



BIBLIOTECA NAZ.
Vittorio Emanuele III

XIV

A

11

NAPOLI

5
x
7









C. 1030

Quasi

as:



EXPOSITIO
B. HUMBERTI
BURGVNDII
GENERALIS V.

Magistri Ordinis Prædicatorum.

SVPER REGVLAM D. AVGVSTINI

Episcopi, ac tria vota substantialia Religionis,
& in eandem quædam brevis enarratio

Hugonis de S. Victore Can. Reg.

*Nunc denuò ad communem religiosorum Fratrum
sub eadem Regula degentium
utilitatem impressa.*

quadr. folio



C O M I,

Typis Hieronymi Frouæ.

M. D C I I.

Superiorum Mandato.



LIBRARY
B. H. W. BERTI
1844
G. 12. 1. 1.

THE
LIBRARY
OF THE
B. H. W. BERTI
1844
G. 12. 1. 1.



1844

THE
LIBRARY
OF THE
B. H. W. BERTI
1844
G. 12. 1. 1.



A D M O D V M

REV. IN CHRISTO

P A T R I B V S, E T

F R A T R I B V S

ORDINIS PRAEDICATORVM,

caterisq; religiosis viris sub D. Augustini

regula Degentibus Salus.



AGNAS, & immortales priscis illis viris gratias habendas censeo, qui bonis artibus, & disciplinis excogitatis, atq; re-
pertis vitam nostram ita excoluerunt, vt rectè,
commodeq; degere possemus, atq; intra
præscriptos humanæ naturæ limites consi-
stentes, legum consilijs admoniti, lunge à

beluarum moribus, cultibusq; ferinis retra-
cti in errores minimè dilaberemur inhuma-
nos. Maiores tamen, ac potius maximas il-
lis habendas haud dubitauerim, qui ea inue-
nerunt, quibus animi nostri quibusdam ve-
luti alis suffulti, & humanam conditionem
transcenderent, & his, quæ terrena, caducaq;
sunt, pro nihilo habitis, ad diuinarum rerum co-
gnitionem euolarent. Inter quos celeberrimus
ille D. Augustinus effulgit, qui sanctissimis An-
gelicè viuendi normis traditis, memorandas
Christo seruatori religiones peperit illarum
prototypus, ex quibus per tempora veluti ab
arundinetis tot B. Patrum animatae scintillæ
ad beatitudinem euolantes emanarunt, quod
omnium nomina recensere si vellem; non
istæ prælo excussæ paginæ comprehende-
rent. Quare vt omnes tanti Doctoris vesti-
gijs inhærentes apertam, & exploratam ha-
beant illius regulam, B. Humberti Paraphra-
sim in eandem luculentissimam, necnon de
tribus essentialibus religionum votis præcla-
ram eiusdem authoris eruditionem edendam
curaui. Hoc autem vnum me impulit: Tum
vt piè amicorum cupiditati, & precibus
obse-

obsequer, qui litteris mihi, & verbis tanti
authoris monimenta affectantes sæpè, ac sæ-
pius inculcare non destiterunt; Tum vt qui-
busdam admodum Reu. Patribus mihi ne-
cessitudinis vinculo deuinctis annuerem:
Tum deniq; vt plurimorum, & Nouitiorum
præcipuè vtilitati consulerem. Illa igitur in
lucem prodeunt, vt diuturna temporis inglu-
uie quasi vorata reuiuiscant; vtq; tandem
velut gemmæ è terrarum visceribus erutæ,
& abstrusis exenteratæ cuniculis, elucescant:
Quæ simul, quantum mihi per tempus licuit,
varijs distracto negotijs, mendis, & errorib-
us, quibus passim perscatebant, expurgari
studui. Itaq; religiosi fratres, qui sub D. Do-
minici, aut cuiusvis alterius vexillo, D. Au-
gustini regulæ innitentes dimicatis, si vos
hanc ob oculos Paraphrasim habeatis, æquè
percipietis, quomodo hostis nequissimi tela
in ipsum retorqueatis iaculantem; quomo-
do vosmet abnegantes Duci vestro subster-
natis; quomodo cupiditates cohibentes mun-
di haud illecebris inhictis: quomodo in sum-
ma rerum omnium egestate nihil habentes
omnibus affluatis: quomodo deniq; nil pro-

prij retinentes Dæmonem ad singularem luctam prouocantes succumbere faciatis. Hæc enim est verè mensa lautissimis quibusuis spiritualibus deliciarum ferculis referta. Hæc verè est Prælatorum Magistra, quæ illos, vt subditos timore retardent, & amore alligant, docet, & erudit. Hæc verè proficientium disciplina, quam qui legendo imbibet, diuinarum rerum amore æstuabit, & accurate si perlustrauerit, maximum sibi fructum in religiosæ vitæ curriculo afferet; simulq; Authoris solertiam, prudentiam, & vigilantiam admirando prædicabit: Vt autem indefessum in litterarum palestra, eiusq; assiduas in studio elucubrationes dignoscatis. Diuinum ipse compilauit officium, quo Prædicatorum Patrum Ordo in hanc vsq; horam vtitur; cui Clemens Quart. Pont. Max. amplissima subscriptionis nota astipulatus est. Insuper in Ordinis nostri constitutiones ornatissimam inceperat explanationem, qua omnes in illis emergentes ambiguitates enodabat; sed illi subscribere haud licuit immatura morte præuento, & à Domino vocato: Extat solummodo in Bibliotheca conuentus nostri

nostri Comensis expositio manu scripta, super Prologo, & Diuini Officij Capitulo, vbi tam lucidè eloquitur, vt nihil inter legendum desiderari queat; quod opus ni mancum, & imperfectum esset, iam excudendum tradidisset: librum edidit pariter, qui Prædicantium summa inscribitur in tres refecata libros. Opus verè mirandum composuit de vita spirituali sex intercisum libris. Prædicatorum Patrum gesta libris quinque compilauit. De officijs Ordinis Fratrum Prædicatorum librum vnum deprompsit. Epistolarum ad diuersos liber vnus legitur. De Crucis prædicatione mira tractauit. Angelicam de contemplationis gradibus scalam condidit. Postremò de veris, & falsis virtutibus sermones habuit doctissimos. Nunc tanti Patris otium in litterarum studio videte: Cuius equidem scripta examinare si velimus, magis hoc laborioso litterarum otio profuit animarum salutis, quàm regimine, calamo magis, quàm virga. Nam calamo dictauit, quicquid lingua annuere possit, & imperare. Ille igitur si loquebatur viuens; nunc scripturarum monumentis loquitur, imperat, & hortatur in Do-

mino obdormiens. Sed (heu proh dolor) cur
edaci tempore omnia voranti opulentissima
huiusce viri scripta propemodum tumulata
obdormiunt? Cur tanti viri sapientia, in re-
gendo prudentia, in corrigendo grauitas, in
erudiendo charitas, & amor, & animi singu-
laria cætera insignia scriptis iam prodita non
elucescunt? Pro nunc quod à tempore corro-
sum eripui, vna cum perbreui Hugonis de S.
Victore Can. Reg. in eandem regulam exa-
ratione accipite. Et interim si flosculos à flo-
rentissimo isto editos viridario colligere veli-
tis, & animæ stemmata componere, florum
virescentium electiones, indice adiecto, facil-
limè colligetis. Quare viretum lustrantes,
florumq; botros carpentes vt animam bono
Christi odore redolentem habeatis, vestra pa-
riter in orationis fragrantia, & sacris in operi-
bus mei mementote, meq; Deo commenda-
te, me amate, & in Domino valete.

Vestrum omnium humillimus

Fr. Petrus Maria Fatig. de Vrgnano
Ord. Præd. Sacræ Theolog. Lector,
ac in Ciuitate Comi Inquisitor.



DE RELIGIOSIS
B. HUMBERTI
EXEMPLIS

Dialogicum Carmen.

Musa refer, queso, Humberti memoranda
Magistri:
Quis fuit hic? M. Speculum. cur? M.
Quia sorde lauat,
Sorde lauat? memora M. scripsit monimenta salutis;
Queis vigilans animus sordida noxa piat. (Christo,
Quis fuit hic? M. Genitor: peperit sacra gemmina
Nunc virgulta rigat stelliferiq; Patris.
Quis fuit hic? M. Miles: pugnans superauit Auernū,
Diuitias spreuit, carnis & illecebras.
Quis fuit hic? M. Sacra legis fuit iste Lichurgus,
Hanc serua, & superum tu athera conspicies.
Quis fuit hic? M. Dux: cœlestem fortemq; Phalangē
Confratrum duxit, tela retorsit onans.
Qui fuit hic? M. Mater: dedit hic lac, pocula, māmās,
Fouit, dum vixit, dumq; quiescit, alit. (naui
Quis fuit hic? M. Palinurus magnam hanc equore
Incolumem duxit, fluctiuomq; mari.
Quis fuit hic? M. lumen cœcas de corde tenebras
Vt pepulit lingua, nunc calamoq; fugat


Quis

*Quis fuit hic? M. tuba: qua reboans toto intonat orbe
Excitat hac Fratres, palma animatq, sono.
Quis nunc est? M. Sydus clarum, sol, cœlica lampas,
Claustreis quæ fulsit, nunc rutilatq, choris.
M. Dicā: Athleta, Parēs: speculū, fuit iste, Lichurgus:
Dux: Mater: Rector: Lux: tuba: Sydus: Amor.
Sat dixti: nō novi tanti memoranda Magistri:
Gratulor ipse tibi: Cœlica musa vale.*





IN LVCULENTISSIMAM
B. HVMBERTI PARAPHRASIM
Super D. Augustini Regula.



C A R M E N.

H V M B E R T I quicumq; cupis monimen-
ta Magistri,
Tu fusò hic strictim carmine pressa leges.
Astriferi si valla petas, te hac Norma Tyronem
Diriget, vt regula dogmata in arte rudes.
Tartareos vitare dolos, compescere luxus,
Auriq; ardentem pellere corde famem.
Mente inhiare sacris, Herebi superare penates
Edocet, & primo subdere colla Patri.
Abdicat ista viros mundo, Cælog; maritat,
Allicit ista animos, acceleratq; Deo.
Hac Duce opes Cresi spernis, nec tolleris vllò
Fastu, nil retinens diceris esse Bias,
Istà rheda est pernix, vehit alta ad cælica Tempe,
Quem terra optasti, tu potiere polis.
Edocet, adducit, franat, compellit, & arcet,
Allicit, & vitat, subdit, amore iubet.
Abdicat, accelerat, libat, dispergit, & optat,
Nil ambit, spernit, nil retinetq; sibi.

Cælo

*Cælo inhiare docet, terret, solatur, adauget,
Euchit ad Superos, inglomeratq; Deo.
Hanc sequere ergo, bono & Christi redolebis odore,
Vt redolet fragrans cespitem nata rosa:
Atq; age, quod dicat, Numenq; litabis honore,
Tu Mactans, Vas, Thus, Victima, & Ara Phani.*

S. B.



IN



IN TRIA ESSENTIALIA
RELIGIONIS VOTA

A B. Humberto elucidata
Præludium.

EN tela, en clamidem, en clipeos, enq;
arma salutis;
Hostes queis vincas, queis subigasq;
tibi.

*Sit sine carne caro pauper, sit mensq; subacta,
Vincitur his mundus, Tartara furua, caro.*

Colla iugo subdas, fati tum munera spernas.

Sitq; tibi cælebs tum sine carne caro.

Tunc subiges mundū, luxus, tunc tartara, manes;

Tunc strophio dignus cælica regna petes.

Victima grata Deo mentis maectata voluntas;

Hostia grata Deo, cum sine carne caro.

Hostes cæde Deo cordis penetrable tenentes

Mundū maecta, & opes immola egenus, inops.

Ara

*Ara Dei sit cor, caleat charitatis in igne :
Hostia diuitia, victima Marte Venus.
Iam pereas mundo, carni, pereatq; voluntas;
Tunc eris Angelicis dignus inesse Choris.
Nudus eris Dives; regnis potiere subactus;
Castus delicijs tuq; fruiere Dei.*

S. B.







EXPOSITIO

B. HUMBERTI SUPER REGVLAM B. AVGVSTINI.



CAPITVLVM PRIMVM.

VIRIS Religiosis non modicum expedit, vt clarè intelligant totam sententiam Regulæ, sub qua viuunt, vt sciant ad quid tenentur ex obligatione professione contracta. Expedit etiam, vt aduertant, quæ rationabiliter sunt in ea tradita, vt ex his maiorem habeant deuotionem ad illam. Insuper quoniam multum prodest eis, vt considerent vtilitatem eorum, quæ continentur in ea, vt libentius ea obseruent. ¶ Proinde, cum Regula Beati Augustini contineat quædam obscura, & quædam valde rationabiliter ordinata, quæ multi non solent aduertere; quoniam multâ etiam eorum, quæ continentur in ea, immo fere omnia sint perutilia, expositio sequens declarat ipsius dubia; elucidat rationem eorum, quæ ibi sunt tradita; Ostendit, quàm vtilia contineantur in ipsa; vt degentes sub illa, & maximè fratres Prædicatores, qui sub ipsa viuere elegerunt, & sciant ad quid obligantur ex illa, & ad scita deuotionem habeant, & ex deuotione huiusmodi diligentius obseruent, quæ continentur in ea, opitulante gratia Iesu Christi.

COMMENDATIO REGVLÆ BEATI
Augustini. Cap. 11.

INter multas, & varias Regulas, sub quibus Religiosi diuersi militant in Ecclesia; Quædam sunt, quas tradiderunt viri, qui Cathalogo Sanctorum non ascribuntur; Aliæ sunt, quas sancti quidam tradiderunt, sed tales, qui non fuerunt eminentes in sapientia; Aliæ vero, quas (& si sancti, vel perfecti in sapientia tradiderunt) tamen non fuerunt multæ auctoritatis. Certum est autem, quod sanctitas in anima viri, plus interdum valet ad proferendum salutare sententias, quàm sapientia. Interdum autem simplicitas, licet sancta, si per sapientiam non dirigatur, minus laudabiliter profert sententiam, sententia vero prolata a sanctitate, & sapientia, quibus deest auctoritas, minus acceptatur.

¶ Quanta ergo, & quali acceptione digna est regula, quæ a viro sanctissimo, sapientissimo, eximie auctoritatis beato S. Augustino, tradita reperitur? Præterea, in principio, cum oriri cœperunt religiones in Ecclesia Dei, fuerunt duo genera religiosorum, scilicet Anachoritæ, siue Solitarij, & Cœnobitæ, scilicet in congregatione viuentes. Post tempus multum beatus Benedictus, cuius regula est in grandi auctoritate in Ecclesia Dei; composuit regulam ad exemplar vitæ Cœnobitarum priorum. Beatus vero Augustinus suam formauit ad exemplar vitæ Apostolicæ. Quis autem dubitet, vitam Apostolicam vitæ cunctorum viuentium præferendam? Antiquitas etiam multum confert ad laudem scripturarum; quia quanto antiquior, & quanto per plurium legentium examen transiens, nec passa calumniam, tanto iudicio plurimum approbatur. Cum ergo regula beati Augustini

stini, non solum modernas regulas, sed etiam regulam beati Benedicti, multis annis præcesserit, & per tot virorum illustrium, & conciliorum iudicia transierit; quis audeat eam amodo calumniari? Præterea multæ sunt regulæ, quæ imponunt multas observantias corporales; Regula vero beati Augustini consistit circa spirituales actiones; ut sunt dilectio Dei, & proximi, unitas cordium, concordia morum, & similia; Quis autem nesciat exercitia spiritualia præcellere exercitationibus corporalibus; sicut spiritus præeminet corpori, & lex spiritualis legi carnali? ¶ Nota, quòd religionis status est degentium in se, vel in Deo, & requiruntur in ea quædam pertinentia ad statum congregatorum, circa quem tradit mandata octo. Primum propter quod &c. Item est status agentium pœnitentiam, ideo dicit, (orationibus instate.) Item est status excellentis honestatis; & ideo dicit, (non sit notabilis &c.) Item est status subuenientium multis necessitatibus, ideo dicit, (Vestres vestras.) Item est status spiritualis fraternitatis; ideo dicit, (Lites aut nullas, &c.) Item est status subiectionis; ideo dicit, (Præposito tanquam patri, &c.)

*PRAEDICATIO MAGIS COMPETIT
religioso . Cap. III.*

STatus Religiosus magis competit prædicatori, quàm sæculari. Primo quia est excellentior; sicut autem prædicatoris est in alto stare cum prædicat; ita & altus status, iuxta illud Esa. 40. Super montem excelsum ascende tu, qui evangelizas Sion. Secundo, quia prædicatoris est non solum præcepta, sed & consilia prædicare. Quo-

modo autem crederet aliquis de consilijs illi, qui illa renuit accipere sibi? potius videtur, quod illa reddantur alijs suspecta, cum ipse nolit ea sibi, & pos-
sunt dicere ei, quod dictum est de phariseis: Di-
cunt, & non faciunt; nec sequuntur exemplum il-
lius, qui cepit facere, & docere. Tertio quia oportet
prædicare non solum bonis, sed etiam perfectis, &
mundanis, & mundum contemnētibz, carnalibus,
& spiritualibus, utentibus voluntate propria, &
non utentibus, Quis autem dubitet, quin magis
competat illi, in quo plura signa maiorum bono-
rum apparent, prædicare illis, qui sunt in maioribus
bonis, quàm illi, in quo non apparent huiusmodi si-
gna? Quarto, quia status religionis est status con-
templationis, ea vero, quæ prædicantur, maximè col-
liguntur in contemplatione. Vnde Greg. In con-
templatione hauriunt, quod postmodum in prædi-
catione effundunt. Quinto, quia homini, qui
est in sua libertate, timendum est de præsumptione;
si sit facilis ad prædicandum; si vero sit tardus, ti-
mendum est ei de negligentia; magis ergo expedit
alieno imperio prædicare, quàm proprio motu; Ro.
x. Quomodo prædicabunt, nisi mittantur? quis au-
tem magis tenet statum nunciij, quàm religiosus; cui
dicitur: Vade, & vadit: veni, & venit? Sexto
quia in executione officij prædicationis, de facili,
& in multis contingit offendere, propter quod fru-
ctus prædicationis impeditur; expedit ergo præ-
dicatorem habere correptorem; vnde dominus
misit discipulos binos, ut vnus corrigeretur per
aliū; nec debet odisse correctionis disciplinam,
qui alijs enarrat Dei iustitiam.

D. AVGVSTINI.
REGVLA BEATI AVG. MAGIS
competit predicatoribus . Cap. IIII.

INter regulas approbatas regula Aug. magis conuenit prædicatoribus. Primo, quia prædicatores debent esse viri litterati, quòd inténdit Aug. in regula. id.

Codices certa hora singulis diebus pe.

Vult ergo discipulos adeo studiosos esse, quod nulla dies prætereat, quin codices reuoluántur. Secundo quia beatus Dominicus pater fratrum prædicatorum profectum in omni bono, & fructum circa salutem animarum acquisiuit sub ista regula. Tertio cum regula beati Augustini deducta sit tanquàm ab exemplari a vita apostolica, quam prædicatores omnes summæ debent imitari. Quarto quia instituendo nouum ordinem prædicatorum oportuit aliqua noua condere instituta, vt circa studiũ, paupertatem, & huiusmodi; Oportuit ergo talem eligere regulam, quæ non haberet aliqua, quæ contrariarentur huiusmodi statuendis, sed talis esset, cui huiusmodi couenienter aptarentur.

STATVS PAUPERATIS MAGIS
competit predicatoribus . Cap. V.

Licet regula beati Aug. permittat habere possessiones, tamen melius fuit prædicatoribus his carere, quia multo plus competit prædicatio euangelica pauperi voluntario, quàm diuiti. Primo quia prædicatori euangelij incumbit prædicare Christum pauperem, & euangelicam paupertatem; quis autem dubitet, quin huiusmodi prædicatio maiorem effectum habeat, & magis deceat in ore

pauperis, quàm diuitis? Secundo quia melius est prædicatoribus vitam excellentioris prædicatoris imitari, vt fuerunt Apostoli pauperissimam vitam ducentes in prædicatione. Tercio quia temporalia multum occupant, & inducunt sollicitudinem, propter quod dominus volens prædicatorem esse vacuum ab omni occupatione ipsum impediens, dixit discipulis suis; Neminem in via salutandum; Et Paulus, ne traheretur a prædicatione, cessabat a baptizando; Vnde quidam zelator animarum, cum multo tempore prædicasset in tanta humilitate, quòd nolebat ducere nisi asinum, tandem expertus, quòd cura, & sollicitudo, quam habebat de asino, modo cogitando quid comederet, modo ne eum amitteret, modo ne malè custodiretur, dimisit ipsum, & posuit se ad iter pedibus conficiendum, vt eius animus liberius vacaret prædicationi. Quarto quia prædicatoris est, non solum in locis populosis, sed etiam in locis modicis pauperibus prædicare exemplo illius, qui circumibat castella docens; quo modo autem possunt hoc implere diuites, qui ducunt equos, & familiam? Quinto quia fructus prædicationis colligitur in confessionibus, & consilijs animarum; & ideo talem expedit esse prædicatorem, ad quem fiducialiter accedant omnes pro huiusmodi; certum est autem, quod personæ pauperes audacius accedunt ad uirum pauperem; & in habitu humili, quàm ad diuitem, & in habitu glorioso; quia animalia ad sibi simile facile sociantur; immo etiam diuites, & nobiles laici, & litterati facilius committunt animarum suarum secreta pauperibus, quàm diuitibus.

DE EXPOSITIONE TITVLI.

Cap. VI.

Quia dicitur in fine regula, (Vt autem uos in libello hoc, tanquam in speculo, possitis inspicere,) putauerunt quidam, quod regula Agu. esset ille liber, qui dicitur speculum Augustini; & ideo dixerunt in titulo, Incipit speculum Augustini, sed hoc est erroneum, speculum enim est liber, in quo recolligit August. mandata Dei, qui dicitur speculum, quia in eo legendo potest quilibet uidere quantum profecerit, uel quid ei desit; posset tamen dici, quod, sicut duplex est speculum, scilicet generale, quod quandoquē ponitur in Aula communi, in quo respiciunt omnes, & speciale, quod ponitur in camera, in quo domina se respicit, ita est duplex opus Augustini, scilicet liber supradictus, qui pertinet ad communes, & alter ad solos religiosos.

QVARE HOC OPVS DICITVR

regula. Cap. VII.

Dicitur hoc opus regula dupliciter; Regula enim uno modo dicitur a rectitudine, quasi rectula, sicut est illa, qua utuntur scriptores, & lignarij, & cœmentarij, Alio modo dicitur a regendo, ut in grammatica, & in alijs scientijs; iuxta primum modum dicitur hoc opus regula, quia sicut per regulam distorta diriguntur, sic per hoc opus distortæ uitæ diriguntur; Item sicut per illā gibbi remouentur; ut patet in cœmentario, sic per istam superbix, & superfluitates complanantur; Item per regulam, res quadrantur, ut lapides redduntur qua-

terni opere quadro; Sic per istud opus fiunt homines quadrati in virtutibus Cardinalibus, ut sint aptiores ædificio cœlesti; Item habilitantur res diuersæ, ut fiant aptæ coniunctioni in vnum, ut patet in cæmentarijs, sic per istud opus fiunt diuersi vnū in Domino; Item per regulæ applicationem relinquuntur in pergameno diuersæ lineæ rectæ, & multæ, sic per istud diuersæ virtutes in hominē, quæ nihil aliud sunt, quàm lineæ rectæ, quia virtus est qualitas mentis, qua rectè viuitur, vnde omnis virtus est quædam rectitudo; Item sicut scriptor, qui de regula non curat, frequenter distortè scribit, sic discipuli August. regulam negligentes distortè viuunt, qui autem secundum eam diriguntur rectissimè viuunt; Item sicut ex applicatione regulæ quandoquæ res, quæ videbatur recta, apparet distorta, vel gibbosa, quæ apparebat plana, sic proculdubio, si diligenter Vita multorum sub hac regula degentium ipsi regulæ conferatur, apparebit distorta, plusquàm antea crederetur; Secundo etiam modo potest dici regula, quia sicut regula in sanctis docet artem sciendi, sic istud opus artem viuendi; & sicut per regulam regit se quis in scientia, ita per hoc opus in vita; & sicut habet regula exceptionem, ita regula recipit dispensationem.

— 213 —

Cap. VIIII.

ANte omnia, fratres charissimi, diligatur Deus; deinde proximus; quia ista præcepta sunt principaliter nobis data.

Quia mandata Dei non sunt relinquenda propter mandata hominum, immo super illa debent omnia alia fundari, quia sine illis ista nihil prosunt; ideo

Aug.

Aug. ante omnia mandata sua præponit Dei mandata; Quia vero plenitudo legis est dilectio charitatis ad Deum, & proximum; ideo non ponit mandata singula vitans prolixitatem, sed hoc solum, in quo omnia alia complentur; & quamuis omni homini necessaria sit charitas; tamen specialius prædicatori. Si enim linguis hominum loquatur, & angelorum; charitatem autem non habeat, factus est velut æs sonans, aut cymbalum tinniens, quod alijs prodest eos vocans, sibi vero nocet seipsum confringens. Quid autem prodest homini, si totum mundum lucretur, detrimentum autem suum faciat? Item predicatoris interest instructum esse, & maxime de necessarijs ad salutem, iuxta quod dicitur de Iohanne Luc. 1. Ad dandam scientiam salutis plebi eius; Certum est autem, quod interdum, ubi deest scientia alia, charitas instruit de his plenè, primæ Io. 1. Vnctio id est charitas docet vos de omnibus, scilicet necessarijs ad salutem. Item utilius est in prædicatore incendere, quam instruere; sed certè qui non ardet, non incendit, quia charitas inflammat verba, & facit, ut facula. Item in prædicatore grande vitium est torpor, vel pigritia; Charitas autem non solum sollicitat prædicatorem, sed etiam compellit. 1. Cor. 5. Charitas Christi urget nos. Item quia charitas non quærit, quæ sua sunt, sed quæ Iesu Christi.

Cap. IX.

Hæc igitur sunt, quæ, ut obseruetis, præcipimus, in monasterio constituti.

Traditis mandatis Dei, tradit mandata sua. Quidam hic incipiunt regulam, nec habent præceden-

ria mandata; & hoc accidit ex eo, quòd Augustinus, scribens quibusdam mulieribus suæ diœcesis religiosiis inserit in fine Epistolæ regulam istam, quam tradidit eis obseruandam, incipiens ita (Hæc igitur sunt;) In regula autem, quam tradit viris, proponit ante istud duo mandata charitatis, & incipit ita (Ante omnia fratres &c.) Quare autem in regula mulierum non præmisit duo mandata de dilectione? Dici potest, quòd in muliere amor spiritualis de facili degenerat in carnalem, & ideo timens dare huic degenerationi occasionem, noluit eis aliud imponere de dilectione proximi.

Cap. X.

Vtrum omnia, quæ continentur in regula, sint in præcepto. Videtur quòd sic. Constat enim, quòd hoc pronomen (hæc) demonstrat omnia, quæ sunt in regula, & de his dicit, (præcipimus.) Contra. Sequitur, quòd professor regulæ peccat mortaliter, quando cumquæ facit contra aliquid, quod sit in regula, ergo si non domat carnem suam ieiunijs, abstinentia escæ, & potus, quantum valetudo permittit, vel si non versatur in corde, quod profert, quando psallit, & similibus, peccat mortaliter. Ad hoc dicunt quidam, quòd hæc dictio (hæc) cum sit demonstratiua rei propositæ, non demonstrat ibi nisi duo mandata proposita, scilicet de vnitæte cordium, & de communitate rerum, & hæc duo solum sunt in præcepto in tota regula. Sed, si hoc esset verum, sequeretur, quòd illud, quod remotè dicitur; præposito tanquàm patri obediatur, non esset in præcepto, quod constat esse falsum. Ideo dicunt alij, quòd omnia sunt in præcepto, sed cum præcepta

præcepta affirmatiua non ligent ad semper, non est
necesse, quod peccet mortaliter professor regulæ,
quandocunque non implet omnia, quæ ibi dicun-
tur. Sed si hoc esset verum, sequeretur saltem in
negatiuis, quæ obligât ad semper, quodd, quicunque
contrafaceret, peccaret mortaliter; ergo quicunque
in Oratorio faceret aliquid, quàm illud ad quod fa-
ctum est, vel quicunque iret sine socio, & simili-
bus, peccaret mortaliter, quod dicere est crudelitas.
Ideo dicunt alij, quod etsi omnia præcipiat Augu-
tamen professor regulæ illius non peccat mortaliter
contrafaciendo, quia promittit non obedientiam,
Augustino, sed prælato. Sed secundum hoc nullus
mortaliter peccaret faciendo contra aliquid, quod
sit in regula, nisi quando supra verba Augustini ad-
deretur præceptum prælati, quod manifestè fal-
sum est; Ideo dicunt alij, quod regula est tota in præ-
cepto, non tamen singulis, sed professoribus omni-
bus, insimul in eadem domo existentibus; sicut si
pater familias præciperet toti familiæ, vt purgarent
tali die talem campum totum, præciperet omnibus
insimul; non singulis, & sufficeret, quodd vnus face-
ret vnâ partem, alius aliam, dummodo totum fie-
ret ab omnibus insimul; Ita etiam impletur præce-
ptum de tota regula seruanda, quando in eodem
conuentu seruatur totum, licet non quilibet totum
impleat. Sed secundum hoc sufficeret, quodd in eo-
dem conuentu aliqui seruarent abstinentiam, alius
faceret orationes, alius portaret habitum debitum,
& sic de alijs dummodo seruaretur, quod est ridi-
culum dicere. Ideo dicunt alij, quod obseruantia
regulæ est in præcepto, sed non singula, quæ
continentur in regula, sunt sub præcepto, sicut non
singula, quæ exprimuntur in Euangelio. Sed hoc
iterum

iterum videtur minus benè dictum; Cum enim dicitur (Hæc sunt, quæ, vt obseruetis, præcipimus.) Hoc pronomèn (hæc) cum sit discretiuum, potius demonstrat singula mandata, quàm mandata in genere, & ita potius præcipitur obseruantia singulorum, quàm obseruantia in genere; ideo, reprobatis prædictis responsionibus, dicendum est, quòd quædam reperiuntur in verbis diuinis, quæ habent in se modum, & intentionem præcepti, vt est illud, vt diligatis inuicem, sicut dilexi vos; quædam vero, quæ habent præceptum in intentione, quamuis non in modo, vt est illud, Non furtum facies; quædam autem habent modum præcepti, sed non intentionem, vt est illud de sanatione surdi, & muti Matth. 7. Præcepit eis, ne cui dicerent; Quis enim audeat dicere, quod intenderet eos dominus per hoc ligare ad mortale, & quod peccassent mortaliter prædicando? Et tale est istud; non enim est probabile, quòd vir tam sapiens, etsi per modum præcipiendi loquatur, intenderet omnia ponere sub præcepto, & tantam damnationis materiã ministraret accedentibus ad regulam suam pro salute quærenda. ¶ Sed oritur ex hoc quæstio. Quare posuit verbum præcipiendi, ex quo non intendit præcipere? Ex hoc enim, quod sic loquitur, videtur ministrare occasionem scrupulorum multorum. Respondetur, licet non intendat omnia ponere sub præcepto, tamen suæ intentionis est, quòd multum vult omnia seruari; ad expressionem ergo suæ voluntatis vtitur verbo præceptorio, potius quàm alio verbo simplici, ne daretur ex tenui modo loquendi pigritiæ humanæ occasio minus curandi de mandatis regulæ. Et est simile in Euangelio Marci. 6. Præcepit eis, ne quid tollerent

in via, nisi virgam tantum. ¶ Sed iterum surgit alia quæstio; Si enim verbum (præcipimus) non importat veritatem præcepti, sed solum intentionem voluntatis, ergo nullum præceptum est in regula. Respondeo, verum est, quod nullum præceptum est in regula ex virtute huius verbi; sed multa sunt in intentione, quamvis non secundum expressionem in modo loquendi; sicut diuina scriptura cum nobis loquitur eodem modo, tamen quædam reputantur simplices exhortationes, quædam præcepta; sicut Luc. 7. cum dicitur; Si quis percusserit te in vnam maxillam, præbe ei & alteram, reputatur consilium; & cum dicitur in eodem capitulo, Mutuum date nihil inde sperantes, licet sit idem modus loquendi, tamen reputatur præceptum. ¶ Si vero quærat, quomodo possunt hæc cognosci, Respondeo, per rationem; ratio enim benè disposita potest de facili iudicare, quod vir sapiens intendit obligare professores suæ regulæ ad ea, quæ pertinent ad obedientiam, ad castitatem, ad humilitatem, & similia, non autem æque ad ea, quæ pertinent ad vltimam domationem carnis, vel cauendū omnem notabilitatem in omni motu, gestu, & similia. Sicut ergo in sacris scripturis per rationem, & doctrinam sapiētium docemur, quæ sunt præcepta, & quæ cōsilia, vel exhortationes simplices, vbi scriptura loquitur vniiformiter, ita in hoc opere. Patet igitur ex prædictis, quod modus tradendi mandata huius regulæ, licet secundū verba præceptorius videatur, tamen secundum intentionem non est præceptorius vniuersaliter. ¶ Quid est, quod dicitur (obseruetis in monasterio constituti.) Numquid extra monasterium non sunt hæc obseruanda? Respondeo. Quædam sunt, quæ dependent a loco, vt peti-

rio codicum, & huiusmodi, & ad hæc non tenetur aliquis extra monasterium; Alia sunt, quæ non dependent ex loco, vt habitus, honestas, & huiusmodi, & hæc ubique sunt seruanda.

Cap. XI.

Primum propter quod in unum estis congregati, vt unanimis habitetis in domo, & sit vobis anima vna, & cor vnum in Deo) Excellentior est vita Cœnobarum, quàm Anachoritarum.

In premio post mortem.

In securitate in morte.

In emolumento multiplici in vita.

¶ Propter primum dicitur in vitispatrum, quòd cum essent ostensi quattuor ordines in cælo cuidam viro sancto, scilicet infirmantium, & gratias agentium, seruientium infirmis, solitiorum, & viuentium in congregatione sub obedientia; quartus apparuit sublimior, eo quod alij omnes faciunt secundum propriam voluntatem, isti autem secundum voluntatem alterius; vnde, & de Christo dicitur ad Philipen. 2. factus est obediens vsquè ad mortem, propter quod, & Deus ex. illum; &c. Propter secundum dicitur de quodam hæremita, qui, Deo reuelante, cognita morte, accessit ad Cœnobium, vt securius transiret transitum periculosum in necessitate. Propter tertium, dicitur Ecclesiastici 4. Melius est duos esse simul, quàm vnum, habent enim emolumentum societatis suæ. Primum emolumentum societatis æquisitio; Si enim tanta est virtus societatis cum muliere fidei, quòd sanctificatur vir infidelis per mulierem fidelem; primæ Cor. 7. Quantò magis sanctificatur quis ex socie-

tate

rate multorum bonorum? Psalmus, cum sancto sanctus eris. Secundū sancta in bono calefactio, sicut carbo frigidus ab ardente; Eccles. 4. vnus quomodo calefiet? Et si fuerint duo fouebuntur mutuo. Tertium corroboratio; Prouer. 18. Frater, qui iuuatur a fratre, quasi ciuitas firma, vbi murus murum corroborat, & turris turrim. Quartum cadentis subleuatio; Ecclesiast. 4. Si vnus ceciderit ab altero fulcietur, ueh soli, quia cum ceciderit, nō habet subleuantem. Quintum hostium impugnatio; ibidem; Et si quispiam præualuerit contra unum, duo resistent ei. Sextum delicti indulgentia; Gen. 18. Si inuenero in Sodomis quinquaginta iustos, dimittam omni loco propter eos. Septimum præsentia Christi per gratiam; Matth. 18. vbi duo, vel tres congregati fuerint in nomine meo, in medio eorum sum, scilicet per aliquem effectum gratiæ. Octauum precum exaudirio; Matth. 18. Si duo ex vobis consenserint super terram, de omni re quacumque petierint, fiet illis a patre meo; quia multitudo obtinet, quod non obtinet solus.

QVAE SOLENT TURBARE

unitatem. Cap. XII.

VNitatem spiritus solent multa turbare. Primum sensus abundantia, cum alius dicit sic, alius aliter; contra quos dicit Apostolus, Obsecro, vt id ipsum dicatis omnes; & non sint in vobis scissmata; id est diuisiones. Secundum est sapientiæ diuersitas; cum enim alij sapientiam æternam accipiunt, & secundum eam ambulant, & diriguntur; alij vero sapientiam mundi, carnis, uel diaboli, fir diuisio, & turbatur unitas prædicta, contra hoc dicit Apostolus, Idem sapite, id est eandem sapientiam habete.

habete. Tertium est amor singularis ad alterum; hac enim occasione frequenter disiungitur quis ab alijs, contra hos dicit Apostolus, Eandem charitatem habentes, hoc est dilectionem communem, Quartum est amor propriæ commoditatis; cum enim non quærantur communiter ab omnibus, quæ sunt Iesu Christi, sed quærit iste, quod suum est, & ille similiter, oritur diuisio, contra quos Apostolus dicit, Nemo, quod suum est, quærat. Quintum est obstinatio voluntaris, cum aliquis induci non potest ad acquiescendum alijs, contra quem dicitur in Psalmis, In domo Dei ambulauimus cum consensu; cum consensu enim ambulant, qui sibi facile mutuo acquiescunt, & hoc multum facit ad cordium vnitatem. Sextum est auersio à voluntate diuina; cum enim ipsa sit vna, qui adherent, vnius sunt voluntatis, & qui auertuntur ab ea, feruntur in diuersa; ideo inquirenda est voluntas Dei secundum Apostolum, & facienda, prout petitur in oratione Dominica, cum dicitur, Fiat voluntas tua. ¶ Sed notandum, quod postquam dixit.

Vt vnanimes habitetis in domo, subiunxit (Et sit vobis anima vna, & cor vnum in Deo.)

Errant enim quidam, qui conueniunt in his, quæ sunt mundi, carnis, vel diaboli vnanimiter, quæ vnititas non est laudanda, sed perniciofa; Greg. super illo verbo Iob. 12. Membra carnum eius cohærentia sibi, sicut perniciosum est, si desit vnititas bonis, sic perniciosum est, si non desit malis. Tria autem mala sequuntur ex huiusmodi vnitatem. Primum est in corrigibilitas; Greg. in mora, Qui diuisi corrigi poterant, iniquitatum suarum pertinacia vniti durant. Secundum est audacia in malicia; Actum. 7. Impetum fecerunt vnanimiter in eum; Greg. Peruersos

uersos vnitas roborat, dum eos concordat. Tertium, durior persecutio bonorum. Greg. in mora. Reproborum vnitas; bonorum vitam tanto durius premit, quanto se ei per collectionem durior opponit; ista vnitas in Deo non est, sed potius contra Deum. Vnde Iosue 9. Congregati sunt, vt pugnarent contra Iosue, idest Christum; Interdum corde, Psalmus, Cogitauerunt vnanimiter simul aduersum te; Aliquando ore; psalmus, Aperuerunt super me os suum; Aliquando opere; Actu. 4. Conuenerunt in ciuitate ista aduersus puerum tuum Iesum, quem vnixisti, Herodes, & Pilatus cum gentibus, & populis Israel facere, quæ manus tua, & consilium tuum decreuerunt. Ista societas non est sequenda, sed fugienda. Genes. 18. In consilium eorum non veniat anima mea, & in cætu eorum non sit gloria mea. Sed sunt alij, qui, licet non sint in vnitate cum malis, non tamen habent cor vnum in Deo cum alijs, quia resistunt bono, & opponunt se reformationibus, restrictionibus, nouis constitutionibus, & similibus, quæ valent ad boni promotionem, iuxta illud Act. 7. Dura ceruice vos semper Spiritui sancto resististis; Spiritui enim sancto resistit, qui bonum quodcumq; a Spiritu sancto est impedit; Contra quos dicitur de sapiente, Iaco. 4. Bonis consentiens. Sed sunt alij, qui tanta amicitia adherent aliquibus, quod semper, & in bono, & in malo adherent eis. Sed hæc est amicitia secularis, & falsa; quia secundum Tullium hæc lex est in amicitia uera, vt numquam turpe quid rogemus, nec rogati faciamus; propter hoc, sicut dicitur in Valerio maximo, cum quidam rogaret quendam amicum suum, vt faceret quoddam inhonestum pro eo, & ille responderet, quod non poterat, quia erat

inhonestum, & rogans diceret, quid mihi prodest amicitia tua, si pro me non faceres nisi honestum, ille respōdit, immo quid mihi valeret amicitia tua, si pro te facerem inhonestum? Numquā adhaerendum est alicui, quod eum sequamur in malo in amicitia, & qui contra faciunt, non habent cor vnum cum alijs in Deo solo; quia habent, & in bono, & in malo cor vnum cum alijs. Prouidendum igitur est volenti seruare mandatum de vnitatem cordis in Deo, ne conueniat cum alijs in malo, vt faciunt primi, ne discedat ab alijs in bono, vt faciunt secundi, ne consentiat cum aliquo cōmuniter in bono, & in malo, sicut tertij; sed solum in his quæ Dei sunt. Hæc est enim vnitas, quæ hic mandatur, vt fides, oratio, prædicatio, studium, ædificatio proximi, promotio ordinis, & similia. Quia vero in congregatione religiosa, non tantum vnitas animorum, sed etiam rerum communitas inueniri debet, Subiungit. ¶ *Et non dicatis aliquid proprium; sed sine vobis omnia communia.*

DE LAUDE COMMVNITATIS.

Cap. XIII.

Circa communitatem notanda sunt quinque. Primo de laude status huiusmodi. Secundo de fructu. Tertio de occasionibus proprietatis, & de remedijs. Quarto de persecutione huius vitij. Quinto de quibusdā dubitabilibus circa proprietatem.

Cap. XIII.

Circa primum nota, quod in statu naturæ, ante peccatum erant omnia communia; vnde Isid.

ius

ius naturale, communis omnium possessio, dist. 1. Item, in primordijs status gratiæ, Act. 4. erant illis omnia communia, Item in statu futura gloriæ, Beda super prædicto verbo, qui ita viuunt, vt sint omnia communia in domo, Cænobitæ vocantur; quæ vita tanto scælicior est, quantum statum futurum imitatur, in quo erunt omnia communia. Cum ergo reperiri non possit melior status naturæ, statu ante peccatum, nec gratiæ melior primitiuo, nec gloriæ futuro; quàm scælix est ille status, qui tales status naturæ, gratiæ, & gloriæ imitatur.

Cap. XV.

CIrca secundum nota, quòd proprietas frequenter est occasio turbationis cum proximo. Seneca. Quietissimè homines viuerent, si tollerentur hæc duo pro nomina, meum, & tuum. Res enim communes nunquàm sunt materia litis. Sed cum ex concupiscentia vult sibi appropriare quis, surgunt frequenter turbationes, vel cum haberi non possunt, vel cum habitæ auferuntur, & impletur illud Prouer. 15. Conturbat domum suam, qui sectatur auaritiā. s. ptoprietatis. Secundo dat occasionem victoriæ inimico, quia per proprium potest eum inimicus tenere, sicut tenetur quis ab aduersario per vestem; Vnde in vitis patrum, cum quidam frater venisset ad senem volens relinquere sæculum, sed retinere aliqua modica propter necessitatem, dixit ei senex, vade ad macellum, & eme carnes, & pone super dorsum tuum, & sic veni ad me, quo facto inuaserunt eum canes, & occasione carnum lacerauerunt eum; Et dixit senex; sic dilaniantur a dæmonibus, qui abrenunciantes sæculo aliquid

retinent sibi. Tertio impedit animum ab alijs, vbi est enim thesaurus hominis, ibi est & cor eius, vnde, vt supra dictum est, quidam asinum dimisit, ne distraheretur.

Cap. XVI.

Circa tertium nota, quòd tria dant occasionem proprietatis. Primum est indigentia; magis enim eligunt aliqui aliquid habere cum peccato, quàm indigere, contra hoc est duplex remedium, vnum est liberalitas prælatorum, vt liberaliter ad ministrent de communi, & tollatur occasio huiusmodi; Actu. 4. Diuidebatur singulis, sicut cuiquè opus erat; & in eodem, nec quisquè egens erat inter illos. Aliud est patientia subditorum; sunt enim quidam secundum Gre. qui pauperes esse volunt, sed sine defectu; non sicut Apostolus, qui dicit, Scio abundare, & penuriam pati. O quot penurias sustinuit in victu, & vestitu, qui dicit 2. Cor. 11. In fame, & siti, in ieiunijs multis, in frigore, & nuditate. Huius ergo exemplo, maximè qui alijs prædicant pœnitentiã, patienter ferre debent indigentias; Psalmus, Bene patientes erunt, vt annuncient. Secundum est diffidentia de prouidentia diuina; sunt enim quidam, quibus quamuis nihil desit, tamen semper timent in futuro sibi deesse. Remedium huius est confortatio dominica, quam facit verbo, & exemplo, siue promissione, & ratione; Verbo, cum dicit, primum quærite regnum Dei, & iustitiam eius, & hæc omnia adiicientur vobis; Exemplo, cum dicit, considerate volatilia cæli, non laborant, neque nent, & pater vester cœlestis pascit ea, quanto magis vos modica fidei? Et
in maximè

maximè prædicator es possunt habere istā fiduciam, qui suam, & aliorum salutem procurant. Beda, Tanta prædicatori in Deo debet esse fiducia, vt præsentis vitæ necessaria, quamuis non præuideat, tamen sibi non deesse certissime sciat. Tertium est carnalitas; sunt enim adeo aliqui circa curam carnis intenti, in cibis, & vestibus, quod non sunt contenti necessarijs, quæ eis competenter ministrantur, & ideo inordinate procurant alia ad satisfaciendum carnalitati suæ; contra quos Apostolus, Carnis curam ne feceritis in desiderijs. Remedium huius, consideratio finis, ad quem ducit huiusmodi carnalitas. Apostolus, Si secundum carnem vixeritis, moriemini; maximè autem prædicatori cauenda est huiusmodi carnalitas. Apostolus, Castigo corpus meum, & in seruitutem redigo; ne fortè cum alijs prædicauero, ipse reprobus efficiar,

Cap. XVII.

Circa quartum, nota, quod tria sunt genera peccatorum, quæ magis sunt persequenda. Vnum est peccatum contra rem publicam, sicut furtum, & similia; per quæ læditur proximus, Et ideo contra hoc dictum est, Exo. 23. Maleficos non patiaris viuere. Aliud est peccatum, quod habet plures occasiones excusationis; aliter enim, si cessaret persecutio peccatorum, iam non reputarentur peccata, & facile committerentur ab omnibus, & infiniti damnarentur, & ideo Ecclesia vsuram, quæ huiusmodi peccatum est, incessanter persequitur. Prover. 26. Responde stulto iuxta stultitiam suam, ne sibi sapiens videatur. Si enim Ecclesia huiusmodi stultis vsurarijs, qui non reputant vsu-

ram peccatum, non responderet per penas, per prædicatores abhominantes eosdem, iam sapienter sentire viderentur. Aliud est peccatum, quod habet continuitatem, sicut concubinatus; huiusmodi enim peccatum facientes, sunt in malo proposito continuè, & ideo grauius peccant. Vnde in decretis, Peccata tanto grauiora sunt, quanto diutius obligatam tenent animam infœlicem. Et ideo ecclesia frequenter concubenarios persequitur exemplo Pauli, qui fornicatorem frequenter tradidit sathanae, non solum propter magnitudinem sceleris, sed propter continuitatem. Vnde dicitur de illo, quod uxorem patris habebat, sicut suam; Et exemplo Iohannis, qui dixit, Mar. 6. Herodi, non licet tibi habere uxorem fratris tui. Constat autem, quod in peccato proprietatis, illæ tres causæ concurrunt; est enim contra rem publicam, quia de communi facit proprium; & videtur quasi non esse peccatum, propter occasiones cuiusdā necessitatis, quæ ad hoc inducunt; ipsum non cōtinere dēinet proprietariū, quia de vitio carnis, vel inobedientiæ, & huiusmodi cito resurgit quis, sed in isto inuolutus continuo moratur in eo. Quanto ergo sancta religio debet p̄sequi peccatum huiusmodi, habens triplicem circumstantiam prædictam, quarum quælibet sola facit omne peccatum, in quo reperitur sic odio sum, vt sine simulatione zelus sanctus in ipsum debeat exerceri. Narrat autem huiusmodi persecutionis, & p̄uisionis exemplum Grego. 4. dialogorum, qui præcepit proprietarium sepeliri in sterquilinio, dicentibus fratribus omnibus, Pecunia tua tecum sit in perditionem, & projicientibus tres aureos, quos fuerat inuentos habere, cum eo in sepulchro. Dant exemplum etiam ipsi fundatores ecclesiæ

ecclesiæ primitiua; quod enim peccatum grauius est punitum in ecclesia primitiua, quàm peccatum Ananiæ, & Saphiræ, qui de eo, quod commune esse debebat, sibi modicum aliquid retinentes, ad verbum. B. Petri, morte subita sunt perempti, Et factus est timor magnus in vniuersa ecclesia, Act. 5. Datur etiam exemplum de Achor, qui furatus fuerat de anathemate Hierico, & propterea fuit lapidatus, & omnia, quæ eius erant, consumpta fuerunt igne, Iosua. 7. Non est ergo huiusmodi peccatum dissimulandum, nec parcendum talibus, quia nec Deus parcat eisdem. Vnde monacho habenti proprium negabit Deus suum proprium, quod est misereri, & parcere.

Cyp. XVIII.

1 **C**irca quintum quæritur, vtrum possit prælatus dispensare cū subdito super proprio habendo? R. quod non, quamtecumque sit auctoritatis, nec etiam Papa; extra de statu monachum ad monasterium, vbi sic dicitur, Non æstimet abbas, quod super habenda proprietate possit cum aliquo monacho dispensare; & quia abdicatio proprietatis, sicut custodia castitatis, adeo est annexa regulæ monachorum, vt contra eam, nec summus Pontifex possit licentiam indulgere.

2 Virum cum religioso, possit dispensari circa vsum rei. R. duplex est vsus, certus, qui non potest auferri, & incertus, qui est in voluntate alterius, vt auferatur, cum ei placuerit. § Circa primum non potest dispensari; semper enim debet esse voluntas religiosi subiecta prælato, vt resignet, quando voluerit. Circa incertum potest ex causa

rationabili : sed quæ vocabitur causa rationabilis ?
 R. duplex potest esse causa dispensandi in his, scilicet necessitas, & vtilitas. Prima potest esse duplex, scilicet priuata, & communis. Priuata, cum concedit alicui in monasterio pauperi, in quo de communi non possumus habere necessaria, vt aliquid habeat ad vsum necessitatis suæ, cum proposito tamen resignandi semper, cum fuerit requisitus. Communis, vt cum conceditur alicui officiali communi aliquid ad expendendum in vsus, & necessitates aliorum. ¶ Vtilitas similiter potest esse duplex, Priuata, cum conceditur alicui liber ad discendum aliquas orationes, vel ad informandum animum suum in his, quæ pertinent ad salutem, licet non habeat gratiam docendi alios ; Communis, cum conceditur alicui liber, qui potest ex studio suo alijs prodesse : licet autem huiusmodi necessitates, & vtilitates sint interdum causa sufficiens dispensandi, tamen non omnis necessitas, & utilitas sufficit, nisi sit ualde rationabilis ; & manifesta ; ut sunt in necessitatibus quotidianis, quæ pertinent ad victum, & uestitum ; & est ualde cauendum, ne in huiusmodi facile dispensetur propter speciem mali ; quandoquæ enim, & si subsit aliqua causa, tamen species mali remanet ibi ; Item propter conscientiæ periculum, facile enim fingitur causa, ubi non est, & mentitur iniquitas sibi petens huiusmodi dispensationem ; Item propter sequelam trahitur enim dispensatio, quæ fit cum uno ex causa bona, de facili ad consequentiam in altero, in quo non subest eadem causa. Sed esto, quod dispensetur cum aliquo circa usum rei incertum sine causa : nunquid excusatur a initio proprietatis, si habet animum resignandi cum fuerit requisitus ? R. Excusatur a proprietate,

prietate, sed non a peccato; quia in dispensante est abusus potestatis, quæ data non est in destructione, sed in ædificationem, in recipiente est avaritia, cum teneat aliquid sine causa rationabili, de quo posset aliquis proficere, tanquam pecuniam in sudario, quæ dari debuit ad lucrum, Mat. 25. Et ideo districtam de hoc oportebit eum reddere ratione, Sint ergo vobis omnia communia; sed quia de huiusmodi communi ministrandum est singulis non æqualiter, sed secundum exigentiam, subiungitur de hoc mandatum. ¶ *Et distribuatur unicuique vestrum a praposito vestro, non æqualiter omnibus, quia non aqua. va. omnes; sed potius uni. secundum quod cui. opus fuerit.* ¶ Quia dixerat omnia communia esse debere, posset credi, quod quilibet de communi posset accipere, tanquam de suo, pro libito, quem errorem excludens subiungit, quod non propria auctoritate sunt res accipiendæ, sed per distributionem; circa quod quattuor determinat, videlicet quibus sit distribuendum, idest unicuique, a quo, nempe a praposito, quid, videlicet victus, & tegumentum, qualiter, quia non æqualiter omnibus.

Cap. XIX.

Vtrum religiosus accipiens propria auctoritate aliquid de communibus bonis peccet. Videtur quod non; quia sicut tempore necessitatis omnia sunt communia omnibus, sic & religiosi sunt communia, sed in casu necessitatis licet accipere cui libet propria auctoritate, similiter ergo hic? R. Quædam sunt ita communia alicui uniueritati, quod licet cui libet accipere partem pro suo libito, sicut nemo,

nemus, alicui villam, & similia, quædam vero sunt ita communia, quod totum a toto possidetur, & nihil partis a parte, sicut sunt aliqua bona, interdum alicuius capituli in communi, tempore necessitatis omnibus omnia sunt communia, secundum primū modum, & ita licet cuilibet accipere de communibus istis; Religiosis vero sunt omnia communia secundo modo, quia nulli in singulari licet aliquid possidere; & ideo non est simile. Præterea necessitas non subest legibus, religio vero subest; & ideo non licet religiosis accipere de communibus, nisi secundum leges traditas. Præterea religiosus non est sui iuris; & ideo multo magis non debet sibi facere ius etiam in alijs rebus sine alterius auctoritate, alias peccat plus, vel minus. Sunt enim in communibus bonis quædam, quæ uon solent distribui, ut thesaurus ecclesiæ, quædam quæ solent distribui, ut victus, & huiusmodi; Item inter ea, quæ distribuuntur, quædam sunt maioris necessitatis, ut victus, & vestitus, quædam vero minoris, ut libri, pergamenum, & huiusmodi; Item inter ea, quæ sunt alicuius necessitatis, quædam sunt, quæ non sunt distributa, sed sunt adhuc in communi, quædam vero sunt iam distributa; Item inter distributa, quædam sunt, quæ non possunt accipi sine turbatione alterius, quædam sic; Plus ergo peccat, qui accipit, quod non solet distribui, & plus, qui accipit, quod est maioris necessitatis, & plus, qui assignatum iam alijs, & plus qui cum turbatione.

¶ Vtrum excommunicato sit distribuendum. R. Si potest habere absolutionem, & non curat, non est ei aliquid dandum, præcipue si sit ei fomentum malicia; si autem non potest habere, quia est forte casus pertinens ad Papam, & huiusmodi, cum religiosus

religiosus sit pauper, potest ei dari sequestratim, dummodo dans faciat hoc causa humanitatis, non ex contemptu excommunicationis, & recipiens ex hoc non negligat laborare pro absolutione; unde Grego. 11. q. 3. si quis excommunicatis ad sustentationem non superbiæ, sed humanitatis causa aliquid dare voluerit, non prohibemus. ¶ Queritur, quid per Præpositum intelligitur. R. Prælatus, qui per se potest distribuere, dummodo non impediatur à melioribus bonis, cum dicatur Luc. 22. de exemplo prælatorum, Ego autem in medio vestri sum; sicut qui ministrat; potest tamen prælatus istam distributionem facere; etiam per alios. Hic est argumentum, quod prælatus debet esse sollicitus de temporalibus subditi, cum habeat distribuere, sicut pater cogitare de necessitatibus filiorum.

¶ Circa tertium nota, quod non solum victus, & vestitus accipienda sunt per distributionem, sed omnia alia necessaria; tamen de his magis fecit mentionem, quia sunt maioris necessitatis, & quotidianæ, de quibus magis posset videri, quod possumus sumi propria auctoritate. Nota, quod laudabilior est consuetudo religiosorum, qui non dant certo tempore certam vestem, ut pote tunicam unam in anno, vel cappam in duobus, & huiusmodi, sed dant secundum indigentiam. Item illa consuetudo, quæ dat certam pecuniâ certo tempore pro vestibus, aut alijs necessarijs cuilibet, omnino est reprobanda, non solum quia est materia proprietatis, sed quia est contra regulam, quæ dicit. Non pecuniam, sed victum, & vestimentum esse tribuendum. ¶ Circa quartum scilicet non æqualiter omnibus; hoc videtur esse contrarium Beato Benedicto, qui in regula sua dicit certam mensuram panis

nis, & potus dandam omnibus. R. quod beatus Benedictus committit abbati, vt plus tribuatur, si necessitas hoc requirit; in cenventu tamen pōt aliquid dari interdum alicui, quod alijs non datur, cum hoc requirit necessitas, vel infirmitatis, uel naturæ; aliter non est extendenda huiusmodi dispensatio: ne sub pallio necessitatis peragatur negotium voluptatis.

¶ *Sicut opus fuerit, non sicut quisquē voluerit.*

¶ Per hoc innuit, quod cauenda est superfluitas; & nimia tenacitas omni religioso, & præcipue prædicatori, triplici de causa. ¶ Primo ne prædicatio impediatur. Cum enim difficile sit assueta relinquere, quicumquē assuescit superfluitati, vix poterit indigentiam sustinere, sed discurrentem propter salutem animarum oportet indigentias sustinere; alioquin refugeret prædicationem, vt declinaret inopiam. Secundo ne ipsi prædicatori damnoſa fiat prædicatio; cedit enim ad damnum prædicantis penitentiam, nisi & ipse rectē uiuat; primæ Cor. 9. Castigo corpus meum, &c. Tercio vt efficacior in attrahendo fiat: nihil enim est, quod magis attrahat ad prædicationem, quàm fama prædicatoris; inter opera vero de genere bonorum, non est aliquid, quod tam famosum hominem reddat, sicut parcitas. Exemplum de Iohanne baptista, qui ex hoc, & famam sanctitatis acquisiuit, & efficaciam homines attrahendi, Mat. 3. Ipse enim Iohannes habebat vestimentum de pilis camelorū, esca autem eius erant locuste, & mel siluestre, Et sequitur, Tunc exhibat ad eum Hierosolyma, & omnis iudæa. Notandum etiam, quod eleemosynæ dantur intuitu necessitatis, & frequenter sunt de necessitatibus dantium, & pro peccatis, Osæ. 5.

Peccata

Peccata populi mei comedent; glo. oblata pro peccatis. Item eleemosynæ sunt de alieno, non reputatur autem decens, quod de alieno corio faciat quis largas corrigias. Item acquiritur per laborem fratrum non modicum; Noluit autem David bibere aquam acquisitam à tribus fortibus cum periculo, & labore. 2. Reg. 23. Item oportebit de eorum dispensatione reddere districtam rationem; parcius autem quis solet viuere de his, de quibus oportet eum reddere rationem. Legitur in li. Collationū; quod cum frater quidam mundaret legumina, & cecidissent ad terram tria grana lenticulæ per eius incuriam, facta est magna quæstio inter fratres super tali negligentia.

Cap. XX.

Non est autem diffidendum ministrantibus, quæ habentur seruis Dei, quod deficiant in futuro. Non enim dat dominus procuratori, quamdiu habet, sed postquam totum expendit, plus dat ei. Luc. 16. Date, & dabitur vobis. Ad excludendum huiusmodi diffidentiam dicitur Mat. 6. Nolite solliciti esse, dicentes quid manducabimus, aut quid bibemus. Sunt enim tria, quæ dare possunt huiusmodi fiduciam. Primum ex parte dantis; si enim nobilis quilibet familiæ prouidet, quantomagis nobilissimus? indecorum est homini curare de cibo, vel veste, qui militat regno. Nouit rex quemadmodum familiam suam pascat, alat, & vestiât. Secundum ex parte recipientis; Glo. super illo Psalmo. Benedicam dominum; pascebat contemnentes se, & non pascet timentem se? Tertium ex parte dati. Mat. 6. Nonne anima plus est, quàm esca? glo. sa

Qui

Qui maiora dedit idest vitam, & corpus, dabit minora idest victum, & vestes: & si omnibus prouidet diuina clementia, magis qui vacant saluti animarum. Mat. 10. Dignus est operarius cibo suo.

¶ *Sic enim legitis in Actibus Apostolorum, quia erant illis omnia communia, & distribuēbatur unicuique, sicut cuique opus erat.*

Cap. XXI.

Vtrum illa communitas ecclesiæ fuerit ex voto. Credo quod non, sed solum ex perfectione charitatis. Sed quare mutatus est status ille ecclesiæ: non enim licet dicere, quod non fuerit bonus? R. quædam sunt ita essentialiter bona, quod non recipiunt pro aliquo tempore mutationem, sicut diligere Deum, honorare parentes, & huiusmodi; quædam vero pro tempore recipiunt mutationem, sunt enim multa, quæ vno tempore magis expediūt, quàm alio; cum ergo dilatata fuit ecclesia per orbem, & habuit pacem, visum est successoribus Apostolorum, quod magis expediebat, quod ipsi possessiones (quarum precium, cum essent venditæ, dabatur eis, vt idem distribuerent credentibus) retinerent, & darentur ipsis, vt perpetuo possent subuenire inde pauperibus, quàm quod more solito venderentur, & ideo mutauerunt statum illum. Et primo, solæ matrices ecclesiæ habebant huiusmodi, & prouidebant alijs, postmodum vero dilatata est vsquē ad ecclesias alias; & hoc habetur. 12. q. 1. videntes. Videtur autem, quod circa tempora Constantini fuit primo ista mutatio per approbationem vniuersalem, quia forte particulariter ante fuit facta aliqua mutatio particularis. 12. q. 1. futura

¶ Vtrum

¶ Vtrum illa cōmunitas fuerit apud omnes Christia-
nos in Ecclesia primitiua. Credo quod non, nisi
apud iudæos. Primo ratione perfectionis. Maior
enim gratia Spiritus sancti effusa est in iudæa, quàm
in gentibus, quia eos ita effecit ebrios charitate, &
ad tantam promouit perfectionem, vt omnia cōtem-
nerent pro amore Dei, & proximi. Secundo ra-
tione persecutionis futuræ in iudæa, quam præui-
dentes Apostoli noluerunt ibidem aliquid posside-
re, vt habiliores essent ad transinigrandum, 12. q. 1.
futurum. Tercio ratione exempli. Cum enim ab
illis de iudæa descenderit primo fides Christi, ius-
tum fuit, vt & ipsi exempla maioris perfectionis
haberent, vt efficacius per ipsos dilataretur vbiquè.
Esaia. 40. Super montem excelsum, scilicet perfe-
ctionis, ascende tu, qui euangelizas.

¶ *Qui vero aliquid habebant in sæculo, quando in-
gressi sunt monasterium, libenter velint illud esse
commune.*

Cap. XXII.

Quidam reperiuntur, qui, licet reliquerint sæ-
culum, tamen adhuc nimis seculariter dili-
gunt suos, & plus dirigunt eis sua, etiam sine pia
causa, quàm monasterio. Isti, licet nati sint in
Christo, tamen adhuc ligati sunt mundo cum um-
bilico, qui est carnale vinculum, quo ligatur puer
cum matre. Vnde, ei qui talis est, dicit dominus,
Ezech. 16. In die ortus tui non est præcisus umbili-
cus tuus. Alij sunt, qui sua deferunt ad monaste-
rium, tamen diffidentes de communi prouisione
nolunt totum ponere in communi; sed propter se-
nectutem, vel infirmitatem, partem, vel totum
sibi

sibi referuari procurant, peiores Anania, & Saphy-
ra, qui tantum partem seruauerant, Actu. 5.
Isti sæculum dimittunt, & tamen religiosi non sunt,
immo partim religiosi, & partim sæculares. Vnde
cuidam tali, qui fuerat senator, beatus Basilius di-
xit. Senator esse desinisti, & monachum non feci-
sti, vnde dominus interdum indignatur contra ta-
les; & quia minus de Deo confidunt, relinquit
eos sibi, nec de eis cogitat in suis necessitatibus,
quousquè peniteant. Exemplum de illo, qui con-
gregauit lagenam plenam nummis, & tamen, pu-
trefacto pede, sanari non valuit, nisi ad tactum An-
geli. Non fuit talis quidam senex leprosus, cui,
cum quidam obtulisset pecuniam propter senectutem,
& infirmitatem, noluit eam accipere dicens;
Ecce. 50. annos habeo in infirmitate, & nunquàm
aliquid defuit, domino providente mihi semper, &
tu post tot annos venisti auferre procuratorẽ meum
Alij sunt, qui licet bona, quæ in sæculo habuerunt,
communicent, tamen magis ex necessitate, quàm
ex bona voluntate, contra quos dicit Apostolus.
Non ex tristitia, aut ex necessitate, hilarem enim
datorem diligit Deus; voluntas enim a Deo pensatur,
non dati quantitas; contra ista tria vitia dicit
Augustini regula. (Qui aliquid habebant &c.)

Cap. XXXIII.

Pensandum est hic, quantum tenemur commu-
nicare res in religione nobis concessas, si tan-
tum communicamus res olim nostras. ¶ Queritur
de eo, qui non vult res huiusmodi, & speciali-
ter scripta communicare alijs, vtrum peccet. R. fra-
ter, aut habet præceptum tradendi scripta huius-
modi

di, aut non; Si sic, peccat mortaliter, nisi tradat; non, aut est ei licitum, ut pote quia habet licentiam tradendi, vel est consuetudo, quod etiam sine sententia tradi possunt, aut non; Si non, non peccat in aliquo; Si autem est ei licitum, aut alter indiget, aut non; Si non, in nullo peccat non tradendo; Si alter indiget, aut ipse iterum indiget, aut non, si non indiget, neque ad præsens, neque antea, tunc est iudicandum sicut de illo, qui pecuniam domini sui ligavit in sudario, Matth. 25. & potest peccare mortaliter plus, & minus, secundum attentionem dilectionis inordinatæ, quam habet ad huiusmodi, & secundum quantitatem fructus, qui fieret per alium; Si vero indiget, sicut alter, aut indiget plus, vel æquè, vel minus; Si plus, vel æquè, non peccat; Si minus, tunc tam parva potest esse indigentia istius, & tam magna alterius, quod peccaret non tradendo; & e converso, tam parum posset excedere indigentia alterius indigentiam istius, quod non peccaret, & circa hoc docet ratio; Si vero non indiget ad præsens, sed in antea sunt sibi necessaria, tunc videndum est, utrum per traditionem talem posset esse absque illis tempore necessitatis; Si non, tunc iudicandum est sicut supra de illo, qui pecuniam tenet ligatam in sudario; Si sic, tunc distinguendum est sicut supra, quando uterque indiget. ¶ Nota, quod quidam retrahuntur ab huiusmodi mutatione; primo quia nolunt, quod sciat, quod illud, quod interdum dicunt, sumant ex scriptis, sed quasi eorum ingenio attribuatur, & hoc vanitas est; alij vero, quia volunt sibi solis esse nota, quæ in scriptis suis habent, & hoc invidiæ genus est; alij ex tenacitate avaritiæ; quamvis enim nihil faciant de scriptis, tamen adeo dili-

gunt libros, quòd abscondunt eos, sicut coruus denarios, de quibus nihil facit; alij, quia timent deturpationem, & præponunt huiusmodi damnum vtilitati spiritali maiori, & hoc defectus charitatis est; si enim debemus animas pro fratribus ponere, quanto magis libros? alij, quia interdum sibi ab alijs negantur, & hoc est vitium talionis, cum dicat scriptura, Non reddentes malum pro malo. Boni tamen serui Dei libenter communicant. Interdum timentes, non solum vitium, sed etiam notam proprietatis incurrere, iuxta illud Apostoli, ab omni specie mali abstinete vos; Interdum præcauentes turbationem fraternam, quæ frequenter ex hoc oritur, Prouerb. 15. Conturbat domum suã, qui sectatur auaritiam; Interdum humiliter cogitantes, quòd fructus maior fiat per alios; Interdum cupientes sibi merita cumulare; Si enim traditio potus aquæ frigidæ refrigerantis corpus non est sine mercede, Matth. 10. quanto magis traditio scripturæ refrigerantis animam, maiorem habet mercedem? Interdum sperantes se recepturos melius beneficium scientiæ ab illo, qui dicit Luc. 6. Date, & dabitur vobis, contra quos, Bernardo reseruanti quoddam, quod alio tempore daret fratribus, dictum est ei; Quandiu illud seruabis, aliud non dabitur tibi.

Qui vero non habebant, non ea quarant in monasterio, qua nec foris habere potuerunt.

Cap.

XXIV.

NUnquid non licet, qui fuit pauper in saeculo, quærere necessaria in monasterio? constat, quòd sic: ergo videtur istud mandatum irrationabile.

bile. *R.* Quidam reperiuntur, qui de paupertate venientes quærent in religione abundantiam; Hieron. ad Eliodorum Episcopum, Ditiore sunt monachi, quàm fuerunt sæculares; Alij, non solum quærent abundantiam, sed etiam delicata; Idem ad Nepotianum in persona talium loquens dicit, Natus in paupere domo, & in tugurio rusticano, qui vix millio, & cibario pane ventrem rugientem satiare poteram, nunc similiam, & mel fastidio; Alij, non solum hoc, sed etiam honores quærent; Bernardus, Pleriquè in domo Dei non patiuntur haberi contemptui, qui in sua, non nisi contemptibiles esse potuerunt, ibiquè volunt honorabiles videri, vbi honores ab omnibus contemnuntur. Magna abusio, ut in loco paupertatis, vbi diuites incurrunt penuriam, pauperes quærant abundantiam; In loco afflictionis vbi delicati mortificantur, homines rustici quærant delicias; In loco vbi viri honorati eligunt abijci, ibi abiecti quærant honorari. Sed maior abusio, quòd interdum huiusmodi, cum prius de labore viuerent, ibi volunt otiosam vitam ducere, vbi quondam otiosi fiunt laboriosi, contra dictum Apostoli, Qui non vult operari, non manducet; Item interdum tantam curam habent de medicinalibus, ut, vbi alij venerunt vitam perdere iuxta consilium Christi, Matth. 16. ibi iuxta consilium Hypocratis videantur venisse saluare; Item interdum, vbi quondam nominati veniunt absconditi, ut sit eorum vita abscondita cum Christo in Deo, ibi ipsi prius ignoti volunt sibi nomen acquirere; Bernardus super Missus est, Qui antea in suo oppido, vel vico vix cogniti fuerunt, modo circumcunctes prouincias, & curias frequentantes, regum notitias, & principum familiaritates assecuti sunt;

Quare autem, quæso est, quòd à pauperibus in tali loco talia quærantur, in quo à diuitibus contraria affectantur? De talibus igitur loquitur B. August. in regula d. (Qui vero non habebant) scilicet aliquid, & intelligitur de præter necessarios, potest & aliter dici, si intelligatur etiam de necessarijs, vt sit sensus (non ea quærant) idest principaliter non intendant, idest non ad hoc principaliter sint in monasterio, vt ista ibi habeant. Et hoc est contra illos, qui ad hoc intrant religionem, vel sunt in religione, vt habeant ibi necessaria vitæ, vel alia terrena. Isti sunt socij eorum, qui sequebantur dominum, non propter virtutes, sed propter panes, de quibus eos satiabat, Iohan. 6. Item sunt eorum imitatores, qui ventrem suum fecerunt Deum suum, qui omne seruitium, quod alij faciunt Deo vero, ipsi faciunt propter ventrem. Isti sunt, quibus diabolus eruit dextros oculos, idest spirituales intentionem, & facti sunt inepti ad bellum. Isti piscantur in sinistra nauigij, & ideo nihil capiunt, nisi temporalia. Posset etiam tertio modo exponi (non ea quærant) idest quæulosè petant. Et hoc est contra quosdam, qui quamuis fuerunt in sæculo pauperes, tamen magis quæulosi reperiuntur in monasterio, quàm illi, qui fuerunt diuites. Exemplum in veteri testamento. Quamuis enim quidam magni murmurauerint in deserto contra Moysen, & Deum, vt Maria, Choræ, Datham, & Abiron, tamen non super defectum necessariorum, Populares vero super hoc murmurauerunt; Numeri 21. Qui insuper alios trahunt secum, & murmurauerunt super eo, quod in Ægypto nō dicunt se habuisse pretiosiora, sed viliora; Cum enim petunt carnes, tamen non dicunt eas in Ægypto habuisse, sed

piscas,

pisces, & quædam alia viliora; propter hoc misit in eos ignem, & serpentes ignitos. Vnde abbas Pastor. Qui quærulosus est, monachus non est. Licet autem petitio quærulosa etiam necessariorum prohibeatur, tamen charitatiuè prouidendum est eis, quantumcūquè fuerint in sæculo pauperes; & ideo, ne quis credat hoc non fiendum, ponitur circa hoc mandatum, & dicitur.

¶ Sed tamen eorum confirmati, quod opus est tribuatur, etiam si paupertas eorum, quando foris erant nec ipsa necessaria poterat inuenire.

Cap. XXV.

Consuetudo laudabilis est, vbicumquè sancta viget religio, quòd nulli magna cura sit sui, sed paterna cura de filiis, & fraterna charitas; de fratribus cogitet ita sollicitè, quod etiam ipsis tacentibus aduertat, & inquiret de eorum necessitatibus, & piè subueniat eis. Et habetur ad hoc argumentum ex isto, & præcedenti mandato; in quorum altero quærulosa petitio interdicitur, in alio vero charitativa prouisio ponitur. Item argumentum est hic, quòd propter murmur non est quis puniendus in subtractione necessariorum; eo quòd dicitur (Sed tamen eorum infirmitati, quod opus est tribuatur) Non tamen dicit cupiditati, sed infirmitati quod opus est. Porro nulli debet deesse prouisio, sed communiter, non solum illis, qui diuites fuerunt in sæculo, sed etiam qui pauperes, vt periculum acceptionis personarum euitetur; vt certius meritum habeatur, quia, cum ministrantur diuitibus necessaria, potest esse aliqua causa humana mouens, quæ non habet locum in paupere; Item

vt quod suum est, eis reddatur, quia bona ecclesiarum sunt bona pauperum; Item vt occasio scandali, tam ex parte secularium, quam fratrum summo-ueatur, Item ne religio mundo assimiletur; Item vt vera fraternitas in ea reperiatur; Item ne pauperes, qui frequenter in religione multum proficiunt, ab ingressu religionis retrahantur. Verum, quia abundantia necessariorum quandoquē est occasio mali, talibus ad cauendum hoc dicitur.

¶ Non tamen ideo putent se esse foelices, quia inueniunt victum, & tegumentum, quale foris inuenire non potuerunt.

Cap. XXVI.

TRaditis mandatis circa vitia primaria, quæ oriuntur circa communitatem, hic incipit ponere mandata circa vitia secundaria, quæ sunt ad superbiam pertinentia: horum autem, quædam reperiuntur in his, qui fuerunt in sæculo pauperes, alia vero in his, qui fuerunt diuites, de quibus ibi (rursus etiam illi, &c.) Quia vero superbia in paupere detestabilior est, iuxta illud Eccles. 25. Tres species odiuit anima mea, quarum vna est pauper superbus, Ideo primo prosequitur de huiusmodi superbix destructione, determinans circa hæc tria. Primo enim ponit mandata ad destruendum, quod malum est. Secundo ad informandum circa hoc, quod bonum est, d. (sed sursum &c.) Tertio reddit harum causam, d. (ne incipiant.) Et quia interdum oritur quædam extollentia in huiusmodi pauperibus ratione rerum, quas inueniunt abundē; Rerum enim affluentiam solet sequi extollentia quandoquē ratione societatis; Ideo ad destructionem
vtrius-

utriusque ponit mandatum duplex. Primum, cum dicit (Non tamen.) Secundum, cum dicit (Nec erigant.)

Cap. XXVII.

CIrca primum nota, quoddam aliqui reperiuntur, qui, licet ad religionem venerint animo sustinendi penuriam, mortificandi carnem, assequendi abiectionem tamen lapsu temporis mutati in virum alterum, sed non virtute dextræ excelsi, cum in ea inueniunt rerum copiam, carnis delectabilia, honoris gloriam, sic illecebrantur tali prosperitate, quod primæ charitatis obliti ea refugiunt omnino, quæ primo quæsierunt, & contraria totis viribus amplexantur. Hinc est, quod conuentus, in quibus occurrunt aduersa, horrent, & fugiunt; ad illos vero, in quibus inueniunt prospera, suspirant, & ab illis auelli non possunt, mutationes de locis prosperitatis ad contraria sustinere non possunt pro vtilitate animarum, vel necessitate ordinis quantacumque, contraria vero procurant pro posse, & cum in his contra voluntatem eorum sit aliquid, inueniuntur minus obediētes, incurrunt murmura, & diuersa iudicia, suos iudices iudicantes, & alia mala quam multa; Cumque in conuentibus sua desideria assequi non possunt, discurrunt exterius, transeunt libenter ad standum in curijs, & cum opportunitas occurrerit, facile excipiunt dignitates: Sed heu longe recesserunt isti non solum à sapientia sanctorum, sed etiam sapientium mundi huius. Non sunt isti de opinione Philosophorum illorum, qui dixerunt summum bonum paupertatem, sed potius de errore opinionis illius reprobatissimæ, quæ felici-

tatem posuit prosperitatem successuum, sicut tangit Phil. in 1. Eth. Non sic fecerunt Sancti patres, de quorum multis legitur in vitis patrum, quod ipsi fugientes honores sibi exhibitos, & alia prospera in locis suis se ad alia transferebant, renuentes cum Dauid consolationes huius mundi. Non fecit sic pater sanctus Dominicus, qui libentius morabatur Carcasonæ, quàm Tholosæ propter hoc, quod plures ibi sustinebat persecutiones. Gregor. Sancti viri plus prospera, quàm aduersa formidant; nec mirum; plures enim pereunt in prosperis, quam in aduersis. Psal. Cadent à latere tuo, scilicet sinistro aduersitatis, mille, & decem millia à dextris tuis, idest prosperitatis. Gregor. Continuus successus temporalium æternæ reprobationis est indicium. Legitur quod Iacob cancellabat manus in filiorum Ioseph benedictione super illum, quem inuenit ad sinistram ponens ad dextram, & e conuerso; Quod dicunt sancti factum fuisse in figuram futuræ benedictionis in ipso die nouissimo, quia illos, quos inueniet ad sinistram aduersitatis, ponet ad dexteram felicitatis æternæ, quos vero ad dexteram prosperitatis, ponet ad sinistram damnationis æternæ, sicut patet in diuite, & Lazaro. Item quando quis uenit ad hospitium alterius, & comedit in mane splendide, non solet ei parari cœna magna. Luc. 6. ueh uobis, qui saturati estis, quia esurietis. Item inueniuntur aliqui operarij, quibus lautè uolentibus uiuere in die murat paterfamilias mercedem, & tanto minus in sero recipiunt de mercede, quanto plus receperunt in labore. Timendum est ergo illis, qui multum habere uolunt, dum adhuc sunt in labore, ne parum inueniant in mercede, & dicatur illi, qui talis est, illud Luc. 6. Recepisti mercedem

cedem tuam, totam scilicet, vel in parte. Admonendi sunt etiam, qui corporaliter prosperantur, ne cum cuncta ad votum suppetunt, dantem quærere negligant, si in his, quæ dantur, animum figant. Quis autem habens hæc prospera gloriari potest, quod in his cor non figat, & quod eorum actione a superna delectatione non retrahatur? Quis igitur est, qui his vtatur, vt dicitur? Quantum itaque cauendum est a seruis Dei eorū abundantia, quibus ita difficile est benè vti? ideo ex pietate subtrahit diuina prouidentia ista electis, ne per abusum in malum eis conuertantur. Greg. Electis suis Deus asperum iter facit, ne dum detinentur in via, obliuiscantur eorum, quæ sunt in patria. Quot enim sunt, quibus ista prospera auerterunt cor a cœlestibus ad se? Item aduersitates multos erudiunt, sed prosperitates multos decipiunt, in eis enim iacet hamus subesca: Greg. Cum omnis fortuna timenda sit, magis timenda est prospera, quàm aduersa: illa enim sequiendo erudit, ista blandiendo seducit. Licet autem omnibus seruis Dei sit timenda prosperitas, tamen magis illis, qui de paupertate venerunt; mutationes enim ad contraria morbos facile generant. Isti enim, sicut exeuntes de inedia carceris, & sicut vrsus famelicus, plus solent excedere in fruendo prosperis. Prouer 25. Mel inuenisti, comede, quod sufficit tibi. Isti etiam fortius adhærentes delicijs fugiunt angustias, sicut canis exustus semel, plus timet aquam calidam. Inde est, quod Hieremias rogat regem Sedechiam dicens 36. Ne reducas me in domum Ionathæ, ne moriar ibi. Apud eum enim erat multa angustia, & inedia. Isti etiam solent plus inaniter gloriari cum illis, qui dicunt Zach. 11. Benedictus dominus, [quia facti sumus diuites. In
istis

istis etiam plus solet ratio absorberi à prosperis, sicut aqua facilius absorbet hominem, qui non est in aqua nutritus, quàm piscem; Gen. 40. Succedentibus prosperis oblitus est interpretis sui. Ista abundantia solet in istis rebellionem inducere; Deuter. 32. Inuenit eum in terra deserta, in loco horroris, & vastæ solitudinis; Constituit eum super excelsam terram, vt comederet fructus agrorum, vt sugeret mel de petra; Et post. Incrassatus est dilectus, & recalcitrauit. Quia ergo in istis tam periculosa est prosperitas vitæ, Augustinus ipsis extollentiam de huiusmodi interdicit. Non enim verè debent tales se reputare foelices, cum eos facile tot mala sequantur in prosperis.

Cap. XXVIII.

N*Ec erigant cervicem, quia sociantur eis, ad quos foris accedere non audebant.*

¶ Nota, quòd vtendum est societate diuitum, & magnorum in bonum: debent enim ex hoc esse grati, considerantes quid fecerunt eis, iuxta illud, Suscitans à terra inopem, & de stercore erigens pauperem, vt collocet eum cum principibus. Item debent ex hoc moueri ad amorem religionis, quæ eis contulit, quod mundus dare non potuit iuxta illud, Gratia Dei sum id, quod sum. Item debent ex hoc eleuari in spem futuræ societatis. Si enim in statu gratiæ ascendunt ad societatem maiorum, quanto magis in statu gloriæ, vbi nulla erit personarum acceptio? primæ Iohann. 1. Quod vidimus, annunciamus vobis, vt societatem habeatis nobiscum, & societas vestra sit cū patre, & filio eius Iesu Christo, Sed miseri quidam, qui tali societate deberent

vti in bonum, abutuntur ea ad superbiam; quam destruens sanctus Augustinus, tanquam malum, ponit postea informationem circa hoc, quod bonum est, docens qualiter circa hoc debeant se habere, dicens (Sed sursum cor habeant, & terrena vana non quærant.) Sursum cor habetur, cum sursum gratiæ referuntur, cum sursum suspiratur, cum de magnitudine pietatis patris cœlestis super nos recogitatur, cum vsus omnium dirigitur, cum sursum tanto benefactori nos obligatos recognoscimus, cum ex hoc ad illius amorem excitamur, Et sic ad locum vnde exierunt flumina abundantiae temporalis reuertuntur, secundum varios modos, Eccles. 7. Et hoc est, quod dicit (Sursum cor habeant) scilicet in necessarijs, quæ inuenerunt postmodum.

¶ Notandum est, quod omnia terrena dicuntur vana, Eccles. 1. Vidi cuncta, quæ fiunt sub sole, & ecce vniuersa vanitas. Non dicit super solem, sed sub sole. Hæc autem sunt terrena, & vana, quæ fragilia, & deficientia intuenti, faciunt etiam eum corruere; propter quod Ægyptus, idest mundus comparatur bacculo arundineo, Esaia 36.

Ne incipiant monasteria diuitibus esse utilia, non pauperibus, si diuites illic humiliantur, & pauperes illic inflantur.

Cap. XXXIX.

SVnt aliqui præceptores, quibus est pro ratione voluntas: non fuit talis Augusti. Ipse enim tradendo mandata, subiungit rationem d. (Ne incipiant, &c.) Elicitur autem ex hoc verbo, quod aliqui reperiuntur in monasterijs, quibus non sunt ipsa monasteria ad salutem. Quomodo enim erunt

eis ad salutem, quibus non sint vtilia? immo non
 solum aliqui, sed multi sunt. Cuius rei tres sunt
 causæ, vna generalis, & duæ particulares. Gene-
 ralis est peccatum mortale quodcumquē, hoc enim
 facit, ne prosit religio ad salutem, habitus, vel pro-
 fessio, vel societas, vel opera exteriora bona, vel
 nomen, vel fama, vel dedicatio sui Deo. Et ideo
 dicitur, Eccles. 30. Salus animæ in sanctitate iusti-
 tiæ. Sanctum idem est, quod mundum. Hiero.
 Non religiosum fuisse, sed religiosè vixisse lauda-
 bile est. Alia causa, & particularis est fraterna of-
 fensa, de qua infra, Qui nunquam vult petere ve-
 niam, aut non ex animo petit, sine causa est in mona-
 sterio, etiam si inde non proijciatur. Hoc est enim,
 quod facit reprobari a Deo, quicquid offertur: nec
 potest Deus homini placari, nisi prius frater place-
 tur, Mat. 5. Si offers munus tuum ad altare, & ibi
 recordatus fueris, quod frater tuus habet aliquid
 aduersum te, relinque ibi munus tuum ante altare,
 & vade prius reconciliari fratri tuo, & tunc ve-
 niens offer munus tuum. Tertia causa, est superbia,
 de qua hic habetur. Dicuntur autem monasteria
 inutilia superbis, quia plures vtilitates aufert eis
 superbia. Vbi nota, quod tribus de causis solent
 aliqui ingredi religionem; Vna, vt possit ibi me-
 lius sibi cauere a peccatis, a quibus vix sibi cauere
 possunt in statu sæculari, Alia, vt ibi de iam com-
 missis purgentur, Tertia, vt ibi plus merentes
 maius in futuro lætitiæ præmium consequantur.
 Istas autem tres vtilitates confert religio, Eccles. 1.
 Religiositas custodiet, Ecce primam, Et iustifi-
 cabit cor, Ecce secundam, Iocunditatem, atque
 gaudium dabit, scilicet in futuro, Ecce tertiam.
 Superbia autem aufert ista tria. Superbia enim est
 causa

causa aliorum malorum, & propter ipsam multi re-
 ligiosi corruerunt in alia multa mala; Eccles. 10.
 Initium omnis peccati superbia, qui tenuerit illam
 adimplebitur maledictis, idest vitijs. Glo. de super-
 bia nascuntur haereses, scismata, detractiones, in-
 uidia, verbositas, iactantia, & huiusmodi. Item
 impedit iustificationem; Luc. 18. Descendit hic, sci-
 licet humilis peccator, iustificatus ab illo, scilicet
 superbo. Item priuat bona opera finali mercede;
 vnde infra dicitur, Superbia bonis operibus
 insidiatur, vt pereant. Quid autem mirum si su-
 perbia faciat pauperibus inutile claustrum, quæ an-
 gelicis spiritibus fecit inutile cœlum, primis paren-
 tibus paradysum? Hinc est, quod, licet omnis su-
 perbia detestanda sit in religione, tamen plus in
 pauperibus. Ratio; quia sicut commendabilior
 est humilitas in persona excellenti, ita magis est re-
 probanda superbia in persona abiecta; & ideo di-
 citur Eccles. 10. Quid superbis terra & cinis, idest
 vilis persona? Item superbia diuitum habet mul-
 tam occasionem: Ipsæ enim diuitiæ sunt magna oc-
 casio ad superbiam, & multum sunt hæc coniuncta,
 tanquam adiectiuum ad substantiuum; Prouer. 8.
 Opes superbæ; Et August. dicit, vermis diuitum
 superbia est, quia sicut ex putredine nascitur ver-
 mis, ita ex diuitijs. Item ad hoc quod diues su-
 perbiat, non oportet, quod faciat sibi magnam vim,
 quia multum habet vnde extollatur, pauper vero
 non sic, nisi inflat semetipsum; Sicut dicitur in fa-
 bula de bufone, qui videns bouem crassum in pa-
 scuis, inflauit se, vt ei similis fieret, sic etiam diabo-
 lus, qui pauper erat respectu Dei, inflauit se, di-
 Similis ero altissimo, Esa. 14. Cum ergo in omni ge-
 nere peccatorum, peccatum procuratum grauius
 sit,

fit, quàm non procuratum, vt in luxaria, gula, & similibus; constat, q̃ grauior est superbia in pauperibus, quàm in diuitibus; Tum quia abiectiores sunt personæ, tum quia habent superbiam procuratam, tum quia minus habent vnde superblant; Et ideo August. talem superbiam appropriato nomine vocat inflationem, inflatio enim pertinet ad res vi-les, vt est vesica, & huiusmodi; Item consurgit quasi ex nihilo, scilicet ex aere, qui quasi inane reputatur; Item fit per quandam violentiam.

¶ Nota etiam, quòd res est vsitata diuites superbire, res vero inusitata, superbia in paupere; imo intantum est paupertati annexa humilitas, vt vnum accipiat pro alio, etiam à saluatore, Matth. 5. Beati pauperes spiritu; quia secundum glos. paupertas hic vocatur humilitas secundum vnum sensum. Et ideo, quia superbia non solet inueniri in paupere, sicut in diuite, dicit Aug. (Ne incipiant monasteria diuitibus, &c.) quia res noua, & inconsueta. Sic igitur patet, quòd superbia in pauperibus est contraria religioni ex hoc, quia facit monasterium eis inutile; Item est graue peccatum, propter quod vocatur inflatio; Item est res præter vsum, q̃ notatur, cum dicitur (ne incipiant.) Et ideo conueniens est, vt sancta religio laboret modis omnibus ad superbiam huiusmodi reprimendam.

Cap. XXX.

Rursus etiam illi, qui aliquid videbantur esse in sa-
culo, non habeant fastidio fratres suos, qui ad il-
lam sanctam societatem ex paupertate venerunt.
Magis autem studeant non de parentum diuitum di-
gnitate, sed de pauperum fratrum societate gloriari.

¶ Sicut

¶ Sicut in pauperibus venientibus ad congregationem duplex inuenitur vitium pertinēs ad superbiam, vt iam dictum est, ita & in diuitibus vnum, & minus occasione rerum, circa quod tradit mandatum infra di. (nec extollantur) Aliud ratione personarum, & maius, & circa hoc, hic ponit mandatum, primo di. (Rursus etiam illi &c.) Nota. Quidam dicuntur fratres natura, ut omnes homines; quidam fide, ut omnes Christiani; quidam religionis conformitate, vt religiosi eiusdem professionis; Cum ergo nullus sit contemnendus, iuxta illud Malac. 2. Quare despicit unusquisque fratrem suum; quanto minus ille, in quem concurrunt tres prædictæ causæ fraternitatis? Item si contemnitur in societate peruersa pauper à diuite, & ignobilis à nobili, non est mirum; In societate uero sancta, omnes unum debent esse in Christo; Gal. 3. Non est iudeus, neque græcus, non est seruus, neque liber, non est masculus, neque fœmina, omnes enim unum sumus in Christo. Item angelicæ naturæ sublimitas pauperes non fastidit, imo astat eis, & ministrat, Matth. 18. Videte ne contemnatis unum ex pusillis istis, dico enim vobis, quoniam Angeli eorum &c. Rex etiam Angelorum factus mortalis non fastidiuit societatem eorum, imo istos elegit, Iacob. 2. Nonne Deus elegit pauperes in hoc mundo? Item factus etiam immortalis legitur frequenter apparuisse in specie pauperis, ut hortulani, peregrini, & alijs multis modis; Vnde B. Martinus diabolo apparenti in specie diuitis, tanquam esset Christus, dixit, Christum purpuratum non noui; Si autem eos fastidiret, eorum formam non assumeret. Quomodo ergo fastidiendi sunt à diuitibus illi, quos nec Angeli, neque angelorum rex fastidierunt? Pa-

ter ergo, quod illi, qui magni fuerunt in sæculo, non debent fastidire alios, qui venerunt ex paupertate, tum quia fratres, tum quia societas sancta, tum quia pauperes; magis autem debent gloriari de eorum societate, quàm de parentum diuitum dignitate. ¶ Vbi nota, quòd aliqui reperiuntur, qui gloriantur, quòd sciuntur esse generosi; contra quos legitur de sancto Alexio, qui fuit de nobilissimis Romanorum, & de multis alijs sanctis, quòd fugerunt, vt eorum nobilitas lateret, & intantum latuit, vt in persona pauperum eleemosynam acciperet a seruis suis; Alij vero sunt, qui continere se non possunt, quin interdum aliquod verbum proferant, per quod se generosos ostendant; contra quos Patriarchæ nobilissimi iudeorum dixerunt coram Pharaone, viri pastores sumus, Gen. 47. Isti si verè Christi serui essent, non ostenderent se nobiles, sed potius contrarium cum Agatha nobilissima dicerent, Ancilla Christi sum, & ideo seruilem personam me ostendo; Sunt iterum alij, qui his non contenti, faciunt se maiores, quàm verè fuerunt in sæculo; contra quos Moyses negauit se esse filium filiae Pharaonis, Heb. 11. quod credi poterat, nolens se extollere super id, quod erat; Cum ergo omnia hæc, & similia sapiant gloriam de dignitate parentum, interdicuntur.

¶ *Nec extollantur, si communi vitæ aliquid de suis facultatibus contulerunt, nec de suis diuitijs magis superbiant, quia eas in monasterio partiuntur, quàm si eis in sæculo fruerentur.*

Cap. XXXI.

Hic traditur mandatum ad cauendum superbiã, quæ oriri solet in diuitibus occasione rerum.

¶ Nota

¶ Nota, quòd diabolus, inimicus totius boni, nititur impedire, nè bonum propositum concipiatur; quòd, cum non potest, impedit ne ad effectum perducatur, quòd, cum nequit, perdere laborat; Apocal. 12. Draco stetit ante mulierem; quæ erat paritura, vt cum peperisset, filium eius deuoraret. Hinc est, q̃ multos, qui posteaquàm contemptum mundi ad effectum perduxerunt, tentat de superbia, vt bonum iam consummatum pereat. Est autem duplex superbia, scilicet quædam latens in cogitatione; Eccles. 11. Non te extollas in cogitatione; Alia apparens exterius aliquibus actibus exterioribus; Eccles. 13. Qui communicauerit superbo, induet superbiam. Volens ergo Beatus August. neutram relinquere in diuitibus, dicit duo; scilicet, (Nec extollantur) propter primum, (Nec de suis diuitijs magis superbiant) propter secundum.

¶ Nota, in vno vocat religionem communem vitam, in alio monasterium, Superius autem vocat eam sanctam societatem; Et sic per tria nomina designantur, quæ pertinent ad tria vota. Dicitur enim sancta societas, contra immunditiam, Communis vita, contra proprietatem, Monasterium, quod est monachorum statio, propter obedientiam.

¶ Nota etiam, quia de bono opere, & præcipue mundi cōtemptu non est superbiendum; Tum quia omnia bona nostra sunt deformia; Esa. 64. Omnes iustitiæ nostræ tanquam pannus menstruatus; Item, Si quid sunt, à Deo sunt, & non à nobis, Esaia 26. Omnia opera nostra operatus es in nobis; Item sunt debitum, non gratuitum; Luc. 17. Cum omnia benè feceritis, dicite, quoniam serui inutiles sumus, quod facere debuimus, fecimus; Quæ est ergo materia superbiendi de aliquibus bonis, cum ita sint

turpia, cum non sint ab ipso, cum sint debitum? Quis enim solet de solutione debiti superbire? Adhuc de dispersione omnium, specialiter temporalium, quis audeat superbire? Nonne multi Philosophi hoc fecerunt? Nonne innumerabiles hæretici? Nonne, & ipse Iudas, & alij quam plures, qui omnes à domino sunt reprobati? Benè ergo dicitur illis (qui diuites fuerunt in sæculo) quod de colatis in monasterio nec extollantur in corde, nec superbiant in opere.

Cap. XXXII.

Alia quippe quacumquè iniquitas in malis operibus exercetur, ut fiant; Superbia vero etiam bonis operibus insidiatur, ut pereant. Q. d. Bene necessarium est cauere ab ipsa superbia, quia contra morem aliorum peccatorum superbia nō est solum in malis operibus, immò oritur etiam ex bonis, & destruit ipsa; ut patet Lucæ 18. de phariseo iusto; Et de illo in vitis patrum, qui elatus in cogitatione accepit diabolus in specie mulieris oberrantis. Tangit autem August. tria, propter quæ superbia prædicta est valde timenda religiosis. Primum est, quod insidiatur; In quo innuitur, quod latet apud eos; Hieronym. Superbia in cinere, & cilicio latet; plus autem timendus est occultus hostis, quàm manifestus, quia minus potest caueri. Secundum est, quod insidiatur bonis operibus. Religiosi sunt ditiores bonis, quia implent non solum præcepta, sed & consilia, Et insudant diligentius in congregandis virtutibus, & meritis, ita ut eis competat illud primæ ad Corinth. 1. In omnibus diuites facti estis in illo; Mercatori autem quantò ditior est, tantò plus

plus timendus est latro spolians. Tertium est, quod dicit (vt pereant.) Inuidia enim dolet de bono, Accidia differt bonum, Ira simulat bonum, quia quod facit, videtur esse iustum, quamuis iustitiam Dei non operetur; Iacob. 1. Luxuria desipit bonum propter infectionem palati, Auaritia auertit à bono terrenis ex toto intenta, Gula non curat de bono dicens illud Esa. 22. Comedamus, & bibamus, cras enim moriemur, venialia maculant bonum; sed superbia, quod peius est, destruit omne bonum. Greg. Superbia omnes virtutes destruit. Hinc est, quod Iob 20. vocatur ventus vrens.

Cap. XXXIII.

Quid enim prodest dispergendo dare pauperibus, & pauperem fieri; cum anima misera superbior efficitur diuitias cōtemnendo, quàm fuerat possidendo?

¶ Reddita ratione traditionis mandati prædicti, rationem reddit obseruationis. Q. d. Hoc mādaturū non sine ratione est traditum, & ideo requirit, vt obseruetur; quid enim prodest &c. Nota, quod quidam fuerunt, qui disperferunt, sed non dederunt, vt multi Philosophi, & hæretici, qui in signum contemptus mundi, per vicos, & plateas disperferunt pecunias; Quidam vero dispergunt, & dant, sed nō pauperibus, immò mundo, vt vani prodigi; Alij dispergunt, & dant pauperibus, sed non fiunt pauperes, quia non dant omnia, vt boni eleemosynarij in sæculo remanentes, Similes illi de quo dicitur, Dispersit dedit pauperibus; Alij vero dispergunt, & dant totum pauperibus, & fiunt pauperes, quod est super omnia alia; Qui enim hoc facit, nihil illi deest; vnde loquens dominus ado-

lescenti, qui mandata seruauerat, dixit, Adhuc vnum tibi deest, Luc. 18. Innuens per hoc, quod si illud haberet, quod erat omnia dare pauperibus, & pauperem fieri, nihil ei deesset, Cui autem nihil deest, in summo est. Sed veh talibus quantumcumq; sint magni, si ex hoc superbiant. Priuantur enim ex hoc octo vtilitatibus, quæ secundum Euangelium sequi solent ex tali dispersione. Tales enim ex hoc non solent fieri discipuli domini, Lucæ 14. Omnis ex vobis, qui non renunciauerit omnibus, quæ possidet, non potest meus esse discipulus; unde à contrario sensu, qui huiusmodi renunciat, assequitur eius esse discipulus; Sed superbia facit esse de familia diaboli; Iob 40. Ipse est rex super omnes filios superbiæ. Secundo assequi non solent cumulum perfectionis; Matth. 19. Si vis perfectus esse, vade, & vende omnia, quæ habes, & da pauperibus; Perfectus autem est, cui nihil deest; Sed superbia, quantumcunque abundet homo, ipsum ex toto annihilat; Eccles. 21. Domus, quæ nimis est locuples, annihilabitur superbia. Tertio, non assequi solent studium cœlestis desiderij. Contemptis enim terrenis, cor eleuatur ad cœlestia, Matth. 13. Simile est regnum cœlorum thæsauri abscondito in agro, quem, qui inuenit homo abscondit, & præ gaudio illius vadit, & vendit vniuersa, quæ habet, & emit agrum illum, Thæsaurus ille cœlesti desiderium est, Ager disciplina cœlestis studij; Ex distributione ergo omnium, acquiritur in vita disciplinata cœlesti desiderium; Sed superbia deijcit de cœlo, Luc. 10. Videbam sathanam sicut fulgur de cœlo cadentem, scilicet propter superbiam, quantò magis à cœlesti desiderio? Quarto, assequi non solent per prægustationem consolationem in-

ternam

ternam, scilicet gaudij cœlestis; Matth. 10. Nemo est, qui reliquerit domum &c. qui non accipiat centies tantum; Glos. Omnes, qui propter regnum Dei temporalia spernunt, etiam in hac vita regni gaudium prægustant; Sed superbia latari facit in bonis proprijs; Iob 31. Si lætatum est in abscondito cor meum, & osculatus sum manum meam ore meo, Osculari manum, est delectari in operibus suis, in quo quia consolationem habet superbus, priuatur diuina consolatione; Bernardus; Delicata est diuina cōsolatio, & non datur admittentibus alienam. Quinto, non promittitur eis thæsauros in cœlo; Luc. 18. Omnia quæcumq; habes, uende, & da pauperibus, & habebis thæsaurum in cœlo; Disperserant omnia Apostoli, sed dictum est eis, Matth. 18. Nisi efficiamini sicut paruuli, non intrabitis in regnum cœlorum. Sexto, non promittitur eis honor iudiciarius; Matth. 19. Vos qui secuti estis me, scilicet omnibus relictis, sedebitis super sedes 12. iudicantes 12. tribus Israel; Sed in die illa, superbus erit subtus, & non supra; Esa. 2. Dies Domini super omnem superbum, & arrogantem, & humiliabitur. Septimo, non promittitur illis possessio uitæ æternæ, Matth. 19. Omnis qui reliquerit domum &c. uitam æternam possidebit; sed superbia ducit ad mortem æternam; Esa. 14. Detracta est ad inferos superbia tua. Octauo, Christo, qui pretiosæ Margaritæ comparatur, priuantur; Matth. 14. Inuenta una pretiosa Margarita, abiit, & uendit omnia, quæ habuit, & emit eam; glos. 1. Christum; Sed superbia aufert eum; Psalmus, Et alta à longe cognoscit. Benè ergo dicitur, (Quid prodest dispergendo dare pauperibus, & pauperem fieri, cum anima misera superbior efficitur diuitias contemnendo, quàm fuerat

possidendo, quia per huiusmodi superbiam) priuatur omni vtilitate, quæ sequi solet ex huiusmodi dispersione. Veh igitur animæ, quæ tanto fructu priuatur, pro tam inutili, & vana superbia. Veh illi, qui per iter virtutum tendit ad vitium. Veh illi, qui de medicamento infirmitatem incurrit; Gregor. Qui de virtutibus habitis extollitur, quasi de medicamento infirmatur. Veh illi, qui hic de pauperatur, & tamen partem non habebit in regno cælorum, hic luget, & ibi non consolabitur. Veh illi, qui de via cæli scilicet angusta, facit sibi viam inferni. Quanta confusio erit, cum diuites sæculi cum humilitate videbunt cælos ascendentes, se vero cum paupertate superba in baratrum inferni præcipitari? Et ideo benè vocat Augustinus talem animam miseram.

Cap. XXXIV.

NOtanda sunt remedia contra talem elationem. Primum scilicet, & optimum, est consideratio propriorum defectuum, quibus subiacet homo. Vnde in Vitispatrum dixit quidam senex. Quando cogitatio elationis intrauerit, scrutare conscientiam tuam, si domini mandata custodisti, si inimicos diligis, si gaudes in aduersarij glorificatione, si contristaris in minoratione eiusdem, si recognoscis te seruum inutilem; si recognoscis te plus omnibus peccatorem. Sic autem faciebat abbas Moyses, qui fuit in sæculo magnus peccator, & postea magnæ pœnitentiæ. Cum enim tentabatur de elatione, recurrebat ad peccata sua, recogitando; vnde facta est ad eum vox demoniaca d. Viciisti nos, quia cum te exaltamus, tu te humilias.

Ecclesiastici 11. In die bonorum non immemor sis malorum. Secundum remedium, consideratio meliorum. Quæ enim restat nobis superbiendi occasio; si consideremus quàm parua sunt bona nostra in comparatione ad illa, quæ alij innumerabiles fecerunt? Greg. Sicut incentium superbiæ est respectus deteriorum, ita cautela humilitatis est consideratio meliorum. Tertium est, consideratio incertitudinis valoris operum nostrorum. Etenim quandoquæ, quod reputamus magnum, nihil est in oculis Dei. Gregor. Sordet interdum in oculis iudicis, quod fulget in oculis authoris. Quamuis autem omnibus sit necessaria humilitas, tamen prædicatoribus specialiter valet ad tria. Valet in prædicatione, ad aliorum conuersionem, Valet in studio, ad intelligentiam scripturarum, Valet in operibus bonis, ad propriam salutem.

Cap.

XXXV.

O Mnes ergo vnanimiter, & concorditer viuite. Viuentibus in congregatione non est tatum necessaria pronitas animorum, & communitas rerum, de quibus supra dictum est, sed etiam concordia actionum, de qua hic ponitur mandatum. Est autem duplex actio, scilicet Intrinseca, & extrinseca; In harum vtraquæ debet esse concordia, Et propter primam dicit hic (vnanimiter) propter secundam (concorditer.)

Nota autem, qd sex sunt, quæ multum solent conturbare concordiam, & contraria horum ipsam inducere. Primum est diuersitas animorum; contra quod datum est mandatum supra, cum dictum est, (Vnanimis habitetis in domo, &c.) Secundum, est

proprietas rerum; Meum enim & tuum faciunt discordiam. Contra hoc dicitur (& non dicatis aliquid proprium.) Tertium est acceptio personarum, in distributione comunium. Contra hoc dictum est (& distribuatur unicuique sicut cuique opus fuerit.) Quartum suorum incommunicatio. Contra hoc dictum est (Qui aliquid habebant in sæculo libenter velint illud esse commune.) Quintum est voluntas improba nimis habendi; Contra quod dicitur (qui autem non habebant, nō ea quærant in monasterio, quæ nec foris habere potuerunt.) Sextum est superbia; Superbi enim non possunt benè concordare; Contra quam, tanquam multum abundantem, data sunt mandata multa ab illo loco, (Nec erigant ceruicem &c.) Greg. In religione concorditer est viuendum, ratione cohabitationis, ratione fraternitatis, ratione religionis.

¶ Sequitur autem triplex fructus ex huiusmodi concordia. Primus est profectus in bono. Amb. Res parvæ concordia crescunt; res vero etiam magnæ, discordia dilabuntur. Secundus est hostis fugatio, 1. Reg. 16. Igitur quodcumque spiritus Dei malus arripiebat Saul, David tollebat citharam, & percutiebat manu sua, & refocillabatur Saul, & leuius se habebat, Glos. Diuersorum sonorum moderatus, rationabilisque concentus, Eccles. unitatem signat. Tertius delectatio regis cœlestis. Sicut enim melodix delectant magnates, sic ista concordia regem regum. Eccles. 25. In tribus beneplacitum est spiritui meo, Et post, concordia fratrum.

¶ Nota tamen quodd, sicut harmonia non semper consistit in omnimoda æqualitate vocum, sed in debita proportionē earum, ita concordia non requirit semper æqualitatem omnino, sed debitam proportionem

tionem inter superiores, & inferiores, in elevatione, & depressione conuenienti. Tantum enim superior interdum posset eleuari, vel deprimi, quòd non concordaret cum inferiori, Similiter inferior.

¶ Et honorate in vobis Deum inuicem cuius tēpla facti estis.

Cap. XXXVI.

EX discordia frequenter sequitur inhonoratio, modo verbis conuitiorum in præsentia, modo infamationum in absentia, modo factis per iniurias, vel in rebus, vel personis; Ideo dicitur, Proverb. 20. Honor est homini, qui separat se à contentionibus. Benè ergo post mandatum de concordia, ponitur mandatum de honore mutuo, quasi sequela ad illud. Ab inhonoratione vero mutua valdè cauendum est in congregatione. Nihil enim est, quod homines plus diligere soleāt, quàm honorem suum; Et ideo valdè offenduntur ex tali iniuria. Item cum quis in rebus iniuriatur, auferendo illas, emendare potest, honorem vero nō sic; Proverb. 25. Quæ viderunt oculi tui, ne proferas cito in iurgio, ne postea emendare non possis, cum de honestaueris amicum tuum. Item huiusmodi inhonoratio non solum hominī fit, sed ipsi Deo, qui summè est honorandus; Matth. 25. Quod vni ex minimis meis fecistis, mihi fecistis, quod intelligitur in bono, & malo; Econuerso in honore exhibito homini honoratur Deus, quod sic patet. Honorandi sunt omnes homines indistinctè, iuxta illud beati Petri, Omnes honorate; Et quid honoratur in homine quocumquè, nisi imago Dei? Honor vero, qui exhibetur imagini, illi, cuius est imago, potius exhibetur. Item honorandi sunt prælati specialiter; iuxta

iuxta illud Eccles. 10. In medio fratrum rector illorum in honore; Cuius autem est honor iste, nisi cuius ministri sunt? Vnde Maximus in sermone. Dignitas, quæ defertur ministris; illi, cuius sunt ministri, exhibetur. Item honorandi sunt deuoti viri sancti; Eccles. 10. Semen honorabitur hoc, quod timet Deum; hoc autem fit propter inhabitantem spiritum Dei in illis, sicut capsella honoratur propter reliquias. Bene ergo August. ponens mandatum de honore mutuo, non dicit, Honorate vos inuicem, sed (honorate in vobis Deum inuicem) quia in fratre, non ipse, sed Deus honoratur. Honoratur quoque Deus specialiter rebus sibi consecratis, vt sunt oblationes, & temporibus sibi dedicatis, vt sunt Dies festi, locis etiam sibi consecratis, vt est templum; Et sicut honor, qui exhibetur templo, reputatur honor Dei, qui habitat in templo, quia vnum est propter alterum, ita honorare fratrem est honorare Deum in fratre, cuius est templum; primæ Cor. 3. Templum Dei sanctum est, quod estis vos; Quod specialiter conuenit viris religiosiis, quia & ipsi sunt Deo dicati, vt templum, & eius habitatio specialis per gratiam, vt templum est specialis Domus Dei, & excellentis nobilitatis ædificium, vt templum; Et ideo bene dicit August. (cuius templa facti estis.) Reuocandum est autem ad memoriam, quod Pompeius nunquam fuerit fortunatus, nisi postquam templum fuit à suis honoratum. Quantum ergo est timendum illi, qui non illud materiale, sed istud spirituale, & ideo charius, in propria persona inhonorat? Proinde honorandi sunt prælati omnes tanquam patres, iuxta illud infra, (Honore coram vobis prælatus sit vobis) præcipue vero boni; primæ ad Timotheum. 5. Qui bene præ-

præfunt presbyteri, duplici honore habeantur digni. Honorentur seniores ætate secundum illud Leuitici 19. Coram cano capite consurge, & honora personam senis. Honorentur priores in ordine, tanquàm primogeniti, qui super alios honorabantur in veteri lege; vnde Genes. 49. dicitur Ruben primogenito, Non crescas, scilicet super alios; & secundum magistrum in historijs, idest ad honorem primogenituræ non ascendas. Honorentur æquales, Rom. 12. Honore inuicem præuenientes. Honorentur, qui aliquid maius fuerunt in sæculo, venientes ad nuptias Christi, & quantò honoratiores fuerunt tantò plus honorentur, secundum quod dicitur Luc. 14. In parabola de inuitato ad nuptias, in illo verbo, ne fortè honoratiores te, &c. Honorentur sacerdotes; Propter quod dicitur Eccles. 6. Honorifica sacerdotes. Honorentur, qui sunt in gradu ordinis superioris; Rom. 12. Cui honorem, honorem. Honorentur missi à maioribus præcipuè ad aliqua officia spiritualia exercenda, ut est uisitatio, & huiusmodi; ad Phil. 2. Et huiusmodi honore habetote; Et loquitur de Epafrodito, quem ad hæc miserat Paulus ad eos. Honorentur confessores, & salutis ministri; Eccles. 38. Honora medicum; quòd si uerum est de medicis corporum, quantò magis de medicis animarum? Honorentur dono sapientiæ præditi; Sapientiæ 8. Propter hanc scilicet sapientiam habebò honorem apud seniores. Honorentur specialiter laborantes in docendo, & prædicando; primæ Tim. 5. Maximè qui laborant in uerbo, & doctrina, scilicet honorentur. Honorentur sanctitate præcellentes; Credendum est enim, quòd quilibet habeat donum aliquod, licet lateat, quo nos præcellit, propter quod sunt hono-

honorandi ; ad Philof. 2. In humilitate superiores
sibi inuicem arbitantes.

Orationibus instate horis , & temporibus constitutis.

Cap. XXXVII.

TRaditis mandatis de pertinentibus ad religionem, in quatum est status degentium in vnum, in præcedenti capitulo, tradit Augustinus in hoc capitulo mandata circa pertinentia ad religionem, in quantum est status pœnitentiæ. Sunt autem tria, ad quæ reducuntur opera pœnitentiæ, scilicet Oratio, qua erigitur animus in Deum, qua impugnantur vitia animæ, Mortificatio carnis, quæ insurgit in animam, qua impugnantur vitia carnis, Opus misericordiæ, quo mouetur animus piè in proximum, quo impugnantur vitia mundi; Et circa hoc tria tradit mandata, Circa tertium, ibi (Et si his, qui venerunt ex mo. delica.) Circa secundum, ibi (carnem, vestram domate, Circa primum, hic Orationibus instate.) Sunt autem tria circa orationem valdè cōpetentia religiosi, scilicet Instantia in frequentando, Intentio in cogitando, Maturitas in cantando; Circa quæ tradit hic Augustinus tria mandata, Circa tertium, ibi (& nolite cantare) Circa secundum, ibi (Psalmis & hymnis,) Circa primum, hic. Et traduntur duo mandata circa hoc, vnum pertinens ad orationes ordinarias, aliud pertinens ad orationes extraordinarias, ibi (In oratorio nemo aliquid agat.) Ad instandum ergo orationibus ordinarijs, tradit mandatum dicens, Orationibus instate. Nam, licet orationi omnibus instandum sit, Rom. 12. tamen specialius hoc competit religiosi. Illis enim, qui sunt in tentationibus constituti, cum ab
his

his se non possunt defendere sine adiutorio altissimi, inuocandum est diuinum auxilium instanter; Matth. 26. *vigilate, & orate, ne intretis in tentationem.* Item cum secundum Greg. dona Dei faciliè amittantur, nisi à largiente custodiantur, quilibet habens aliquod donum Dei, recurrere debet ad largientem, vt custodiat, & qui plus habet, plus debet recurrere. Item in rebus difficilibus præcipuè solet implorari diuinum auxilium; Cum ergo religiosi plus impugnentur à tentationibus, quàm alij, Eccles. 2. *Fili accedens ad seruitutem Dei sta in iustitia, & timore, & præpara animam tuam ad tentationem, Et plus habeant de donis cœlestibus, & habeant opus arduum præ manibus, scilicet opus perfectionis ducere ad consummationem, incumbit eis triplex necessitas plus orandi, scilicet tentationum assiduitas, Amittendorum bonorum facilitas, Proprij negotij difficultas.* Præterea multum facit ad opportunitatem orandi occupationum subtractio; Propter quod dicitur Eccles. 18. *Ne impediaris orare semper, idest ne assumas tibi ea, quæ impediunt te ab oratione.* Item multum facit ad idem loci congruitas; Psalm. *Adorabimus in loco, vbi steterunt pedes eius.* Item sancta, & deuota societas dicentium verbo, & exemplo venite adoremus, & procidamus ante Deum. Item contemplatiuus obligatur magis ad orandum, cum secundum Ber. *Oratio semper sit contemplationis.* Item viuentes de eleemosynis tenentur orare pro benefactoribus, exemplo Pauli dist. 2. Tim. 1. *Det misericordiam dominus Onesiferi domui, quia sapè me refrigerauit, & catenam meam non erubuit.* Item sicut diuites, qui non possunt multum orare, supplere debent in eleemosynis, Sic qui non

non possunt dare eleemosynas, debent hoc in orationibus compensare. Licet autem religiosis multum instandum sit orationibus, tamen magis (horis, & temporibus constitutis) Hoc enim, sicut dicit Gilbertus sancti Ruffi abbas expositor huius regulæ, Non est solum oratio, sed etiam obedientia; Constat autem, quod duplex bonum melius est. Item horis, & temporibus constitutis conuenit, non solum vnus conuentus, sed innumera multitudo per vniuersum orbem ad orandum; Cum ergo, sicut dicit scriptura, impossibile sit preces multorum non exaudiri, sperari debet, quod, & si non ratione sui, tamē ratione multitudinis orantis, cui se adiungit, debet citius exaudiri. Item probabile est, quod sicut locus deputatus orationi facit, vt preces citius exaudiantur, sic etiam tempus statutum à spiritu sancto, Esaiæ 49. Tempore placito exaudiui te, Sicut & pauper veniens ad eleemosynam statuta hora citius accipit. Quamuis autem omnibus septem horis canonicis nobis instandum sit orationi, tamen specialius quibusdam horis, scilicet Matutinis, Prima, & Completorio, contra quod sunt aliqui, qui vix surgunt ad Matutinas, sed occasionibus fallaciter receptis quasi semper remanent, quasi sufficiat eis diuinis laudibus interesse solum de die. Non videntur isti pertinere ad illam beatam turbam innumerabilem astantem ante thronum Dei, de qua dicitur Apocal. 7. quod non solum die, immò die, ac nocte seruiunt ei in templo eius. Non sunt isti de illis animalibus sanctis, quæ nec die, nec nocte requiem habent dicentia, Sanctus, sanctus, sanctus, dominus Deus omnipotens, qui erat, & qui est, & qui venturus est, Apocal. 4. Non sunt isti de illis custodibus sanctæ Ecclesiæ, qui non solum

de die, sed etiam tota die, & tota nocte perpetuò nō
tacent, scilicet laudare nomen Dñi, Esa. 63. Excita-
tur, qui huiusmodi est, Tre. 2. vbi dicitur; Consur-
ge, id est cum alijs surge, lauda in nocte. David nec
occupationibus regijs diurnis, nec nocturnis deli-
cij uxoriū retrahebatur, quin de nocte surgeret ad
laudes Dei; Nam dicit, Media nocte surgebam ad
confitendum tibi. Christus interdum, non solum
partem noctis, sed etiam totam noctem expende-
bat orando; Luc. 6. Et erat per noctans in oratio-
ne Dei. Paulus, & Silas non impediabantur angus-
tia carceris, quin media nocte laudarent Deum,
Act. 16. Infelices somnolenti illi, qui tantorum exē-
plo non excitantur ad Matutinas. Præterea mulie-
res solent surgere de nocte pro sollicitudine domus
suæ; Prouerb. ultimo, De nocte surrexit, deditquē
prædam domesticis; Item artifices magna parte no-
ctis uigilant; Studentes sapientiæ surgunt de nocte;
Si ergo studiosi pro sapientia acquirenda, & artifi-
ces pro lucro, mulieres pro cura domus suæ sic sur-
gūt de nocte, quantò magis oportet seruos Dei pro
seruitio regis æterni surgere de nocte? Præterea
tempus nocturnum aptius est actibus contempla-
tionis, quia liberius, & quietius est ab occupationi-
bus; Ideo dicitur in Psal. In die mandauit dominus
misericordiam suam, & nocte canticum eius. Item
benedictio nō solum debetur Deo de die, sed etiam
de nocte, Psal. Non dormitabit, nequē dormiet, qui
impugnat Israël; cui resistitur per sacras uigilias;
primæ Mach. 12. Cum sol occidisset præcepit Iona-
thas suis uigilare, scilicet propter aduersarios, quos
audierat nocte superuenturos. Item somnolentos
frequenter comitantur carnales tentationes; Has
autem reprimunt honestæ uigiliæ, Eccles. 31. uigi-
lia

lia honestatis tabefaciet carnes. Item sicut dominus veniebat ad Balaam de nocte, Numeri 22. ita frequentius in huiusmodi silentij tempore visitat animam, & immittit consolationes internas; Iob 35. Qui dedit carmina in nocte, id est gaudiosas consolationes. Item surgentes ad Matutinas multipliciter se purgant. Surgendum est igitur libenter ad Matutinas, ne tempus aptissimum orationi amittant, vt debitum benedictionis Deo plenè reddamus, vt impugnate Ecclesie succurramus, vt tétationes carnis euadamus, & meritū satisfactionis nobis acquiramus, vt cōsolationū sanctarū participes efficiamur, vt corpori in Dei seruitio de sanitate prouideamus.

¶ DE COMPLETORIO.

Cap. XXXVIII.

SVnt aliqui fugientes Completorium; tamen econtra, cum magna diligentia caueant fratres, ne vnquam horam istam amittant, & hoc multis de causis. Constat enim, quòd hora illa est, in qua de labore actiuæ transitur ad quietem contemplatiuæ, Propter quod tunc cantatur, Nunc dimittis seruum tuum Domine secundum verbum tuum in pace; Bonarum autem mentium est libenter huiusmodi transitum facere, nec occupationes actiuæ vltra diē prolongare, secundum illud, Exhibit homo ad opus suum, scilicet qui ratione vritur, & ad operationem suam vsquē ad vesperam, scilicet & non vltra. Item, cum sit tempus tacendi, & loquendi, Eccles. 3. Ista hora est, in qua incipit silentium apud religiosos, quod omnes boni libentius debent accipere, quàm locutiones. August. Loquela sit in necessitate, taciturnitas in iocunditate. Item ista est hora, in qua anima

animalia sancta, quæ per diem vadunt ad exteriora, reuertuntur ad interiora; Vnde & in principio dicitur, conuerte nos Deus salutaris noster, scilicet ab exterioribus ad interiora. Item secundum morem nostrum Completorio sunt annexæ orationes secretæ, quarum fructum frequenter amittunt, qui non interfunt. Item in illâ hora sunt multa, quæ non fiunt in alijs horis, quæ habent aliquem effectum gratiæ conferendæ, sicut est Asperio aquæ benedictæ, Benedictio prælati. Item remanentes à Completorio, ut frequenter peius expendunt illud tempus, quàm remanentes ab alijs horis diurnis. Item huiusmodi remanentes solent alios inquietare suis uigilijs, & clamoribus, & tardo ingressu ad dormitorium, quod ualdè cauendum est circa seruos Dei. Qui enim ipsos inquietat, spiritum sanctum in eis habitantem contristat. Item alios scandalizat. Videntes enim eos remanentes à Completorio, non de facili habent rationem iudicandi, quod remaneant, nisi ex causa minus sufficenti, & sic in eis scandalizantur. Si autem ille, qui scandalizat unum de pusillis, expedit, ut suspendatur mola asinaria in collo eius, Matth. 18. Quid de illo sentiendum, qui conuentum scandalizat? Item solemniter recommendamus nos Beatæ Virgini in Completorio; Constat autem, quod efficax est ualdè recommendatio tam sollemnis; Vnde magister Iordanus narrat se audisse à quodam religioso, quod quando fratres dicebant eya ergo &c. uidebat Beatam Virginem flexis genibus recommendantem ordinem filio suo. Interfint ergo libenter fratres Completorio, propter amorem contemplationis, propter amorem silentij, propter curam propriæ conscientiæ, propter fructum secretarum orationum, propter assequendum fructum aliarum

gratiarum, propter cautelam temporis non inutiliter expendendi, propter vitandam inquietudinem, & scandalum fratrum, & propter deuotionem ad Beatam virginem. Quid autem mirum si viri spirituales aduersperascente die libenter transeunt ad quietem, cum etiam aues garrum tunc dimittant, & quiescant? immo, vt dicit Plinius, tota multitudo apum in alueari ad sonitum vnus circumuolantis illa hora quiescit sine strepitu vsquè mane, & tunc ad sonitum eiusdem circumuolantis consurgunt.

¶ Prædicta igitur duo tempora sunt apta orationibus secretis, quia Matutinum præcedit occupationes diurnas, Vespertinum vero sequitur, & ita vtrumquè liberum est ab occupatione. Ista sunt illa duo sacrificia legalia, non carnalia, sed spiritualia, scilicet Matutinum, & Vespertinum, quæ quotidie iubentur offerri, Exod. 29. Orandum est specialiter in mane, & sero, vt primordia, & vtilia actionum nostrarum offerentes ipsi, qui est Αλφα, & Ωμυα, principium, & finis, debitas primitias inchoationis, & decimas consummationis persoluamus eidem. Item orandum est mane, vt in actionibus diurnis oratione dirigamur, Et hoc sonat oratio, quæ dicitur in Prima, orandum est in sero, vt oratione contra tentationes nocturnas muniamur, & hoc sonat oratio, quæ dicitur in Completorio; Istæ autem orationes non mutantur, sicut orationes, quæ dicuntur in alijs horis, secundum diuersa tempora; quia immutabiliter his de causis semper orare debemus in his duobus temporibus. Item orandum est mane propter futura, vt benè fiant, Sero propter præterita mala, vt remittantur.

¶ In Oratorio nemo aliquid agat, nisi ad quod factū est, unde & nomen accepit, vt si fortè aliqui etiam
præter

præter horas constitutas, si eis vacat, orare voluerint, non eis sine impedimento, qui ibi aliquid agendum putauerint.

Cap. XXXIX.

Hic tradit mandatum circa orationes extraordinarias, quia non sunt necessitatis, sed voluntatis; nec tradit mandatum, ut fiant, sed mandatum, ne impediantur.

¶ Nota circa expositionem huius verbi Oratorium, quod dominus vniuersorum, non solum de personis retinuit sibi ad ministrandum aliquos specialiter, ut ministros ecclesiæ, sed & de rebus decimas ad ministrorum sustentationem, de temporibus Dies solemnes, & de locis aliqua sibi specialiter appropriauit ad seruiendum sibi; Inter quæ unum est Oratorium, quod dicitur ecclesia; id est congregatio ratione eorum, qui ibi conueniunt; Dicitur etiam templum ratione illius, in cuius nomine conueniunt, scilicet Dei; Templum. n. dicitur à theos, quod est Deus, & platea, quasi Dei platea; Et Oratorium ratione eius, quod ut frequentius, & principalius fit ibi oratio.

¶ *Ad quod factum est.* ¶ Videtur, quod tempore gratiæ non debeat esse locus aliquis proprius ad orandum. Mulieri enim Samaritanæ quærenti, ubi esset locus orandi, respondit dominus, Venit hora, in qua veri adoratores adorabunt in spiritu, ergo non est curandum de loco. R. Non est in loco ponenda talis fiducia, quod non credat aliquis alibi se non posse audiri, sicut faciebant aliqui iudæi, sed curandum est ex alijs causis de loco. Si enim non esset aliquis locus orationibus deputatus, cum tunc nesciretur, utrum orarent homines, uel non, multi

omitterent orare. Item cum uadit quis ad locum deputatum orationi, plus laborando plus meretur. Item ipse locus ad hoc deputatus, ad hoc incitat, sicut locus deputatus comestioni ad comedendum; & similia: Et ideo licet orationis virtus sit in spiritu, tamen deputatur locus propter iam dicta.

Cap. XXXX.

Nemo aliquid agat. ¶ Videtur, quod non liceat in Oratorio prædicare, confessiones audire, & similia. R. Ista spiritualia exercitia, quibus animi eriguntur in Deum, secundum quandam nominis extensionem vocantur orationes quandoquæ, quia oratio est ascensio animi in Deum; Vnde quædam glos. super illud, Hoc genus dæmoniorum non eiicitur nisi in ieiunio, & oratione, dicit, Oratio generalis, non solum est in verbis, sed in omnibus, quæ in obsequium Dei, & fidei deuotionem gerimus; Sicut ergo sub parte satisfactionis, quæ est ieiunium comprehenditur omnis carnis afflictio, & sub elemosyna omne genus pietatis, ita sub oratione omnes actus spirituales.

¶ Vtrum liceat in casu ibi comedere, vel iacere. R. non regulariter, sed dispensatiuè, ex causa.

¶ Vtrum liceat ibi dispensatiue emere, uel uendere, sicut comedere. R. non; quia ista quasi nunquam exercentur sine peccato; Vnde, & dominus cum indignatione eiecit ementes, & uendentes de templo. Ex his collige, quod actiones spirituales regulariter possunt ibi fieri; & actiones corporales, quæ sunt necessitatis, & sine peccato possunt ibi fieri dispensatiuè; Actiones vero, quæ vix, vel nunquam sunt

sunt sine peccato, nullatenus debent ibi fieri, nisi fortè in necessitate grandi.

Cap. XXXXI.

NOta, quia in hoc q̄ Aug. prohibet impediri illos, qui fortassis interdum orare volunt præter horas constitutas, manifestè commendat huiusmodi secretas orationes, quæ proculdubio sunt signum euidens sanctitatis, & à viris sanctis cum omni diligentia sectandæ. Huiusmodi exemplum reliquit nobis Saluator, qui, cum nullo indigeret, totiens tamen legitur orasse sic. Item Apostoli ministerium mensarum propter hoc reliquerunt, Act. 6. Item ferè omnes sancti antiqui; Vnde Paulus hæremita mortuus inuentus est appodiatu ad arborem ore, ac manibus in celum erectis, quasi orans. Huiusmodi exemplum specialiter reliquit nobis B. Dominicus, qui tam frequenter etiam pernoctabat in oratione carens lecto. Huiusmodi exemplum reliquerunt nobis patres primitiui, quorum tempore Ecclesia erat plena Fratribus orantibus antè altaria prostratis. Nam huiusmodi orationes habent aliquas prærogativas super orationes ordinarias. Illæ enim, quæ sunt in communi officio, pro maiori parte sunt potius laudes, quàm petitiones; Laudes vero pertinent magis ad patriam, quæ est in plenitudine, & ad viam, in qua est status indigentie, magis pertinent petitiones; Secretæ autem orationes magis sunt petitiones; & ideo magis in præsentī necessariæ. Præterea in communi officio, cū sint ibi petitiones certæ, & interdum tales, quibus, qui interest, non multū indiget, in orationibus vero secretis petit quilibet, quod sibi placet; Cuilibet aut magis necessarium est

laborare pro eo, quo magis indiget. Præterea orationes communes sunt de institutione ecclesiæ, secretæ de institutione Dei, iuxta illud Matth. 6. Tu vero clauso hostio ora patrem tuum, Et de sic orando legitur exemplum dedisse dominum, de alio vero modo orandi non, & ideo sunt maioris necessitatis, unde & ad omnes pertinent. Item sunt magis mentales, quàm vocales, hoc autem multum facit ad efficaciam orationis, Psal. Cum inuocerem, id est intus vocarem, exaudisti me Deus. Præterea generant maiorem affectionem; potest enim sic orans plus immorari circa singula meditando; ex huiusmodi autem morosis cogitationibus generantur maiores affectiones desideriorum sanctorum, quæ faciunt orationes efficaciores; iuxta illud Psal. Desiderium cordis eorum audiuit auris tua. Præterea sunt puriores; quia nihil vanitatis eis admisceri potest, sicut vocalibus, quæ sunt coram hominibus. Præterea magis in promptu possunt haberi; quia communes indigent libris, interdum loco, socijs, & tempore, In istis vero non sic, Psal. Apud me oratio Deo vitæ meæ. Item deficientibus verbis corporis, istam orationem non oportet deficere; Vnde de B. Martino dicitur, Inuictum ab oratione spiritum non relaxabat.

Cap. XLII.

NOta etiam, quòd libentius est orandum in loco sacro; piè enim creditur, quòd facilius dominus exaudit orationes, quæ fiunt in loco sibi deputato. Item credendum est, quòd Angeli talem locum sanctum magis frequentent, qui aptior est illis ad offerendum orationes eorum coram Deo.

Pro-

Probabile enim est, quòd dæmones, qui libenter impediunt orationes, non audent ita accedere ad locum sacrum; Genes. 28. Quàm terribilis est locus iste. Item omne Oratorium est consecratum in honore alicuius sancti; Pium est autem credere, quòd sanctus patronus ecclesiæ specialē curam habeat de conuenientibus illic, sicut princeps de his, qui conueniunt ad loca sui domini. Item ibi ut frequentius est corpus Christi, reliquiæ sanctorum, imagines Crucifixi, & B. Virg. & sanctorum, quæ sensibilibiter introducunt in mentem horum memoriam, quæ multum valent ad excitandam deuotionem; Denotior autem affectus summè facit orationem efficacem; Aug. Dignior sequetur effectus, quando feruentior præcedit affectus.

Cap.

XLIII.

SCiendum etiam, quòd, licet ad seruos Dei deuotos pertineat sic libenter orare, tamen propter huiusmodi orationes extraordinarias non debent dimittere ea, quæ ordinariè sunt facienda, & ideo dicit Aug. (si eis vacat,) Innuens quod, cum instant aliæ occupationes ordinariæ, non sunt propter orationes huiusmodi dimittendæ. Qui enim propter orationes huiusmodi dimittit facere, quòd debet secundum votum professionis, est sicut vsurarius, qui libentius dat, quod non debet, quàm reddat, quod debet, contra quem, Rom. 13. Redditur omnibus debita. Item insistere orationibus huiusmodi, relictis communibus occupationibus, sapit singularitatem; hoc est autem, quod multum nocet in religione, sicut fera in vinea; Psalm. Singularis

ferus depastus est eam, scilicet vineam Domini. Item istæ procedunt ex propria voluntate, illæ autem ex aliena ordinatione. Item ille, qui facit, quod alij faciunt, non habet vnde de vana gloria teneatur, sicut ille, qui non est sicut cæteri hominum; Oratio autem extraordinaria facilius fermentatur vanitate, ergo minus accepta, quia noluit dominus in lege, quod in aliquo sacrificio offerretur fermentum. Item talis est, sicut ovis segregata, quam facilius inuadit lupo, vt patet de B. Thoma Apostolo, qui segregatus ab alijs dominum videre non meruit. Sicut Abbas facit quandoquæ pitantiam in cõuentu, & non vult, quod habeant, qui non interfunt cum alijs, ita dominus spirituales gratias, & consolationes.

Cap. XXXXIV.

Sciendum est autem, quod non solum spirituales occupationes, vt lectio, officium ecclesiæ, & huiusmodi non sunt dimittendæ propter huiusmodi orationes, sed nec etiam corporales actiones, quæ sunt ad vitæ sustentationem necessariae, vt sunt procuratio necessitatum, opera officiorum, & seruitia varia pro fratrum necessitatibus. Certum est enim, quod ex his occupationibus sequitur aliqua utilitas, de oratione vero sua nescit aliquis vtrum sit efficaciam ante Deum, vt sibi, vel alijs multum profit; Certa autem bona præferenda sunt incertis; August. Tene certum, & dimitte incertum. Item pallio huiusmodi orationum, quasi vitæ contemplatiuæ, frequenter nutritur accidia, & fugiuntur opera laboriosa; contra illud Eccles. 7. Ne oderis laboriosa opera.

Cap. XXXV.

ATtendendum autem, quòd, licet in omnibus fratribus sit reprehensibile dimittere laboriosa opera, quibus necessitatibus fratrum subuenitur propter orationes huiusmodi, tamen plus in fratribus laicis. Non enim esset laudabile, quòd à patre familias vocatus ad laborandum operarius in vinea propter orationem longam, quam faceret in ecclesia, illud dimittere; Ipsi autem fratres laici vocati sunt propriè ad operandum, sicut clerici ad alia spiritualia; & ideo habent, diligenter exercere. 1. Corint. 7. Vnusquisquè, in ea vocatione, qua vocatus est, in ea permaneat. Item diuisiones gratiarum sunt datæ ad hoc, vt inuicem se iuuent serui Dei; Sicut ergo clerici ministrant eis gratias spirituales doctrinæ, & officij, & huiusmodi, quas acceperunt, ita & illi debent eos adiuuare, 1. Petr. 4. vnusquisquè sicut accepit gratiam in alterutrum illam administrantes. Item in corpore vno sunt multa membra habentia actus, & officia diuersa, & vnumquodquè membrum seruit de officio suo, & officium alterius non assumit; Laici ergo, qui sunt manus, cuius est operari, melius faciunt hoc sollicitè agendo, quàm si assumerent oculi officium contemplationi ultra modum vacando. Præterea cogitare debent, quòd qui sustinent Prædicatores, sicut Pauli sustentantes vitam, participes sunt bonorum, qui per eos fiunt; Matth. 10. Qui recipit prophetam in nomine prophetæ, mercedem prophetæ recipiet. Item sæculares laborant vehementer pro vita sua quomodo habenda in mundo, quantò magis fratres laici pro vita gloriosa? Propter hoc
igitur

igitur laudabilior est frater laicus, qui succinctè dic-
tarum orationum, ad quas tenetur, dimittit solem-
nitatem, & multitudinem Missarum, & prolixita-
tem officij in Matutinis, & alio tempore, & occu-
pationes in Missis priuatis, & orationes extraordi-
narias, vt plus de tempore expendat in corporali
labore, quàm qui in his se detinens, & occupans,
minus operatur tempore operandi; præcipue cum
non sit sine magno periculo in ordine paupere, &
de eleemosynis viuente, huiusmodi eleemosynis pa-
sci ille, qui non est aptus ad seminandum spiritua-
lia aliqua, nisi per fructum sui laboris huiusmodi
recompenset.

Cap. XLVI.

Psalms, & hymnis cum oratis Deum; hoc versetur
in corde, quod profertur in ore.

¶ Licet propriè loquendo omnis psalmus sit hym-
nus, tamen hymnus est laus Dei cum cantico, &
quandoquè restringitur ad illos hymnos, qui habet
notabiliores cantus, & ideo accipitur hic pro illis,
qui in officio diuino habent distinctum modum in
cantu à psalmodia; vt sit sensus (cum oratis Deum)
psallendo, siue alio modo (hoc versetur &c.) Vel
aliter; psalmis, idest orationibus secretis, & hym-
nis, idest orationibus sonoris, scilicet publicis.
Vtrum obliget hoc mandatum. R. sicut fit in cano-
nica scriptura, August. enim quædam ponit in regu-
la, quæ non sunt tam præcepta, quàm incitamenta
ad bonum, de quarum numero hoc est vnum, vnde
virtute regulæ non obligatur ad hoc aliquis aliter,
quàm obligetur ex iure diuino; Cordis autem eua-
gatio in orationibus, aliquando accidit ex infirmi-
tate

tate humana, aliquando ex negligentia, aliquando ex proposito; Licet autem totum sit reprehensibile, tamen tertium magis, quàm secundum, & secundum magis, quàm primum. Item sunt quædam cogitationes cuiusdam necessitatis, sicut cum incumbit aliquis alicui, de quo oportuit eum cogitare; Sap. 9. Deprimit terrena inhabitatio sensum multa cogitantem; Aliæ vanitatis, Psal. Dominus scit cogitationes hominum, quoniam vanæ sunt; Aliæ iniquitatis; Sap. 1. Peruersæ cogitationes separant à Deo; In oratione ergo cauendum est à primis, sed plus à secundis, plus à tertijs. Item quædam oriuntur ex immissione dæmonum; quædam etiam ex culpa præcedenti, ut cum quis ante orationem adeo est vagus, quòd illa occasione occurrunt ei oratio, sicut & in somniando, quæ ipsum impediunt; quædam ex culpa præsentis, ut cum quis dicendo officium se occupat in alijs; Primum malum, secundum peius, tertium pessimum. Item in orando occurrunt quandoquæ cogitationes utiles, & de pertinentibus ad orationem, ut cum occasione alicuius verbi occurrentis in oratione cogitat quis aliquid utile ad sermonem; quandoquæ quidem vtilis, sed de impertinentibus, quandoquæ, & impertinentes, & inutiles, immo quandoquæ nociuæ; Primæ habent aliquam excusationem, Secundæ minorem, Tertiæ minimam. Multum igitur debent omnes, & maxime religiosi dare operam, ut orando versetur in corde, quod profertur in ore, alias oratio eorum erit simiatica. Simia enim interdum labia mouet ad modum orantis, licet nesciat, quid dicat. Matth. 15. Populus hic labijs me honorat, cor autem eorum longè est à me. Item cum quis loquitur proximo suo, cogitat in eo, quòd dicit, & tantò magis, quantò maior

ior est, cui loquitur; Cum ergo orando loquamur summo Deo, quantum cogitare debet quilibet in oratione sua? Bernardus. Cum ad orandum in Ecclesiam intraueris, fluctuantium cogitationum tumultum relinque exterius, vt soli Deo vacare possis. Item oratio cibus est cordis, sicut enim amittit dulcedinem boni morselli, qui non masticat eum, sic dulcedinem spiritualem orationum, qui non conterit dentibus intelligentiæ. Ber. Cibus in ore, psalmus in corde sapit; non negligat anima illum terens dentibus intelligentiæ, ne si fortè integrum glutiat, frustretur sapore palatum dulciore super mel, & fauum. Item in oratione petimus, vt Deus nobis intendat iuxta illud, Intende mihi, & exaudi me; Quomodo autem est probabile, quòd hoc faciat, si nos nobis non intendimus? Bernardus. Quomodo mihi intendet, qui mihi non intendo? Item quod magis efficax est in oratione, est ex parte cordis; August. Potius ad vocem cordis, quàm corporis aures eius; Et Isidor. Oratio cordis est, non labiorum; nequè enim verba deprecantis Deus intendit, sed orantis cor aspicit; qui ergo cor non habet in oratione, subtrahit, quod melius est in oratione, quod vt euitetur, recolligendum est cor, cum acceditur ad orandum; Interdum etiam respiciendum est in libro, vt melius cor applicetur ad ea, quæ dicuntur. Quamuis autem ex infirmitate humana homo non possit habere cor multum in orationibus suis, non tamen propter hoc tepescendum est ab oratione; quia pauper, licet non semper clamet, tamen sola instantia cordis diu sedendo ad portam dominum mouet ad misericordiam, & multò magis de misericordia Dei est confidendum. Item cum à principio orationis fuerit intentio meritoria, totum

tum opus, quod sequitur, est meritorium, licet non semper actu cogitetur de illo; & valet opus orationis, & si non per modum orationis, tamen per modum meriti.

Cap. XXXXVII.

E*T nolite cantare, nisi quod legitis esse cantandum. Quod aut ita scriptum est, ut non can. nō cantetur.*

¶ Hic tradit mandatum circa maturitatem in cā-
tando, ut non aliud, quàm quod scriptum est, can-
tetur, cum dicit (nolite &c.) Neque aliter, cum di-
cit (Quod autem non ita, &c.) Licet hæretici re-
prehendant cantus vocales Ecclesiæ, tamen Eccle-
sia non sine multa ratione ipsos instituit. Habet e-
nim huiusmodi cantus, siue iubilus multos viles
effectus. Vnde est, quòd cor liquefacit in affectum
sanctum. Vnde de beato Augustino scriptum est.
Flebat autem vberimè in hymnis, & canticis sua-
uè sonantis Ecclesiæ vocibus vehementer affectus.
Alius mentem eleuat. Greg. Oculos cordis attol-
lit iubilus laudis. Vnde multi rapiuntur in extasim
in huiusmodi iubilatione, & ideo postquàm dictum
est in psal. In Ecclesijs benedicite Deo domino, se-
quitur ibi, Beniamin adolescentulus in mentis ex-
cessu. Tertius tristitiam malam depellit. Glos. su-
per illo verbo Iacob. 5. Tristatur aliquis vestrū; cre-
bra psalmodiæ dulcedo nociuam tristitiæ pestem
depellit. Ideo dicit David. Exultabunt labia mea,
id est ita replebor gaudio, quod in labijs apparebit,
cum cantauero tibi. Quartus præparat viam cor-
dis domino ad infusionem multiformium gratiarū.
Greg. super Ezech. Cum vox psalmodiæ per inten-
tionem cordis agitur, omnipotenti domino iter

ad cor præparatur. Isti effectus sunt in anima. Quintus diabolus fugat. 1. Reg. 16. Dauid tollebat ci-
tharam, & psallebat manu sua, & refocillabatur
Saul, & leuius se habebat, recedebat enim ab eo spi-
ritus malus. Sextus Deum delectat. 1. Cant. Sonet
Vox tua in auribus meis. Septimus militantem
Ecclesiam assimilat triumphanti, quæ semper iubi-
lat. Bernar. super Can. Nihil in terris ita propriè re-
præsentat quendam cœlestis habitationis statum,
sicut alacritas laudantium Deum. Octauus inimi-
cos Ecclesiæ conturbat. 2. Paral. 20. Cumquæ cœpif-
sent laudes canere, vertit dominus insidias inimi-
corum in semetipsos, & percussi sunt.

Cap. XLVIII.

Porro circa libros Ecclesiasticos benè correctos,
& benè legibiles habendos est magna diligen-
tia facienda. Per ipsos enim dirigimur in ea, quæ
pertinent ad Deum, per scholasticos vero in ea, quæ
pertinent ad proximum, vt est docere, prædicare,
& huiusmodi; Magis vero curandum est nobis de
his, quæ pertinent ad Deum, quàm proximum.
Item huiusmodi libri sunt communes, & omnes il-
lis vtuntur, non est autem ita de scholasticis; com-
munia vero præponenda sunt proprijs. Item ad istos
necesse habent recurrere senes, & malè videntes, &
minus prouecti. Item pertinent ad ornatum Eccle-
siæ. Item ex defectu eorum fiunt defectus, & erro-
res in officio, vnde plures turbationes, & scandala
oriuntur, quàm ex insufficientia aliorum librorum,
quæ valdè sunt cauenda in seruitio diuino. Cauen-
dum est autem cuilibet, ne aliud, vel aliter, quàm
scriptum est in libris, cantet, vel legat ex proprio
sensu;

sensu; magis enim sequenda est auctoritas maioris, quàm etiam ratio, quia hoc humilitatem, illud presumptionem sapit, sicut dicit expositor regulæ. Preterea si iste vult cantare aliud, quàm scriptum est, ille similiter, fiunt diuisiones, & turbationes in officio. Item tollerabilius est aliquid minus benè cantari, vel legi, dummodo non sit error intollerabilis; qui nusquàm inuenitur in libris, quàm fieri turbationem in officio, & ideo semper est faciendum secundum libros, valdè etiam curandum est cuilibet, vt sciat, quæ scripta sunt de officio, si enim studetur cum tanta diligentia in illis, ad quæ nullus tenetur, quantò magis vbi addiscunt homines illa, ad quæ tenentur? Hæc enim est scientia salutaris, idest ad salutem pertinens.

Cap. XLIX.

Carnem vestram domate ieiunijs, & abstinentia esca, & potus, quantum valetudo permittit.

Hic tradit mandata circa secundam partem penitentia, quæ pertinet ad carnis macerationem. Et circa hanc dat tria mandata. Primum pertinet ad potentes, ibi, (Carnem vestram, &c.) Secundum, ad impotētes, ibi, (Cum autem aliquis, &c.) Tertium, ad vtrosquē, ibi, (Cum acceditis, &c.) Et vide, quòd secundum surgit ex primo, tertium ex secūdo. Cum enim dicit, quantum valetudo permittit, quia posset aliquis dicere, Quid faciendum ergo est in impotentibus? subiungit, (cum autem aliquis non potest ieiunare, &c.) Et quia in illo dicit, non tamen extra horam prandij; Ideo quid in prandio vtriusquē sit agendum, subiungit (Cum acceditis, &c.) Circa primum vero dans mandatum dicit, quid carni facien-

ciendum, quia domanda, non extinguenda, & per quæ, quia per duo, scilicet per ieiunia, & per abstinentias duplices, scilicet esca, & potus. Quamuis enim ad omnes seruos Dei pertineat carnem domare, tamen specialiter requiritur hoc à Prædicatore. Prædicatores enim frequenter prædicant Iesum Christum, & hunc crucifixum, & ad huiusmodi etiam crucifixionem alios inducunt; Quanta autem verecūdia est huiusmodi Prædicatori à corpore incrassato? Item Prædicatoris est in Prædicationibus, confessionibus, consilijs persuadere, vel imponere alijs, vt carnem doment; quid autem prodest huiusmodi ita esse sollicitum de alijs circa ista, & pro salute sua digito nolle talia tangere? Ideo dixit Apostolus. Castigo corpus meum, & in seruitutem redigo, ne fortè, cum alijs prædicauerim; ipse reprobus efficiar. Item Prædicatoris est discurrere per mundum inter fœminas, & alia incentiua ad malum, & ideo, si corpus eius non fuerit edomatum, de facili præcipitabit eum. Et ideo dixit sancta Sinclerice in vitis patrum; Ieiunium frænum est monacho ad peccatum. Item Prædicator est nuncius missus à rege cœlesti, non solet autem credi nuncio, nisi ostendat signa, per quæ constet ipsum verum esse nuncium, & de familia illius, à quo dicit se missum; Prædicator igitur debet signa domini sui portare manifestè; Hæc autem sunt carnis maceratio, Gal. 5. Qui Christi sunt, carnem suam crucifixerunt. Item Prædicatoris est per famam sanctitatis mundum attrahere ad se, quod maximè fit per abstinentiam, sicut patet de sancto Iohanne Baptista. Item Prædicatoris est laudes Dei dulcius personare, Pellis autem pinguis non benè resonat; Ideo sicut de pellibus melius desiccatis fiunt tympana

ad benè cantandum; sic dulcius resonat laudes diuinas Prædicator siccus, quam pinguis; & ideo secundum Expositionem Gregor. dicitur in Psal. Laudate dominum in tympano, quod sit scilicet de pelle deficcata. Item Prædicatoris est prædicare de scripturis sanctis, & ideo debet se aptare ad penetrandum subtiliter, ad quod multum ualet carnis maceratio, quia secundum Hieron. pinguis uenter non gignit sensum tenuem: Danieli enim uescenti leguminibus, & aqua data est intelligentia uisionum. Item Prædicatoris est inducere homines ad uitam Christi tenendam, ut sicut ipse ambulauit, ita & ipsi ambulent; melius autem docet pingere, qui non solum uerbo, sed imaginem ostendendo docet, & ideo Prædicator debet uitam Christi, non solum uerbis prædicare, sed etiam in se ostendere; & ideo Paulus .Corinth. 4. Semper mortificationem Iesu in corpore uestro circumferentes, ut & uita Christi in corporibus uestris manifestetur.

Cap. L.

Sed sunt quidam miseri religiosi, qui non secundum spiritum, sed secundum carnem ambulantes uentris ingluuie superati uitæ austeritatem, quam assumpserunt uoluntariè, post experientiam exhorrentes inconuenientia multa hac occasione committunt; hoc est enim, quod interdum eos fugat de statu claustrali, sicut dicitur de lupo famelico, quod fames fugat eum de nemore. Modò si occurrat opportunitas, facilè transeuntes ad dignitates, contempto periculo curæ animarum: modò si hoc non possunt, libenter morantes in curijs, etiam in statu uerecundiæ pleno; modò ad aliam religio-

nem se transferentes non animo austeriorem vitam ducendi, sed laxiorem; modo quod peius est, cum apostasiæ crimine ad Ægyptum sæculi propter eius cibaria reuertentes, & in his omnibus ventris refectiōnem quærentes; & cum eam inuenerint, non possunt ab ea separari, sed in ea detenti, nunquam reuertuntur ad claustrum; sicut coruus adhærens cadaveri non est ad archam reuersus. Item hoc est, quod remanentibus in claustro quibusdam facit interdum sic displiciter illud, vt carcerem. Vidi ego quendam fratrem de morantibus in curijs, qui cum captus fuisset à domino suo domino Fedetico, & traditus cuidam ciui ad custodiam, laborauerunt fratres, vt cum eis posset morari, quod cum obtinissent, & aliquot diebus cum eis fuisset, videns austeram vitam ipsorum, magis elegit ire ad carcerem, quàm cum eis amplius commorari. Item hoc est, quod facit aliquos quasi in continuo discursu esse, nec possunt in claustris teneri: Cum autem sunt in conuentibus, in quibus melius procurantur quàm extra, vix possunt ad alia negotia, etiam sancta emit ti. Et facti sunt similes histrionibus, qui semper frequentant loca, vbi sunt conuiuia meliora, contra quos dicitur, Eccles. 7. Melius est ire ad domum luctus, quàm ad domum conuiuij. Isti, qui sic vexantur ab ista peste, non possunt residere in oratione, lectioni insistere, & huiusmodi spiritualibus vacare, sed assueti per domum circumeuntes, modò explorant, quid comedere, modò expectant, si aliquid de foris apportatur, modò solem respiciunt, quando descendit, vel ascendit, modò sacristam molestant, modò pulsantem ad horas, quod transierit hora comedēdi, modo morantur prope hospitium, si fortè occurrat ibidem occasio, quod inuitentur;

Si de-

Si defunt aliqua, murmurant, sicut filij Israel in deserto; si restrictiones circa carnalia fiant, pro viribus se opponunt, si datur pœnitentia pertinens ad abstinentiam, aut non faciunt, aut tantum differunt, quod sepelitur obliuione; In dispensationibus secum faciendis super abstinentijs, necessitatem, vel rationem aliquam non attendunt; Prælatos circa hoc faciles, optimos reputant, & commendant, rigidos vero in his intollerabiles reputant; Si vero infirmitate contingat eos laborare, tantam curam habent carnis in medicinalibus, in recreationibus, & huiusmodi, quod ab his auelli non possunt; Interdum vero propter huiusmodi vitium proprietatis incidunt, semper apud aliquos procurantes haberi aliquid, ad quod recursum habere possint, prouidentia diuina deficiente eisdem; Interdum vero intantum excedunt in cibis, & potibus, & medicinis, & cœnis serotinis, quod carnem miseram, cui fomenta ministrare debuerant, destruunt more illorum, qui quos debent balneare, interdum suffocant, & extinguunt. Quis his consideratis non videat, quod Nabuzardan princeps Coquorum; id est gula domum domini, scilicet religionem totam destruit, & incendit, 1.Reg.26.

Cap. LI.

Proinde disciplina abstinentiarum, sicut statuta est, debet rigide obseruari à quolibet, & à Prælati est super hoc diligenter vigilandum, ne facile circa hoc aliquid relaxetur; ad quod præter damna prædicta sunt multa alia inductiua, reperitur enim, quod Iudei cum tanto rigore obseruant abstinentias suas, quod potius eligunt mori, quàm con-

tra facere, sicut patet 2. Machab. 7. Item etiam in Hæreticis, & Sarracenis inuenitur. Quanta ergo verecundia est, quod homines, qui reputantur summæ perfectionis inter Christianos, leues inueniantur in suis obseruantijs relaxandis. Item non inuenitur aliquod peccatum humanum grauius punitum, quàm fractio abstinentiæ impositæ primis parentibus, quantum ergo ex hoc exemplo timendum est illis, qui tam facilè debitas abstinentias frangunt? Ideo dicitur Zach. 13. Adam exemplum meum ab adolescentia mea. Item abstinentia habet multos impugnatores; ipsam enim impugnat caro: Item creaturæ visu pulchræ, & ad vescendum suaues: Ipsam impugnat, quod maius est, ratio, quæ facilè contra eam inuenit argumenta: Item societas, quæ sæpius sua importunitate ipsam molestat; & ideo tanto virtuosior, si perdurat, quanto magis impugnatur. Ideo viri virtutum, quibus dicitur viriliter agere, districtè eam seruant, vt ex hoc fiant in virtutibus gloriosiores, quia quanto pugna grauior, tanto victoria gloriosior. Item licet caro multa possit, tamen interdum simulat se impotentem, sicut Vulpes, quæ in orto simulat se mortuam, vt possit capere gallinam, Et ideo non est ei passim credendum, sed cauendum, ne decipiat. Item venter est sicut malus Episcopus, qui procurationem, quam semel accepit, iterum exigit, licet non habeat ius in ea; & ideo sicut clerici propter hoc resistunt Episcopo in prima receptione, sic faciendum est ventri à bono viro; Iob 3. Vocem exactoris scilicet ventris non audit. Item spiritus habet ius in homine, similiter & caro, debet enim homo sibi suam necessitatem; sicut interdum duo nobiles habent iura sua in eodem castro. Consueuerunt autem huiusmodi nobiles,

biles, maxime ubi non bene concordant, multum cauere ne alter acquirat aliquid in iure alterius; Cum ergo caro, & spiritus sibi inuicem aduersentur, quantum debet cauere spiritus, ne caro acquirat aliquid super eum? Certum est autem, quod homo non debet carni vitam secundum voluntatem suam, sed solum secundum necessitatem, Ro. 8. Debitorum sumus non carni, ut secundum carnem uiuamus; Et ideo valde timendum est spiritui, ne ultra necessitatem carni aliquid ministretur, ne ex hoc caro iura sua in homine ampliet supra spiritum extraordinarie. Item recreationes, quæ præter cursum consuetum recipiuntur, solent generare infirmitates. Item consuetudo facit hominem potentior: E contrario interruptio consuetudinis facit minus potentem. Et ideo frangentibus facile abstinentias semper est difficilius ad consueta redire. Item huiusmodi dispensationes interrumpunt præscriptiones de minimis, quas ex consuetudine continua acquirit spiritus super carnem.

Cap. LII.

Scierdum, quod licet abstinentiæ districtè sint obseruandæ, tamen semper cauenda est in istis indiscretio, & hoc ratione societatis, paupertatis, & officij; cum enim quis affligit carnem indiscretè, incurrit interdum infirmitatem, & impotentiam, per quam redditur alijs onerosus; Prudens autem est ab huiusmodi cauere, iuxta illud 2. Cor. 11. Sine onere me vobis obseruari, & seruabo. Item cum aliquis hac occasione incurrit infirmitatem, oportet plures expensas pro eo fieri, quod cauendum est diligenter, ubi est paupertas. Exem-

plum in vitis patrum de hæremita, qui factus Episcopus plures faciebat abstinentias in Episcopatu, quàm antea; Requisitus quare, R. quòd, cum erat in hæremito, conseruabat corpus suum, vt poterat, bono modo cogitans, quòd si infirmaretur, non haberet necessaria, in Episcopatu autem non timebat hoc, quia in illo paratæ erant sibi consolationes in omni infirmitate sua. Item prudentis viatoris, qui habet multas dietas facere, est cum multa diligentia equum suum custodire, multò magis viro, qui habet in prædicatione, vel alijs pertinentijs ad actiuam assiduè occupari, est cauendum, ne deficiat ei equ^o corporis proprii, & magis quàm de alio equo; Si enim deficit equus viatori, potest alium quærere, vel ipsum relinquendo pedibus iter conficere, vel alij custodiam cõmittere: Hic vero non sic, quia corpus aliud nemo potest acquirere sibi, nec alij custodiendum committere. Ideo dicebat Psal. Fortitudinem meam, scilicet vires corporis mei ad te custodiam. Propter hoc etiam notabiliter dicit August. carnem domãdam, non extinguendam; domandam, ne lasciuiat, vt pullus indomitus, ne rebellet, vt seruus malus, ne desæuiat, vt fera crudelis. Gregorius in Moralibus. Per abstinentiam vitia sunt extinguenda, non caro. Et tanto quis sibi debet præesse moderamine, vt & ad culpam caro non superbiat, & tamen ad effectum rectitudinis in opere subsistat. Hinc est, quòd viri sancti solent interdum illas abstinentias libenter facere, quæ parum nocent corpori, & tamen multum valent ad virtutem, Vt sunt abstinentia à fructibus, à contrarijs suæ complexionis non solum propter sanitatem, sed etiam propter virtutem, ab herbis, & fructibus crudis à falsis aliquibus, à multitudine ferculorum, à cibis

sum-

sumptuosus, & curiosè paratis, ab extraordinarijs
 comestitionibus, ab omni notabilitate in potu, & si-
 milibus multis, per quæ & vitia carnis domantur,
 nec multum læditur corporis valetudo.

Cap. LIII.

Quamuis August. imponat abstinentiam escæ,
 & potus, tamen omni religioso specialiter ca-
 uendum est ab omni excessu circa potum; ad quod
 multa inductiua sunt. Sarracani enim secundum
 legem suam perpetuò abstinent à vino. Rechabitæ
 in veteri lege nunquam bibebant vinum, Hiere. 35.
 Nazareni tempore consecrationis suæ non bibebāt
 vinum, vel aliud, quod inebriare posset. Numeri 5.
 Cum autem hæc omnia fiant ab eis propter falsam
 religionem, vel figuram nostræ religionis, quàm
 reprehensibilis est in viris religiosis excessus in vi-
 no? Item sicut narrant historiæ, Carolus non bi-
 bebat nisi ter in mensa, Ludouicus etiam Rex Fran-
 corum in vase, in quo bibebat, dicitur habuisse si-
 gnum, vsquè ad quod ministrabatur ei vinum, &
 residuum erat aqua, & erat ferè in eadem quantita-
 te cum vino; Si ergo hoc faciunt sæculares, quanta
 verecundia est, quòd religiosi excedant in potu?
 Possunt autem esse multa reprehensibilia religiosis
 circa potum. Vnum circa quantitatem, Ideo dicit
 Apostolus Timotheo; Modico vino vttere; Ber. ad
 monachos, tantum placet nobis auctoritas Aposto-
 li de bibendo vino, obsecro ne tradatis obliuioni,
 quod dicit modico vino. Aliud est circa fortitu-
 dinem vini. Dicitur in consilio, Vinum sibi tem-
 peret, & se vino, quanto magis hoc faciendum est
 religiosis? Aliud circa varietatem vini. Indecens

est religiosi non esse contentos vno vino, sed varietates non paucas in vno cōuiuio congregare. Aliud est circa pretiositatem, non enim est viri religiosi in haustu vini pretium ponere, vnde multi pauperes possent commodè sustentari. Vnde vox illa Sapientia 2. Vino pretioso nos impleamus; non est bonorum, sed hominum pessimorum. Aliud est circa extraordinarias potationes. Si enim & asini non adaquantur nisi certis horis; quàm indecens est religioso tota die bibere modò hic, modò ibi? Aliud circa verba. Sunt enim quidam, qui per totam interdum mensam loquuntur de vinis, & præsentibus, & absentibus dicentes, Hoc est tale, illud est tale. Osee 7. Super vinum ruminabant. Aliud est circa subtilitatem iudicandi de vinis. Sunt enim quidam, qui ita sciunt iudicare subtiliter de valore vinorum, & conditione, quàm si essent magistri in illa arte.

Cap. LIV.

Sciendum, quòd vinum abutentibus multa mala solet facere, quæ sunt valdè contraria religionis honestati. Religiosos enim summè decet continentia ratione voti; vinum autem incitat ad libidinem. Prouerb. 20. Luxuriosa res est vinum. Item ipsi in societate debèt habere cor vnum, & animam vnā cum alijs, vinum autem facit turbationem ad alios, Eccles. 31. Vinum multum potatum irritationem facit. Item ipsorum est laudibus diuinis insistere; hoc autem facit blasphemare, Glof. super illud 1. ad Corinth. 10. Si uè comeditis, si uè bibitis &c. Si violentia te ingurgites, quasunque laudes lingua sonet, vita blasphemat. Ipsorum est etiam linguam disci-

disciplinatam habere, alioquin secundum Iacob. vana est eorum religio; Hoc autem facit fatuè loqui, 3. Esdræ, 3. Omnia operta facit loqui. Ipsorum vita debet esse in luctu; vinum autem incitat ad vanam lætitiā, Ibidem omnem mentem conuertit in securitatem, & non meminit omnem tristitiā. Ipsorum est contemplationi vacare; uinum autem obscurat intellectum naturalem. Glos. super illud Prouerb. 23. Cui suffossio oculorum. Immoderatus haustus uini interioris oculi; & exterioris ingerit cæcitatem. Impedit quoque scientiam acquirendam, Ideo dicit Salomon, Eccles. 2. Ut animum meum transferrem ad sapientiam, cogitavi à uino abstrahere carnem meam. Impedit similiter scientiam infundendam; Ideo dicitur Daniel 10. Trium hebdomadarum diebus caro, & uinum non introierunt in os meum, scilicet quando aspirabat ad reuelationem. Saluator etiam legitur dixisse discipulis, Attendite, ne grauentur corda uestra crapula, & ebrietate. Sed nunquid tenentur omnes professores huius regulæ domare carnem, quantum possunt? R. Quædam sunt in regula, quæ potius sunt incitamenta ad bonum, quàm obligatoria per præceptum, & hoc est de talibus.

Cap. LV.

NOtandum uero, quòd natura humana, quæ ualdè fortis fuit in prima conditione sui, non est adeo debilitata, quin multa possit in abstinentijs. Quòd patet in abstinentijs magnis, & longis, quas sustinent inuiti in carceribus, & quas faciunt aliqui pro sanitate acquirenda, uel conseruanda, & quas fecerunt, & faciunt adhuc multi sancti, non
solum

solum viri, sed etiam mulieres fragilioris naturæ. Si enim tanta sustinent inuiti, si tanta sustinent aliqui pro corpore, si tanta fragilis natura, quantum possent homines, si essent voluntarij, si tantum diligenter animas, vt corpora? Profectò si probarent vires suas, inuenirent se plus posse, quàm credunt. Se probant homines, quantum possunt in proijciendo lapidem, quantum in currendo, quantum in luctando, & similibus; in his autem, quæ Dei sunt, non probant vires suas. Bernar. Ignosce, ignosce domine; dissimulamur, tergiuersamur, & in his, quæ ad te pertinent, vix est, qui velit experiri, quid possit. Dicunt filij Zebedæi Matth. 20. Possumus scilicet bibere calicem passionis, & nos non possumus leuem abstinentiam sustinere? Dicit Paulus ad Phil. 4. Omnia possum in eo, qui me confortat, & nos, quibus numquam deest diuinum adiutorium, diffidimus nos pauca posse; proculdubio possumus multa, sed nolumus. Hieronymus. Non posse dicunt esse in causa, cum non velle sit in culpa.

Cap. LVI.

Cum autem aliquis non potest ieiunare, non tamen extra horam prandij aliquid alimentorum sumat, nisi cum egrotat. ¶ Hic tradit mandatum ieiunij, quo ad impotentes, & est sensus. Cum aliquis non potest ieiunare, non tenetur; tamen ne solutio ieiunij cedat in dissolutionem, non comedat extra horam prandij, nisi fortè non solum impotens, sed etiam infirmus, cum infirmis lex non sit posita, quin comedant, quodocunque necessitas requirit. Eliciantur autem ex hoc mandato tria. Primum est, quod mitius agendum est in ieiunijs cum debilibus, quæ cum forti-

fortibus. Secundū, q̄ cauenda est extraordinaria co-
mestio in clauſtro diligenter à religioſis, cum etiam
debilibus eam inhibeat Auguſt. Tertium, q̄ opera
pietatis circa infirmos præferenda ſunt rigori reli-
gionis, cū eorū comestio ſub certa lege non claudat̃.

¶ Quæritur circa primum, quando Prælato con-
ſtabit de debilitate fratris, ſi vero verbo ipſius ſtan-
dum eſt, multis poterit eſſe occaſio mentiendi. Rñ-
deo, quamdiu habetur bona opinio de fratre, q̄ ſit
ſeruus Dei, credendum eſt ei de debilitate, quam
dicit ſe habere, ſi vero præſumptiones malę haben-
tur de eo, nō oportet ſemper credere verbo ſuo, niſi
conſtet per alia argumenta. Quid fiet de illis, qui
non dicunt debilitatem ſuam? Rñdeo, pij Prælati
eſt cognoscere vultum pecoris ſui, vtrum macilen-
tum ſit, aut pingue, & eſſe ſollicitum non ſolum de
anima, ſed etiam de corpore ipſius; debet etiam fra-
tribus iniungere, vt ſint ſolliciti inuicem aduertere,
ſi frater aliquis aliquam neceſſitatem patitur, & eā
ſibi charitatiuē indicare, & illorū maximē, qui præ
humilitate, vel verecūdia ſolent de his tacere.

¶ Quæritur vtrum Prælatus poſſit diſpenſare in
ieiunijs eccleſiæ. Reſpondeo. Non credo, q̄ poſſit;
ſed cum ſit credendum, q̄ eccleſia numquā inten-
dit obligare ad ieiunia impotentes, poteſt iudicare
de impotentia ſubditorum, quæ oritur, vel ratione
iuuentutis, vel ſenectutis, vel complexionis, vel ſi-
milium, & eius declarationem poſſunt ſubditi cum
bona conſcientia tenere.

Cap. LVII.

Circa ſecundum nota de his, qui extra horam
prandij comedūt. Si qui fortassis fructus quos-
cum-

cumquē comederent extra mensam, quòd est cauendum ualdè uiris sanctis, nec modicum reputandum. Nonnè totus mundus damnatus est propter huiusmodi comestionem primorum parentum? Nonnè monialis transiens per hortum, & comedens lactucam, cum lactuca comedit diabolus, sicut refert Gregor. in Dialogo? Item religiosi multum debēt resistere tentationi comestionis huiusmodi. Exemplum in vitis patrum de quodam, qui cum fuisset tentatus de comedendo cucumere in horto, suspendit illum in cella ante oculos, & sic in aspectu illius se cruciabat. Item quidam Archiepiscopus vir magnæ honestatis, cum se posuisset in mensa, & apportati fuissent ei ficus, quos multum diligebat, accepit vnum, volens eum comedere ante benedictionem, quam tradidit obliuioni, cum autem hoc aduertisset, deposuit eum, & dixit gulæ suæ. Domina gula nimis festinabatis, & ideo facietis hanc penitentiam, quia hodie non comedetis ficus, & sic stantibus ficibus coram se non comedit ex eis. Item qui extra horam comedunt, fugientes communem refectionem fratrum, captant certam horam, vel locum alium, vt aliquid melius habeant, contra quod viri religiosi dant operam, vt semper comedant cum conuentu, & hoc vt pascantur non solum corpore, sed & spiritu ex lectione, Vnde infra (ne solæ vobis fauces sumant cibum, sed & aures verbum Dei esuriant.) Item vt vitent dissolutiones, quæ solent accidere in huiusmodi, maximè in verbis, propter quæ legitur punitus diues in lingua. Luc. 6. vt réfrigeret (inquit) linguam meam, glos. inter conuiuia, sicut mos est, loquacitati studuit. Item ne fructum perdant, qui sequitur ex moderata refectione, de qua Chrys. Nihil sic salutem,

lutem, nihil sic sensuum acumen operatur, nihil sic ægritudinem fugat, sicut moderata refectionio. Huiusmodi autem moderamen melius seruatur in conuentu, quàm extra. Item vt certiores sint de societate Christi, cum enim Christus sit, vbicunquè duo, vel tres congregati sunt in nomine eius, Matth. 18. certius est ipsum esse, ubi plures sunt, & magis specialiter propter ipsum congregati. Item propter meliorem sequelam huius refectionis, hanc enim refectionem sequuntur gratiarum actiones; uisitatio ecclesiæ, orationes secretæ, meditationes sanctæ, officium mortuorum, & similia, illam autem locutiones, potationes, & aliæ dissolutiones more illorum, de quibus dicitur; Exod. 32. Sedit populus manducare, & bibere, & surrexerunt ludere. Item propter scandalum uitandum fratrum. Sicut enim sequentes conuentum multis sunt ad exemplum in bonum, ita comestiones extraordinariæ multis sunt occasio iuditiorum multorum, murmuris, & turbationis, quæ sunt ualdè timenda; 1. Cor. 8. Si esca mea scandalizat fratrem meum, non manducabo carnem in æternum. Propter hæc igitur, & alia quædam non sunt talia conuiuia extraordinaria sectanda, Osee, 4. Quasi uacca lasciuiens declinauit Israel; quæ scilicet separatur se ab alijs in pascuis; & post. Dimitte eum, quia separatum est conuiuium eius. Sed nunquid Nouitij, & alij debiles; qui comedunt ante horam prandij, transgrediuntur hoc mandatum? R. non, dummodo comedant in hora, & loco statutis à maioribus; hoc enim, quod secundum statutum fit, hora debita reputatur. Item nunquid, qui medicinalibus utitur, uel bibit extra horam prandij, transgreditur hoc mandatum? R. non, & hoc patet ex hoc, quod dicit.

(ali-

(alimentorum) medicinalia enim, & potus licet interdū nutriant, tñ simpliciter non uocātur alimēta.

¶ Nota etiam; q̄ religiosi non debent os aperire ad cibum, sicut bestia, quæ non obseruant uices, locum, & tempus; & ideo ad maiorem gulæ refrenationem statutum est apud eos, ut non comedant, uel bibant, nisi sedendo, & præcedente benedictione, & cum duabus manibus.

Cap. LVIII.

Circa tertium nota, quòd quidam prætextu religionis exercent quasdam austeritates circa infirmos, in cibis, in silentijs, & alijs huiusmodi, præferentes huiusmodi austeritatem operibus pietatis, & in hoc putantes se esse religiosos; Hæc est religio Phariseorum maledicta à domino, Matth. 23. Veh uobis scribæ, & Pharisei, qui decimatis mentram, & anethum, & relinquitis, quæ grauiora sunt legis, iudicium, & misericordiam, &c. hæc non est religio quam Iac. diffin. d. i. c. Religio munda, & immaculata apud Deum, & patrem hæc est, uisitare pupillos, & uiduas in tribulatione eorum: Eadem ratione in uisitatione infirmorum dicitur in uitispatrum, q̄ fuerunt duo fratres, quorum unus multum ieiunabat, alter seruiebat infirmis deuotè; quæsitum autem fuit à quodam sene, quis eorum esset maioris meriti: & dixit senex, si frater ille ieiunans appendat se per nares, non potest peruenire ad mensuram illius, qui seruit infirmis. Mandat dominus Luc. 6. ut simus misericordes, sicut & pater noster cœlestis misericors est, sed miserationes eius sunt super omnia opera eius, ergo in homine præualet misericordia super omnia opera eius. Nō est autem maior

maior misericordia, quam quæ exercetur circa infirmos; ibi enim pascitur esuriens, potatur sitiens, uestis nudo paratur, lectus fatigato, extraneo subuenitur circa hospitalitatem, uisitatur ligatus uinculis infirmitatis, & tandem exhibentur mortuo officia humanitatis, & sic in hoc opere misericordiæ omnia opera adimplentur. Præterea in operibus rigoris religionis seruitur quandoquæ Deo de uno sensu, uel in membro; ut in abstinentia de gustu, in uigilijs de uisu, in aspero uestitu de tactu, in silentio de lingua, in clausura de pedibus, in opere uero pietatis circa infirmos seruit ei oculus uigilando, & interdum horrenda uidendo, olfactus fetores sentiendo, auditus dura audiendo interdum ab ipso infirmo, tactus infirmum tractando, gustus propter eos comestionem dimittendo, lingua eos consolando, pes pro eis discurrendo, immò & totum corpus pro eis diuersimodè laborando. Quæ ergo religio poterit huic comparari, in qua sic homo se ipsum religat, ut Deo ex toto seruiat in proximo? Huius religionis sectandæ dedit nobis exemplum dominus, qui tam benignum se exhibuit infirmis eos uisitando, dulciter alloquendo, frequenter sanando, qui & Apostolos mittendo, de eis inungendis, & sanandis mandauit.

Cap. LIX.

Cum acceditis ad mensam, donec inde surgatis, quod uobis secundum consuetudinem legitur, sine tumultu, & contentione audite, ne sola uobis fauces sumant cibum, sed & aures esuriant uerbum Dei. ¶ Hic ponit mandatum, quod pertinet tam ad im-
potentes, quàm ad potentes. Nota, quòd in concilio

cilio Toletano statutum fuit, quòd in conuiuio sacerdotali semper habeatur lectio de scripturis diuinis, dist. 44. Pro reuerentia. Huius autem statuti triplex potest esse causa. Prima, ut ibi non solum homo exterior, sed etiam interior pasceretur uerbo Dei; contra quod dicitur Iob, 24. de iniquo, Pascit sterilem, quæ non parit, scilicet carnem, & uiduæ non benefecit, scilicet animæ, quæ in præsentis solatio uiri sui, scilicet Christi, caret. Secunda, ut anima intenta diuinæ lectioni, & per hoc retracta à delectatione ciborum, per hoc magis peccata caueat, quæ ex huiusmodi delectationibus nasci solent, contra quod in Epistola Iudæ de quibusdam dicitur, Animales spiritum nō habentes; quia sicut animalia, quæ sunt sine ratione ex tota concupiscentia effundunt se super escam, ita & ipsi. Vnde ipsi præmittitur in eadem Epistola, Hi sunt in epulis suis maculæ conuiuantes sine timore. Tertia, ut per hoc euitentur nociua uerba, quæ solent in conuiujs oriri, propter quæ diues legitur punitus in lingua. Hieron. Conuiuia tunc ex charitate ueraciter prodeunt, cum in eis absentium nulla uita mordetur. Nullus ex illusione reprehenditur, nec in eis negotiorum sæcularium inanes fabulæ audiuntur. Huiusmodi statutum olim seruatum fuit, cum clerici in simul comedebant, & adhuc seruatur apud aliquos, qui sic comedunt, sed quia pauci sunt tales, multum euanuit apud omnes. A religiosis hoc perfectius est obseruandum. Episcopi interdum lectionem habent in parte conuiuij, sed religiosi debent habere per totum; Ideo dicit August. (donec inde surgatis.) Item apud eos tantus tumultus est, quòd lectio uix potest audiri; sed apud religiosos seruatur silentium, ut lectio quietius audiatur; Et ideo dicit

dicit (ne solæ vobis fauces sumant cibum, sed & aures esuriant verbum Dei.) ¶ Et nota, quòd vbi sunt uiri spirituales, & maximè prædicatores in aliquo conuiuio, vbi non est lectio, conuenit eos semper aliqua ædificatoria dicere ante finem conuiuij, vt numquàm cibus carnalis sit absquè spiritali. Hinc est, quòd candelabrum, quòd significat lumen scripturæ, erat in mensa panum in tabernaculo, & in templo, & tabulæ testamenti erant in archa cum manna, Hebr. 9. Hinc est, quòd Vilhelmus Episcopus Parisien. in mensa sua uerbis ædificatorijs solebat affluere, & dicebat se nolle alium lectorem in mensa sua. Huiusmodi exemplum reliquit nobis Saluator; qui, ex quo prædicare cæpit, non legitur in conuiuio fuisse, in quo non dixerit aliqua ædificatoria. Nam comedit cum Phariseo, & ibi dixit, Simon habeo tibi aliquid dicere, Lu. 7. Item fecit Leui ei conuiuium in domo sua, & Pharisæis murmurantibus, quia cum peccatoribus manducabat, dixit. Non est opus ualentibus medicus, sed malè habentibus, Mat. 9. cap. Item intrauit in domum cuiusdam principis manducare panem, & intendens quomodo primos accubitus eligerent inuitati, dixit ad eos, cum inuitatus fueris ad nuptias, non recumbas in primo loco, &c. Lu. 14. Item comedit cum Zachæo, & ibi dixit, Hodie huic domui salus facta est. Luc. 19. Item facta est ei cœna in Bethania, & ibi orta murmuratione de vnguenti effusione super eum, multa dixit ædificatoria in excusationem, & laudem Mariæ, Iohan. 12. Item, cœnauit cum discipulis, & ibi multa dixit ædificatoria, Luc. 22. & Iohan. 13. Item post resurrectionem comedit cum discipulis offerentibus ei partem piscis assi, & fauum mellis, & dixit eis, Hæc sunt

G uerba,

verba quæ locutus sum vobis, Luc. vltim. Item in die Ascensionis conuescens præcepit eis, ab Hierosolymis ne discederent, &c. Actuum 1.

Cap. LX.

Qui infirmi sunt ex pristina consuetudine, si aliter tractantur in victu, non debet alijs molestum esse, nec iniustum videri eis, quos fecit aliqua consuetudo fortiores.

¶ Traditis mandatis circa duo, quæ pertinent ad duas partes pœnitentiæ, tradit hic circa quædã, quæ pertinent ad tertiam, quæ est circa opera misericordiæ: quia vero non est eius intentio tradere circa hæc omnia plenariè, sed solum quæ vt frequentius religiosi sunt magis necessaria, tradit hic mandata circa abusiones, quæ apud eos oriri solent circa misericordias, quæ fiunt, vel circa ægrotationes, vt hic, vel circa delicatos, ibi, (Et si eis qui venerunt, &c.) vel circa recreandos post infirmitatem, ibi, (Quemadmodum autem ægrotantes.) ¶ Et nota, quòd aliqui solent molestè ferre, quo ad voluntatem, & iniustum reputant quo ad rationem, quando quibusdam ægrotantibus fiunt misericordiæ aliquæ in victu. Contra quàm abusionem ponit hic mandatum; Item solent isti reputare tales esse melioris conditionis, & contra hanc abusionem ponit aliud mandatum dicens. Nec illos fœliciores putent, Circa primum nota, quòd infirmi ex pristina consuetudine dicuntur illi, qui frequenter solent ægrotari; Istis autem, siuè actu ægrotent, siuè non, sunt faciendæ aliquæ misericordiæ in victu modò in infirmatorio, modò in hospitio, interdum etiam in conuentu, dummodò eorum infirmitas sit manifesta. Et

hoc est aliter tractare in victu, q̄ autē sic faciendum sit, pater. Dñs enim aliter tractauit in victu humanam naturam in statu firmitatis, & aliter in statu infirmitatis; in primo enim statu concessit ei victum fructus arboris tantum, in secundo vero concessit panem, & herbas, & carnes post diluuium. Præterea Ars medicinæ hoc præcepit; ipsa autem ordinata est à Deo, ergo qui huic resistit, Dei ordinationi resistit. Item nonnè Apostolus præcepit Timotheo, vt vteretur vino propter frequentes infirmitates, quod non legitur alijs præcepisse, qui non habebant huiusmodi infirmitates; porro qui hoc molestè ferunt, infirmantur de aliorum medicina. Item sunt deteriores Iuda, qui murmurauit in effusione vnguenti super Christum sanum; ipsi autē murmurant de effusione misericordiæ super ipsum infirmum. Item magnæ immisericordiæ est nō facere misericordiam, maioris est non diligere, sed maximæ eam non ferre; quantæ ergo immisericordiæ sunt homines, qui etiam factam ab alijs molestè ferunt. Sunt autem, quod grauius est, quidam, qui hoc iniustum iudicant æstimantes quod, quia omnia communia sunt inter fratres, omnia debent diuidi æqualiter; q̄ si verum est, ergo iniuste fecissent Apostoli, qui diuidebant communia, sicut cuiquē opus erat; Item eadem ratione omnis homo ageret iniuste, qui maiorem cūram haberet de membro infirmo, quàm de sano, & magis expenderet pro eo.

Item secundum hoc, iniuste ageret paterfamilias, partem domus debiliorem reficiendo; quæ omnia quia falsa sunt, putet, quod hoc non debet iniustum videri.

Cap. LXI.

NEc illos feliciores putent, quia sumunt, quod non sumunt ipsi, sed potius sibi gratulentur, quia valent, quod non valent illi.

¶ Hic ponit mandatum, secundum circa abusum secundam, ubi nota, quod infirmi, licet plus sumant, non sunt feliciores reputandi, quam sani. Primo, quia maiorem habent indigentiam, quod non est felicitatis, sed miseriæ. Secundo, quia frequenter, quod sumunt, cum magna verecundia sumunt, & angustia. Tertio, quia illa, quæ sumunt, licet meliora, non eos tantum delectant, ut sanos minus bona. Quarto, quia cum his omnibus habent multas afflictiones alias, quæ eos vexant. Quinto, quia priuantur multis consolationibus spiritualibus, quas habent sani in lectionibus, in officijs Ecclesiæ, in studijs, & huiusmodi. Sexto, quia oportet eos etiam inuitos, alios in multis portare, ut ipsi portentur; quæ omnia potius habent miseriæ, quam felicitatem: porro qui sani sunt, & fortes in religione, habent multam misericordiam gaudendi in domino, & ei gratias agendi. Status enim infirmitatis est multis occasio murmuris, & impatientiæ, & accidiæ, & aliorum peccatorum, à quibus sani sunt liberi, sunt enim liberi à multa seruitute, qua sunt infirmi subiecti Prælati, & Officialibus occasione suæ necessitatis; Item libentius in omni conuentu habentur, & queruntur; Item onera ordinis sunt eis leuiora; Item habent vnde plus lucrari possunt in meritis, quanto potentiores sunt ad plura; Item iocundiores, & in pluribus consolationibus, & sine tedio vitam ducunt, per quæ patet ratio huius mādati.

Cap.

Cap. LXII.

ET si eis, qui venerunt ex moribus delicatioribus ad monasterium, aliquid alimentorum, vestimentorum, operimentorumve datur, quod alijs fortioribus, & ideo fœlicioribus non datur, cogitare debent, quibus non datur, quantum de sua seculari vita illi ad istam descenderint, quamvis usque ad aliorum, qui sunt corpore firmiores, frugalitatem pervenire non potuerint.

¶ Duę sunt abusiones, quę contingunt interdum occasione misericordiarũ, quę fiunt delicatis apud alios, quibus hæc non fiunt; Vna est, quia non considerant rationem huius; & cõtra hãc ponitur istud mandatum; Secunda, quia volunt idem fieri sibi; contra quam ponitur sequens mandatum, (Nec debent velle, &c.) ¶ Circa primum nota, quod in religione sunt faciendę aliquę misericordię illis, qui fuerunt in sæculo delicati. Primo, ne ex nimia durtia tepescant, vel de ingressu peniteant. Secundò, ne infirmitatem incurrentes perpetuò sibi, & alijs graues fiant. Terrio, vt iocundius domino seruiant. Quarto, ne sæculares hoc audientes religionem horreant. Quinto, ne in religione omnibus odibilis rusticitas inueniatur. Sexto, ne religio irrationabilior sit natura, quę morbo nobiliori, & teneriori delicatiora ministrat. Septimo, ne carcer domini crudelior sit carceribus tyrannorum; quis enim tyrannus, vel etiam, Sarracenus nobilibus, & delicatis incarceratis apud se non facit maiorem misericordiam, quàm alijs. Octauo, vt ex hoc ad meliora prouocentur: nobilis enim animus magis prouocatur ad bonum per misericordias, & gratias, quàm duritias. Sed sciendum, quod quędam sunt gra-

tiæ, quæ vertuntur in dissolutionem, vt est nimia libertas loquendi, quædam in periculum, vt est nimia frequentatio parentum, & similia, quæ non sunt necessitatis. Quia vero circa ista non expedit fieri misericordias, sicut circa illa, quæ sunt necessitatis; ideo nominat tria, circa quæ fit misericordia; scilicet alimenta, vestimenta, & operimenta, quæ etiam sunt necessitatis. Circa ista vero cauendū est ab excessu nimio. Primo, ne religio pereat. Secundo, ne alij iustè scandalizentur. Tertio, vt ipsi, quibus fit misericordia, ab excessu sæculari per mediū temperantiæ paulatim transeant ad religionis frugalitatē; & ideo notabiliter dicit aliquid alimentorū, quod sonat in modicum. Attendendū, quòd interdum solent aliqui subditi mumurare contra facientes misericordias, cū nesciant causam facti, ideo dicit paterfamilias Mat. 20. An non licet mihi, quod volo, facere? Solent etiam quandoquē scandalizari contra recipientes, cū nesciant necessitates eorum; ideo dominus Phariseis scandalizatis contra discipulos confricantes spicas sabbatho respondendo ostendit eorum necessitatem, sicut Dauid simili necessitate comedit panes, quos non licebat; Mat. 12. Solent iterum quandoquē se præferre illis in corde suo, cū non vrantur talibus; Sed comparatio status ad statum in sæculo tollit huiusmodi superbiam. Exemplum in vitis patr. de monacho Ægyptio duræ vitæ, qui fuerat rusticus in sæculo, qui cum visitasset Arsenium, qui delicatius viuebat, primo scandalizatus in eo, cum intellexisset, quantum fuerat in sæculo delicatus, dixit: Veh mihi, quia tu de delitijs venisti ad duram vitam, Ego autem de dura vita veni ad delitias. Bene ergo dicit, cogitare debent, quibus non datur, &c. vt patet, cogitantes rationem facti,

Si, vt contra facientes huiusmodi misericordias, non murmurent; attendentes vero eorum necessitatem in recipientes, non scandalizentur; suum vero statum sæculare in illorum statui comparantes, illis se in religione non præferant.

Cap. LXIII.

NEc debent velle omnes, quòd paucos viderint amplius, non quia honorantur, sed quia tolerantur, accipere; ne contingat detestanda perversitas; vt in monasterio, ubiq; pos. fiunt di. laboriosi, fiant pauperes delicati.

¶ Hic tradit mandatum circa abusione secundâ; dicens duo. Vnum in quo est substantia mandati, cum addit (ne contingat.) Et nota; quòd non dicit, non velint omnes, &c. quia tanquam prudens in suis mandatis declinat pericula. Quod autem pertinet ad recreationem carnis valde est difficile, & ideo, vt non inijciat laqueum ad peccandum, non dicit, non velint, Dicit autem (Non debent velle) vt magis moueantur ad hoc, quod dicit; plus enim mouere solet ratio inserta in mandato, quàm solum mandatum, quia hoc per se est debitum, & rationale; & verè non debent omnes velle accipere, quòd vident non multos, sed paucos accipere; quia dispensatio, quæ solet fieri paucis; nõ est redigenda in ius commune. Sed heu hæc ita nõ cohibent quosdam, qui in sæculo in tenui statu fuerunt, quin etiam in religione velint viuere delicatè, vbi qui magni fuerunt in sæculo, asperis sunt contenti. Dicitur Dan. 1. quod ipse, & socij eius, qui erant de genere regio in curia regis, contemptis cibis regijs, & uino, de quo ipse bibebat, contenti erant legumini-

G 4 bus,

bus, & aqua; Et isti de genere rusticano, contemptis uilibus, uolunt nutriri cibis, & uino regalibus in domo Christi. Item dicitur Esaia 11. Leo quasi bos comedet paleas, & exponitur de tempore aduentus Christi; secundum Hiero. ad litteram, nunquā impletum est, uel implebitur, sed ideo dicitur, quia nobiles, sicut leo, in illo tempore sic humiliati sunt, ut essent contenti cibis rusticanis, sicut bos; per quem rusticus designatur. ¶ Sed nota, quod uir Dei spiritu plenus. uocat hanc culpam non solum peruersitatem, sed peruersitatem detestandam, & benè. Sunt enim tria, quæ dominus specialiter detestatur. Primum est superbia; Vnde Amos 6. De testor ego superbiam Iacob. Secundum est crudelitas; Prouerb. 8. Labia mea detestabuntur impium, idest illum, qui est sine pietate. Tertium est seminatio discordiæ inter fratres, Prouerb. 6. Et septimum detestatur anima eius, illum scilicet, qui seminat inter fratres discordiam. Sanè non sunt sine superbia pauperes, nec sine crudelitate incompassionis, nec sine occasione discordiæ inter fratres, cum uolunt æquari illis, qui fuerunt diuites, in recreationibus. Et ideo uerè est huiusmodi peruersitas detestanda.

Cap. LXIV.

Sanè, quemadmodum agrotantes necesse habent minus accipere, ne grauentur, ita & post agritudinem sic tractandi sunt, ut citius recreentur, etiam si de humillima sæculi paupertate uenerint, tanquā hoc illis contulerit recentior agritudo; quod diuitibus anterior consuetudo.

¶ Traditis mandatis circa abusiones, quæ solent oriri circa misericordias, quæ fiunt infirmis, uel delicatis,

delicatis, tradit hic mandata circa eas, quæ oriuntur circa recreandos post infirmitatem, quæ sunt duæ. Vna ex parte Prælatorum, quando eas non faciunt, Alia circa recipientes, cum eis abutuntur. Circa primum ponit hic mandatum; Circa secundum, infra cum dicit (sed cum vires, &c.)

¶ Nota ex prædictis, quod sunt mandata tradita contra abusiones videntium misericordias hucusquæ; hic autem contra abusionem facientium, in sequenti vero clausula circa abusionem recipientium.

¶ Nota autem hic primo circa illud, quod dicit (minus accipere, ne grauentur) quod excessus in quantitate cibi, vel potus grauat quo ad corpus, quo ad animam, & quo ad famam. Quo ad corpus, quia auferit quietem somni; Eccles. 3. Saturitas diuitis non sinit eum dormire. Item generat infirmitatem, quia secundum Senecam multa fercula multos morbos fecerunt; Eccles. 37. In multis escis erit infirmitas. Item addit graues dolores; Iob 20. Cum satiatus fuerit, arctabitur, & omnis dolor irruet super eum. De his tribus habetur Eccles. 31. ubi dicitur, vigilia, & cholera, & tortura viro infrunito, id est homini, qui est sine frugalitate, quæ est parcitas in victu; Si autem hæc facit huiusmodi excessus etiam in sano, quanto magis in infirmo? Item grauat quo ad animam, quia obtundit aciem cordis, sicut dicitur in libro collationum Hier. Nihil adeo obstruit intelligentiam, sicut comessatio, & ebrietas. Contra dicitur Daniel 1. Quia pueris abstinentibus data est amplior intelligentia. Item confundit memoriam, ut non recordetur quis agendorum; Osee 13. Saturati obliti sunt mei. Item incitat carnalem concupiscentiam; Hiere. 5. Saturavi eos, & mœchati sunt. Propter hæc omnia dixit dominus discipulis
Luc.

Luc. 21. Attendite, ne grauentur corda vestra crapula; & ebrietate. Item grauat quo ad famam, dicuntur enim isti similes Sodomis, de quibus dicitur *Ezechie 26.* Hæc fuit iniquitas Sodomæ, saturitas panis. Et nota, sicut tangitur in libro collationum, dicitur panis, quia saturitas etiam in cibis vilibus est cauenda. Item solent dici canes, qui tantum comedunt, quod oportet eos vomere; *Esa. 56.* Canes impudentissimi nescierunt saturitatem, ad hæc cauenda instruit nos natura, quæ dedit homini minus os secundum sui corporis quantitatem, quàm alijs animalibus; instruit etiam medicina; vnde cum quæsitum fuisset à Galeno, Quæ est perfecta medicina? dixit, abstinentia; Et idem, cum quæsitum fuisset ab eo, quare parum comederet, respondit, vt viuam. Instruit etiam sanctorum doctrina; vnde non immeritò irascitur dominus contrarium facientibus, secundum illud *Psal.* Manducauerunt, & saturati sunt nimis, & post, adhuc escæ eorum erant in ore ipsorum, & ira Dei ascendit super eos.

Cap. LXV.

Secundo nota circa illud (sic tractandi sunt, &c.) quia sunt quidam Prælati, qui circa recreationes faciendas debilibus inueniuntur interdum duri nimis, de quibus dicitur *Ezech. 33.* Quod infirmum fuit, non consolidastis. Sunt autem tria, quæ solent ab hoc retrahere. Primum est species religionis, sub prætextu enim religionis tractant fratres durè interdum; sed deberent cogitare, quòd religio munda, & immaculata apud Deum (de cuius iudicio magis est curandum) hæc est, *Iacob. 1.* Visitare pupillos, & viduas in tribulatione eorū, quod est

est opus misericordiæ; ergo eadem ratione in omni opere misericordiæ est vera religio. Secundum est tenacitas auaritiæ sub specie paupertatis, quam allegant; sed deberent cogitare, quod si essent largi dispensatores secundum sui Domini voluntatem, Dominus, qui diues est, largius eis necessaria ministraret. Consuevit enim Dominus dispensatori ministrare expensas, postquam omnia expendit; & ideo dicitur Luc. 6. Date, & dabitur vobis. Tertium est duritia cordis, sunt enim quidam, qui indurantur ad suos, quasi non sint sui, vt struthio; faciles ad duritias, sed duri ad misericordiam; sed deberent attendere, quod in scripturis Prælati vocantur matres; Bern. ad Prælatos, Discite vos matres esse, non dominos, vt more matrum ad subditos pia gestetis viscera. Sic faciebat Paulus, qui dicit 1. Thes. 2. Facti sumus in medio vestri, tanquam si nutrix foueat filios suos. Sic etiam docebat Timotheum, dicens. Exerce te ad pietatem. Cessantibus igitur causis prædictis minus bonis, sic tractandi sunt debiles in refectionibus, quo ad cibum; in repausationibus, ne ad labores grauentur; in dispensationibus circa religionis rigorem, vt citius genua debilia roborentur, & roborati per recreationes congruas ad religionem, pro qua videntur huiusmodi Prælati zelare, citius reuertantur; ne expensas, quas timent ex diuturnitate languoris, oporteat ad augeri; & ipsi pro opere pietatis consequantur promissionem vitæ, quæ nunc est, & futuræ. (Sed cum dolore.) Notandum est, quod sunt quidam Prælati, qui huiusmodi recreationis faciunt minus indigentibus propter aliquam eorum magnitudinem, & de humilioribus quibusdam magis indigentibus non curant. Bern. Videmus multos, qui,
quod

quod est crassum assumentes, quod debile est projiciunt, quod valde cauendum est. Primo, ne vitium acceptionis personæ in domo Dei inueniatur. Si enim non est deferendum pauperi in iudicio iustitiæ contra diuitem, sicut habetur ex lege Exod. 23. multo minus deferendum est diuiti contra pauperem, vel pusillum in operibus misericordiæ, ne iustitia lædatur. Si enim tanta est vis pietatis, quod in necessitate aliena facit propria; quanto magis iustum est, vt communia fratri indigenti communicentur? Non est igitur hoc solum misericordia, sed debitum, propter quod dicitur, cap. 4. de opere pietatis, Et redde debitum tuum. Non est ergo contrarium, si fiat sine iustitiæ læsione. Tertium, vt maius meritum habeatur; cum enim, quod sit minimis suis, Deus factum sibi reputet, quanto quis maior est, tantò maiora fieri sibi reputat, & tantò habet acceptius, & tantò magis remunerat; & ideo notabiliter dicitur. Matth. 25. non solum de minimis, sed de minoribus; Quamdiu, inquit, non fecistis vni de minoribus his, nec mihi fecistis. Ad cauendum igitur personarum acceptionem, ad conseruationem iustitiæ, ad meritum augmentum, pie tractandi sunt fratres in huiusmodi recreationibus, etiam si de humilima sæculi paupertate venerint, tanquàm hoc illis fiat ratione infirmitatis præcedentis de nouo, quod diuitibus sit interdum ratione consuetudinis antiquæ, quam in sæculo habuerunt. Et est argumentum ex hoc, quod condescendendum est aliquibus in aliquo ratione consuetudinis præcedentis. Vnde dicitur quod B. Bern. cuidam monacho, qui timebat frigus in capite multum, concessit contra morem ordinis, vt portaret caputium, sicut in sæculo consueuerat; Quod cum fecisset

fecisset aliquot diebus, & semel existens in choro videret alios monachos senes, & iuuenes extractis caputijs in frigore cantantes, viriliter compunctus in seipso extractum caputium de capite proiecit in medium chori, & postea numquàm voluit portare. Item dicitur de quodam Abbate sancto, quòd quibusdam iuuenibus monachis tentatis de carnibus anserum, quas in sæculo libenter comedebant, concessit, vt clanculo paratas comederent; quod cum facerent, in ipsa mensa confusi in seipsis surrexerunt, & intrantes claustrum, pulsato cymbalo, intrauerunt refectory, & fabas cum alijs comederunt. Item dicitur de quodam alio viro magnæ religionis, & famæ, quòd cuidam subdito suo, qui ceciderat in tristitiam, concessit vallare in aliquo loco occulto, sicut in sæculo optimè facere consueuerat, & dicitur eidem valuisse, & quo ad corpus, & quo ad animã. Hæc igitur, & similia & si non sint trahenda ad consequentiam, tamen si fiant interdum, & raro à viris sanctis, credendum est, quòd fiant illo inspirante, qui populo suo suspiranti ad ollas carniū consuetas dedit contra morem vastæ solitudinis carnes in abundantia in deserto.

¶ Sed, cum vires pristinas reparauerint, redeant ad feliciorē consuetudinē suā, quā famulos Dei tanto amplius decet, quanto minus indigent, ne cibi eos teneat voluptas iam vegetatos, quos necessitas leuaret infirmos.

Cap. LXVI.

DVæ sunt abusiones, quæ interdum reperiuntur in illis, quibus recreationes misericorditer impenduntur; Vna, quòd post sufficientem recreationem,

tionem non facile redeunt ad conuentum, contra quam ponitur istud mandatum; Alia, quodd felices estimant illos, qui diuites fuerunt, quibus, vt eis videtur, talia facilius impenduntur; contra quam ponitur sequens mandatum, s. (Illos aestiment, &c.)

¶ Sed nota circa illud, quod hic dicitur, quod natura ad hoc quolibet anno reparat vires in terræ nascentibus, vt & resumptis viribus ferat fructum consuetum. Item ad hoc datur annona copiosius equo, vt fortior effectus melius faciat dietam suam. Et ad hoc diuisit Deus tempus, in tempus quietis, scilicet noctem, & tempus laboris, scilicet diem, vt somno reſectis artubus in nocte, de die exeat homo ad opus suum. Sic & serui Dei, reparatis viribus per recreationes, debent redire ad labores consuetos conuentus, & hoc est eum diligere ex totis viribus, sicut præcepit Deuter. 6. cum, scilicet ex eius amore, in eius seruitium expendimus vires nostras: Benè ergo dicit vir sanctus (Sed, cum vires pristinas reparauerint, redeant ad feliciorem consuetudinem suam) scilicet ad vitam conuentualem, modo consueto sequendo chorum, reſectorium, capitulum, scholas, collationes, & alia fienda, quæ solent à conuentualibus exerceri. Et inde quanta mala solent prouenire interdum illis, qui se subtrahunt à sequendo conuentum, vnum est refrigeratio. Vnde Bern. cuidam monacho tentato de solitudine dixit. Sicut carbo ardet cum alijs ardentibus, separatus verò refrigerſcit, immò & nigrescit, & reddit fumum; similiter & titio ardens claret cum alijs, segregatus hæc eadem incurrit; ita monachus segregatus à conuentu facile frigescit à furore in corde, & denigratur conuersatione, & reddit fumum malæ famæ. Aliud est indignatio regis æterni.

æterni. Omnis enim congregatio facta est, quasi exercitus quidam Domini; Iuxta illud Can.6. Terribilis, ut castrorum acies ordinata; Solent autem multum indignari reges contra suos, qui non sequuntur exercitum suum; quomodo ergo non indignabitur rex regum, & Dominus dominantium contra tales? Indignabitur siquidem, & non modicum. Ideo in huius figuram David indignatur contra Miphiboseth, licet claudum, dicens ei, 2. Reg.19. Quare non venisti mecum Miphiboseth, scilicet cum alijs, qui erant mecum in exercitu meo? & abstulit ei medietatem possessionum suarum, secundum morem principum, qui punire solent à suo exercitu remanentes. Aliud est periculum latronum; Solet enim peregrinus separans se à socijs, facilius incidere in latrones: Ideo sicut peregrini pergentes Romam, cum transeunt per terras guerrarum, solent expectare magnam societatem, & illam præcipuè in qua est Potestas, vel aliquis magnus conducens; ita & religiosus se semper debet coniungere multitudini conuentus; præcipuè cum dominus sit semper in eo, tanquam in bona congregatione, Zach.8. In diebus illis apprehendent fimbriam viri Iudæi dicentes, Ibimus vobiscum, audiuius, quoniam Deus vobiscum est. Aliud est nota infidelitatis; Cum enim dominus mittat religiosi, tanquam operarijs in vinea sua laborantibus, quicquid boni habet, quomodo potest se excusare ab infidelitate ille operarius, religiosus scilicet, qui vult comedere omnia bona, quæ mittuntur, modò in infirmitorio, modò in cœna, modò cum fratribus hospitibus, & nihil sustinere laboris in conuentu. Sicut vespertilio, qui dicitur bibere oleum lâpadarum in ecclesia, & nihil laborat in cantando?

Et

Et Iob 2. e contrario, Si bona, inquit, suscepimus de manu Domini, mala autem cur non sustineamus, ut scilicet simus participes laboris, sicut consolationis? Aliud est erroris inuium. Ovis enim segregata à grege de facili vadit per multa inuia, sicut & isti per multas dissolutiones, & irreligiositates, & insolentias; 1. Pet. 2. Eratis sicut oves errantes, scilicet cum non eratis in ouili ecclesiæ. Aliud est exclusio à portu cœlesti, sicut solet accidere peregrino stulto eunti vltra mare, qui, cum naus applicat ad aliquem portum, solet egredi ad terram causa recreationis, & interim flante vento, alij proficiscuntur ad portum, & ipse in littore remanet, & ideo dicitur e contra de discipulis Domini, quasi de sapientibus, Matth. 8. Ascendente Iesu in nauiculam, secuti sunt eum discipuli eius, nolentes scilicet in littore remanere. Patet ergo ex his, quod incurrunt sex mala, Refrigerationem charitatis, & hoc quo ad se, Indignationem regis æterni, & hoc quo ad Deum, Periculum latronum, & hoc quo ad socios, Inuium erroris, & hoc quo ad viam, Carentiam portus, & hoc quo ad patriam.

¶ Item notandum, quod vita conuentualis habet sex prærogatiuas, quas multum debent diligere serui Dei. Prima est in meliori occupatione. Extra conuentum enim frequenter occupantur in aliquibus minus bonis, in conuentu vero est quasi continua occupatio in aliquo bono; & de hoc valdè curandum est bono viro, Vnde Hier. Semper aliquid boni operis facito, &c. Secunda est in maiori securitate, securior enim est quis ab hoste suo, cum est inter socios suos, quàm cum extra, & ideo Cain non interfecit fratrem suum, quando erat cum patre in domo cum suis, sed eductum in agro, sicut habetur.

habetur. Genes. 4. Tertia est in maiori ordinatione, omnia enim magis ordinatè fiunt in conuentu; Si autem omnibus fidelibus curandum est de huiusmodi ordinatione, secundum illud 1. Cor. 4. Omnia secundum ordinem fiant in vobis, quòd magis illi, qui viuunt in ordine, & ordinem sunt professi? Quarta est in maiori virtute, quicquid enim fit in conuentu, fit non secundum propriam voluntatem, sed alterius, quod virtuosius est, quàm si secundum propriam voluntatem fieret, cum illa nunc trahat huc, nunc illuc. Sene. Hoc solum virtuti adijcies, quod propriæ voluntati detraxeris. Quinta est in vniformitate maiori. Vita enim conuentualis est vniformis, sicut motus cœlestium, boni autem viri debent se libenter conformare cœlestibus; & ideo dicuntur frequenter in scriptura cœli: & valet multum huiusmodi vniformitas vitæ, quia varietas turbationem inducit & corporis, & anime, vniformitas vero quietem, & pacem; Psalm. In pace in idipsum dormiam, & requiescam; hoc est quod est idipsum, idest idem, siue vnum, dormiam in pace, & quiete. Sexta est in oratione maioris humilitatis. Sequestrator enim singularitatis etiam in bono habet occasionem illam superbiæ, de qua dixit Phariseus, Luc. 18. Non sum sicut cæteri hominum. In societate verò, cum nihil faciat quis, nisi quod alij, nō est occasio huiusmodi superbiæ; Quid autem magis cauendum viro sancto, quàm superbia? Tob. 4. Superbiam in tuo sensu, idest mente, nunquàm dominari permittas, in ipsa enim initium sumpsit omnis perditio. Sic ergo patet, quantæ prærogatiuæ sit vita conuentualis.

¶ Itē considerandū, q̄ conuentū sanctæ conuersationis semper sequit̄ ille magnus abbas, cui fecimus

professionem, & obedientiam, dicendo facio professionem, & promitto obedientiam Deo, quantum cumquē sint ibi pauci; Matth. 18. Vbi enim sunt duo, vel tres congregati in nomine meo, ibi sum in medio eorum. Item secundum regulam Euangelij, Quicumq; humiliores sunt, & minores apparent, sunt apud Deum maiores, Isti vero sunt, qui solent melius sequi conuentum. Item in huiusmodi conuentu frequenter fit pitantia gratiarum, & consolationum spiritualium; Vnde Apostoli congregati receperunt spiritum sanctum. Item ibi dat benedictionem, non hebdomadarius, vel abbas, vel Episcopus, sed maior his, videlicet summus Pontifex; Psalm. Illic enim, scilicet vbi fratres habitant in vnū, mandauit dominus benedictionem. Item statutum est Apostolicum, vt nullus subtrahat se ab isto conuentu; ad Heb. 10. Non deferentes collectionem vestrā, id est societatem in simul collectam, secundum glo. Item subtrahentes se solent grauiter damnificari. Saul recedens à cuneo Prophetarum amittebat gratiam prophetalem; 1. Reg. 19. Thomas absens à choro Apostolorum priuatus est visione dominica; Iohan. 20. Iudas exiens à societate apostolica colligatus est cum inimicis Christi, & factus est eius proditor; Matth. 28. Cum igitur præsentia abbatis in conuentu sequela maiorum cum ipsis in conuentu sequantur pitantiæ bonæ, benedictio magnæ personæ, statutum forte, & punitio grauis se subtrahentium, soleātq; huiusmodi rē mouere multum monachum ad sequendum conuentum; q̄ peruersus est religiosus, quem ad sequendum hunc conuentum non mouet præsentia Dei, nec coassistencia bonorum, nec pitantiæ gratiarum, nec benedictio Dei, nec tam grauis punitio transgressorum? Miserabiles igitur est

est consuetudo illa, de qua Heb. 10. (sicut consuetudinis est quibusdam) scilicet deferere collectionem, idest in simul collectos; Et e contra benedicta consuetudo illorum, qui libenter sequuntur ubique conuentum, cum, sicut supra dictum est, tot mala proueniant se subtrahentibus, tot bona sint in Vita conuentuali, & tot rationabiliter motiua ad sequendum; & ideo benè vir sanctus vocat istam consuetudinem fœliciozem, nō per comparisonem, quod contraria sit fœlix, sed per oppositionem, quia illa sit miserabilis valdè, ista vero valdè fœlix. Porro ista beata consuetudo, & si omnes deceat, tamen magis illos, qui minus indigent; in quo reprehenduntur illi specialiter, qui præter necessitatem morantur in recreationibus. Isti sunt sicut trutani, qui recipiuntur in diuitibus hospitalibus causa infirmitatis; & postquam sanati sunt, fingunt se adhuc infirmos, & ibidem morantur propter bonos lectos, & alia bona, contra quos dicit Dominus Marci 2. Paralytico sanato, Surge tolle grabatum tuum, & vade in domum tuam, sicut datur licentia trutano. Item horum corpus est sicut asinus, qui habens in stabulo pabulum bonum, & paleas ad quiescendum, in mane cum est tempus, quod vadat ad onera consueta, fingit se claudum, sed cum pungitur virga, & compellitur, inuenitur fortis; Et sic faciendum est tali corpori; Ecclesiastici 30. Cibaria, & virga, & onus asino, non dicit solum cibaria, sed post cibaria virgam compellentem ad onus. Item horum caro est, sicut murilegus claustrorum, qui in refectorio solet viuere de crustis, sed postquam consuevit ire ad infirmitorium, ibi inuenit morsellos, & reliquias carnum, numquàm vult redire ad refectorium, sed semper frequentat infirmitorium, quan-

rumcumquē exclametur, & confundatur ibi, nisi in vno casu, scilicet quando nihil datur ei ibidem, tunc enim redit ad refectorium: & sic subtrahenda sunt huiusmodi carnis delectabilia, vt reuertatur ad consueta. Exemplum de filio prodigo, Lucæ 15. Qui, postquā defuerunt delitiæ, redijt ad panes mercenariorum in domo patris; Quā indecens igitur est, vt famulus Dei sit tanquam trutanus, vel asinus fictus, vel murilegus? Ideo benè dicit (Quæ famulos Dei tantò amplius decet, quantò minus indigent.) Tamen interdum contingit, quòd illi, qui fuerunt valdè spirituales, & contemplatiui, postmodum voluptate ciborum illecti fiunt ita carnales, quòd vix possunt auelli ab huiusmodi cibis. Exemplum de aquila, quæ (sicut dicitur in libro collationum) cum volet in altissimis, subitò interdum se deijcit super cadauer, & ita fortiter adhæret, quod vix auelli possit ab eo, ita & isti; & ideo confundit eos Apostolus, Gal. 3. Sic stulti estis, vt cum spiritu ceperitis, nunc carne consumamini. Dicitur fabulosè, quod vrsus ideo habet paruas aures, & paruam caudam, quia cum vellent introducere ad locum mellis, vt comederet, fecit tantam difficultatem in intrando, cum traherent per aures, quas habebat longas, quod scissæ sunt in manibus eorum, & decurtatæ sunt; cum autem ingressus inuenisset mel, & nimis auidè deuoraret, & vellent eum trahere per caudam, quam habebat longam valdè, ita fortiter adhæsit melli, quòd in trahendo eum retro, rupta est cauda, & facta est parua. O quot sunt, & fuerunt, qui cum magna difficultate introducti primò ad recreationem, vix postmodum possunt auelli à melle dulcedinis illius, contra quos dicitur, Prouerb. 25. Mel inuenisti;

nisti; comede, quod sufficit tibi, quasi dicat, non nimis, sed moderatè. Dicitur iterum, quod fuit quidam Philosophus multum iustus, & audax in dicenda ueritate; cum autem multum, & audacter obloqueretur de rege suo, & curiâ eius, quæ erat multum carnalis; rex sapienter, & non per potentiam uolens sibi providere, usus consilio prudentium vocauit eum ad curiam suam, ut esset commensalis suus, & assisteret ei in consilijs; cum autem, licet quodammodo coactus, consensisset, per lapsum temporis paulatim inceperunt ei tantum placere delitiæ curiæ, & solatia carnalia, quod amisit cor dicendi aliquid contra regem, & curiam suam, & sic rex, & sui dimissi sunt in pace à lingua illa. Quis autem nesciat, quòd multi zelatores austeritatis, qui solebant durè loqui contra huiusmodi carnales, peiores eis effecti, in hoc habenas laxantes, postquam feruntur in eis similia, ex placencia, quam inueniunt, in eis irretiuntur, & taliam iam loqui non audent, sicut de cane dicitur, quod proiecto ei pane à latrone, cessat à latratu? Ideo dicitur, Eccl. 20. de xenijs, quæ possunt hic uocari pitantiæ recreationum, collatæ Prælati, & officialibus, & alijs his utentibus, quòd quasi multi in ore auertunt correctiones. Cum igitur uoluptas cibariorum uiros spirituales efficiat carnales, & carnalia, quæ prius fugiebant, faciat nimis sequi, & os apertum ad huiusmodi claudat à reprehensione aliorum salubri; benè dicit uir sanctus, quòd (caueat, ne cibi eos uoluptas teneat iam uergatos.) Tenet equidem quandoquæ etiam uiros bonos in uinculis huiusmodi uoluptas. Vidi ego quendam bonum religiosum, qui cum fuisset in infirmitorio aliquanto tempore, & appropinqua-

ret dies, quo oportebat eum redire ad conuentum, aduertens, quid agebatur in anima sua, dixit in quodam solatio, quod ita videbatur ei difficile relicto infirmitorio intrare conuentum, sicut ei fuit difficile à principio relicto sæculo intrare ordinem, & ideo valdè cauendum est etiam viris sanctis ab huiusmodi.

Cap. LXVII. -

Illos sanè existimant ditiores, qui in sustinenda paritate fuerint fortiores: melius est enim minus egerere, quàm plus habere.

¶ Quidam experti solatia recreationum apud se magnificant illos, qui diuites fuerunt, quibus, vt eis videtur, hæc frequentius impenduntur, & hæc est abusio secunda prædicta, contra quam ponitur mandatum hoc. Non enim diuites propter hoc debent reputari melioris conditionis, sed potius, qui fortes sunt ad sustinendam paritatem, debent ditiores aestimari. Et ponitur in hoc mandato, Primo substantia mandati, ibi (Illos aestiment) Secundo, causa mandati, ibi (Melius enim est, &c.)

¶ Et notandum, quòd duo sunt genera diuitiarum, corporales videlicet, & spirituales, de quibus habetur 1. Cor. 8. Propter vos egenus factus est, cum esset diues, vt eius inopia diuites essemus; Glos. in spiritualibus. Non enim ad hoc fuit pauper Iesus, vt essemus diuites in temporalibus. Consistunt autem istæ diuitiæ spirituales in virtutibus, Eccles. 44. Diuites in virtutibus, & in operibus earum, & 1. Tim. 6. Præcipe diuitibus huius sæculi diuites fieri in operibus bonis; quæ duo vno homine possunt dici iustitia generalis, quæ consistit in virtutibus, & in

in operibus earum meritorijs. Et attende quanta differentia est inter ista duo genera diuitiarum. dicitur Prouerb. 17. Quid prodest homini stulto habere diuitias, cum sapientiam emere non possit? Ergo propter diuitias corporales non potest haberi sapientia; ergo multo magis nec iustitia, quæ melior est; Ergo nec regnum cælorum, quod est maius; sed pro quolibet opere iustitiæ meritorio, quantumquæ modico, haberi potest regnum cælorum, ergo melius incomparabiliter omnibus diuitijs mundi iustitia. Sicut ergo incomparabiliter aureus denarius excedit denarium plumbeum in valore, ita & diuitiæ spirituales, corporales; quia per illas non potest haberi, nisi quid vile scilicet temporale aliquod, per istas vero potest haberi pretiosum regnum cælorum. Item solent diuitiæ temporales interdum prodesse possessori suo ad hoc, ut si fortè ex aliqua offensa cadat in manus domini ad penam mortis, per illas liberetur in curia illius. Non sic autem erit in die magnæ necessitatis; non ei tunc diuitiæ subuenient, iustitia vero subueniet. Preuerb. 11. Non proderunt diuitiæ in die ultionis, iustitia vero liberabit à morte. Item diuitiæ corporales non possunt transferri ad aliud sæculum. Iob 37. Diues, cum dormierit, nihil secum affert, opera vero iustitiæ illius deferuntur, Apoc. 14. Opera enim illorum, scilicet bonorum, sequuntur illos. Differunt ergo sicut præbenda, quam habet aliquis in aliqua Ecclesia, & extra nihil ei valet, & præbenda, quam habet quis, ubicunque moretur, quæ reputatur melioris conditionis. Item corporales diuitias multi volunt habere, & non possunt, propter quod dicitur Prouerb. 23. Ne erigas oculos ad opes, quas habere non potes, scilicet corporales, quæ vix ha-

beri possunt, e contra spirituales facile habere possunt, quicumquē uolunt, Eccles. 15. Ante hominem bonum, & malum, ad quod uoluerit, extendat manum; Ergo quicumquē uult, potest habere bonum, in quo consistunt diuitiē spirituales. Item istē possunt perire inuito domino, Eccles. 5. Pereunt in afflictione pessima, cum enim uel auferuntur ab alijs, uel amore, uel mutata fortuna euolant, si non inuito possessore hoc eueniret, non relinqueretur afflictio, sed quia inuitē hoc fit, relinquunt pessimam afflictionem. Spirituales uerō non possunt auferri à nolente; ideo dicitur Oseā. 8. Proiecit Israel bonum. Non enim bonum potest amitti, nisi proiciatur ab homine, secundum illud quod dicit Philosophia Boetij, Talia tibi arma contuleramus, scilicet uirtutes, quæ nisi prior abiecisses, inuicta te firmitate tuerentur. Item istæ habent annexam multam amaritudinem, Naum 3. Cuius diuitiæ mare, scilicet amaritudo; Est enim labor in acquirendo, timor in custodiendo, dolor in amittendo, anxietas in dando, angustia, cum in expendendo minorantur, miseria in uita, cum non expendantur. Quid autem sunt omnia ista, nisi amaritudines? Illæ uero iucunditates, Psal. In custodiendis illis retributio multa, Glos. In custodiendis dicit, non pro custodiendis, quia in præsentī gaudium habent, & iocunditatem, quæ tanta est, quod dici non potest. Item istæ sunt interdum nociuæ dominis suis, Eccles. 5. Diuitiæ conseruatae in malum domini sui, in malum scilicet culpæ, Eccles. 11. Si fueris diues, non eris immunis à peccato; nec à malo pænæ, quo ad præsens, 1. Tim. 6. Qui uolunt diuites fieri, incidunt in tentationes, & in laqueum diaboli, qui ducens eos illaqueatos ad sæculum ponit

nit in statu, in quo incurrent pœnam damnationis Matth. 19. Facilius est camelum per foramen acus transire, quàm diuitem intrare regnum cœlorum, & pœnam sensus iuxta illud Iacob. 5. Et manducabit carnes uestras tanquàm ignis, scilicet aurum, & argentum, & hęc duo, quo ad futurum. Verum e-contrario nihil in uita utilius est hominibus diuitijs spiritualibus, scilicet uirtutibus, sicut dicitur de quattuor cardinalibus Sap. 8. Cum ergo diuitiæ spirituales, sicut ex his patet, plus ualeant ad acquirendum magna; & succurrant in die magnæ necessitatis; & portari possint ubiquè; & facilius acquirantur; & difficilius amittantur; & habeant secum annexam iocunditatem; & summam conferant utilitatē, quæ omnia defunt corporalibus: patet, quòd excellentiores sunt incomparabiliter istæ illis. Et ideo uocantur à sapientia opes superbæ, Glo. Quicquid donorum fidelibus cœlitus datur, cunctis mundi opibus excellentius est. Sanè istis diuitijs multum abundant illi, qui fortes sunt ad sustinendum parcitatem, habent enim meritum abstinentiæ, & hoc pertinet ad abstinentiam; Item meritum patientiæ sustinendo, quod est carni molestum, & hoc pertinet ad fortitudinem; Item meritum obedientiæ sequendo communia statuta, & hoc pertinet ad iustitiam, sicut species eius; Item meritum prudentiæ spiritus, quæ est contraria prudentiæ carnis, & ipsam habet elidere suppeditando carnem, & hoc pertinet ad prudentiam; Item habet meritum fidei, quid enim, nisi fides Christi moueret eum eligere in bonis parcitatem? Hebr. 11. Fide Moyses elegit affligi cum populo Christi; Item meritum spei, uiri enim sancti exponunt corpus in præsentis propter spem percipiendi melius in resurrectione-

rectione: sicut miles exponit equum in seruitio regis liberaliter, sperans quòd si amittat eum, restituetur sibi à rege 2. Mach. 7. Dixit vnus de septem fratribus respiciens membra, quæ exponebat martyrio propter leges Dei, hæc ipsa despicio, quoniam ab ipso me recepturum spero. Item meritum charitatis, quia propter Deum hic sustinetur. Psal. Propter te mortificamur tota die, idest propter amorem tuum. Cum igitur fortes in sustinendo parcitatem habeant merita quattuor cardinalium, & trium theologicarum virtutum, vt patet ex his, valdè sunt diuites diuitijs spiritalibus, quæ quanto alijs prævalent, tanto chariores diuitiæ reputandæ; sicut diuitiæ auri sunt veriores, quam æris: & ideo benè dicit vir sanctus (quòd tales ditiores sunt æstimandi, quàm quicumquè alij propter diuitias corporales.)

Cap. LXVIII.

QUòd autem intelligat de diuitijs spiritalibus, patet per hoc, quod subiungit (Melius est enim, &c.) Melius est, respicit ea, quæ sunt virtutis, & est sensus: melius est minus egere, &c. hoc est, melioris conditionis est ille, qui minus eget, & minus habet. Verbi gratia. Melioris conditionis est sanus, quin minus eget medicinalibus, & minus habet, quam infirmus, qui plus eget eis, & plus habet, & potens contra frigus, qui minus habet de vestibus, & minus eget, quàm passibilis à frigore, qui plus eget vestibus, & plus habet: & sic in similibus. Sic natura humana melior fuit ante peccatum, quando minus eguit huiusmodi, & minus habuit: quàm post peccatum, quando plus eget, & plus habet.

Et

Et sicut ager, qui minus eget fino ad fructum suum faciendum, & minus ibi ponitur, melior est illo, qui plus eget, & in eo plus apportatur: & honesta nostra, quibus secundum Apostolum minorem honorem circundamus, quia minus egent, meliora reputantur inhonestis, quibus maiorem honorem circundamus, quia magis egent: Sic quoque melioris conditionis est, qui minus eget, quam qui plus egens plus habet.

¶ Huius autem est ratio multiplex. Prima, quia talis plus habens, quanto plura habet, tanto de pluribus habet reddere rationem. Lucæ 12. Cui plus committitur, ab eo plus exigitur. Secunda, quia quanto plus oportet ei ministrare, tanto magis est alijs onerosus, quod valde cauendum est seruo Dei 2. Corinth. 11. In omnibus me seruavi vobis sine onere, & seruabo. Tertia, quia minus acceptus est domino suo, sicut operarius, qui præter mercedem in sero reddendam, quanto plura requirit in procuratione diurna, tanto magis est tædiosus domino, & minus acceptus. Ideo Hiram Rex Tyri Salomoni petenti famulos suos in suum seruitium, & promittenti dare, quod vellet, volens ei complacere, non petijt pro eis superflua, sed tantum necessaria, Et tu inquit præbebis necessaria, non dicit superflua 3. Reg. 5. Quarta, quia eget maiori sollicitudine quotidiana pro suis scilicet necessitatibus: hoc autem non modicæ est miserix. Ideo Lucæ 10. præfertur pars Mariæ sine sollicitudine parti Marthæ, quæ erat sollicita circa plura. Quinta, quia oportet talem quasi in seruitutem redigi eorum, à quibus oportet eum huiusmodi abundantiam recipere: sicut mutuo accipiens seruus est fœnerantis, propter suam necessitatem. Prouerb. 22. Quod valde cōtrarium est libertati, in qua debent viuere sub gratia

gratia constituti. Ideo dicit Apostolus 1. Corint. 7. Nolite effici serui hominum. Sexta, quia minus paratus est ad obedientiam: sicut diuites, qui indigent multis equis, & multis necessarijs in uia, non ita citò possunt se mouere, sicut pauper, qui non habet nisi personam suam. Semper autem Dei seruus debet esse paratus: sic de Angelo dicitur Tob. 5. Et quasi ad ambulandum paratus. Luc. 11. Et vos estote parati. Cum ergo huiusmodi plus habentes, de pluribus habeant reddere rationem, & magis sint onerosi socijs, & minus accepti domino, suo in seruitio, & in angustia sollicitudinis, & in seruitute maiori, & minus parati ad obedientiae executione, benè dicuntur minus egentes, & minus habentes melioris conditionis, quàm isti. Et hoc est, q̄ dicitur. (Melius est enim minus egere, quàm plus habere.)

¶ *Tertium capitulum totius regulae.*

Non sit notabilis habitus uester: nec affectetis vestibus placere, sed moribus.

Cap. LXIX.

Hic incipit tertium capitulum, quod est de pertinentibus ad religionem, in quantum est status honestatis excellentis; ad huiusmodi uerò honestatem pertinet honestas in habitu, de qua hic; honestas in societate, de qua ibi (quando proceditis, &c.) honestas in moribus, ibi (in incensu,) Et super omnia inhonestatis correctio, ibi (quando ergo simul estis, &c.) Porro circa honestatem habitus tradit hæc duo mandata, unum contra exteriorem notabilitatem, Aliud contra interiorē affectionem, ex qua causatur. Primum ibi (Nec affectetis) Circa primum uerò notandum, quòd habitus

tus in religioso potest esse notabilis ex septem; scilicet ex pretiositate 1. Tim. 2. de mulieribus. Non in ueste pretiosa quantò magis hoc seruandum in uiro religioso paupertatem professo? Exemplum de Augustino, qui de se dicit: Fateor, de ueste pretiosa erubesco, non enim decet hanc professionem. Item ex mollitie; quia non decet uiros pœnitentiar huiusmodi mollities. Matth. 11. Ecce qui mollibus uestiuntur in domibus regum sunt, ubi scilicet non est locus pœnitentiæ. Inuenit per hoc à contrario, quod ubi est locus pœnitentiæ, non debet huiusmodi habitus inueniri. Item ex pulchritudine, quia sapit superbiam 1. ad Tim. 5. Habentes quibus tegamur, his contenti simus. Nota quòd dicit tegamur, Glos. super Matth. 3. ibi. Iohannes habebat uestimentum de pilis &c. Seruus Dei non debet habere uestimentum ad decorem, sed tantum ad tegendum nuditatem. Si autem hæc decet hominē Christianum, quantò magis religiosum? Item ex inusitatione: sicut quando est alterius coloris, uel formæ, uel quantitatis, uel in alio modo quocumquē dissimilis uestibus, quæ communiter ab alijs socijs deferuntur. Hæc est uestis peregrina, de qua dicitur Sopho. 1. Visitabo super omnes, qui induti sunt ueste peregrina. Et est argumentum, quòd non debent parcere uisitatores in articulo tali cuicumquē, qui talem inducit deformitatem. Item ex sæcularitate; quod est quando solutæ, uel manicæ sunt nimis strictæ, uel aliter aliqua lasciuiæ, uel curiositate uestis quacumquē in aliquo notanda. Sicut enim uestis aliquantulum religiosa in sæculari ostendit ipsum habere animum religiosum, ita in religioso uestis sæcularis ostendit ipsum habere animum sæcularem, Eccl. 20. Amictus hominis enūciat de illo.

Item

Item ex superfluitate, videlicet cum quis habet caputios superfluos, vel tunicas, vel alia quæcumque præter necessitatem iustam. Cum quidam religiosus fatigatus ex itinere quiesceret in via, quidam paruus puer accedens, & sedens iuxta eum, & videns in eo tres tunicas gradatim apparentes, & caputium, & cappam desuper, incepit computare dicens 1. 2. 3. 4. 5. & quasi scandalizatus dixit tale, vel simile verbum: Vt quid vos habetis tot tunicas, cum ego non habeam nisi vnā? Si autem puer sic fuit scandalizatus; quis dubitat multos in huiusmodi malum exemplum accipere? Ideo dominus volens cauere ab huiusmodi scandalo discipulos, dixit eis Matth. 10. Nequē duas tunicas habeatis. Et dicit Hieron. duas; necessariam, & superfluum, ex quo patet, quod superfluitas est interdicta discipulis Domini. Item ex nimia compositione, cui nimis intendunt interdum aliqui, aut in parando caputium, aut in ligando sotulares, & similibus, quod est muliebre. Psalm. Filia eorum compositæ. E contra dicitur Exod. 22. Non induetur vir veste muliebri. Tantum autem decet huiusmodi sollicitudo compositionis virum religiosum, quantum indecens reputatur in scripturis viros fieri effeminatos. Patet igitur, quod habitus viri religiosi non debet esse notabilis, vel in pretio, vel in mollitie, vel in decore, vel in extraneitate inusitata, vel in aliqua curiositate sæculari, vel in superfluitate, vel in nimia compositione.

Cap. LXX.

SI vero sit Prædicator super omnia decet eum vilitas in habitu, quod sic patet super illo verbo Zach.

Zach. 13. Non operientur pallio saccineo, dicit glo.
Mos erat prophetis indui sacco, cum populum ad
penitentiam prouocabant. Item Matth. 3. dicitur de
eximio prædicatore penitentiae. Ipse autem Iohan-
nes habebat vestimentum de pilis camelorum, &
zonam pelliceam circa lumbos suos. Item Apocal.
11. dicitur de Enoch & Helia: Prophetabunt die-
bus mille ducentis sexaginta amicti saccis. Si ergo
primi prædicatores penitentiae, scilicet prophetae in
veteri lege, & medius inter legem, & euangelium
sanctus Iohannes, & ultimi in fine venturi, scilicet
Enoch, & Helias, qui omnes fuerunt de genere Iu-
daeorum non curantium de abiectioe Christi, tam
vilibus vestibus vsi sunt, vel vtentur, ad mouendum
efficacius ad penitentiam; quanto magis competit
Prædicatori euangelicae paupertatis & qui speciali-
ter est ad prædicandum penitentiam deputatus, ui-
litas uestis? Item dicit Glo. super illo uerbo. Matth;
10. Erat Iohannes uestitus pilis camelorum: uestis
conueniens prædicatori: Et benè dicit conueniens:
Filius enim Dei, cum uoluit prædicare in mundo,
induit ualdè uilem uestem, scilicet carnem huma-
nam. Zach. 3. Et Iesus erat indutus sordidis uesti-
bus, quod exponitur super Iohannem de uestibus
nostrae mortalitatis, cum inuentus est habitu, ut ho-
mo. Prædicatoris uero est super omnes ipsum imi-
tari, & maximè in his, quæ prædicationi contingunt.
Item prædicatoris est debellare mundi gloriam, hæc
autem pro magna parte consistit in uestibus pretio-
sis: Quomodo autem potest gloriam mundi contem-
ptibilem reddere ille, in cuius toto corpore huius-
modi gloria relucet? Contigit Parisijs, q̄ quidam
Magister theologiae secularis prædicabat in uniuersa
sitate indutus optima ueste, uel cappa uoua in prin-
cipio

cipio hyemis. Cum autem leniter imprimeret uerba sua in cordibus auditorum; quidam fatuus, qui erat in medio scholarium surrexit, & dixit: Et tace: illa vestis pretiosa, quam habes, non permittit te audacter dicere veritatem, & fecit ei mirabilem confusionem. Nonne & ipse Apostolus hanc eandem confusionem facit facientibus contra suam prædicationem; cum dicit Rom. 3. Qui prædicas non furandum, furaris &c. quod habet locum in omni simili? Debent ergo, qui habent mundi prædicare contemptum, cauere, ne in suo habitu appareat aliquid, quod gloriam mundi prætendat. Item vilitas vestis signum fuit quondam veri prophetæ. unde Zach. 13. Non operientur pallio sacco, ut mentiatur: quod exponitur de falsis prophetis, qui volentes videri veri prophetæ, operiebant se saccis, sicut veri. ergo coopertura sacci fuit signum veri prophetæ, & à Deo missi: multò magis nunc est signum veri nunciij Dei, cum & ipsi Apostoli missi à Christo non fuerint, sicut solemnes nunciij mundi in gloria vestium, sed in multa paupertate apparuerunt in hoc mundo: Prædicator vero multum debet curare, ut habeat signa, per quæ appareat verus nuncius Dei, ut ei melius credatur, & ideo conuenit ei vestis vilis. Item prædicatori multum est curandum de bona fama, quia ipsa attrahit mundum ad eum, huiusmodi autem vestis reddit hominem in sanctitate valde famosum, quia secundum Senecam: Argumentum bonæ voluntatis est grabatus, & pannus durus: cum non ex necessitate, sed ex voluntate hoc pati quis sustineat. Attrahit etiam per vestis durtiam Prædicator multos. Matth. 3. Ipse Iohannes habebat vestimentum de pilis camelorum, & zonam pelliceam circa lumbos suos: & sequitur, Tunc exhibat

exibat ad eum Hierosolyma, & omnis Iudæa, & omnis regio circa Iordanem. Item Prædicatoris est exemplo ostendere, quod dicit uerbo, cum ergo ut frequenter habeat prædicare pœnitentiam, debet eam ostendere in se: Apoc. 11. Prophetabunt amici saccis. glo. prædicantes pœnitentiam, & exemplo ostendentes. Non autem ita pœnitentia apparet Prædicatoris in ieiunijs, uel orationibus, uel afflictionibus quibuscumquæ, cum huiusmodi non fiant in publico, sicut in uestibus, quæ semper sunt in aperto, & ideo conuenit, ut uestis eius utilitatem pœnitentialem prætendat: Et ideo dicit glo. Matth. 3. de pilis camelorum. Qui pœnitentiam prædicat, habitum pœnitentiæ prætendat. Item ad prædicationem pertinet non solum uerbis, sed factis docere: sicut Christus omni sua actione docuit. Et Prophetæ olim factis suis docebant, ut patet Eze. 12. In uasorum transmigratione. Et ideo dicitur Iohannes uox. quia non solum uerbo, sed totus clamabat; sicut quælibet pars uocis est uox. Porro uilitas uestis multa docet, docet enim, quod sicut ipsa, quæ est exterius, est uilis, ita omnia exteriora sunt uilia. Item docet, quod nunc est tempus non festiuium, quando solent ferri uestes pretiosæ; sed feriale ad laborandum, quando solent uiliores deferri. Item docet, quod nunc sumus in uia: etenim uiliores uestes deferuntur etiam à diuitibus in uia, quàm quando in domo sunt. Item docet, quod debemus esse famuli domino seruiantes, uiliores enim uestes deferuntur ab his. Item docet, quod habemus nunc causam luctus, pro luctu enim solent uiliores uestes deferri. Item docet, quod debemus nunc intendere placationi diuinæ, sicut Niniuitæ uestes uiles assumentes. Et alia quàm multa salubria docet ue-

stis huiusmodi. Cum igitur vilitas in vestibus Christo assimiletur in sui prædicatione, & valeat ad mundi gloriam debellandam & signum det de veritate nunciij cœlestis, & valeat ad famam, & exemplum penitentia, & doctrinam sanctorum multiplicem, quæ omnia sunt omni Prædicatori valde necessaria: patet, quod Prædicatori conuenit vilitas vestium; & quantò vestis est magis exterior, & plus videtur, ut sunt cappæ, tantò magis est in illis vilitas obseruanda.

Cap. LXXI.

Quia vero vestium prædicta notabilitas exterior procedere solet ex affectu interiori placendi: Sequitur mandatum contra hoc, quod dicitur (Nec affectetis vestibus placere) Benè autem dicitur viro religioso, ne affectet placere vestibus, hoc enim est meretricum. Vnde Cyprianus ad mulieres. Fugiant virgines, & pudicæ cultus, & habitus impudicarum insignia meretricum. Si autem mulieres bonæ debent hoc fugere, quantò magis viri sancti? Non est siquidem eis huiusmodi placentia imitanda, sed potius deploranda. Exemplum de quodam sancto, qui cum vidisset quandam meretricem, dixit. Ignosce mihi omnipotens Deus; quia ista meretrix taliter se pro mundo composuit; & ego tibi Domine placere proposui, & similia per meam negligentiam non impleui. Et in vitis patrum dicitur, quod cum abbas Pambo descendens in Alexandriam vidisset quandam mulierem meretricem, fleuit, & cum interrogatus fuisset, quare fletet: dixit. Duæ res me mouent; vna de perditione illius; Alia, quia non habeo tale studium placendi Deo, sicut ista turpi-

turpibus hominibus. Non ergo debent quærere viri sancti placere ornamento vestium: sed ornamento morum, propter quod subdit (sed moribus) Sed nūquid velle placere moribus licitum est, cum dicat Apostolus Gal. 1. Si adhuc hominibus placerem, Christi seruus non essem? R. sicut appetitus excellentiæ, si ibi sistatur, est semper peccatum, si autem appetatur excellentia propter Deum, vt quia scilicet maiorem fructum potest quis ibi facere, vel similia, non est peccatum: sic & voluntas placendi hominibus, si sit in hac placentia vltimus finis, est semper peccatum: si verò dirigatur ad factum melius, potest esse sine peccato. Vnde gloss. super prædictum locum. Apostolus non se hominibus placere rectè dicebat: quia eo ipso, vt Deo placeret, utebatur, & ideo dicitur Ephes. 6. Non ad oculum seruientes, quasi hominibus placentes, sed sicut serui Christi. Qui enim intendit placere hominibus propter Christum, tali placentia seruit Christo. Item talis placentia aliquādo adeo intensa est, quòd propter eam facit aliquis aliquid, quod displicet Christo Act. 12. videns Herodes, quòd placeret Iudæis interfectio scilicet Iacobi, apposuit apprehendere & Petrum. Huiusmodi intentio facit placentiam talem culpabilem; Vnde in eodem super illo verbo, An quæro hominibus placere, dicit Gloss. Sicut quando litteras accepi à sacerdotibus ad occidendum Christianos, non, quia si adhuc hominibus placere vellem, vt olim, Christi seruus non essem, & ideo dicitur ad Rom. 15. Vnusquisque proximo suo placeat in bono, quod dicitur ad differentiam illorum, quos placentia talis ducit ad malum. Duplici igitur ex causa potest esse huiusmodi placentia culpabilis, vel ex parte finis, cum ponitur vlti-

mus finis in ea, uel ex parte intentionis, cum tanta est, quod inducit ad aliquod Deo displicens. Aliter uerò potest quis placere Deo; simulq; uelle placere hominibus, scilicet propter Deum, & in bonum. Et sic faciebat Paulus 1. ad Cor. 10. Per omnia omnibus placeo, de quo maximè Prædicatori curandum est. Necessarium enim est ei non modicum, ut libenter uideatur, quocumquè declinat, & ut libenter audiatur, & ut facillè sua doctrina executioni mandetur, & ut facillè sibi acquiescatur in suis consilijs, & ut correctiones suæ patienter sustineantur, & ut in suis necessitatibus, si indigeat, deuotè subueniatur eidem. Quis autem hoc, uel istorum aliquid exhibebit hominibus displicentibus? Proinde non solum bonis, sed etiam malis; non solum amicis, sed etiam aduersarijs; non solum domesticis, sed etiam extraneis; immò & omnibus exemplo Apostoli laborandum est Prædicatori propter Deum placere, alioquin parum proficiet apud eos, ad quos mittitur, si displiceat. Sicut secundū Greg. parum apud Deum proficit, cum is, qui displicet, mittitur ad intercedendum. Porro ad huiusmodi placentiam acquirēdam ualent multa. Primum est, ut caueatur ab offensa cuiuslibet. Vnde 2. ad Cor. 10. cum dixisset Apostolus. Sine offensione estote Iudæis, & Gentilibus, & ecclesiæ Dei; statim subiungit, sicut & ego, per omnia omnibus placeo. Vnde Glos. Per omnia omnibus placere est sine scandalo cuiusquè agere. Scandalum uerò idem est, quod offensa. Secundum est, ut aliorum utilitati opera impendatur. Vnde ibidem Apostolus, cum dixisset Per omnia omnibus placeo, subdit immediatè. Non quærens quod mihi utile, sed quod multis. Glos. Per omnia omnibus placere est agere ad profectum

aliorum. Tertium est, vt pro quolibet libenter quod petit, fiat. Titum 2. super illo verbo. Seruos dominis suis in omnibus placentes, non contradicentes, dicit Glo. hoc modo poterunt placere, si non murmurauerint, cum domini eis aliquid iusserint. Si autem faciunt sine murmure, siuè libenter, quod mandat dominus; facit seruum placere suo maiori, cui tenetur, quis dubitet, quin hoc multò magis faciat quemlibet placere alij, cui minus tenetur? Quartum est; vt infirmitates aliorum patienter portetur. Ro. 15. Debemus imbecillitates infirmorum sustinere, & non nobis placere, non quod nobis placeat vendicare, sed q̃ fratri; Inde venit per hoc, quod valdè placet cuicumquè fratri, & proximo, cum infirmitas sua patienter portatur. Quintum est, cum quis aliorum moribus se conformat. Naturale est enim, vt complaceat sibi quilibet in suo simili, propter quod dicitur Prouerb. 3. Pater in filio complaceat sibi, quasi in sua imagine. Et ideo non est mirum, si Paulus placebat omnibus, qui omnia omnibus factus se omnibus conformabat. Sextum est, vt nihil per potentiam, seù duritiam, sed per rationem, vel benignitatem apud omnes agatur. Et ideo in vita Clementis dicitur de eo, quòd ita morum ornamento pollebat, quod Iudæis, & Gentilibus, & Christianis placebat: Et subditur ratio in hunc modum. Diligebant eum Gentiles: quia non execrando, sed rationem reddendo ostendebat ex libris eorum, vnde nati essent, & qualiter defecissent. Iudæorum verò gratia utebatur, ex eo quòd legem eorum sacratissimam memorabat, primum, què eos locum habituros, si suæ legis sacramenta seruarent. A Christianis verò diligebatur: quia singularum regionum inopes scriptos habebat no-

minatim, & eis prouidebat. Ex quibus patet, quòd ratio, & benignitas eum placere omnibus faciebat. Cum igitur hæc valeant ad huiusmodi placentiam acquirendam, quæ necessaria est Prædicatori: debet Prædicator sapiens dare operam ad huiusmodi exercenda. Quod si fortè faciens, quod in se est, non placet aliquibus, iam est illorum vitium, non suum. David enim quamuis dicatur aspectu desiderabilis, & esset acceptus in conspectu regis Achis, tamen sa trapis non placebat propter eorum inuidiam, sicut dicitur 1. Regum 29.

Cap. LXXII.

Quando proceditis, simul ambulate. cum veneritis, quò itis, simul stete.

¶ Quoniam multum decet viros religiosos & sanctos honestè ambulare ad eos, qui foris sunt, sicut dicitur 1. Thes. 4. Ideo hic ponitur mandatum circa honestatē, quæ prouenit ex societate in ambulando.

¶ Et nota, quòd quamuis ire cum socio pertineat ad religiosi honestatem cuiuslibet, tamen specialiter pertinet hoc ad discipulos Domini, propter negotium discurrentes per mundum. Hinc est, quòd Dominus misit in Ægyptum pro suis negotijs Moysen non solum, sed associauit eidem Aaron Exod. 4. Venerunt simul Moyses, & Aaron, & congregauerunt cunctos seniores filiorum Israel; & post frequenter dicitur, q̄ in simul intrabāt ad Pharaonem, & in simul loquebantur, & in simul respondebant eidem. Hinc est etiam, quod Christus discipulos misit binos, & binos: sicut dicitur Luc. 11. Hinc est iterum, q̄ spiritus sanctus Paulum, vel Barnabam, quātumcumquē essent sufficientes, solos non assumpsit

ad opus suum, sed simul associatos. Segregate, inquit, (scilicet spiritus sanctus) Paulum, & Barnabam in opus, ad quod assumpsit eos. Act. 13. Numquid iterum Collegium Apostolorum, quod erat in Hierusalem, cum audisset, quia recepit Samaria verbum Dei, misit solum Petrum, vel solum Iohannem, quorum vterque vir tantus fuit? Non vtrique seorsum, sed simul miserunt, inquit, Petrum & Iohannem. Act. 8. Item nunquid reservatur solus Enoch, aut solus Helias ad veniendum in fine mundi contra Antichristum, & ad subueniendum electis? constat quod non, sed in simul veniēt: sicut patet Apoc. 11. Item Iosue non vnum solum, sed duos exploratores misit ad terram aduersariorum. Iosue 2. Item nunquid Tobias mittere voluit filium suum sine socio ad terram longinquam pro pecunia rehabenda? Nonne, Deo ordinante, ipsi datus est angelus in socium in specie viri. Tob. 5. Proinde quantumcumque sint viri spirituales, vel etiam sapientes, numquam debent soli ambulare, vel soli stare, ubicumque declinent. In cuius figuram in tabernaculo non erat vnus solus cherubim, sed duo versis vultibus se respicientes Exod. 15. Ad sciendum autem quantum conferat huiusmodi societas ad honestatem, notandum, quod diabolus citius inuadit, vel procurat inuadi ad tentandum de re inhonesta solum, quam associatum; sicut latro citius inuadit peregrinum solum, quam cum socio existentem. Gen. 39. Accidit autem, ut quadam die intraret Ioseph domum, & operis quippiam absque arbitris faceret, & illa scilicet vxor Phutipharis, apprehensa lacinia vestimenti eius, diceret, dormi mecum. Nunquid meretrix illa laqueus diaboli impetisset eum de turpitudine, si secum habuisset socium? arbitror quod non. Item

cum est aliquis solus, facilius consentit turpi tentationi: quia multa sunt turpia, quæ non dimittunt homines propter Deum, quæ propter homines dimittunt. Vnde Eccles. 23. Dixit fornicarius; Quis me videt? tenebræ circundant me, & parietes cooperiunt me: quem vereor? & ideo facilius consentit in peccatum. Vnde de quodā monacho dicitur, quòd cum mansisset sexaginta annis in claustro virgo, & innocens, vltimo anno missus solus pro negotijs abbatiæ incurrit in tentationem, & consentiens amisit virginitatem, & eodem anno mortuus est. Item si contingat aliquem cadere in peccato, & habeat socium, qui hoc aduertat, festinat socius ad eius eleuationem, si autem nesciat, nihilominus inspirante Deo ipse actor interdum recurrit, & confitendo eius auxilio nititur resurgere; quòd si solus fuerit; nec habeat ad quem recurrat, vel qui ei manum porrigat, diutius moratur in peccato, sicut qui cadit in luto, nec habet adiutorem. Et ideo dicitur. Eccles. 4. veh soli, quia si ceciderit, non habet subleuantem. Cum igitur, sicut patet ex his, societas profit ad hoc, ne tam citò tentetur quis de aliqua inhonestate, vel tentatus non ita facilè consentiat, vel cadens citius resurgat: constat, quòd multum valet societas quātum ad illam partem honestatis, quæ est declinare à malo. Item bonorum sociorum est seinuicem incitare ad bonum, sicut peregrini solent se incitare in via, vel mane ad surgendum, vel ad fortiter ambulandum, & similia. Exemplum Augustini, qui lecta uita sancti Antonij dixit socio suo Alipio. Quid patimur? quid hoc est? Surgunt indocti, & cælum rapiunt; & nos cum doctrinis sine corde, ecce vbi versamur in carne, & sanguine. Et pastores dicunt ad inuicem. Luc. 2.

Transeamus vsquè Bethleem, & uideamus hoc uerbum, quod factum est. Item cum omnis homo habeat defectus, ubi sunt duo socij; supplet frequenter unus defectum alterius. Sicut Aaron defectum Moyfis in loquendo, & ipse Moyfes pro eo apud Deum. Vnde Exod.4. dicit Dominus Moyfi. Ipse loquatur pro te ad populum, & erit os tuum; tu autem eris ei in his, quæ ad Deum pertinent; & sic in multis alijs inuicem se iuuabant. Item Dominus non solum est in domo, ubi duo, uel tres sunt congregati in nomine eius, sed etiam in uia in simul ambulantes se adiungit Luc.24. Et ecce duo ex illis ibant ipsa die &c. Et post. Et factum est, dum fabularentur, & secum quærerent, & ipse Iesus appropinquans ibat cum illis. Quis autem dubitet, quin Dominus sit cum illis, quibus est in adiutoriũ omnis boni? Patet ex his, quòd societas ualeat ad incitationem in bonum, ad complementum boni per alterius suppletionem, ad habendum adiutorium diuinum in bonum, quæ omnia ualent ad partem illius honestatis, quæ in bono faciendo consistit. Verum discipulos Domini discurrentes per mūdum non solum decet honestas secundum duas differentias prædictas, sed decent eos alia quædam pertinentia ad honestatem: quia ipsa addit supra iustitiam, & est unum, scilicet claritas opinionis, quæ multum facit ad pulchritudinem honestatis. Sapientia 4. O quam pulchra est casta generatio cum claritate, id est cum clarè, & liquide constat de castitate, ita quòd nulla sinistra suspitione offuscatur, ad hoc autem multum ualeat societas; citius enim oritur sinistra suspicio contra ambulantes, uel manentem solitariè, quàm contra sociatum, & ideo dicit sanctus Bern. ad Eugenium. Bonos contubernales

nales habeas, qui vitæ, & honestatis tuæ custodes sint, & testes. Aliud est status dignus honore: unde Dominus conqueritur de Iudæis Ioan. 8. quòd ipsum missum à patre nō honorabant: Et vos inquit inhonorastis me. Maiori autem honore videtur dignus, qui vadit associatus, sicut consueuerunt ire personæ honorabiles, quàm qui solus vadit, sicut consueuerunt ire contemptibiles. Aliud est ratio credendi. Qui enim vadit ad negotia Domini, si nō creditur ei, adhibeat testem socium suum. Est igitur talibus necessarium, ut habeant per quod credatur ei, hoc autem est societas, quia in ore duorum, vel trium testium stat omne verbum, Matth. 18. Cum igitur societas famulos Dei faciat claræ famæ, & ponat in statu digno honore, & faciat eis credi, quæ omnia sunt eis valdè necessaria, cum alijs supradictis, dicitur eis (quando proceditis, simul ambulate, cum veneritis, quò itis, simul state.) Et debent professores regulæ August. cauere, ne in uia, vel hospitij se qualicumquē occasione diuidant, etiam propter fructum animarum, nisi propter necessitatem inuitabilem: quia melius est eis aliorum utilitatem negligere, quàm cum damno proprio mādātum suæ professionis præterire.

Cap. LXXXIII.

I*N incessu, statu, habitu, & in omnibus motibus vestris nihil fiat, quòd cuiusquàm offendat aspectum, sed quod vestram deceat sanctitatem.*

¶ Quædam est honestas, quæ surgit de re extrinseca, & irrationabili, ut est habitus, & est magna: Quædam quæ surgit ex re intrinseca, sed rationabili, ut est societas, & est hæc maior: Quædam quæ
oritur

oritur ex re intrinseca, & ratione annexa, ut disciplina in actibus, & hæc est maxima. Traditis ergo mandatis circa duo prima, ordinatè tradit hic mandatum tertium. Et primò in generali, Secundò in particulari: ibi (oculi vestri &c.) ¶ Et notandum, quòd secundum Hugonem de sancto Victore. Disciplina est conseruatio honestatis, cui parum est malum non facere: sed studet etiam in his, quæ agit per omnia irreprehensibilis apparere. Et ideo tradit hic mandatum continens duo, scilicet quid circa hoc cauendum: vbi dicit. (In incessu) & quid agendum vbi dicit. (sed quod vestram deceat sanctitatem) Et quia aliquando in ambulando; aliquando in quiescendo, aliquando circa habitum exteriorem, aliquando circa gestus, siue motus corporis extrinsecos talia fiunt a quibusdam, quæ oculos multorum offendunt, ponit mandatum circa hæc quattuor, ut sic disciplinatè se habeat seruus Dei in his omnibus, & irreprehensibiliter, ut nullus in aliquo istorum quattuor offendant cuiusquam aspectum, scilicet in incessu, statu, habitu, & in omnibus motibus nostris, hoc est gestibus &c. ¶ Notandum vero, quod in incessu solèt reprehensibilia reperiri. Sunt enim quidam, qui nimis festinè incedunt, intantum ut interdum præcipitent semetipsos. Isti sunt similes illi Iehu sanguinario, de quo dicitur 4. Regum 9. præceps enim graditur. Hoc autem non est sine offensa videntium. Prouer. 19. Qui festinus est, pedibus offendit, non solum interdum cadendo, sed oculos intuentiũ, maximè si religiosus sit præceps offendendo. Alij ita lentè, & pedetentim incedunt, sicut solent incedere, qui nument pedes. Quid aut mirum, si hoc est in viro reprehensibile; cum et in mulieribus delicatis filiabus

bus Sion hoc Dominus reprehēdebat dicens Esa. 3. Et pedibus suis composito gradu incedebant, quod dicitur in reprehensionem earum. Item in oppositum Ezech. 1. De sanctis animalibus dicitur, Planta pedis eorum, quasi planta pedis vituli. Bos enim multum lentē incedit, sed vitulus non lentē, sed tamen non multum currit: quia iste debet esse modus in viro sancto, vt nec nimis citò, nec nimis lentē incedat, sed modo mediocri, quod est maturitas. sicut tangitur in Glo. super istum locum. Alij sunt, qui ita incautē incedunt sine prauidentia, quòd modò offendunt ad lapidem, modò ponunt pedem in luto, modò impingunt in alios, modò corruunt in via, modò non tenent viam bonam, & hoc est ambulare secundum modum cæcorū. Sophoniæ 1. Ambulabunt, vt cæci. Contra quos dicitur. Prover. 4. Palpebræ tuæ præcedant gressus tuos. Ad hoc enim dati sunt specialiter oculi, vt dirigant gressus. Alij sunt, qui incedunt collo extento, vt filiæ Sion; ceruice erecta, vt cerui; pectore prominente, vt gallus; cum commotione scapularum, & brachiorum ventilatione, quasi remigantes; cum cubitorum ambulatione se per ventrem tenendo, vt domicelli, & alios irreuerenter præcedendo; quæ omnia sunt superbiæ signa, & valdè dedecent virū religiosum. Ideo dicit Apostolus, ad Ephe. 4. in contrarium. Obsecro vos, vt ambuletis cum omni humilitate. Alij sunt, qui incedendo semper videntur tristes, neminem salutantes, nemini affabiles se ostendentes, nunquàm solatium aliquod facientes, nullum in aliquo verbis bonis ædificantes; sed quasi in amaro silentio tota die pergentes. Super quo seipsum Dauid reprehendit dicens. Quare tristis incedo? contra quos dicitur Actuum. 8. de Eunuchobaptizato.

zato. Ibat per viam suam gaudens. Si autem filij Israel ibant in Hierusalem gaudentes, iuxta illud. In domum Domini lætantes ibimus; quantum gaudendum est omni seruo Dei, in omni via sua, cum sit ei via ad cælum. Alij sunt, qui cum deberent in via se in psalmis, vel orationibus dicēdis, vel in sacris meditationibus, vel colloctionibus vtilibus occupare, effundunt se in leuitatibus, & non sine offensa intuentium. Accidit, quòd cum quidam religiosus prædicasset laudabiliter in quadam parochia, & facto prandio recedens cum esset iuxta villam, incepit se leuitatibus dare cum socio, sicut fit interdum ab aliquibus, cum modò percutiunt socium, modò faciunt eum cadere, modò extrahunt ei caputium, & similia. Sequebatur autem eos quædam vetula, quæ fuerat in sermone, & hoc non aduertebant, quæ cœpit dicere multotiens. Domine vos non ille estis, qui prædicauit. Cum autem audirent vocem, respicientes viderunt vetulam: & quæsierunt, quid dixisset. At illa dixit ei, qui prædicauerat, Domine ego dixi vobis, quod non estis vos ille, qui hodie prædicauit? At ille, & quare hoc dixisti; cum ego sim verè ille, qui prædicaui? At illa, Domine nos habemus quendam sacerdotem iuuenem, qui valdè benè cantat missam; sed interdum illa die, qua celebrauit, discurrit pèr domos, & cum inuenerit iuenculas, ponit manum in sinu earum, & palpat eas, & cum dicitur ei. Quid est hoc? quod facitis, nonne celebrastis hodie? Respondet, & dicit. Ego non sum ille, qui celebraui: sed ego sum, quidam iuuenis, & ludo. Ideo Domine dixi, quòd vos non estis ille, qui prædicauit, exemplo sacerdotis nostri; valdè enim aliter vos habetis in inhonestis ludis, quàm hodie in ser-

mone. Quanta confusio fuerit in suo religioso super hoc; & quantum scandalum vetulæ; qui legit, intelligat, & caueat à similibus saltem exemplo mulieris illius, quæ dicit Thobix 3, Numquam cum ludentibus me miscui; nequè cum his, qui in leuitate ambulant, participem me præbui. Sunt alij tam mobiles, vt consistere secum non valeant: sed nunc ibi, nunc alibi subito comparent, semper discurrentes, nunquam quiescentes. Isti sunt similes illi, de quo dicitur Hiere. 14. Qui dilexit mouere pedes suos, & non quieuit, & Domino non placuit. Et hos vocat beatus Benedictus gyrouagos, contra quos dixit Dominus Apostolis, vt quiescerent, saltem quousquè abundantia spiritus sancti haberent, qui eos exterius indueret. Sedete, inquit, in ciuitate quousquè; induamini virtute ex alto, Lucæ ultimo. Sunt alij, qui vadunt non solum leuiter, sed inutiliter, nil boni facientes temporalis, vel spiritualis in tota via, contra quos dicitur Apostolis. Eatis; & fructum afferatis. Sunt alij, qui non solum infructuosè, sed & damnosè facientes interdum vias nouas, frangentes sepes, conculcantes fata, & similia quædam cum damno pauperum, & scandalo plurimorum, contra quos dicunt filij Israel Regi Edom, Numeri 20. Non ibimus per agros, nec per vineas, nec bibemus aquas de puteis tuis; sed gradiemur publica via, nec ad dexteram, nec ad sinistram declinantes. Cum igitur hæc prædicta multorum intuentium oculos soleant offendere: curandum est non modicum seruis Dei; & illis præcipuè, qui multum habent discurrere, & spectaculum facti sunt mundo, & hominibus, vt sint dies clara, & illuminata doctrina apud omnes, ita vt omnia notent, quod sic honestè ambulent, quasi in die, & tam discipli-

natè,

natè, quod in incedendo non appareant notabiles, vel in nimia festinàtia, vel in nimia tarditate, vel in improvidentia, vel in aliqua superbia, vel in inconuenienti tristitia, vel leuitate dissoluta, vel in facilitate discurrendi, vel in discursu infructuoso, vel quod grauius est damnofo.

Cap. LXXIV.

Circa statum sciendum est, quòd non accipitur status solum, prout dicitur à stando, secundū quod dicitur aliquis erectus stare; sed prout opponitur motui ambulandi, secundū quod dicitur stare, quicumquē non mouetur eundo: circa vero statum sic acceptum, multa sunt reprehensibilia. Vnū est, cum quis non potest secum stare, sed semper cum alijs. Quia secundum Senecam signum est bonæ mentis secum consistere. Et idem dicit. Quiotiens inter homines fui, minus homo redij. Ideo dicitur Exo. 16. Vnusquisquē maneant apud se. Aliud est cum quis, etiam si consistat secum, tamen stat otiosus ab actione. Matthæi. 20. Quid hic statis tota die otiosi? Ideo dicitur de beato Gregorio, quòd quamuis infirmaretur grauius propter abstinentiam, & orationes; tamen aut semper orabat, aut legebat, aut scribebat, aut dictabat: quòd etiam de multis alijs sanctis reperitur. Aliud est, cum quis vacat ab exterioribus actionibus; quia non semper potest illis aliquis occupari; & tamen non exercetur interius mens eius, contemplationibus. Ad hoc enim in Sabbatho vacabatur ab operibus corporalibus, vt liberius mens posset contemplationi diuinæ intendere. Vnde. Psal. Vacate, & videte. Proinde vir sanctus quiescens, & non occupatus

exte-

exterius, debet contemplationi intendere, vel speculationi, sicut speculator quiescens in specula, qui modò ante, modò retro, modò supra, modò a dextris, modò a sinistris subtiliter dirigit suum intuitum. Esaia. 21. Super specula Domini ego sum stans. Et benè dicit, Domini; quia ad ea, quæ Dei sunt, & non ad alia debet esse contemplatio viri sancti. Reprehensibile ergo est in viro sancto quiescente, vel cum secum stare non potest, vel cum stans secum est obiosus ab opere, vel cessans ab opere speculationi non vacat, vt modò supra cœlestia, modò infra infernalìa, modò ante futura, modò retro præterita, modò a dextris prospera, modò a sinistris aduersa contempletur. Porro in commorando cum alijs sunt multi reprehensibiles. Sunt enim quidam, qui nimis libenter commorantur inter mulieres, quòd est non sine nota, & offensa videntium. Legitur, quòd cum quidam iuuenis coram Pythagora diceret se libentius inter mulieres, quàm inter Philosophos conuersari; dixit Pythagoras. Et siue libentius in luto, quàm in aqua pura versantur, Item Zacha. 11. Familiæ domus David seorsum, & mulieres eorum seorsum, familiæ domus Nathan seorsam, & mulieres eorum seorsum; familiæ domus Leui seorsum, & mulieres eorum seorsum; domus Semei seorsum, & mulieres eorum seorsum; omnes reliquæ familiæ seorsum, & mulieres eorū seorsum. Item dicitur, quod propter hoc Ioseph, & Maria amiserunt puerum Iesum; quia erat consuetudo, quòd viri, & mulieres ibant seorsum, & credebant vterquè, quòd esset tanquàm puer in societate alterius. Si ergo philosophi sic detestantur conuersationem mulierum; Si Iudæi tantam distinctionem inter hos faciebant; Si etiam parentes

Domini

Domini Iesu ipsum propter hoc neglexerant: quantum cauendum est viro sancto, & propter periculum, & propter famam, ne libens commoretur inter mulieres. Ideo dicitur Eccles. 42. cap. In medio mulierum noli commorari. Sunt alij, qui libentius morantur inter leues, quàm inter bonos contra doctrinam Senecæ dicentis. Inter illos commorare, qui te meliorem facturi sunt. Eccles. 36. Cum viro sancto assiduus esto. Sunt alij, qui libentius morantur inter magnates, quàm inter consimiles, contra quos Eccles. 13. dicitur. Aduocatus à potente discede, si autem aduocato est discedendum, quanto magis cauendum est bono viro, ne se ei iungat? Non autem sic de consimilibus. Eccles. 27. Volatilia ad sibi similia conuertuntur scilicet ad morandum. Nonnè columba libentius moratur cum columba, quàm cum magnis aquilis, vel vulturibus? Patet ergo, quòd vir disciplinatus, cum ei commorandum est inter alios, libentius stare debet inter viros, quàm mulieres, & inter honos, libentius inter consimiles, quàm inter magnates.

¶ Item quantum ad loca sunt quædam reprehensibilia circa stantes, sunt enim quidam, qui libentius stant in locis publicis, quàm absconsis similes hypocritis, de quibus dicitur Matt. 6. Amant in angulis platearum stantes orare, contra quos dicitur Hebr. 11. In speluncis, & cauernis terræ. Vnde & de Saule dicitur, quod cum bonis fuit ante regni receptionem. 1. Reg. 10. Ecce absconditus est domi. Alij verò sunt, qui nimis libenter stant in locis periculosis, vt sunt locutoria; in quibus in lingua peccatur; Spectula, in quibus peccatur in visu; Diuersoria hospitiorum, & infirmariarum, in quibus & in gula, & in multis alijs peccatur, contra quos dicitur de Dauid 1. Reg.

24. *q.* habitabat in locis tutissimis Engaddi, quia vir sanctus in locis, quæ magis secura sunt à peccato, libentius debet stare. Sunt igitur alij, quibus videtur graue stare in ecclesia, & in huiusmodi locis sanctis, quod procurante diabolo non est dubium fieri, qui huiusmodi loca horret, contra quos dicitur Iohan. 19. Stabat iuxta crucem Maria mater eius, & soror matris eius Maria Cleophæ, & Maria Magdalenę. Item eodem 20. Maria stabat ad monumentum. Dicitur etiam de quodam sancto sacerdote, qui cum non haberet aliquid facere, stabat semper in ecclesia in choro, interrogatus verò, quare hoc faceret, dixit, quod faciebat societatem Domino suo intelligens de Eucharistia, quæ erat super altare. Et hoc est, quod dicitur Lucæ 2. in commendationem Annæ prophetissæ, quòd non discedebat de templo, ieiunijs, & orationibus, vel obsecrationibus seruiens Deo nocte, ac die. Pertinet ergo ad virum sanctum libentius morari in absconso, quàm in publico, libentius in loco securo, quàm periculoso, libentius in locis sanctis, quàm in communibus. Et sic patet, quòd sunt tria reprehensibilia circa statum ex parte solitudinis: tria ex parte societatis: tria ex parte loci: à quibus cauendum est propter disciplinam seruandam in stando.

Cap. LXXV.

CIrca hoc verò, quod subiungitur (& habitu.) Posset alicui videri, quòd idem sit, quod hic dicitur de habitu, cum illo quod supra dictum est (Non sit notabilis habitus vester) Ad quod dici potest, quod habitus duplici ex causa potest esse reprehensibilis, vel ex sui natura, cum est nimis pretiosus,

fus, vel mollis, & huiusmodi, vel ex actu humano, videlicet cum aliquid fit in ipso, vel ab artifice, vel à deferente, quod est reprehensibile. Ad primum pertinet, quod supra dictum est: Ad secundum, quod hic dicitur, vnde ibi dicitur. (Non sit notabilis habitus vester) quasi dicat de se. Hic autem dicitur: Nihil fiat, scilicet ab aliquo. Vnde sicut dictum est, illud pertinet ad honestatem illam, quæ surgit ab extrinseco, istud verò ad illam, quæ surgit ex actu intrinseco. Ut igitur nihil fiat in habitu, quod non prætendat disciplinam, providendum est seruo Dei, quòd vestis sua non sit nimis longa, vel brevis, nimis lata, vel nimis stricta, nimis scissa, vel nimis clausa, nimis formata, vel nimis informis, nimis defluens, vel nimis succincta, nimis composita, vel nimis turpiter posita, nimis nitida, vel nimis sordida, nimis laniata, vel nimis repetiata, nimis aptata, vel nimis ineptè relicta, nimis dissuta, vel nimis curiosè consuta. Quia verò ad habitum pertinent omnia, quæ exterius deferuntur, cauendum est etiam idem circa panniculos, sotulares, corrigias, cingulos, tabulas, bursulas, sellas, sigilla, manubria, & similia, ne aliquid fiat in istis, quod ex pretio, vel superfluitate, vel curiositate, vel sæcularitate aliqua, vel alio modò quocumquè possit reprehensibile iudicari. Hæc enim viri sancti multum in religiosis solent detestari. Vnde Hugo de sancto Victore in libello de disciplina, post singularem nominationem multorum talium excessum dicit sic. Tædet me nominare omnia, in quibus stulti, & vecordes mulieribus studia sua auferunt, & penè cum habitu sexum mutauerunt. Sunt enim mille modi, quibus vanissimi de se spectaculum hominibus præbent in habitu. Sed hæc

omnia debet feruus Dei despiciere, cum videat nullos nisi irrisione dignos talibus deseruire; hæc enim omnia veræ religioni contraria sunt, & qui his studium adhibent, hominibus magis viles & contemptibiles fiunt, qui verò hæc despiciunt coram Deo, & hominibus chariores, & honorabiliores fiunt, & sunt.

Cap. LXXVI.

Circa illud quod dicitur de motibus sciendum, quòd non accipitur hic motus, prout contrariatur quæsti, sed prout dicitur actus alicuius membri, vel plurium, qui quandoquæ vocatur gestus. Est autem gestus secundum Hugonem modus, & figuratio membrorum corporis ad omnem agendi, vel se habendi modum, & ideo conuenit viro sancto, quòd videat attentè, qualiter in omni motu membrorum, & in omni modo se habendi appareat disciplinatus. Porro disciplina in motibus membrorum consistit in hoc, vt vnum membrum alterius officium non accipiat, vt vnumquodquæ decenter exerceat actum suum, contra quod dicitur Prouerb. 6. de apostata, cuius mens auersa est à Deo: Graditur ore peruerso, annuit oculis, terit pede, digito loquitur. Vnde Hugo de hac materia sic dicit. Sunt quidam, qui sine buccis patentibus auscultare nesciunt, & quasi ad cibum, ita palatum ad verba aperiant. Sunt alij, qui in agendo, vel audiendo quasi canes sitientes linguam prætendunt, & ad singulas actiones labia, velut molam contorquendo, circuducunt. Alij loquentes digitum extendunt, supercilia erigunt, & oculos in orbem rotantes cuiusdam intrinsecus magnificentia conatus ostendunt,

dunt, caput iactant, comam excutiunt, vestimenta coaptando componunt, & latera quasi cubitando, pedesque ostendendo ridiculosam formam suæ responsionis faciunt. Alij alteram tantum aurium voci apponunt, quasi ambe non fuerint factæ ad audiendum. Alij interdum ad videndum alterum tantum oculorum aperiunt. Alij maiori ridiculo cum medietate oris loquuntur. Sunt præterea mille larvæ, mille corrugationes narium, mille contorsiones labiorum, quæ decorem disciplinæ deturpant, & faciei pulchritudinem, quæ est speculum disciplinæ, cui tantò maior custodia est adhibenda, quantò minus quod in ea peccatum fuerit, celeri potest. usque huc de Hugone. Qualiter autem per disciplinam caueant, quæ huiusmodi sunt, docet Bern. dicens. Disciplina cervicem summittit, deponit supercilia, componit vultum, ligat oculos, cohibet cachinnos, moderatur linguam, gulam frenat, iram sedat, format incessum. Licet autem viro disciplinato cauendum sit ab omnibus prædictis, tamen magis cauendum est ei à gestibus risorijs, qui scilicet incitant ad ridendum; vel turbatiuis, qui alios turbant; vel derisorijs, per quos alij deridentur; vel simiaticis, per quos aliorum gestus repræsentantur, sicut simiæ faciunt; vel turpibus, ut ribaldi faciunt, vel ioculatorijs, ut faciunt histriones. Hæc enim quantò maioris sunt indecentiæ, tantò magis dedecent viros deditos honestati. Patet ex iam dictis, quid cauendum sit in actibus membrorum. Sed quia gestus ultra hoc se extendit ad modum habendi, ideo videndum est, qualiter vir disciplinatus sedebat habere omni tempore, omni loco, in omni statu, & cum omnibus, & in quibusdam actionibus suis alijs à prædictis. ¶ Sciendum igitur, quòd

aliter se debet habere in die; quia actiue operibus pijs erga proximum insistendum aliter in nocte; quia contemplatiue Deo vacandum. Psal. In die mandauit Dominus misericordiam suam, & nocte canticū eius. Aliter in ferijs; quia tunc est magis corporalibus necessitatibus intendendum. Exod. 20. Sex diebus operaberis, quod intelligitur de pertinentibus ad corpus. Aliter in festis; quia tunc spiritualibus est omnino vacandum, eodem capitulo: Memento, vt diem sabbathi sanctifices, idest ipsum sanctum habendo operibus sanctitatis intendas. Aliter in tempore tribulationis, quia gaudenter. Luc. 6. Gaudete in illa die scilicet tribulationis. Aliter in tempore prosperitatis, quia timoratè. Greg. Magis timenda est fortuna prospera, quàm aduersa. Item in tempore silentij se debet habere tacitè, Eccles. 3. Tempus tacendi scilicet silentij. Item surgendum strenuè. Eccles. 32. Hora surgendi non te trices, idest pigrè te habeas, sicut illa hora mulieres se tricantes. Item tempore ieiunij letè. Matth. 6. Cum ieiunatis, nō eritis sicut Hypocritæ tristes, & si de alijs varijs modis secundum exigentiam temporum diuerforum, & secundum congruentiam temporis diuersimodè se debet habere. Eccles. 3. Omnia tempus habent suum, idest distinctum.

¶ Quantum ad locum verò notandum, q̄ in religione sunt diuersa loca, quidam locus orationis, vt Oratorium: quidam disciplinæ, vt Capitulum: quidam doctrinæ, vt scholæ, & locus sermonum: quidā studij, vt cella: quidam necessitatis humanæ, vt refectorium, infirmitorium, hospitium, camera, & aliæ officinæ. Quædam ad diuersarum necessitatum officia deputata, quædam ad recreationis solatia, pertinentia, vt locutorium, pratellum, & hortus, in qui-

quibus omnibus vir sanctus in modo se habēdi debet ostendere disciplinam. In Oratorio siquidem existens se debet habere maturē. Greg. Abusio claustri vna est dissolutio in choro. Iuxta altare reuerenter. Idem. Alia abusio irreuerentia iuxta altare. Iuxta reliquias timoratē. Leu. 26. Pauete ad sanctuarium meum. In capitulo stans in loco iudicij corrigendus debet se habere, sicut Dominus ante Pilatum præsidentem: de quo Bern. Stabat Iesus ante præsidentem demissis aspectibus, vultu hilari, rarus ad verba, paratus ad opprobria, paratus ad verbera. In scholis, & loco sermonis attentē: Psal. Attendite popule meus legem meam, hoc est attentē audite. In cella vtiliter, vacando scilicet vtilibus. Hier. 7. Bona facite studia vestra, idest vtilia. In refectioe, in mensa, & in omni comestione, sic religiosē, vt secundum doctrinam Hugonis linguam à loquendo restringat, oculos non circumducatur, sed omnia membra cum omni modestia contineat; super escam se non effundat; sic mundē comedat, q̄ ceteris abhominacionem, vel displicentiam in aliquo non faciat. In dormitorio sic quietē, vt alios nō inquietet. Cum enim seruire Deo regnare sit: quotquot sunt eius serui, seruiūt ei die, ac nocte. Dicitur autem 1. Reg. 23. Tu quis es, qui inquietas regem scilicet Saul dormientem? Si autem hoc ascriptum est audacię: quantō magis sunt reprehensibiles, qui tot reges cœli quiescentes inquietant. In infirmitorio non querulosē. Exemplum de Lazaro, qui plenus vlceribus, & iacens ad ianuam diuitis, cupiens saturari de micis, quę cadebant de mensa diuitis, sed nemo ei dabat: tamen non legitur murmurasse. Lucæ 16. In hospitio letē: vnde abbas Ioseph in vitis patrum dixit. Reddenda sunt, quę sunt Cæsaris

Cæsari: & quæ sunt Dei Deo: Quando ergo est præsentia fratrum, cum gaudio debemus eos suscipere: quando autem soli sumus, opus habemus lugere. Exemplum de Zachæo, qui lætus in hospitio gaudens suscepit Dominum. Luc. 19. In cameris verecundè: & ideo fiunt in abscondito: vel quia itur ad locum absconditum pro necessitate ventris 1. Reg. 24. Ingressus est Saul, ut purgaret ventrem. Porro in alijs officinis necessitatum, sic est disciplina seruanda, quod nunquam quis in eis compareat, nisi pro iusta necessitate, ne sit similis mulieribus illis, de quibus dicitur 1. Tim. 5. Curiosè discunt circumire domus non solum curiosè, sed etiam verbosè loquentes, quæ non oportet. In locutorio verò debet sic se habere, quod non otiosa, vel peiora, sed vera loquatur 1. Pet. 4. Si quis loquitur, quasi sermones Dei. In horto vero, vel prato sic meditativè, quod de inspectis trahat aliquam ædificationem exemplo Domini dicentis Matth. 6. Considerate lilia agri, quomodo crescunt &c. Et iterum Luc. 21. Videte ficulneam, & omnes arbores, cum producunt iam ex se fructum, scitis quia prope est æstas: ita & vos, cum videritis hæc fieri, scitote, quoniam prope est regnū Dei. Secundum igitur diuersitatem locorum prædictam, & alia quædam loca, diuersi sunt modi se habendi pertinentes ad disciplinam. Porro quantum ad statum, sciendum quod in statu prælati se debet habere vir bonus sollicitè. Rom. 12. qui præest in sollicitudine. In statu subditi subiectivè. Hebr. 2. Subiacete præpositis vestris, quod est, quando non erigitur subiectus in prælatum. In statu sanitatis laboriosè. Matth. 18. Dimisit eam febris, & surrexit, & ministrabat eis. In statu infirmitatis consolatoriè. Tob. 5. Forti animo esto; dixit angelus ad Tobiam

biam infirmum; quod est contra illos, qui in infirmitate nimis dei ieiunant. Item in statu iunioris, ut sunt Nouitij, quasi ignoranter. Eccles. 32. Adolefcens loquere in tua causa vix, cum necesse fuerit. Si bis interrogatus fueris, habeat caput responsum tuum. In multis esto quasi inscius, & audi tacens, simul & quærens, & loqui in medio magnatorum non præsumas, & vbi sunt senes, non multum loquaris. Omnia quidem hæc sunt ignorantia signa. In statu senioris sapienter, vtilitati scilicet communi vacando 1. Mach. 14. Senes de bonis terræ tractabunt, quod pertinet ad sapientes. In statu sublimi humiliter. Eccles. 4. Quantò maior es, in omnibus te humilia. In statu inferiori constanter, ut scilicet tali statu contentus non aspiret ad sublimiorem 1. Cor. 7. Seruus vocatus es, non sit tibi curæ, sed, si potes liber fieri, magis vtere. Si autem hoc in statu seruitutis est seruandum, qui est viliissimus status inter infirmos, quantò magis in alijs? Huius autem glo. reddit rationem dicens. Quia quantò quis despectior est in hoc sæculo propter Deum, tantò magis exaltabitur in futuro. Sic & in alijs multis diuersis statibus diuersa competunt, in quibus vir disciplinatus diuersimodè se debet habere, sicut & Christus, in quantum Deus, in quantum homo in quantum rex, in quantum sacerdos, in quantum Dominus, in quantum magister, in quantum iudicandus, in quantum iudex, aliter cum personis se habuit, & habebat.

¶ Notandum est iterum, quòd diuersimodè se debet cum diuersis habere Dei seruus; Ad praelatos obedienter Heb. 12. Obedite præpositis vestris. Ad socios cœquales amabiliter. Ber. Socialiter, ut amare appetas, & amari. Ad minores paternè, eorum
scili-

scilicet ædificationi intendendo, sicut Christus docebat discipulos suos, & Tobias filium, & Apostolus, qui dicit 1. Cor. 3. Tanquàm paruulis in Christo lac dedi vobis. Cum officialibus tranquille, non perturbando eos 1. Thes. 5. propter opus illorum, pacem habete cum illis. Cum discolis pacifice. Psal. Cum his qui oderunt pacem, eram pacificus. Cum viris sanctis sanctè. Psal. Cū sancto sanctus eris, idest sanctè te habebis nihil coram eis faciens contrariū sanctitati. Item cum forinsecis sapienter, quia nescitur, quid intendant. Col. 4. In sapientia ambulate ad eos, qui foris sunt. Cum mulieribus pudicè 1. Tim. 5. Anus obsecra ut matres, iuuenculas ut sorores in omni castitate uidelicet ut sint cum eis, & inter eas uerba scilicet casta, intuitus castus, gestus casti, ita quod in omnibus appareat pudicitia. Cum pauperibus affabiliter. Eccles. 4. Pauperum congregationi affabilem te facito. Cum diuitibus curialiter, ne scilicet exasperentur, sed quadam sagaci curialitate attrahantur ad bonum. Nonnè curialiter se habuit Dominus ad Zachæum diuitem, inuitando seipsum ad comedendum cum eo? sicut dicitur Luc. 19. Et comedendo cum publicanis, qui erant diuites & peccatores? sicut dicitur Matth. 9. Cum domesticis secundum carnem spiritualiter: sicut Bern. qui nouem fratres suos attraxit ad ordinē suum, & sicut Paulus qui dixit Rom. 9. Optabam ego ipse anathema esse à Christo pro fratribus meis, qui sunt cognati mei secundum carnem, quod dixit secundum glo. ad exprimendum magnum desiderium, q̄ habebat de salute eorum, qui sibi secundum carnem attrinebant. Cum aduersarijs patienter, sicut oues inter lupos. Ro. 12. Non uosmetipsos defendentes charissimi. Denique debet in conuersatione

tione sua bonum exemplum ostendere omnibus. Ro. 12. Prouidentes bona non tantum coram Deo, sed etiam coram omnibus hominibus. In suis actibus ad omnes se mansuetè habere 2. Tim. 2. Seruum Domini oportet māsuetum esse ad omnes. Cum omnibus de eorum utilitate agere, ut omnes Deo lucrifacere laborer. Eccles. 37. Cum uiro irreligioso tracta de sanctitate, & cum iniusto de iustitia, & cum muliere de his, quæ æmulatur; cum timido de bello, & cū negotiatore de traiectione, cum emptore de uenditione, cum liuido de gratijs agendis, cum impio de pietate, cum inhonesto de honestate, cum operario agrario de omni opere, cum operario annuali de consuetudine anni, cum seruo pigro de multa operatione, & sic de alijs secundum doctrinam Greg. in pastorale dicentis, quòd aliter, & aliter sunt docendi diuersi. Et Paulus diuersimodè instruebat diuersos, ut seruos, Dominos, mulieres, & uiros, senes, & adolescentes, uirgines, & coniugatas, Episcopos, Presbyteros, & Diaconos, & alias diuersitates hominum.

¶ Postremò notandum, q̄ sunt actus quidam, quibus homo stat in se: Alij, quibus ordinatur ad Deū: Alij, quibus habet agere cum proximo, in quibus omnibus est seruandus modus se habendi disciplinatus. Primi sunt stare, iacere, sedere; stando autem debet oculos dimissos habere, exemplo publicani stantis à longe, in cuius laudem dicitur, q̄ nec oculos audebat ad cælum leuare Luc. 18. Sedendo uero nō debet tybias diuariare, seu pedes diuidere: sicut tradunt antiqui religiosi in suis statutis; cum hoc etiam in meretrice reprehendatur Ezech. 16. Diuisti pedes tuos. Iacendo cauere, ne se discooperiat, sicut Noë ebrius Gen. 9. Inebriatus est, & nudatus

in tabernaculo suo. Secundi sunt illi, quibus seruitur Deo, & maximè in officijs diuinis in quibus obseruandum est, vt fiant reuerenter. Hebr. 12. Seruiamus ei cum metu, & reuerentia, hoc est cum illo metu, qui dicitur reuerentia. Item quòd fiant diligenter, contra quos Hiere. 48. Maledictus, qui facit opus Domini Dei negligenter, secundum quandam litteram, licet secundum aliam dicatur fraudulenter. Item quòd fiant timidè. Psal. Seruite Domino in timore, sicut famuli regis astantes, & semper timentes, ne aliquando minus benefaciant. Tertijs sunt quidam corporales, vt cum hominibus in temporalibus ministratur, quod faciendum est sedulè 4. Regum 4. Ecce sedulè in omnibus ministrasti nobis. Alij spirituales, vt est docere, in quo cauendum est bono viro, ne se in aliquo magnificare videatur; sicut faciebat Eliu Iob 32. & in quattuor sequentibus capitulis: quia imprecatur Psalmus, vt disperdat Dominus linguam magniloquam. Item corrigere, siuè ad partem, siuè publicè accusando; quod faciendum est modestè seruo Dei 2. ad Tim. 2. Modestè corripientem; quod fit, cum non exceditur modus in aggrauatione, vel asperitate loquendi, & similibus. Item iudicare, vt cum oportet aliquem propter culpam in aliquo condemnare, in quo semper est seruanda misericordia exemplo Domini, qui semper punit citra condignum Eccles. 4. In iudicando esto misericors. Item conferre, siuè disputando, siuè alio modo, in quo cauendum est à lite. 2. Tim. 2. Seruum Dei non oportet litigare. Item consulere interdum, in quo agendum est prouidè. Vnde de sancto Sebastiano dicitur. In consilio prouidus. Talis etiam fuit Ioseph, qui tamquam prouidus in consilio, dixit Pharaoni, Prouideat rex vi-

rum sapientem, & industrium, & præficiat eum terræ Ægypti. Genes. 41. Item aliquando aliqua sibi commissa agere, quod faciendum est prudenter 1. Reg. 18. Egrediebatur Dauid ad omnia, quæcumque mississet eum Saul, & prudenter se agebat. Sic ergo debet se habere Dei seruus in his actionibus spiritualibus ad proximum, ut in docendo se magnificet; in corrigendo seruet modestiam; in iudicando ad pœnam non derelinquat misericordiam; in conferendo sit sine lite; in consilijs prouidus; in agendis prudens; & sic patet de disciplina seruanda in gestibus, & quantum ad actiones, & quantum ad modum se habendi in omnibus, & quo ad tempus, & quo ad locum, & quo ad statum, & quo ad homines, & quo ad quasdam specialiter actiones, per quas cauetur offensa hominum intuentium seruos Dei; & sit, quod decet sanctitatem eorum.

Cap. LXXVII.

Circa quod notandum, quod disciplina in exteriori conuersatione multum decet viros sanctos, est enim exterioris conuersationis disciplina, quasi quidam ornatus 1. Petr. 3. Sicut enim sanctæ mulieres in Deo sperantes ornabant se aliquando, & loquitur ibi de morum ornatu, sicut patet ex eo quod subiungit dicens. Sicut & Sara obediebat Abrahamæ dominum eum vocans, ex quo relinquitur, quod mores disciplinati sunt quidam ornatus. Dominus vero, qui omnes partes vniuersi ornauit præter infernum, pulchrius ornauit cœlum. Cum ergo viri sancti frequenter in scriptura dicantur celi, quàm indecens esset, si non essent ornati? Ideo dici-

dicitur Iob 26. Spiritus eius ornauit cœlos. Quod intelligitur non solum ad litteram, sed mysticè de sanctis secundum Gregor. quorum ornamenta sunt gratiæ exterius fulgentes à spiritu sancto eis data. Item templum Dei nō solum debet ornari interius, sed etiam exterius, propter q̄ fiunt imagines sanctorum, & similia in parietibus: cum ergo uiri sancti sint templum Dei uerius, quàm templum lapideum, iuxta illud Templum Dei sanctum est, quod estis uos 1. Cor. 3. Non est sine indecentia, nisi exterius sint ornati. Ideo dicitur 1. Mach. 4. Ornauerunt faciem templi, quod intelligendum est esse factum de uno, & fiendum de alio. Item uiri sancti sunt uasa, non in contumeliam, sed in honorem, in quibus ministrantur Domino uaria genera potuum, ciborum, aromatum, luminum, & huiusmodi. Vasa uerò templi, & tabernaculi erant omnia pulcherrima, non solum interius, sed exterius etiam: Sic est etiam in uasis, in quibus nunc ministratur regibus. Decet igitur, ut uiri sancti, tanquàm in quibus Regi regū ministratur, sint decenter ornati, & ideo dicitur de uiro sancto Eccles. 50. Tanquam uas ornatum omni lapide pretioso. Quia igitur sancti uiri ratione sanctitatis sunt cœlum, & templum Dei, & uasa in honorem æterni Regis, decet eorum sanctitatem, ut exterius per disciplinam sint ornati. Præterea conuersatio exterior dicitur uestis. Eph. 4. Depónite ueterem hominem secundum pristinam conuersationem, & post. Induite nouum hominem. Ex quo innuitur, quòd conuersatio uetus, & noua, sunt quasi uestis uetus, & noua. Et sic omnis conuersatio exterior est quasi uestis: porro pulchræ uestes decent curiales, quia sicut dicitur Hester 4. Induto sacco non licebat intrare aulam regiam, & regina Sab-

ba admirata est uestes assistantium Salomoni 3. Regum 10. Cum ergo uiri sancti soli sint de curia Regis æterni, quia omnes alij sunt de curia diaboli; quantum decet eos uestis pulchra conuersationis exterius? Ideo dicit Paulus Colos. 3. Induite uos sicut electi Dei sancti, & dilecti: quasi dicat. Cum sitis à Deo electi, & sanctificati, & specialiter dilecti, & ideo sui specialiter induite uos, non sicut ribaldi, sed sicut decet familiam tanti regis, uiscera misericordiæ, benignitatem, ita scilicet ut appareant exterius in uobis uiscera misericordiæ; benignitas scilicet, & alia, quæ sequuntur, quæ omnia faciunt ad gloriam conuersationis exterius. Item sacerdotes decent pulchræ uestes, unde Aaron habuit uestem poderis, in qua depictus erat totus orbis terrarum, & dicitur de uestibus eius. Eccles. 45. quòd sic pulchræ ante eum non fuerunt. Cum ergo uiri sancti sint Domini Sacerdotes, & sacrificantes ei die, ac nocte hostias laudis, multum decet eos pulchritudo uestis huiusmodi. Et ideo dicitur in Psalmis. Sacerdotes tui induantur iustitiam, id est sic induantur, quòd exterius appareat in eis per totum iustitia, quæ est nomen uirtutum. Item mulieres nobiles solent indui pulchrius. Cum ergo animæ sanctæ omnes sint filiæ Regis æterni; quantum decet eas pulchra uestis? Ideo dicitur in Psalmis de filia Regis cœlestis. Circundata uarietatibus. Patet ergo, quòd uiros sanctos, & ratione curiæ de qua sunt, & ratione sacerdotalis officij, & ratione nobilitatis, decet pulchritudo, non solum intrinseca in uirtutum habitibus, sed extrinseca in morum disciplina, ut sicut scriptum est. Prouerb. 3. de domesticis Ecclesiæ sint uestiti duplicibus interius scilicet, & exterius. Præterea disciplina exterior est signum ante-

interioris status, videlicet bona boni, & mala mali. Eccles. 19. Amictus corporis, & risus dentium, & ingressus hominis enunciant de illo. Indecens verò est non modicum viro sancto habere signa viri mali: sicut indecens est honestæ matronæ habere signa prostitutæ. Ideo debet laborare ad disciplinam exteriorē, vt nō solum sit; sed etiam appareat Dei seruus. Ideo dicitur 1. Cor. 4. Sic nos existimet homo, vt ministros Christi, quasi dicat. Sic nos habeamus, vt videntes conuersationem nostram exteriorē, talem de nobis habeant homines opinionem. Item sicut alias pelles habent lupi, alias oues; ita iustum est, vt alia conuersatio iustorum, siuē bonorum exterior, alia malorum, sed malorum est nigra sicut Æthiopiū. Threnorum 4. Denigrata est super carbones facies eorum, & ideo bonorum debet esse alba. Eccles. 19. Omni tempore vestimenta tua sint candida. Quamuis hypocritæ induant se quandoquē talibus: non ideo dimittenda est vestis huiusmodi à bonis; quia sicut dicit Glos. super Matth. 7. Oues non debent deponere vestimenta sua, & si lupi quandoquē eis induantur. Item opera hominis exteriora sunt fructus eius. Arbor autem bona fructus bonos facit, & mala malos: sicut dicitur Matth. 7. quā in conueniens ergo esset, si arbor aliqua plantata à Domino in horto suo tanquā electa non faceret sibi fructum competentem? Ideo dicitur Gen. 1. Germinet terra lignum pomiferum, faciens fructum iuxta genus suum. Debent ergo boni viri tanquā bonæ arbores in exterioribus, bonis conuersationis fructibus abundare. Et sic patet, quantum deceat sanctitatem bonorum exterior disciplina.

Cap. LXXVIII.

O Culi vestri, & si iaciantur in aliquam fœminarum, in nullam figantur.

¶ Datum est mandatum præcedens circa disciplinam motuum in generali: Hic autem tradit mandatum circa disciplinam singularis sensus; non autem circa quoslibet sensus, sed solum circa oculos: Nec circa quolibet obiecta visus, sed solum circa fœminas. Primò enim ponit mandatum. Secundò causam traditionis mandati: ibi. (Nec dicatis vos habere, &c.) Vt autem sciatur, quare potius prosequitur de disciplinis oculorum, quàm aliorum sensuum. Et quare potius circa fœminas, quàm circa alia visibilia.

¶ Notandum est primò, quòd oculi sunt magis habiles ad actionem peccandi, quàm alij sensus. Secundò, quòd impuditiæ apparet in eis corruptio maior, quàm in alijs sensibus. Tertiò, quòd impudicitia est magis contraria honestati, quàm alia vitia.

¶ Circa primum sciendum, quòd visus irritat gulam Gen. 3. Vidit mulier lignum, quòd esset bonum ad vescendum, & pulchrum oculis, aspectuq; delectabile; tulit de fructu illius, & comedit. Item incitat cupiditatem. Matth. 4. Ostendit ei omnia regna mundi, & gloriam eorum, vt. s. incitaret eum ad cupiditatem illorum. Item inflammat libidinem Eccl. 9. Propter speciem mulieris multi perierunt, & ex hoc concupiscentia, quasi ignis exardescit. Item prouocat ad superbiam. Vnde dñr in fabula, quòd bufo se inflauit in prato; quia ibi vidit bouem magnū pascentē, & voluit ei assimilari in magnitudine. Sic et dicit Ber. de Luciferò, quòd vidēs filiū Dei æqualē Patri, voluit assimilari, sicut viderat filiū Dei simile, & dixit in cor-

de suo. Similis ero altissimo. Esa. 14. Itē cōmouet irā. Matth. 18. Videntes conserui eius; quæ fiebant, contristati sunt valdē. Item concitat inuidiam. 1. Reg. 3. Videbis æmulum tuum in templo, in vniuersis prosperis Israel. Et post. Vt deficient oculi tui, & tabescat anima tua, scilicet inuidia, hæc inuidendo. Et Socrates optabat oculos inuidorum dignos esse in singulis ciuitatibus, vt de profectibus omnium torquerentur. Item fouet accidiam: Acidiosi est enim, visa intemperie corporis, non exire ad opus, sed torpescere in domo. Eccles. 11. Qui considerat nubes, nunquā metet. Sic igitur omne genus peccati per oculos generatur. Et ideo dicitur Matth. 6. Si oculus tuus fuerit tenebrosus, totum corpus tuū tenebrosū erit; quia omnes tenebræ peccatorum, per malos oculos inducuntur. Iuxta illud Philosophi. Oculi vos in omnia quotidie vitia præcipitant. Item alij sensus non semper habent obiecta in promptu, vt patet in olfactu, auditu, gustu, & tactu. Sed visus semper habet aliquid, quod videat, si velis, in quo potest peccare: & ideo potest quasi incessanter peccare 2. Pet. 2. Oculos habentes plenos incessabilis delicti. Item actus oculi velocior est, quā aliorum sensuum, propter quod Apostolus adiungit eū cum momento 1. Cor. 15. In momento, in ictu oculi. Et ideo facilē per ipsum peccatur. Iudith 10. Cum intrasset ante faciem eius, statim cāptus est in oculis suis. Patet ex his, quod per oculos committi potest peccatum multipliciter, & incessanter, & faciliter. Et ideo dicitur Eccl. 31. Nequius oculo quid creatum est? per quē scilicet tot peccata committuntur, & tam assiduē, & tam facilē?

¶ *Circa secundum notandum*, quod impudicitia viget in omnibus sensibus. Viget enim in olfactu, cum

cum in odoribus meretricis delectatur, de quibus dixit meretrix Prouer. 6. Aspersi cubile meum mirra, & aloë, & cinamomo. Item in auditu, cum auditu uerborum mulieris cor inflammatur. Eccles. 9. Colloquium illius, quasi ignis exardescit. Item in gustu: cum ex conuiuando cum ea libido prouocatur. Propter quod dicitur Eccles. 9. Cum muliere aliena ne federis omnino; nec accumbas cum ea super cubitum: & non alterceris cum ea in vino: ne forte declinet cor tuum in illam. Item in tactu. Prouerb. 6. Qui ingreditur ad uxorem proximi sui, non erit mundus, cum tetigerit eam. Item in oculis 2. Pet. 3. Oculos habentes plenos adulterij. Verum licet uigeat hæc corruptio in omnibus sensibus; tamen magis in visu. Tactus enim simplex solam suauitatem carnis; Auditus solam dulcedinem eloquij; Olfactus solam fragrantiam odoris meretricij percipiunt de muliere: Gustus uero in conuiuando nihil de ea percipit propriè, sed solum de his, in quibus cum ea communicat, contrahit scilicet saporis effectum: Visus uero de ea percipit figuram, colorem, gestus, ornatum, membra singula, & totius corporis dispositionem; quæ tantò magis inflammant concupiscentiam: sicut ligna, quantò plura sunt, tantò faciunt maiorem ignem. Ideo benè dicitur Eccles. 9. Et ex hoc; scilicet visu mulieris concupiscentia, quasi ignis, exardescit, qui scilicet plus ardet, quando plura sunt ligna. Sic igitur patet, quod visus magis inflamat ad libidinem, quàm alij sensus. Item frequentius potest habere copiam sui obiecti in muliere visus, quàm alij sensus; quia frequentius potest uideri, quàm tangi, vel audiri, vel quàm haberi possit solatium de eius conuiuio, vel aromatibus. Dan. 13. Videbant quotidie eam, scilicet Susannam,

seniores ingredientem, & deambulantem. Et ideo frequentius committitur impudicitia per visum, quàm per alios sensus. Item omnes mulieres vnius ciuitatis possunt interdum videri, nobiles, & ignobiles, coniugatae & virgines, religiosae, & saeculares, & sic de alijs. Non autem sic possunt omnes tangi, vel audiri, vel haberi in conuiuium, vel de propè redolere. Et ideo oculus cum pluribus facit peccata, quàm alij sensus: quia in omnibus, quas videt, potest peccare. Vnde impletur in eis illud Threnor. 3. Oculus meus depre'datus est animam meam in cunctis filiabus vrbs meae. Item oculus audacius peccat in muliere, quàm alij sensus. Audet enim quis videre multas, quas non auderet tangere, vel cum eis comedere, vel ad loquendum, vel alias aliquatenus appropinquare. Vnde longo tempore deperijt Amon in amorem Thamar, quam videbat speciosissimam: nec tamen audebat eam tangere, vel impetere de turpitudine. sicut dicitur 2. Reg. 13. Itē oculi impudicitia non ita percipitur ab alijs, sicut verborum, vel tactuū, aliorumve sensuum; Et ideo sicut ille, qui non putat se videri, securius fornicatur, ita & oculus securius, quàm sensus alij, agit impudicè. Et ideo dicit Aug. infra. Nec putare debet, qui in feminam figit oculum, ab alijs se non videri: innuēs per hoc, quod multi sunt tales, qui sic putant; & ideo securius figunt. Item alij sensus possunt habere impedimētum de facili, ab exteriori, circa mulieres: quia completio actus eorum dependet ex facto alieno. Vnde non potest quis tāgere mulierem, uel loqui cum ea, uel comedere, uel commorari propè eam, sine eius assensu. Visus uerò non dependet ex facto alieno; sed solum ex voluntate uidentis, si leuet oculos, iuxta illud Esa. 49. Leua oculos tuos,

& uide. Et ideo liberius peccat in muliere: quia non potest ita impediri, sicut alij sensus. Item insatiabilius peccat; citius enim fastidiunt tactus, & auditus, & alij sensus in muliere illud, in quo delectantur, quàm uisus Eccl. 5. Non satiatur oculus uisu. Cum igitur (sicut patet ex iam dictis) uisus uehementius inflammet ad libidinem, & frequenter, & circa plures personas, & peccet audacius, liberius, & insatiabilius: constat quòd in ipsis oculis est maior corruptio circa impudicitiam; propter hoc dicit philosophus. Vestra luxuria sunt oculi.

¶ *Circa tertium notandum*, quòd uir religiosus est quasi res Deo ualdè sacrata: sicut reputabatur sacrum, quòd separabatur ab usibus communibus, & Deo offerebatur: & ideo significantur religiosi per Nazaræos. Nazaræus idem est, quòd sanctus, quia ipsi religiosi debent esse ipsa sanctitas. Item in seruitio, quòd exhibetur magnatis, nihil est ita indecens, sicut immunditia: Propter quòd dicit David in Psal. Ambulans in uia immaculata hic mihi ministrabat. Item licet omne peccatum sit immunditia, iuxta illud. Quæ autem de corde exeunt, hæc coinquinant hominem, Matth. 15. tamen luxuria est maior immunditia. Propter quòd mulier fornicaria comparatur stercorei Eccles. 9. quòd est maxima immunditia. Cum ergo immunditia quæcumquè ualdè inhonestè sedeat in re sacrata quacumquè, & in seruitio homini terreno exhibito: quantò magis immunditia impudicitie indecens est uiro tam specialiter Deo consecrato, & eidem seruiendi die, ac nocte? Et sic patet quantum sit contraria impudicitia honestati. Proinde cum intendat August. tradere mandata motuum ad disciplinā pertinentia ad honestatem, non fuit contentus de motibus huius-

modi tradere mādāta in genere, nisi specialiter prosequeretur de oculis, in quibus est maxima corruptio circa pudicitiaē honestatem dicens (Oculi vestri & si iaciantur in aliquam fœminarum, in nullam figantur.)

Cap. LXXIX.

ET est sciendum, quòd multa mala euenire solent ex mulierum aspectu : Gen. 6. Videntes filij Dei filias hominum, quòd essent pulchræ, acceperunt vxores sibi ex omnibus, quas elegerant : Et hæc fuit primaria causa diluuij, in quò fuerunt omnes præter paucos submersi. Item 12. eiusdem. Viderunt Ægyptij vxorē Abrahæ, quod esset pulchra nimis, & nunciauerunt principes Pharaoni, & laudauerūt eam apud eum, & sublata est mulier in domum Pharaonis; propter quod flagellauit Dominus Pharaonem plagis maximis, & domum eius. Item eiusdem 33. Cum vidisset Sichen filius Emor princeps terræ illius Dinam, adamauit, & rapuit, & dormiuit cum ea : propter quod interfectus est postea Emor, & omnes masculi ciuitatis illius. Item Iudicum 14. Descendit Sanson in Thannatham, vidensquē ibi mulierem de filiabus Philistijm accepit eam : & postmodum ipsa tradidit eum ; & fuit occasio mortis suæ. Item 2. Reg. 11. Vidit Dauid mulierem lauantem se ex aduerso super solarium suum, erat autem pulchra valdē : & post missis nuncijs tulit eam. Et hoc fuit postea sibi occasio homicidij, & prodicionis, & maximæ iræ Domini contra eum. Item Iudith 16. Sandalia eius rapuerunt oculos eius, scilicet Holofernīs : pulchritudo eius captiuā fecit animam eius : & hac occasione fuit capite truncatus.

Item

Item Dan. 13. Videbāt Sufānnam seniores quotidie ingredientem, & deambulāntem: & exarserunt in concupiscentia eius. Quod eis postmodum fuit occasio lapidationis. Hęc si quidem, & alia multa mala leguntur euenisse propter mulierum concupiscentiam ex oculorum intuitu generatam. Ideo cauendum est bono viro, ne ex proposito respiciat mulierem: quòd si fortè in casu videt, cauendum est ei, ne oculos figat in eam. Porro oculos dicitur figere, quis tripliciter. Vno modo cum morosè respicit, quasi iudicans de figura, & pulchritudine: sic faciebant illi, de quibus dicitur Iudith 10. Et erat in oculis eorum stupor: quoniam admirabātur pulchritudinem eius. Et post 11. dicebat alter ad alterum. Non est talis mulier super terram in aspectu pulchritudinis. Numquid non benè morosè respererant illam, cuius pulchritudinem omnibus alijs fēminis præferebant? Alio modo cum inspicitur ad concupiscentiam incitandum: iuxta illud Matth. 5. Omnis, qui viderit mulierem ad concupiscēdum eam, iam mæchatus est in corde suo. Alio modo cum videtur cum concupiscentia: iuxta illud quod dixerunt senes Sufanna ante se positæ. In concupiscentia tui sumus: Licet autem primus modus non videatur in se esse mortale, sicut alij duo: tamē quia est occasio valdè proxima ad mortale, prohibetur omnis huiusmodi fixio oculorum, non per modum præceptorium, quo ad primum modum: sed per modum valdè dissuasorium: sicut in multis similibus in regula inuenitur. Vnde reddens causam huius mandati subdit dicens.

¶ Nequē enim quando proceditis, fēminas videre prohibemini, sed appetere, vel ab ipsis appeti velle, criminofum est. Nec solo tacito affectu, sed affectu, & aspectu

*aspectu quoque appetitur, & appetit concupiscentia
fœminarum.*

¶ Quasi dicat ideo non uisionem simplicem, sed fixationem oculorum prohibeo, quia appetitus mulierum est criminofus: qui scilicet appetitus surgit, uel est cum aspectu; & non solum in tacito affectu.

Cap. 18. LXXX.

CIrca hoc uerò, quod dicitur hic, quòd uidere fœminas non sit prohibitum. Notandum est, quòd quamuis non sit prohibitum propter periculum transgressionis, quia difficile esset hoc seruare, tamen est tutum. Dicitur in li. Barlaam, quòd cum quidam rex gentilis nutrisset filium longo tempore in occulto, ne possent ei Christiani loqui, & inducere ad fidem suam: Tandem cum iam esset adulescens, fecit eum educi ad uidendum delectabilia mundi, quæ eum ad se allicerent, & sic magis elungaretur à doctrina Christi. Cum autem inter alia uidisset mulieres, quas usquè tunc non uiderat: & quæsisset, quid hoc esset, dictum est ei. Isti sunt dæmones, qui seducunt homines. Cum autem postmodum quæreretur ab eo: quid magis sibi placuisset inter omnia, quæ uiderat: Respòdit. Dæmones, qui seducunt homines. Ex quo patet, quòd multum est allectiua species mulieris. Cum ergo multum alliciant, & non liceat eas concupiscere: non est securum eas uidere. Gregorius. Non est tutum intueri, quod non licet concupiscere. Item non est perfectionis. Vnde legitur in uitis patrum, & cum quidam monachus occurreret quibusdam sanctis mulieribus, & propter eas diuerteret à uia: dixit ei quidam illarum. Tu, si fuisses perfectus monachus non

non diuertisses à nobis: nec tantum respexisses nos, quòd posses discernere, utrum essemus mulieres. Item non est religiosum. Vnde reperitur in uiti(patrum, quòd cum quædam ualdè nobilis, & diues mulier uenisset à partibus remotis ad quendam uirum ualdè religiosum: & inter alia rogasset eum, ut oraret pro ea. Respondit ille. Rogo Deum, ut tollat memoriam tui de corde meo. Cum autem ipsa super hoc scandalizata recedens dixisset hoc cuidam Episcopo: ipse eam consolans dixit ei. An nescis, quia es mulier? & quòd dæmones solent uiros sanctos per imaginationes, & memorias mulierum maxime uexare? Ideo hoc tibi dixit: Nam pro anima tua semper orat. Similiter legitur ibidem, quòd quidam frater dixit cuidam seni. Pater iam senuisti, eamus uidere mundum. Cui senex. Vbi non est mulier, fili, illuc eamus; Et frater. Et ubi est locus, ubi non sit mulier, nisi in solitudine? Et senex. Ergo fili in solitudinem me tolle.

¶ Legitur etiam ibidem, quòd quidam multum religiosus propriam matrem uenientem ad eum uisitandum noluit uidere. Cū ergo uiri religiosi nolūt habere memoriā mulierum in corde: nec esse in loco, ubi possint eas uidere, & et refugiant uidere proprias matres: quā cōtrarium est religioni uidere mulieres? Item non est cautū. Per uisum enim inducitur species ad animā, quæ ipsam impugnat, uelit, nolit: nec potest facile se ab ea post modum expedire. Quis autem sapiens uelit in domum suam inducere huiusmodi tribulationem. Ideo super illud Iob 31. Pepigi fœdus cum oculis meis: dicit Glo. Fœdus cum oculis pepigit, ne primus incautè inspiceret, quòd postea inuitus amaret. Item non est fidelitatis Deo debitæ, quomodo enim est fidelis Domino suo, qui portas

portas castri sibi commissi aperit inimicis suis; & sic auferuntur ei castra? Ideo post illud Pepigi fœdus cum oculis meis, vt non cogitarem de virgine, subiungitur. Quam enim partem haberet in me Deus desuper? quasi dicat: Nonnè amitteret sic Deus, quicquid habebat in me? Item non est angelicum. Viri enim angelici, pudici scilicet, vt Angeli, non debent intueri mulieres. Et ideo dicitur 1. Cor. 11. Debet mulier velamen habere super caput suum propter Angelos, idest propter angelicos homines, ne eam aspiciant. Ergo non est angelicum intueri mulierem. Item non est philosophicum. Legitur enim philosophum quendam (vt dicit Hier.) eruisse sibi oculos propter hoc, quod phantasmata ingredientia per oculos impediabant eum à sapientia. Cum igitur phantasmata mulierum ingredientia per oculos summè impediunt à sapientia, non temporali, sed æterna; & scandalizent ad mortem animam: quales philosophi sunt isti, qui sic habent oculos promptos ad mulierum aspectum? Ideo dicit dominus Matth. 5. Si oculus tuus scandalizat te, erue eum, & proijce abs te. Quod quamuis non sit ad litteram intelligendum omnino, tamen multum concordat huic sententiæ. Item huiusmodi visio procuratio est diabolica. Vnde legitur in Vitispatrum, quod cum quidam fuisset ab infantia in monasterio nutritus, cum iam creuisset, demones ostendebant ei formas, & habitus mulierum. Quod cum retulisset patri; & cum eo semel descendisset ad sæculum: & vidisset ibi mulieres; dixit iterum ei. Ecce istæ sunt, quas de nocte videbam in cella: Et miratus est senex de fraude. Procurant ergo demones huiusmodi visionem, cum aliter copia non habeatur: & etiam interdum in formas huiusmodi

se transformant: Propter quod succubi vocantur. Cum igitur videre mulieres non sit securum, non perfectionis, non religiosum, non angelicum, non philosophicum, immò procuratio diabolica; quãuis non sit prohibitum: tamen propter huiusmodi inconuenientia est valdè cauendum.

Cap. LXXXI.

Item circa hoc dubitatur, quod dicitur, quod (apetere mulieres, vel ab ipsis apperi velle criminosum est) cum sit occultum, & crimen videatur sonare infamiam: Ad quod soluendum, Sciendum est, quòd crimen quattuor modis accipitur: sicut dicit Gratianus, & probat per dicta sanctorum. dist. 26. Vno modo strictè, & sic dicitur crimen peccatum mortale, vnde ibidem. Crimen vocatur criminalis infamia (cum infamia.) Et trahitur de verbis Hieronymi. Secundo modo largè, & sic dicitur omne peccatum mortale, siuè cum infamia, siuè sine infamia crimen. Vnde ibidem. Multi decipiuntur, dum credunt, quod si super fundamentum Christi capitalia crimina ædificant, ipsa per ignem transitorium possint purgari: Et trahitur de verbis Augusti. Constat autem ibi crimina vocari quęcumquè mortalia. Tertiò modo largius: Sic dicitur crimen quodcumquè peccatum, siuè mortale, siuè veniale; quod non ex infirmitate, vel ignorantia, sed ex deliberatione committitur. Vnde ibidem. Crimen appello (aliàs latè patet & competenter) omne peccatum complectens, quod ex deliberatione procedit: & trahitur ex verbis Bedæ, & Augustini. Quarto modo largissimè, & sic dicitur crimen omne peccatum siuè mortale, siuè veniale: Vnde ibidem nomine

mine criminis omne peccatum intelligitur: & trahitur à uerbis Hiero. Patet ergo ex his, quod cum appetitus prædictus sit semper mortale, dicitur crimen, iuxta secundam acceptionem criminis prædictam. Et nota, quòd sola cogitatio de muliere non est in se aliquando peccatum: Delectatio nerò in huiusmodi cogitatione potest esse mortalis, & uenialis secundum diuersas circumstantias: Appetitus uero mulieris semper est mortalis. Porro cogitatio est origo delectationis prædictæ; & delectatio inducit in appetitum. Est enim huiusmodi cogitatio sicut scintilla; de qua scriptum est Eccles. 11. Scintilla augetur ignis. Item sicut fermentum modicum, de quo dicitur 1. Cor. 5. Modicum fermentum totam massam corrumpit. Item sicut caput serpentis, de quo Hieron. Lubricus est coluber tortuosus, & nisi capite teneatur, totus illabitur. Ideo uiri sancti, ne trahantur ad huiusmodi delectationem, vel appetitum, laborant circa huiusmodi primarias cogitationes, extinguentes scintillas huiusmodi, fermentum expurgantes, caput serpentem conterentes, exemplo illius, de qua scriptum est Gen. 3. Ipsa conteret caput tuum. Sunt autem tria, quæ ualent contra huiusmodi cogitationes. Primum est clausio oculorum ab aspectu mulierum, per quæ introductæ cogitationes huiusmodi in memoria relinquuntur. Job 31. Pepigi fœdus cum oculis meis, ut nec cogitarem de virgine, hoc est, ut post visum virginis non remaneret in me memoria eius, facies me cogitare de ea. Secundum est occupatio cordis in cogitationibus sanctis. Sicut enim dicit quidam senum: Cor hominis est quasi molendinum, quod molit illud, quod ei ministratur, & cum molit unum, non potest aliud molere. Cum bonum bladum san-

ctarum

clarum cogitationum molit, nō recipit malas; sed à diabolo, vel aliunde aptantur. & ideo benè dicitur Eccles. 3. Quæ præcepit tibi Dominus, cogita illa semper; qui enim sic facit, per hæc euadit cogitationes immundas. Tertium est fides Christi. Huiusmodi siquidem cogitationes sunt paruuli Babylo- nis, & cum sentiuntur in corde oriri: recurrendum est ad Christum, per orationem, & ad signum crucis eius, & ad memoriam passionis eius, & similia; vt horum adiutorio teneantur, ne procedant, sed potius allidantur: & beati qui sic faciunt. Psal. Beatus, qui tenebit, & allidet paruulos suos ad petram, idest ad Christum, siuè ad fidem eius. Et sic patet qualiter appetitus mulierum, secundum quod accipitur actiuè, sit cauendus. Reperiuntur autem aliqui, qui & si non appetant mulieres: tamen interdum volūt appeti ab eis; vel quod peius est, ex hoc, q̃ appetuntur ab eis, gloriantur; vel quod pessimum est, aliquid faciunt interdum, vt appetantur. Quæ omnia viri sancti diligenter cauent; non solum non facientes aliquid, ut appetantur; non solum in hoc non gloriantes; sed ne appetantur multam diligentiam apponentes.

¶ Ad quod cauendū notandū est, q̃ mulieres sunt multū curiosæ ad uidendum homines, & specialiter etiam bonos, Gen. 49. Filix discurrerunt super muros. Glos. Hieron. de muris, & turribus, & fenestris rota puellarum Ægypti turba prospexit in Ioseph, quando intrauit Ægyptum. Sicut autem ex uisu mulieris, exardescit concupiscentia uiri: ita è contrario ex uisu uiri concupiscentia mulieris. Eze. 23. Cum uidisset Ooliba similitudinem filiorū Babylo- nis, infaniuit super eos concupiscentia oculorū suorum. Non solum autem hoc accidit circa filios Ba-
bylonis,

bylonis, sed etiam circa filios Dei. Vnde Hospita Beati Bernar. sic infaniens in eum, de nocte accessit ad lectum eius, licet eam respueretur clamando latrones, latrones. Et ideo bonorum virorum est, & maximè illorum, qui sunt aspectu gratiosi, rarò, aut nunquã apparere inter mulieres, sed potius in clanculo stare, non solum propter se, sed & propter mulierum fragilitatem Hiero. ad Oceanum. A consortio virorum longè sint fœminæ. Monachum, vel clericum solitudo facit, non publicum. Item frequentatio mulierum paulatim solet corda earum inflammare in viros. Gen. 39. Post multos dies iniecit domina sua oculos in Ioseph, quasi dicat. Noh statim ab initio, sed postquàm diu fuit cum ea conuersatus, & ideo viri sancti cauent huiusmodi frequentationem. Hiero. ad Oceanum. Si pudicitiam quæris, scilicet simpliciter, tam tuam, quàm alterius; fœminam, quàm benè videris conuersantem, mente dilige, non corporali frequentia: & post. Cur sanctimonialium frequentia in Ecclesia, vel in ipso publico te delectat? Item familiaritas in omni re præbet audaciam; audacius enim quilibet à familiari, quàm ab extraneo impetitur: ita & mulier audacius prorumpit in tentationem erga familiarem, quàm erga extraneum. Quod satis ostenditur in quodam opere diabolico in vitis patrum, vbi dicitur, q̃ diabolus volens decipere quendam heremitam in speciem mulieris se transformans, quasi oberrans venit ad cellam eius circa noctem rogans, vt dimitteret eam illa nocte quiescere apud eum: Quod cum annuisset, post receptionem stetit cum eo iuxta ignem, postmodum incēperunt loqui de multis: postea incēpit admirari barbam suam, & tangere, & iocari. Tandem post huiusmodi mul-

ta quasi iam ei familiaris effecta, prouocauit ad turpem commixtionem: ad quod cum se ille pararet, euauit subito de manibus suis dicens. O monache, qui te extollebas usque ad cœlum; ecce quomodo corruisti. Et ideo bonorum virorum est nullam familiaritatem habere plus cum vna muliere, quam cum alia. Hiero. ad Nepotianum. Omnes puellas, & Virgines Christi, aut æqualiter ignora: aut equaliter dilige. Item affectus mulieris erga bonos viros, licet sanctus, facile degenerat in carnalem, quia fragilis sunt naturæ mulieres. Iuxta illud Prouerb. vlt. Mulierem fortem quis inueniet? Ideo viri sancti non faciunt aliquid circa eas ad nutriendum, vel augendum affectum earum circa se, per munuscula, vel per litteras, vel per blanda colloquia, & similia. Hieron. Crebra munuscula, & sudariola, & fasciolas, & vestes ori applicatas, & oblatas, & degustatos cibos, blandasque litteras, & dulces sanctus amor non habet. Lumen meum, desiderium meum, & cæteras ineptas amatorum locutiones, in comædijs erubescimus, & in sæculi hominibus detestamur: quanto magis in monachis, & clericis? Huiusmodi autem, & similia propter hæc sunt cauenda, ne per hæc affectus mulieris nutriatur erga hoc facientes. Item decor hominis solet incitare concupiscentiam mulierum Gen. 39. Erat Ioseph pulcher facie, & decorus aspectu. Et sequitur, iniecit domina sua oculos suos in eum; & ait, dormi mecum. Sed viri sancti est deturpare corpus suum per mortificationem, sicut fecit Hieron. qui scribens ad Eustochium de se dicit. Horrebant sacco membra deformia; & squallida cutis situm Æthiopissæ carnis obdlexerat; pallebant ora ieiunijs; & ante obitum suum erat iam caro præmortua. Qui autem
sic

sic deturpat corpus suum, quomodo appeti poterit, vel amari? Et ideo sic faciendum est viro sancto, quod non compositio, vel pulchritudo ametur in eo, ne sit occasio peccati in alijs. Ambrosius. Pereat corpus, quod amari potest oculis carnalibus. Item cum sentiunt viri sancti se diligi à muliere, fugiunt illam, sicut Ioseph fugit dominam suam, relicto pallio. Eccles. 7. Mulier laqueus est venatoris; vincula sunt manus eius: qui placet Deo, effugiet illam. Quæ enim fera est ita fatua, quin fugiat laqueos, & vincula. Item si fortè contingat, quod insequantur viros sanctos, confundunt eas. Vnde in viti spatrum legitur, quod cum quædam mala mulier quendam bonum virum, quasi comprehensum in loco, in quo non poterat effugere, vellet osculari inuitum: ipse præcidenis linguam suam, cum dentibus proiecit in faciem suam, & confusa recessit. Dicitur etiam de quodam viro sancto, quem quædam mulier cum insequeretur, & molestaret frequenter, vt iaceret secum; ipse fecit parare ignem in domo quadam, & ad ipsam insequentem eum dixit, vt veniret ad locum illum. Quod cum fecisset, extensis carbonibus, posuit se super eos, & dixit ei; veni modò, & iaceas hic mecum, quod illa abhorrens aufugit. Fertur etiam de quodam scholari Parisiens. qui, cum quædam mulier non cessaret eum impetere, dixit ei. quod veniret ad cameram suam. Quæ cum venisset, dixit ei, vt expoliatis pannis intraret lectum suum. Quod cum fecisset: ipse habens virgas optimas incepit eam disciplinare fortissimè cum virgis intantum qd illa multum gaudiosa est, cum euadere potuit ab eo. Sic ergo huiusmodi sunt confundendæ dictis, & factis exemplo Domini, qui minis, & verbis miro modo confudit meretricem Iudæam. Ezech. 23.

dicit.

dicat. Nasum tuum, & aures tuas præcident, & post dimittent te nudam, & ignominia plenam, & similia multa in eodem capitulo 25. & 26. Item sunt aliqui, qui cum mulieres propter aliquam causam sentiunt erga se turbatas, laborant se reconciliare. Hierony. ad Oceanum. Cum salutauerint Dei seruos, si eos præterire celerius viderint, contemptores suos iudicant, & irascuntur. Ordinatur deinde satisfactio, & post. Ille lamentare se simulat precij genus, quasi inducens uerum: modus est ille delictorum. Vnde 3. Esdræ 4. dicitur de Rege, & concubina eius, si indignata fuit, ei blanditur, donec reconcilietur in gratiam. Sancti vero non sic, quia non curant de huiusmodi reconciliatione, quia melius est eas esse turbatas contra eos, quàm carnaliter affici. Et ideo habent ad eas verba non blanda, ad gratiam earum habendam, sed potius prouocantia turbationem. Augu. Sermo brevis, asper, & rigidus cum huiusmodi est habendus, brevis, inquã, non longus, sicut desiderant, Asper qui pungat, nō liniat; rigidus, qui non flectatur ad voluntatem earum. Nonne ista sunt magis turbatiua, quam gratiæ acquisitiua? Viri igitur sancti non solum non volunt non appeti a mulieribus, sed ne apperantur, non comparent de facili coram eis, quod si aliquando comparent a longe, tamen cauent a frequenti accessu ad eas: quod si frequenter contingat ex causa, non reddunt se familiares plus vni, quam alij. Cauent etiam, ne affectum in eis erga se nutriant, de pulchritudine, vel compositione sui non curant, insequentes fugiunt: quas fugere non possint, confundunt, si contra eos turbatæ fuerint, pro reconciliatione earum non laborant, vt ex his non solum sibi, sed & eis caueant a peccato. ¶ Sciendum vero,

quod tria sunt genera feminarum, quæ facilius tentantur de bonis viris, quam aliæ. Primum est continentes, maxime iuuenes: Cum enim tentatio carnis maxime, & cōtinue sit in earum natura: facilius tentantur istæ, quam coniugatæ, vel aliæ mulieres malæ, quæ in suo matrimonio, vel cum alijs multis opus exercentes, minorem causam habent tentationis in alios. Ideo Apostolus reddens circa istud cautum Timotheum: dixit ei. Adolescentiores vi-
 duas deuota 1. Tim. 5. Inter continentes vero, sunt quidam sub habitu, & specie sanctitatis, & ideo, cum non debeant habere familiaritatem cum hominibus mundanis, propter nomen sanctitatis, facilius effundunt suas tentationes in viros sanctos, cū quibus frequentius conuersantur. Et ideo ad cauendum ab istis dicit Augu. Nec minus ideo cauendæ, quia bonæ indolis, vel etiā piæ cōuersationis esse comprobantur: Quanto enim melioris famæ sunt, tanto citius alliciunt, quia sub affectu pietatis, se supponit viscus impiæ libidinis, perniciosum mortis venenum quod suum est proijciens. Item inter huiusmodi continentes speciem sanctitatis habentes, sunt quædam vilis conditionis, quæ facilius cadunt in huiusmodi tentationes, quam nobiles, vel magnæ auctoritatis matronæ, quæ propter honorem suum hoc attentare dedignantur. Augu. Quanto vilior illarum conditio, tanto ruina facilior, & ideo continentibus sub habitu sanctitatis, & vilis conditionis magis cauendum est ab huiusmodi appetitu, secundum modum prædictum, & etiā ab eis magis cauendum.

Cap. LXXXII.

Item de hoc, quod dicitur (aspecto appetitur, & appetit concupiscentia feminarum) potest dubitari. sicut enim affectus non est in aspicere: ita aspectus non est in affici: ita nec appetere, cum appetere sit affectus, quomodo ergo dicitur, quod aspectu appetitur, & appetit concupiscentia feminarum? Ad quod dici potest, quod affectus appetit feminam, sed mediante aspectu: sicut homo secat, sed mediante securi. Est ergo appetitus huiusmodi ipsius affectus tanquam potentiae, a qua elicitur, sed aspectus tanquam instrumenti, quo mediante exercetur. ¶ Et nota, quod non solum aspectus videntis est medium huiusmodi appetitus, sicut supra dictum est, ubi actum est de corruptione oculorum, sed etiam aspectus feminae visae interdum, & hoc quattuor modis. Sunt enim quaedam mulieres, quae oculorum suorum pulchritudine incitare solent concupiscentiam in vidente. Vnde dicitur, quod cum quidam rex vidisset quandam sanctimonialem; & exarsisset in eam; & veller omnino eam habere, & eam super hoc molestaret; ipsa mandavit ei, quod significaret sibi, quid tantum sibi placuisset in ea. Cum autem ille remandasset ei, quod oculi eius super omnia placuissent sibi in ipsa: ipsa eruens oculos misit eos sibi dicens; Ecce habes, quod in me amasti, quod licet, non sit trahendum ad consequentiam: tamen patet ex hoc, quod oculorum pulchritudo incitat concupiscentiam in vidente. Et ideo dicitur. Can. 2. Auerte oculos tuos: quoniam ipsi me auolare fecerunt. Quod licet intelligatur secundum mysterium, & spiritualiter: tamen est tracta similitudo

ab amore stulto, qui cito sicut avis volat: ita cito excitatur a pulchritudine oculorum in muliere. Item solent interdum aliquæ mulieres depingere oculos suos. 4. Reg. 9. Porro Iezabel in introitu Iehu depinxit oculos suos stibio, & hoc iterum incitare solet concupiscentiam in vidente. Item sicut pudicæ mulieres solent oculos habere depresso, ita male erectos. Eccles. 26. Fornicatio mulieris in extollentia oculorū agnoscitur. Et hoc iterum est incitamentum concupiscentiæ: quia creditur, quod talis citius acquiescat peccato. Item solent quandoque malæ mulieres quosdam nutus facere oculis, quibus prouocant ad malum. Vnde Esa. 4. dicitur de filiabus Sion. Nutibus oculorum ibant: & dicuntur ire nutibus: quia nutibus se transferunt in concupiscentiam videntium: sicut vadens eundo se transfert alibi. Quia ergo tam aspectus viri videntis, quam aspectus visæ mulieris, frequenter est medium, per quod excitatur concupiscentia feminarum. Ideo dicitur quod (aspectu appetitur, & appetit concupiscentia feminarum) siue actiue, siue passiue accipiatur concupiscentia: quia mediante utroque aspectu appetitur.

Cap. LXXXIII.

N*Ec dicatis vos habere animos pudicos, si habeatis oculos impudicos: quia impudicus oculus in pudici cordis est nuncius, & cum se inuicem sibimet, etiam tacente lingua, conspectu mutuo, corda nunciant impudica: & secundum concupiscentiam carnis, alterutro delectantur ardore, etiam intactis ab immunda violatione corporibus, fugit castitas ipsa de moribus.*

¶ Dato mandato circa disciplinam oculorum, & causa mandati: ponit rationes, quare obseruandum sit. Ad quod intelligendum nota, quod tres sunt occasiones, quare quis interdum figit oculos indisciplinate in feminam. Vna est, quia non reputatur hoc sibi illicitum. Secunda, quia non reputat se videri ab alio. Tertia, quia non cogitat se videri a Deo. Prima est ex parte sui. Secunda ex parte proximi. Tertia ex parte Dei. Contra primum ponitur hic ratio. Contra secundum: ibi (nec putare &c.) Contra tertium: ibi (sed & si lateat) Ne ergo seipsum quis circa primum decipiat: dicit primo, quod non potest esse impudicitia in oculo, quin sit in anima. Secundo ostendit, quantum malum sequatur ex huiusmodi impudicitia scilicet fugatio castitatis, dicens (& cum se inuicem)

Cap. LXXXIIII.

Circa primum vero notandum, quod impudicus est oculus, qui audet respicere verecunda humani sexus, in se, vel in alio, sicut Cham, qui respexit verenda patris Gen. 9. Item impudicus oculus est, qui attente intuetur imagines libidinosae depictas: sicut Ooliba meretrix, de qua dicitur Ezech. 23. Cum vidisset viros depictos in pariete, & imagines Caldæorum expressas coloribus, & accinctas balteis, insaniuit contra eos concupiscencia oculorum suorum. Impudicus etiam oculus est, qui non refugit aspicere coitus animalium quorumcunque. Vnde & natura refugit aspectum hominum, in coitu animalium, ex quo solet irritari concupiscencia carnis: sicut probatum est multotiens. Item impudicus oculus est, qui in spectaculis respicit

repræsentationes actuum impudicorum: sicut solebat fieri in theatris tempore gentilitatis, & adhuc pro dolor, apud aliquos Christianos sustinetur ludus, qui dicitur bonatellus: Contra quæ dicit multa Augustinus in 2. li. de ciui. Dei, ubi inter alia dicit sic. Veniebamus etiam nos adolescentes ad spectaculû, ut ludis turpissimis oblectaremur. Impudicus quoque dicitur oculus, qui curiose considerat species mulierum. Contra quod dicitur Ecclesiæ 25. Ne respicias speciem mulieris. Impudicus iterum est oculus, qui nutus impudicos exercet: sicut apostata, de quo dicitur Prouerbi. 6. Annuit oculis. Sunt autem huiusmodi nutus multum efficaces in malum, propter quod dicitur Prouer. 6. Non concupiscat pulchritudinem eius scilicet malæ mulieris cor tuum, ne capiaris nutibus illius. Impossibile est, quod huiusmodi impudicitia exerceatur per oculos, nisi animus fuerit impudicus. Constat enim, quod oculi sunt sub regimine animi. Certum autem est, quod nullus permetteret, quod familia sua, quam habet regere, aliquâ impudicitia exerceret coram se: nisi esset impudicus. Item oculi magis sunt in potestate animi, quam membra genitalia, sed nunquâ per huiusmodi membra exercetur voluntarie aliquid impudicum, quin ascribatur animo: quantomagis in impudicitia oculorum est animo semper attribuenda. Item non potest esse matrona pudica, quæ per nuncium aliqua verba impudica mandat alicui: quanto ergo magis erit impudicus animus nuncio eius, id est oculo impudicitiam exercente. Bene ergo dicit, quod (impudicus oculus impudici cordis est nuncius) quia impudicitia huiusmodi manifeste nunciat animum impudicum, secundum quod hominis exteriora enunciat de illo, sicut dicitur Eccl. 19.

Cap. LXXXV.

CIrca secundum quod dicit, quod concupiscentia carnis per oculos exercitata, sine alio tactu fugat castitatem. ¶ Notandum, quod præter istud malum, multa alia mala facit huiusmodi concupiscentia. Vnum est, quod deuirginat animam Eccles. 20. Concupiscentia spadonis, scilicet carnis, quæ sicut spado corrumpere potest, non facundare, in bono, deuirginat iuenculam scilicet animam: per huiusmodi enim concupiscentiam, sine alio tactu exteriori, interdum amittit virginitatem anima. Aliud est: quod auertit a Deo, Dan. 13. Exarserunt in concupiscentia eius, & euerterunt sensum suum; declinauerunt oculos suos, vt non viderent cælum. neque recordarentur iudiciorum iustorum. Aliud est, quod tradit hominē in manibus hostium. sicut Dalida Sansonem Eccles. 18. Si dederis animæ tuæ, hoc est animalitati tuæ, concupiscentias suas, faciet te gaudium inimicis tuis. Aliud est, quod quodam modo equat hominem adultero Mat. 5. Qui viderit mulierem, ad concupiscendum eam, iam mæchatus est in corde suo. Aliud est, quod generat pessimam prolem, generat enim peccatum. Iaco. 2. Concupiscentia, cum concepit, parit peccatum. Quid autem peius? Nonne melius esset, quod pareret bufonem? Item euacuat animam omni bono Dan. 13. Concupiscentia subuertit cor tuum, vas enim, quod subuertitur, euacuatur omni contento. Item facit desipere, in mutando sensum hominis. Sap. 4. Inconstantia cōcupiscentiæ subuertit sensum scilicet in malitia, quia scilicet primus non erat malitia. Item paulatim plus, & plus corrumpit hominem,

sicut pars putrida corrumpit alias 2. Pet. 1. Pug-
 entes eius, quæ in mundo est, concupiscentiæ cor-
 ruptionem idest concupiscentiam, quæ corrumpit.
 Item coinquinat, sicut vulnus plenum sanie. 2. Pet.
 3. In concupiscentijs immunditiæ ambulant: in con-
 cupiscentijs. scilicet quæ plenæ sunt immunditia.
 Item aduersatur spiritui. & impedit ab omni bono
 Gal. 5. Caro concupiscit aduersus spiritum, & post,
 vt non quæcunque vultis, illa faciatis, Item facit
 hominem deturmis mundi Deo cōtrarijs, quæ sunt
 tres, concupiscentia carnis; concupiscentia oculo-
 rum, & superbia vitæ, sicut dicitur 1. Iohan. 2. Pro
 inde, cum huiusmodi concupiscentia tot mala indu-
 cat, non est bonorum virorum, ipsam laxare, exem-
 plo illius iniqui, de quo dicitur Dan. 11. Erit in cō-
 cupiscentijs feminarum, sed potius ipsas refrænare,
 exemplo illius, quæ dicit Thob. 3. Mundam serua-
 ui animam meam ab omni concupiscentia: immo
 debemus eam, mortificare, secundum præceptum
 Apostoli dicentes Col. 3. Mortificate concupiscen-
 tiam malam. Porro ex intuitu mulieris speciei,
 concupiscentia quasi ignis, ex ardescit: Et ideo de-
 cet virum sanctum, vt caueat sibi ab huiusmodi
 concupiscentia, & ab omni impudico aspectu. Nar-
 rat Tullius de offi. li. 2. quod cum essent duo præto-
 res collegæ Pericles, & Sophocles, & causa officij
 conuenissent, contigit quendam iuuenem valde pul-
 cherrimum ad eos intrare, quem cum vidisset So-
 phocles dixit ad socium: o pulchrum puerum Peri-
 cle, & Pericles ad eum, decet Sophocle prætorem
 non solum mentem, sed & oculos abstinentes habe-
 re; Si autem hoc decet prætorem, quantomagis vi-
 rum religiosum? Non est ergo sine culpa viri reli-
 giosi, quod habeat oculos impudicos. Et hæc pri-

ma causa, quare debet cauere vir religiosus ab impudico mulierum aspectu.

Cap. LXXXVI.

NEc putare debet, qui in *fœminam* figit oculum, & illius in seipsum dirigit fixum, ab alijs se non uideri; cum hoc facit, videtur omnino, & a quibus se uideri non arbitratur.

¶ Hic tangitur secunda ratio, quæ est ex parte proximi, quare mandatum prædictum est obseruandum. ¶ Et notandum, quod aliqui sunt ita stolidi, quod cum non uident alios, non putant se interdum uideri ab alijs. Isti sunt animal stolidum, sicut asinus, de quo dicitur, quod quando habet caput inter sepes, non uidens lupum, putat se non uideri ab eo. Sunt iterum sicut pueri, qui in ludo quodam recurrunt ad genua matris, & ibi abscondunt caput, & non putant se uideri ab alijs pueris, quos non uident. Sicut etiam cæcus non putat se uideri ab alijs, quos non uidet. Ita & multi cum aliquid in discipline committunt, circa mulieres, non uidentes alios; non putant ab eis se uideri, sed non est ita. Non putabat Isaac se uideri, cum iocabatur cum uxore sua Rebecca, sed uidit hoc Abimelech rex Palæstinorum, prospiciens per fenestram. Gen. 26. Non putabat ille iuuenis, qui ambulabat, ad uesperascente die, iuxta domum meretricis, quem depræhensum osculata est, se uideri a Salomone, quem tamen uidit de fenestra domus suæ prospiciens per cancellos. Prouer. 7. Nunquid illa mulier, quæ depræhensa in adulterio adducta est ad Iesum Iohan. 8. Putabat se uideri, uel adulterans cum ea, quando sunt & visi, & compræhensi. Sic quodam
Dei

Dei iudicio, multi in huiusmodi, cum se putant latere, depræhenduntur superna providentia, non sine causa valde facili, hoc faciente. Qui enim huiusmodi sunt, corriguntur per confusionem interdum, & nunquam Dei timore corrigerentur. Ideo orat pro talibus Psal. 5. Confundantur, & conuertantur retrorsum scilicet a malis cōceptis retrahantur, præ confusione. Item alijs hoc videntibus incutitur timor similia perpetrandi, sicut de latronibus depræhensis, quorum depræhensio est alijs ad timorem. Exemplum Actuum 5. de Anania, & Saphyra, quibus depræhensis, & punitis, sequitur in historia. Et factus est timor magnus in vniuersa ecclesia, & in omnes, qui audierunt hoc. Item sicut latrones interdum plus nocent reipublicæ, quam raptores, ita occulta peccata, quia frequentius committuntur, & maiores inuadunt, & minus potest ab eis cauere; sicut & latrones frequentius nocent, quam raptores, & magnos thesauros inuadunt, ubi raptores capiunt asinos, & capras, non potest pater familias ab his cauere, quia nescit, quando veniunt. 4. Reg. 24. Immisit Dominus scilicet permissiue latrunculos Chaldæorum, & latrunculos Syriæ, & latrunculos Moab. & latrunculos filiorum Amon in Iudam, vt disperderent eam. Proinde Dominus reipublicæ, & amator boni illius facit interdum, vt depræpendantur huiusmodi peccata, sicut & Domini terrarum adhibent diligentiam magnam, vt depræhendantur latrones, & confundantur. Hiere. 2. Quomodo confunditur fur, quando depræhenditur, sic confusæ sunt domus Israel, quæ religiosos designant. Igitur huiusmodi homines videntur interdum, & depræhenduntur, Deo procurante, & propter alium timorem, & propter bonum cōe.

Cap. LXXXVII.

Sed etsi lateat, & a nemine hominum videatur, quid faciet de illo desuper inspector; quem latere nihil potest? An ideo putandus est non videre; quia tanto videt patientius, quanto videt sapientius? Illi ergo vir sanctus timeat displicere: ne velit fœmina male placere. Illum cogitet omnia videre: ne velit fœmina male videre. Illius namq̃ & in hac causa, commendatus est timor, ubi scriptum est abhominatio est Domino desigens oculum.

¶ Ad obseruandum mandatum prædictum ponitur hic ratio tertia, sumpta ex parte Dei, quo ad eius intuitum. Circa quem quattuor tangit. Primo quantæ sit virtutis (quia ipsum nihil potest latere) Secundo quam fatui sunt, qui putant contrarium, ibi (An ideo putandus est &c.) Tertio ex hoc, quod postquam duę rationes prædictæ debent mouere, concludit propositum, ibi (Illi ergo &c.) Quarto conclusionem auctoritate confirmat. d. (Illius namque &c.)

¶ Circa primum Notandum, quod si hominum aspectum quandoque lateant aliqua facta nostra, tamen diuinum intuitum nihil potest latere. Tenebræ enim quandoque impediunt aspectum humanum, sed non sic diuinum. Iob. 23. Non sunt tenebræ, & non est umbra mortis, ubi abscondantur ibi, qui operantur iniquitatem. Item obstacula, ut parietes, & similia, sed non sic diuinum Eccles. 23. Oculi Domini multo plus lucidiores, super solem, quia scilicet radij solares non pertranseunt, ubi est medium opacum; oculi vero Domini omnia quantuncunque opaca pertranseunt, sicut oculi, qui dicuntur

cuntur ultra parietes uidere. Item modicitas rei impedit interdum aspectum hominis. Sunt enim quædam ita modica, quod non potest ea homo uidere: sed non sic diuinum, Esa. 18. Ego considerabo in loco meo, sicut meridiana lux clara est, quæ scilicet ostendit atomos; ita & ipse uidet & motus, & gestus, & cogitationes, & affectus, & intentiones, & similia quantuncunque modica. Item rei remotio, quandoque enim non uidet homo rem aliter uisibilem, propter sui distantiam, sed non sic Deus, quia ipse est præsens ubique. Gen. 31. dixit Laban, quamuis gentilis. Nullus sermonis nostri testis est, absque Deo, qui præsens respicit. Item rei absconsio in profundum impedit humanum aspectum, sed non sic diuinum. Quid enim profundius corde ipse autem est qui nouit abscondita cordis, ut dicit Psal. Quanto magis omnia alia, & ubique abscondita? propter hoc bene dicit (quem latere nihil potest) concordans uerbo Apostoli dicentis Heb. 3. Omnia nuda, & aperta sunt oculis eius, quia nec tenebræ, nec intermedia, nec rei modicitas. nec distantia: nec aliqua absconsio impediunt uisum eius.

¶ *Circa secundum notandum*, quod Deus non uidetur aliquando uidere aliqua mala, quia dimittit ea impunita. Grego. Quasi clausis oculis non uult aspicere, quod non uult ferre, licet tamen uideatur non uidere, tamen non est ita, uidet enim omnia mala, sed ex causa interdum, quasi non uidens, ea non statim punit. ¶ *Nota*, quod Deus differt punire peccatores multiplici ratione, non enim est uoluntarius ad puniendum, sed quasi inuitus hoc facit Thren. 3. Non enim ex corde humiliavit, & abiicit filios hominum. Et ideo facit hoc tarde, & lente, sicut ille,

ille, qui facit rem aliquam inuitus. Item facit hoc interdum misericorditer expectando ad penitentiam. Sap. 12. Non enim impotens eras impios simul exterminare: sed partibus, idest per partes iudicans dabas locum penitentiæ. Item interdum hoc facit exigentibus culpis aliorum, qui in sordibus fordescendo adhuc, ad penas referuantur maiores, 2. Mach. 6. In alijs nationibus Dominus patienter expectat, vt eos cum iudicij dies aduenerit, in plenitudine peccatorum puniat. Item interdum hoc facit, ne detur malignis occasio gloriandi Deut. 32. Propter iram inimicorum distuli, scilicet punire, ne forte superbirent hostes eorum. Item interdum, vt per hoc nos doceat, q̃ inimicis nostris debemus esse patientes, suo exemplo: non sicut seruus nequã, qui à Domino suo toleratus noluit patientiam habere in conseruum suum. Matth. 18. Serue nequã omne debitum dimisi tibi: quoniam rogasti me. Nonne ergo oportuit, & te misereri conserui tui, sicut & ego tui misertus sum? Sunt ergo quinq; causæ, quare Dominus interdum, & si videat mala aliqua, non tamen statim punit, & cum omnes valde sint rationabiles, patet, quòd huiusmodi patientia procedit ex sapientia, non ex malorum ignorantia. Bene ergo inuehit cōtra istos Aug. dicens (An ideo putandus est non videre, quia tanto videt, patientius, quanto sapientius?)

¶ *Circa tertium notandum*, quòd quinq; sunt circumstantiæ ex parte videntis, propter quas quis solet magis timere facere aliquid mali, coram eo. Vna est, si sit magna persona. Alia, si sit honesta. Tertia est, si malum, quod fit, fiat contra eum. Quarta est, cum ipse videns habet de illo malo accusare. Quinta, si debeat de illo iudicare. Ipse autem Dominus

minus est tam magna persona, q̄ magnitudinis eius non est finis, vt ait Psalmus. Tam honesta, q̄ oculi eius ad iniquitatem respicere non possunt. Abachuch. 2. Ipse est contra quem solum est peccatum. Ipse est, qui habet accusare de peccato testificando, & iudicare. Hiere. 29. Ego sum iudex, & testis. Ideo repræhendit seipsum quod super hoc dicens, & malum coram te feci, qui scilicet es tam magnus, tantus honestatis zelator, in cuius solius iniuriam fit peccatum, qui habes de illo contra me testificari, & de ipso me iudicare. Bene ergo dicit illi scilicet, qui talis est. Timeat displicere vir sanctus: ne velit fœminæ malæ placere. Illum cogitet omnia videre: ne velit fœminam male videre, hoc est, caueat ne in tali visu aliquid mali cōmittat coram eo. Potest etiam talis placentia, & talis visus in casibus esse sine malo: quod repræhendere non intendit. Ideo dicit: male placere, & male videre.

¶ *Circa quartum notandum*, q̄ mulier est quasi faccus stercoreum. Abhominabile enim faceret, qui figeret manum in sacco stercoreibus pleno: & abhominatorem maiorem faceret, si figeret linguam: quæ est nobile membrum. Oculus autem est membrum valde nobile. Quanta ergo abhominatio est coram Deo, figere oculum in huiusmodi faccum. Item abhominabile faceret, qui coram hominibus prouocaret membra genitalia ad motus turpes: sed fixio oculorum in muliere facit hoc coram Deo. Item abhominabile faceret coram hominibus, qui immundicijs impleret sinum suum: sed hoc facit coram Deo fixio huiusmodi, quia ex illa inducuntur cogitationes immundæ innumerabiles in corde. Item abhominabile esset corā hominibus rem præciosam, & mundissimam miscere cum vili, & immunda,

munda, ut vinum cum urina: balsamum cum ster-
coribus. Sic autem facit defigens oculum in mu-
lierem, quia per huiusmodi fixationem, miscet ani-
mam suam, quæ de se tanquam res spiritualis est
preciosissima, & mundissima, cum carne muliebri,
quæ est res vilissima, & immunda. Item abhorrina-
bile esset si quis per nasum emitteret urinam, vel per
os stercora, quia non sunt illi meatus ad hoc depu-
tati. Quanta ergo abhominatio est coram Domino:
cum quis per oculos deputatos ad cœlestia contem-
planda emittit luxuriam? Hoc autem facit defigēs
oculos male in mulierem: per ipsos enim oculos
emittit impudicitiam intrinsicam. Bene ergo di-
cit scriptura secundum aliam translationem. Abho-
minatio est Domino defigens oculum.

Cap. LXXXVIII.

Quando ergo simul estis in Ecclesia, & ubicunq;
fœmina sunt, inuicem vestram pudicitiam cu-
stodite. Deus enim, qui habitat in vobis, etiam isto
modo custodiet vos, ex vobis.

¶ Data sunt supra præcepta uel mandata circa
tria pertinentia ad honestatem: Hic subiungit man-
data circa correctionem inhonestatis, quod est ma-
xime honestatis. Attendendum vero est, quod
quædam sunt, & fiunt mala, super quibus commit-
tentes ea, depræhenduntur: Alia uero, quæ com-
mittentes gratis recognoscunt, depræhensionē uero
malorum facit mutua custodia. Cum autem per
huiusmodi custodiam, aliquid depræhenditur, de-
bet sequi secreta admonitio, cum uero huiusmodi
admonitio non prodest, procedendum est ad denū-
ciationem. Augustinus, igitur hæc prosequens.

Primo

Primo ponit circa depræhendentia, mādāta in particulari. Secundò in generali. In particulari vero primo ponit mandatum circa huiusmodi custodiā, & hoc in materia pudicitiae, de qua specialius est curandum tanquam de re maximæ honestatis. Secundo circa admonitionem: ibi (& si hanc &c.) Tercio circa denunciationem: ibi (Si autem, & post.) Quarto circa eadem in genere, ibi (& hoc quod dixi.) Quinto circa mala, quæ gratis recognoscunt: ibi (quicunq; autem intantum &c.) ¶ Circa primū notandum, quòd sicut nobilis Zelotes sponsæ suæ solet ponere custodes circa eam, ne aliquid faciat indecens: ita Dominus amator animæ multos ordinat circa eam custodes. Assignat ad hoc angelos. Psal. Angelis suis Deus mandauit de te: vt custodiant te. Item prælatos Esa. 62. Super muros tuos Hierusalem constitui custodes, scilicet prælatos. Item proximos Eccl. 17. Vnicuiq; mandauit Deus de proximo suo, scilicet custodiendo. Vnde Gen. 3. repræhenditur Cain de hoc, quòd dixit. Nunquid custos fratris mei sum ego? Porro pudicitia est valde preciosa. Eccles. 27. Omnis ponderatio non est digna continentis animæ. Item habet magnam impugnationem; Impugnatur enim à carne, per concupiscentiam. Item à mundo, per visibilia. Item a Dæmonibus, qui super hoc incessanter religiosos impugnant. Vnde in Vitis patrum legitur, q̄ quidam Dæmon impugnauit quadraginta Annis quendam hæremitam, vt eum semel faceret fornicari. Propter hoc Dæmones in scriptura vocantur locustæ, quæ à iuuentute flores deuorant, ita & ipsi flores pudicitiae. Item vas in quo seruatur pudicitia est vas valde fragile. Iuxta illud Apostoli 2. Cor. 4. Habemus thesaurum istum in vasis fictilibus, quæ
autem

autē huiusmodi sunt, solent diligenter multum seruari. ¶ Item notandum, q̄ aliquando contingit, q̄ personæ religiōsæ declinantes loca solitaria, propter suspicionem, quam de se nolunt generari, committunt in societate, ipsa tamen non aduertente, aliquam impudicitiam in actu, vel visu, vel huiusmodi circa mulieres. Item quandoq; in loco sacro: Item quandoq; illi de quibus nullatenus crederetur. Et ideo incaute faciunt, qui in aliquo istorum confidentes, minus sollicitè custodiunt fratrē suum. ¶ Item notandum, quod pudicitia obseruatio speciale donum Dei est. Sap. 8. Sciui, quoniam aliter nō potui esse continens, nisi Deus daret. Sunt autem multi modi, quibus Deus hominem conseruat ab impudicitia. Vno modo ex virtute seu meritis illam præcedentibus. Sic custodiuit Abimelech regem Geraræ, ne tangeret vxorem Abraham, propter simplicitatem cordis sui, quia nesciens, q̄ esset vxor Abraham, tulerat eam, vt sibi acciperet vxorem suam secundum glo. Gen. 20. Ego scio, q̄ simplici corde feceris hoc, & ideo custodiui te, ne tangeres eam. Alio modo per aduersitates. Osee 2. Sepiam viam tuam spinis, & sepiam eam maceria, & semitas suas non inueniet. Et sequetur amatores suos, & non apprehendet eos. Tertio modo, per adiutorium humanum: sicut reges solent custodire vxores, per eunuchos, quia secundum Apostolum. Dei coadiutores sumus: Sed tamen sine ipso non satisfacimus ad hoc. His prænotatis patet continuatio, & exposito præsentis mādātī. Dixerat enim immediate, quod defigens oculum abhominatio sit Deo, & ideo concludit (Quando ergo simul estis &c.) quasi dicat. Ne ergo cōtingat hoc de vobis, scilicet qđ sitis abhominatio Deo, custodite uos ipsi,

non relinquentes totum custodiæ Angelorum, uel prælatorum. Custodite, inquam, pudicitiam uestram, quæ est res tam preciosa, tam impugnata, & in tam fragili loco posita. Et hoc facite, quando simul estis, non confidentes de societate; & etiam si sitis in ecclesia; uel alio quocunque loco, non confidentes de loci sanctitate (& inuicem) idest unus indefinite alterum, quicunque sit, non confidentes de personæ conditione quacunque. Quamuis autem sic faciatis, quod in uobis est; tamen non putetis hoc sufficere, nisi & ipse Deus hoc faciat, sed confidite, quia, si quod uestra interest facitis, ipse Deus, qui habitat in uobis, qui multis modis solet suos custodire, hoc modo custodiet uos, ex uobis.

Cap. LXXXIX.

ET si hanc, de qua loquor, oculi petulantiam in aliquo uestrum aduerteritis, statim admonete: ne male capta progrediantur, sed de proximo corrigantur.

¶ Custodia mutua valet ad duo. Ad cauendum peccatum ideo dixit in præcedenti mandato. Deus, qui habitat in uobis, etiam isto modo custodiet uos ex uobis, scilicet a malo. Item ad depræhendendū malum; si fiat, & circa hoc tradit hoc mandatum dicens. Quid sit faciendum, quando depræhenditur, scilicet quia monitio est facienda, & statim. Et subiungit causam duplicem scilicet resistentiam futuris, ne capta progrediantur; correptionem de præteritis, ut de proximo corrigantur Et sic tria continet hoc mandatum scilicet mandati substantiam, & tempus exequendi, & causam. Sed quæreret aliquis circa primum. Nunquid tenemur ad correptionem fraternam de uenialibus? Videtur, quod non.

non. Nullus enim tenetur se corrigere de venialibus. Alioquin per venialia damnaretur. Quid ergo mandat August. dicens quod de petulantia oculorum debemus fratrem corrigere, cum huiusmodi petulantia potius iudicanda sit venialis, quam mortalis? respondo venialia sunt dispositio ad mortalia, sed quædam sunt dispositio remota, quædā propinqua, vel ratione multitudinis, sicut in illo, qui assidue huiusmodi sine numero committit, vel ratione magnitudinis, sicut sunt aliqua mendacia, & aliquæ detractiones, & similia, uel ratione connexionis cum mortali, sicut sunt colloquia impudica, & visus, & huiusmodi circa mulierem. Sicut ergo aliquis videns aliquem incedentem per viam, per quam credit, quod statim incurret periculum mortis, peccaret, nisi retraheret eum, ita potest aliquis peccare mortaliter, nisi corrigat fratrem de huiusmodi venialibus, quæ sunt dispositio propinqua ad mortale: & de talibus est petulantia, de qua hic loquitur. Est enim dispositio ualde propinqua ad peccatum mortale. Tenemur igitur ad correctionem fraternam de venialibus interdum, non inquantum venialia, sed inquantum ad mortale inductiua: Quod innuit Aug. cum causam huiusmodi correctionis assignat dicens (ne cæpta progrediantur) In alijs autem casibus, quamvis huiusmodi correctio non sit de necessarijs ad salutem, tamen est de expedientibus. Ad id, quod dictum est in contrarium, dici potest, quod hæc non est uera: nullus tenetur se corrigere de venialibus: quamvis enim venialia nunquam sint mortalia, tamen negligentia corrigendi se de venialibus, potest esse mortalis in casu simili supra posito; sicut & contemptus venialium, potest esse tantus, quod erit mortalis. Et ne-

gligentia in superiori parte rationis non corrigentis inferiore circa uenialia, potest esse mortalis. Sed iterum quæritur circa secundum, quare dicit statim, cum istud mandatum sit affirmatiuum, & affirmatiua non obligant ad semper sed pro loco, & tempore? Respondeo. Quædam sunt peccata iam commissa, & non sunt iam in actu ad correctionem, de istis sufficit, quodd pro loco, & tempore, seruata opportunitate, fiat correctio, immo secundum quosdam de commissio iam delicto tenentur nisi soli prælati, & quo ad alios est consilium. Alia uero sunt, quæ sunt in actu, circa ista statim adhibenda est admonitio, sicut, igne accenso, statim currendum est ad aquam, sine expectatione. Et de talibus loquitur hic, sicut patet ex hoc quod dicitur. (Et si oculi petulantiam in aliquo uestrum aduerteritis) scilicet in ipso actu. ¶ Circa tertium notandum, quod non solum propter causas, quas dicit, sed propter multas alias rationes, debet uigere huiusmodi admonitio multum, quæ dicitur fraterna correctio in religione. Est enim quædam fraternitas, quæ dicitur naturæ, secundum quam omnes descendentes ab Adam dicuntur fratres, Alia fidei, secundum quam omnes Christiani dicuntur fratres, quia habent eandem fidem. Alia professionis, secundum quam dicuntur fratres, qui sub eadem professione uiuunt, sed omnes fraternitates concurrunt in religiosis. Cum ergo huiusmodi correctio fiat ratione fraternitatis, iuxta illud Mat. 18. Si peccauerit in te frater tuus, corripe eum inter te, & ipsum solum. Quantum tenentur ad hoc religiosi, inter quos est tanta fraternitas? Item Eccles. 19. dicitur. Corripe amicum. Ex quo innuitur quod huiusmodi correctio impendi debet maxime amicis, iuxta illud

illud Apostoli. Quos amo, arguo, & castigo. Et ideo ueriores amici magis tenentur corrigere: Sed uerior est amicitia illa, quæ Christi amore est conglutinata, sicut dicit Hiero. & talis est in uiris religiosis. Ex quo patet, quòd magis tenentur ad huiusmodi correctionem in fratribus suis. Item proximitas est causa huiusmodi correctionis: Nò enim tantum tenemur extraneis, uel remotis, quantum vicinis. Eccles. 19. Corripe proximum, ex quo sequitur, quòd magis tenemur proximiori. Quis autem proximior; quam ille, cum quo continue conuersamur? Sic autem est in claustro. Item sanctitas rei ex seipsa prouocare solet, ut uidens in ea sordem, statim festinet abstergere, ut si quis videret sordes in altari Deo consecrato. Cum ergo quilibet religiosus sit Deo consecratus; Quomodo potest se frater eius continere, quin statim laboret abstergere sordem peccati, si uidet eam in ipso? Et ideo bene dicitur Apoc. 22. Sanctus sanctificetur adhuc. quasi dicat. Ex hoc, quòd sanctus est, plus debet curari de eius sanctificatione, si in aliquo inquinetur. Item peccatum fratris redundat in damnum commune, iuxta illud, Nam tua res agitur, paries cum proximi ardet: Sicut ergo quando ignis est in una parte domus, quilibet nititur extinguere, ne tota domus comburatur: Ita curandum est, statim extinguere peccatum, in quocunque sit in religione. Ideo dicit August. (statim admonete, ne male cepta progrediantur) scilicet in ea. Item atque re est proprium opus spiritus sancti secundum illud Ioh. 16. Ille arguet mundum de peccato. Quomodo ergo potest credi, quòd spiritus sanctus habitet in illis, qui numquam arguunt? Ideo signantur dicit Apostolus Gal. 6. Vos, qui spirituales estis, in-

struite huiusmodi, scilicet delinquentes. Pater ex his, quod viri religiosi multum tenentur ad fraternam correctionem, & ratione magnæ fraternitatis, & ratione veræ amicitiae, & ratione magnæ proximitatis, & propter status sanctitatem, & propter propriam vtilitatem; & propter spiritum inhabitantem. ¶ Sed notandum circa modum correctionis, quod huiusmodi correctio facienda est cum lenitate. Delinquentes ei sunt quasi infirmi, & ideo cum lenitate sunt tractandi. Gal. 6. Instruite in spiritu lenitatis. Item cum humilitate, Superbus est enim animus humanus, & ideo cum superbe loquitur eidem alius, sequuntur inde potius iurgia, quàm alij fructus, iuxta illud Prouer. 13. Inter superbos semper iurgia sunt. Propter quod dicitur Prouer. 18. Cum obsecrationibus loquitur pauper scilicet spiritu humilis. Et econtrario. In ore stulti iurgia superbiae scilicet superba correctio. Prouer. 14. Itē cum compassione. Non enim est veræ iusticiæ indignari peccatoribus, sed compati, & ex compassione corrigere, & eos diligere Psal. 79. Corripiet me iustus in misericordia scilicet compassionis: Item cum discretione, Aliter enim corrigendi sunt maiores, aliter pares, aliter minores; aliter graua peccata, aliter leuia, aliter occulta, aliter manifesta sunt corrigenda, seu tractanda. Et in omnibus seruandus est locus, & tempus, & oportunitas, Quod quia non obseruant quidam habentes zelum in correctionibus, sed non secundum scientiam, dicit Bern. Zelum tuum infranet scientia scilicet discretionis. Item cum moderamine: Non enim de festiuis proximorum sunt faciendæ trabes, sicut faciūt aliqui, qui docti sunt in culpas aliorum arguendas 2. Timo. 2. Seruum Dei cum modestia corripientē.

idest

ideft cum modo debito. Eft autem modus debitus, vt potius culpæ femper alleuiantur, quam aggrauentur. Seneca. Lauda parce; uitupera parcius. Item cum tranquillitate, Correctio enim, quæ fit, cum turbatus eft animus, frequenter eft quædam impatientiæ offenfio, mentiens in fe correctionem. Ecclef. 19. Eft correctio mēdax in ira contumeliosi. Ideo vir sapiens expectat facere correctionē, quouſque habeat animum tranquillum, vt tranquillitate iudicet, ſicut Deus cum tranquillitate iudicat Sap. 12. Exemplum de Philoſopho qui iratus contra ſeruitorem ſuum dixit. Iam te uerberarem niſi eſſem iratus; Patet ergo modus, quo facienda eſt correctio, quia cum lenitate, cum humilitate, cum compaſſione, cum diſcretionē; cum moderamine, cum tranquillitate ¶ Porro ex eius correptione facta, debito modo, ſequitur fructus multus. Vnus eſt animæ liberatio. Si enim correctus audit corrigentē, lucratus eſt animam fratris Mat. 18. Si autem non audit, ſaltem ſuam liberat. Ezech. 3. Tu uero animam tuam liberaſti, ſcilicet poſtquā dixiſti impio impietatem ſuam, & noluit ſibi cauere. Vnde patet, quod anima una ſemper liberatur, ſcilicet uel correcti, uel corrigentis. Alius eſt diaboli fugatio. Fugit enim lupus, ubi exclamatur. Quo cōtra Ber. Securus accedit tentator, ubi nullus timetur reprehensor. Alius eſt peccati cognitio: Frequenter. n. committens culpam, non aduertit, quod facit, aut ſi aduertit, non cogitat ſe male feciſſe, aut ſi male, non multum male, Ecclef. 19. Corripe amicum, ne forte non intellexerit, & dicat: non feci hoc, ſcilicet quod tu dicis, uel non feci male. Alius eſt cautela de futuris Prouer. 29. Correctio tribuit ſapientiam, quia ſcilicet per hoc fit homo cautior, ad ca-

uendum in futuro. Alius est puritatis augmentatio. Vas enim aureum, uel argenteum quāto plus confricatur, tanto plus purificatur: Et ita boni uiri religiosi, quanto plus corriguntur, tanto puriores fiunt: Et ideo intelligentes hoc non ferunt grauius; Eccles. 10. Vir prudens, & disciplinatus, nō murmurabit correctus. Exemplum de Augustino Episcopo qui dixit. Ego senex; & Episcopus paratus sum ab omnibus corrigi, & emendari: & illum amicum meum existimo, cuius linguæ beneficio, ante diem extremi iudicij animæ meæ maculas tergo. Alius est amicitiae acquisitio: quamuis enim religiosus correctus interdū ferat moleste in principio: tamen rediens ad cor, aduertit corrigentem amicum suum uerum Prouer. 28. Qui corripit hominem, inueniet gratiam postea apud illum: magis quam ille, qui per linguæ blandimenta decipit. Quia ergo ex huiusmodi correctione sequuntur animæ liberatio, hostis fugatio, peccati cognitio, ad cauendum in futuro sapientia, puritatis augmentatio, amicitiae acquisitio; bene dicitur, quod bonum est arguere. Patet ex iam dictis, quod sex sunt rationes, quare in religione multum debet vigere fraternitas, & charitatiua admonitio: Et sex quæ sunt circa modum correctionis seruanda: Et sex fructus qui ex hoc subsequuntur.

Cap. XC.

S*I autem & post admonitionem iterum, vel aliquo die, idipsum eum facere uideritis iam uelut vulneratum sanandum prodar, quicumque hoc potuerit inuenire.*

¶ Postquam deprehensa culpa fraterna: facta est
admo-

admonitio secreta, & non prodest: procedendum est ad denunciationem. Circa quam tria solent currere: Primum est culpæ indicatio. Secundum indicatæ conuictio. Tertium conuictæ dijudicatio. Et ideo circa ista tria, tradit mandata tria. Primum hic. Secundum ibi. (Primus tamen est altero) Tertium ibi. (conuictus vero) ¶ Circa indicationem vero faciendam, innuuntur quattuor in hoc mandato, scilicet quādo est facienda, quia post iterationem culpæ a fratrum monitione: Et ideo dicit. (Si post admonitionem &c.) Item quare est facienda: quia propter periculum delinquentis: & ideo dicit. (Iam velut vulneratum) Item ad quid est facienda: quia propter bonum scilicet ut subueniatur periculo: Ideo dicit. (sanandum prodat) Item a quo est facienda: quoniam a quolibet, qui hoc depræhenderit. Et ideo dicitur (Quicumque &c.) ¶ Sed quæreret aliquis circa primum. An liceat culpam fratris indicare prælato, vel fratribus, vel in capitulo proclamare publice; non præmissa secreta admonitione? Videtur, q̄ non, quia dicunt iura, q̄ denunciationi debet præcedere charitatiua admonitio, secundum illud Mat. 18. Si peccauerit in te frater tuus, corripe eum inter te, & ipsum solum. Et hoc idem Aug. videtur innuere in isto mandato, quodd si sic est, tunc videntur omnes religiosi peccare, qui proclamant pro culpis fraternis, non præmissa admonitione. Ad hoc autem intelligendum: Sciendum est, q̄ sunt quædam peccata manifesta: & hæc quæcunq; sint, siue parua, siue magna, non requirunt secretam admonitionem, sed publice sunt corrigenda. i. Timo. 5. Peccantes corā omnibus argue, vt & cæteri timorem habeant. Glo. peccantes, qui manifesti sunt. Alia sunt occulta: Et ho-

rum

rum quædam sunt modica, vt excessus in risu, & huiusmodi: & ita annexa fragilitati humanæ, quoddam vix est aliquis, quantumcumque perfectus, qui septies in die non offendit in illis. Ista vero, quia sunt cuiusdam quasi necessitatis, non habent notabilem verecundiam, neque adducunt infamiam. Et ideo non oportet, in istorum correctione, præcedere admonitionem. Ratio enim, quare debet fieri secreta admonitio, secundum sanctos, & magistros est duplex. Vna est, ne amissa verecundia, si corrigatur frater palam, minus timeat peccare. Secunda est, ut parcat famæ fratris, quantum fieri potest, salua salute illius. Cum igitur causæ istæ non inueniantur circa peccata ista: non exigitur ordo huiusmodi in istis, sed sine præcedenti admonitione potest frater, etiam in capitulo proclamari: siue sint manifesta siue occulta. Alia sunt occulta, sed maiora, quæ habent infamiam, & verecundiam, vt inebriatio, & huiusmodi, quæ quandoque sunt venialia, quandoque mortalia. In istis autem interdum contingit, quod creditur probabiliter, quod per secretam correctionem prouideretur saluti delinquentis, & statui suæ religionis, vt si verbi gratia, contingat, quod aliquis probus homo inebrietur ex fortitudine vini, vel alio casu fortuito, & nunquam alias contingit ei: creditur, quod in antea cauebit, si fuerit secreto correctus. In talibus seruandus est ordo correctionis, & peccaret, qui hoc indicaret alijs, non præmissa admonitione, quia nullus fructus sequeretur ex tali indicatione, & infamaretur delinquens sine causa, cum per secretam correctionem, prouideri possit sufficienter omni periculo. Aliquando vero contingit, propter aliquas circumstantias, quod creditur probabiliter, quod per huiusmodi secretam correctionem

rectionem, non sufficienter prouideretur saluti delinquentis, vel statui religionis suæ, & tunc potest omitti huiusmodi correctio secreta, quia non speratur de fructu, & potest, & debet indicari factum prælato, vel alijs bonis, quæ possunt prodesse, & nõ obesse. Vel etiam de eorum consilio potest fieri proclamatio in capitulo: si tamen potest culpa probari. Aliquando vero contingit, quòd creditur, quòd delinquens est tantæ peruersitatis, q̃ si corrigeretur secreto, incurreret odium erga corrigentem, vel mala machinaretur cõtra eum: Vel ex hoc dabit operam ad defendendam, vel cooperiendam maliciam suam: Et tunc non solum non debet fieri talis correctio, immo debet non fieri: quia extremæ est dementiæ secundum Hiero. Frustra niti, & nihil aliud, quàm odium quærere, sed tamen prælato, vel alijs bonis prælatis, secundū modum prædictum, est indicandum. ¶ Ad quæstionem ergo propositam distingue sic, Quia culpa, vel est manifesta, vel occulta. In primo casu non requiritur, q̃ fiat secreta correctio: nec Dominus intellexit de talibus, cum dixit. Si peccauerit in te frater tuus, cum dicat Glo. id est te solo sciente. In secundo casu iterum distingue, quia culpa occulta aut est de minimis, aut de maioribus, quæ habent infamiam secum. In primo casu, non requiritur etiam admonitio secreta. In secundo casu iterum distingue, aut quia præsumitur, quòd profit correctio secreta: & tunc non potest sine peccato dimitti. Aut non præsumitur, & hoc iterum dupliciter, vel quia præsumitur, q̃ non profit sufficienter, & tamen non est occasio mali. Et tunc potest, & dimitti, & fieri. Vel præsumitur, quòd sit occasio mali, & tunc potest, & debet dimitti. Ad illud quod in contrariū dictum est,

est, q̄ denunciationem precedere debet charitatiua admonitio. Dicendum est, quòd licet verum sit in genere, tamen habet exceptiones in casibus, sicut & aliæ multæ regulæ generales, quia præcepta affirmatiua non obligant in omni casu; sed in casu opportuno. ¶ Item dubitatur de hoc quod dicit, q̄ post admonitionem si inuenitur iterum fratrē delinquere, debet iudicari. Videtur enim, quòd non solum una admonitio, sed plures essent faciendæ: sicut fiunt in citationibus iudicum, & in vitatione hæretici, qui post primam, & secundam correctionem id est binam admonitionem, vitandus est sicut dicitur 1. Timo. 3. in Glosa. Ad quod dici potest, q̄ antequàm pœna inferatur iudiciaria, vel vitetur hæreticus, quod est pœnale, plures debent præcedere admonitiones: eo quod pœnæ sunt molliendæ, & non debent inferri sine causa valde iusta, & certa. Indicatio vero culpæ fraternæ, illis, qui pos sunt prodesse, non fit ad pœnam: sed propter medicinam: Vnde sicut medicus, qui vult subuenire infirmo, & probauit, q̄ vna medicina non prodest ei; statim recurrit ad aliam. Ita postquàm probatum est, quòd secretæ admonitionis medicina non prodest: potest recurrere ad medicinam indicationis.

Cap. XCI.

CIrca secundum notandum est, quod dicit, quòd pro vulnerato, scilicet in mente habendus est, qui post admonitionem semel factam, incidit iterum in petulantiam oculorum. Ex quo relinquitur argumentum, q̄ valde mala suspicio habenda est de illis, qui post admonitiones frequentes, nolunt se corrigere, de notabili familiaritate cum mulieri-

lieribus. Nec mirum: Familiaritas enim huiusmodi valde periculosa est viro, quantumcumque perfecto sicut probatum est per multas experientias. Augusti. in lib. de singularitate clericorum. Quanti, & quales clerici, Episcopi simul, & laici, post magna, & signa, & mirabilia, naufragari noscuntur, cum volunt in naui fragili nauigare, hoc est in carne fragili, se exponere periculoso consortio mulierum. Et post. De carbonibus scintillæ diffiliunt; de ferro rubigo nutritur; morbos aspidēs sibilant, & mulier fundit concupiscentiæ pestilentiam. Quam Salomon sic comparat dicens. De vestimentis procedit tinea, & à muliere iniquitas viri. Præterea, & si esset homo sanctus de se securus, tamen debet timere, ne mulier, quæ est res fragilis, de facili, male circa ipsum afficiatur, in eodem. Postremo, & si animum nostrum confidimus, in hoc semper in charitate durare: vel illa apud eos debet esse suspicio, ne illæ, quæ nobis non conveniunt, & in nos ipsos forsitan moueantur, aut incitamentis furialibus stimulentur. Præterea, & si non esset reale periculum: certum tamen est, quod per huiusmodi familiaritatem; status sanctitatis infamia maculatur, quod quàm graue sit, ostendit idem Augustinus in eodem dicens. Peius est, quàm mœchia, continentiam ducere criminiosam, & infamen ducere sanctimoniam; blasphemiam ingerere religioni. Et post. Continentiæ bonum frustra intrinsecus laborioso agone custodit, qui forinsecus officit, & infamat. Et ideo dicit Apostolus. Ro. 14. Ne blasphemetur bonum vestrum. Cum igitur ex huiusmodi familiaritate, sequatur peticulum proprium, & alterius. Et tam grauis infamatio sanctitatis; qualis præsumptio potest haberi, de his, qui & ista sciunt,

sciunt, & tamen nunquàm volunt se corrigere sup
 istis? Veruntamen est timendum, & eis, & alijs ne
 intrinsecus libidine sint infecti, quamuis mulieri-
 bus non vtantur: sicut auarus cupiditate ligatur, cū
 pecuniā à se separari pati non pōtest, quamuis ea-
 dem non vtatur. Idem in eodem. Habent multas
 diuitias, quas suis vsibus negant, sed pro cupida-
 te conseruant, quibus amodo perfruantur, & si in
 vsu non tangantur. Ita, & si qui despexit vinculū
 nuptiarum, & aliter vinculis fœmineis alligatur:
 quamuis nullo concubitu misceatur, desiderio ta-
 men, & visu, & colloquio oblectatur, Amplius ad
 idem. Minorum est, exempla sequi maiorū. Cum
 ergo viri perfecti, & securi inhærent familiaritati-
 bus prædictis, dant occasionem minoribus; idem
 faciendi, qui cum sint infirmi, de facili corruunt in
 istis, & pereunt aliorum exemplo. Idem in eodem.
 Quale præmiū sanctitatis expectat, qui perniciosū
 præbet exemplar, vt infirmi sub prætextu dilectio-
 nis subtiliter fornicētur, & pudicus impudicissimæ
 castitatis præbeat magisterium: destruens, qd Apo-
 stolus cōminatur. Peribit, inquit frater infirmus, in
 tua conscientia, propter quē Christus passus est. Et
 post. Eleazarus maluit vitam suam tormentis adij-
 cere, quam cuique magister perditionis existere: &
 nos vbi nulla tormenta sunt, fluxibus solis, nolu-
 mus anteponeere fratres saluandos. Item ex hoc gra-
 uis turbatio generatur socijs: quorum pax esset sum-
 mo studio seruanda. Virorum enim sanctorum est
 zelare non solum pro castitate status sui: sed etiam
 pro pulchritudine castitatis, quæ oritur ex ea, iuxta
 illud Sap: 4. O quam pulchra est casta generatio,
 cum claritate scilicet famæ. Et ideo cum videat of-
 fuscarī eam: non potest non turbari 1. Mach. 2. di-
 cit

cit Mathathias Et ecce pulchritudo nostra, & claritas nostra desolata est. Et super offuscatione pulchritudinis, & claritatis corporalis ipse, & filij planxerunt valde. Quanto datur maior occasio doloris viris sanctis, cum pulchritudo sanctimonie spiritualis offuscatur? Item praelati in quibus Deus vel auditur, vel spernitur secundum euangelium solent frequenter ab huiusmodi familiaritate subditos coercere: Et ideo qui se non corrigit, non potest de inobedientie malo erga Deum, & suos ministros se excusare. August. in eodem. Possunt parentes: possunt filij: possunt fratres & ipsi (quod plus est) a Deo concessa sibi nature vincula dirumpere. Et clerici, Deo non concedente, immo insuper prohibente, mulierum nexibus compeditam non volunt recusare charitatem. Qualis ergo presumptio in bonum de his haberi potest, quos nec ruinæ infirmorum: nec turbatio sociorum: nec voluntas maiorum retrahere potest a familiaritate predicta? Sane solent aliqui se super hoc excusare. Et hoc tripliciter. Primo pro utilitate, dicentes, quod hoc faciunt propter aliquam utilitatem temporalem, quæ ex hoc obuenit. Ad quod respondet August. in eodem dicit. Si femina utilior existimatur, non oportebat carnalia emolimenta proponere utilitatibus spiritualium commodorum. Secundo pro charitate: dicentes quod quicquid circa hoc faciunt: faciunt ex charitate propter salutem earum. Ad quod idem in eodem respondet dñ. O dilectio, quæ sibi inuidet. O charitas, quæ cupit se in vituperatione laudari. Grande miraculum, ut Virginum castitas virgines faciat velut coniuges ardere. Tertio sanctorum exempla. Aug. in eodem. Sed adiunt. Si de coniunctione scilicet cum mulieribus

clerici

clerici notantur: notandi sunt & sancti Plerique nobiscum: siue Helias, qui mansit apud viduam: siue Apostoli, qui mulieres secum comites circunducebant. Aut Iohannes, qui matrem Domini assumpsit Domino delegante: aut ipse Dominus, cui de suis facultatibus alimenta præstabant mulieres aliquę religioſę: cui etiã Martha ministrabat ad mensam. Et qui singulariter locutus est ad puteum sedens, cum muliere alienigena Samaritana. Vel cui recumbenti fœmina pedes lauit lachrymis. Ad quod respondet Augosti. in eodem dicens. Sic calidi argumentatores, & iuris periti fallaces volunt præuaricari, ipsa iura transuertunt, & inconuenientibus exemplis, velut similes coniecturas obijciunt, qui per Salomonem ipsius legis sagacitate produntur. Peccator inquit homo vitabit correctionem, & secundum voluntatem suam inueniet comparationē. Patet autem eos fraudulenter iura abijcere quatuor modis. Primo, quia faciunt argumentum à maiori affirmatiuē, quod non valet, sicut enim non valet hoc argumentum, Ille miles fortis subiit tale certamen, & vicit, ergo iste debilis pōt hoc idem facere, & vincet. Ita non valet Apostoli, & Prophete habitauerunt cum mulieribus, & euaserunt sine peccato, ergo & nos, propter hoc, idem possumus facere. Vnde idem in eodem deridet dicens. Reuera homines magni, qui se comparant Sanctis, & eximia conuersatio vestra sit, quæ prophetis, vel Apostolis videatur æqualis. Secūdo, quia si in hoc imitandos dicunt sanctos, & imitari volunt, debent eos, & in alijs virtuosis operibus imitari, quod tamen nolunt. Idem in eodem. Ad occasionem luxuriæ nostræ, in peruersum sanctos volumus imitari, & in cæteros actus vestigia imitari nolumus.

In omnibus (dicit Apostolus) commendantes nos sicut Dei ministros, in sustentatione multa: in præsuriis: in tribulatione &c. Ad has imitationes infirmisumus, & ad deducendas mulieres possibilitatem nobis imitationis ascribimus. Tertiò, quia nò est in nobis eadem causa, quæ fuit in sanctis. Dominus enim præuidens, quòd erant futuri heretici, qui & nuptias condemnarent, noluit mulieres à se, & ab Apostolis omnino repellere, ne ex hoc error iste confirmaretur. Idem in eodem. Prævidebatur à Domino, qui nuptias auferrent: quibus iam tunc, per introductas auctoritates prodebatur, ne maritatæ mulieres accedere verarentur ad Christum, cui in præsentia seruirent. Quartò, quia permissa familiaritas ad horam, & ex causa fuit valde moderata. Idem in eodem. Sed non sine moderamine fuit illa permissio. Nam si allocutus est Dominus Samaritanam, ad horam docuit, & recessit. Et factum est (inquit euangelista) post hoc, & iter ipse faciebat, per castella, & ciuitates, euangelizans Dei regnum. Et duodecim cum illo, & mulieres, quæ erant curatæ à spiritibus immundis, & infirmitatibus: Maria quæ vocabatur Magdalena: de qua eiecerat septem dæmonia: Et Iohanna vxor Cuzæ procuratoris Hærodis, & Susanna, & aliæ multæ, quæ ministrabant illi, de facultatibus suis. Nunquid adhærebant singularibus singulares, aut indisciplinatæ commorationes perseuerabant, illecebrose conuerfantes, vbi tota Ecclesia propemodum videbatur. Et post. Vt de Apostolis breuiter probem, quantum illis potuit fluxa familiaritas displicere, qui compulsi sunt, & de ipso Domino loquente cum scemina dubitare, nisi eos maiestatis notitia probata compesceret? Et mirabantur, inquit, q̃ cum

muliere loqueretur. Nemo tamen dixit illi: quid quæris, aut quid loqueris cum illa? Quid autem loquar accessum fœminæ ad pedes Domini prouolutæ: cuius luctus, & planctus, ad defensionem suæ lachrymæ non erubescant improbi flagitare. Et post, Ioannes autem matrem Domini suscepisse videtur: sed matris eius mores maternū indicat nomen. Helias vero missus est à Domino, relinquere solitudinem, & ingredi tabernaculū viduæ, ad magna facienda: vt famis tempore, tam ipsi viduæ, quàm pupillis eius sufficientia tribueret alimenta; qui ieiunijs vsquequaq; afflictus tolerauerat abstinentiam. Qualis illic fuit communitatis affectus, vbi non erat virtus, & qualem ad viduam habuerit introitum, cui fames dedit hospitium. Quisquis es qui te vis de commemoratione viduæ, & Heliae vocari discipulum, prius solitudines, afflictiones, & quadraginta dierum tolera ieiunia. Ex his ergo patet, quòd nec utilitas temporalis, nec charitas spiritalis, nec exempla sanctorum hos excusat, sed allegationes huiusmodi reputandæ sunt excusationes ad excusandum in peccatis. ¶ Postremo notandum quanto zelo moueatur idem vir sanctus contra tales familiaritates inseparabiles. Ostēdit enim eorum stultitiam talem, sicut esset illius, qui vnā febrem haberet, & aliam sibi procuraret, vt haberet duas, dicens. Caro concupiscit aduersus spiritum: habes carnem tuam, quā superes semper: quid tibi vis aliam adducere? Nemo super vnā febrem cupit habere peiorē, ne incipiat omitricem insanabili laborare. Item ostendit fraudes diaboli circa tales multiplices dicens. Diabolus his nititur blandimentis: vt subtractis omnibus iaculis concupiscentiæ: tam diu sopitum ignem sine vllis flammis

flammis occultet: donec duas faculas iungens simul ambas accendat: Et tam diu cessat sequiæ suæ tela supponere: donec sicut peritus venator, quos occisurus est, laquei sui vinculis alliget. Item dicit. Nullis procellis diabolus inquietat, & hanc exhibet lenitatem, vt duas naues connectat ad inuicē quiere, quod cum fecerit, iunctas repentinis turbinibus in semetipsis elidere possit, & perdere. Item præfert istis quosdam sæculares coniuges dicens. Adhuc habet quid mirari: cum de Christianis videam plerosq; maritos pariter, & vxores continentia vcentes, domicilia singularia eligere, & apud spadones nostros fœminæ cohabitatio nunquam potest habere fastidium. Item præfert istis Iudæos dicens. Iudæos considerent vsq; hodie, pro legis imperio, carnis suæ partem circuncisione truncare, & sciant quid merentur, qui euangelio iubente dissimulant circuncisi mulierum præsentia peragere Domini voluntatem. Item præfert istis sacerdotes idolorum, qui ob reuerentiam suorum simulacrorum eunuchantur voluntarie dicens. Puto q̃, & de gallis suis nobis exprobrantur. Insultent, qui abscindentes semetipsos libenter excruciant, dummodo simulacrorum dissimulationes pereant. Clerici vero pro dignitate sacerdotij cœlestis, non fundunt sanguinem, non ferrum tolerant, non est aliquod vulnus, non est aliquis cruciatus, sed solum contra Dominum fœminæ tenet aspectus. Item inducit contra istos amorē Christi ad Ecclesiā dicēs. Ausus sum dicere, à Deo patre missus est filius, de sinu patris, vt ecclesiam faceret innocentem: & clericus fœminæ latus deferere non potest, ne Christi Ecclesiam reddat infamem. Item inducit contra istos fragilitatem propriā dicens. Vnusquisq; qui

securus est, quia necdum tentatur: timeat, ne tentetur, quia nihil de illo dicitur: prospiciat, ne dicatur. Patet ex his, quàm mala præsumptio potest haberi de talibus, contra quos vir sanctus tanta detestatione inuehitur. Proculdubio falsa est dilectio, non vera charitas, quæ sic iungit. Vnde idem in eodem. Malum velamento boni nominis tegunt. Vnde apud eos falsa dilectione vera dilectio violatur. Sed exclamat charitas, & appellat. Tales ego non iunxi: altera est, quæ me simulando coniunxit, nunquàm fluxus foueo, per me sanctitas non potest culpari. Patet ex iam dictis, quàm malam presumptionem generant, qui tam inseparabiliter adherent familiaritatibus notabilibus mulierum.

Cap. XCII.

Circa tertium notandum, quod sunt quidam, qui ex aliqua mala commotione interdum accusant fratres suos: non ad sanandum, sed ad confundendum: huiusmodi accusatio est diabolica. Ipse enim diabolus dicitur accusator fratrum. Apoc. 12. Et constat, quod non accusat ad sanandum, sed ad perdendum. Sic isti sunt, qui vulneratis addunt vulnera, secundum illud Iob. 13. Concidit me vulnere super vulnus. Psal. Et super dolorem vulnerum meorum addiderunt. Isti sunt sicut medici proditores, qui sub specie medicinæ ministrant venenum, quia sub specie correctionis, quæ debet esse medicinalis, intendunt hominem confundere. En decies (inquit Iob. 19.) confunditis me, loquens illis, qui sub specie amicitiae, & correctionis hoc faciebant. Item isti sunt sicut quædam bestiae crudeles, quæ extrahunt cadauera hominum de sepulcris, & in ea de-
seuiunt:

ſauiunt : Sic & iſti vadunt ſcrutando multa mala ,
& producentes ea in lucem, deſauiunt in illos, quos
peccatum occidit. Et ideo verrunt religionem, quę
eſt hęreditas domini, in ſpeluncam. Hiere. 12. Fa-
cta eſt hęreditas mea mihi, quaſi Leo in ſilua. Glo.
70. Nunquid ſpelunca hienę hęreditas mea mihi ?
Hiena nocturna beſtia, mortuorum deuorat cada-
uera, & de ſepulchris effodit corpora. Iſti tanquā
ſpiritu malo exagitati non ſolent ſeruare modum
in accuſando : modo occulta indebite publicando :
modo ſuſpitiones aſſequendo : modo falſa impo-
nendo; modo clamoribus totum capitulum replen-
do: modo diſciplinam traditam in accuſando peni-
tus dimittendo, & huiuſmodi multa committen-
do. Et ideo faciunt capitulum omnibus odioſum.
Amos 5. Qui conuertitis iudicium in abſinthium.
Quod quidem fit, cum capitulum, quod eſt locus iu-
dicij, redditur odioſum, propter amaritudines ibi-
dem iniuſte oppreſſorum. Iſti interdum deſauiunt
in peccatores iam compunctos, & mortificatos, per
pœnitentiam : Et ſunt in crudelitate ſimiles illi,
qui Chriſtum iam mortuum lanceauit. Pſal. Non
eſt recordatus facere miſericordiam, & perſecutus
eſt hominem inopem, & mendicum, & compunctū
corde mortificare. Porro ex his peſtiferis accuſa-
tionibus, ſolent tria mala ſequi ſcilicet. Malum in
accuſato. Quandoq; enim incurrit in grauem tur-
bationem. Gen. 37. Ioseph accuſauit fratres ſuos
apud patrem ſuum crimine peſſimo. Et poſtea ſe-
cutum eſt tantum odium fratrum ad eum, q̃ eum
vendiderunt: Nunquid nos meliores ſumus illis
patriarchis, quibus illa accuſatio fuit primaria oc-
caſio tanti mali. Item malum in accuſante, Solet
enim Deus ſe habere ad hominem, ſicut ipſe ſe ha-

ber ad fratrem suum. Et secundum illud. Nolite iudicare, & non iudicabimini. Dimittite, & dimittetur, & similia: Et ideo Deo faciente, accidit interdum, vt qui sic intendit fratrem corrigere, & confundere, q̄ & ipse confundatur in similibus. Exemplum in Vitis patrum. Frater interrogauit senem, Si videro culpam fratris mei; bonum est celare eam? Dicit ei Senex. Quacumq; hora tegimus peccatum fratris nostri, teget & Deus nostrum: Et quacumq; hora, prodiderimus culpam fratrum: & Deus prodet nostram similiter. Item malum in assistentibus, qui ex hoc scandalizantur, & mouentur contra sic accusantes. Dicunt Euangelistæ, quod Pilatus videns maliciam Iudæorum accusantium Christum coram se: eos reputauit inuidos: & ipse compatiens nitebatur eum liberare. Dicitur iterum Daniel. 25. q̄ Iudæi non permittebant aliquem Iudæum coram se lacerari verberibus, quantum meruisset. Quomodo ergo viscera Christiana poterunt se continere, quin moueantur contra illos, qui & Christiani sunt, & tamen coram ipsis accusationibus innumeris fratrem suum lacerant christianum? Proinde virorum Sanctorum est, nunquam indicare culpam fratris illis, qui non possunt prodesse: nisi ad hoc vt iuuent, Sicut infirmitas infirmi solet ostendi medico, ad hoc vt iuuet. Vnde & sorores Lazari: sic indicauerunt infirmitatem fratris sui bono medico, qui eum poterat iuuare: dicentes. Ioan. 11. Domine quem amas infirmatur. Et ideo bene dicit vir Sanctus (sanandum prodat) quasi dicat ad hoc prodat, vt sanetur, & non ad aliud. ¶ Circa quartum videtur, q̄ male dicat, cum dicit (quod in dicit culpam fratris iterum delinquentis, quicumque potuerit hoc inuenire.) Potest enim hoc inuenire

nire aliquis, qui non correxit eum alias, & talis videtur, q̄ debeat in secreto corrigere, priusquam indicet secundum supradicta. Præterea, quid faciendum illi, qui inuenit huiusmodi culpam, & nunquàm correxit fratrem super hoc: scit tamen fuisse correctum ab alio? Respondeo. Ille qui nunquàm correxit fratrem, nec scit ab alio correctum, debet corrigere secreto, antequàm procedat ad indicationem. Nec de tali loquitur hic, sed de illo quē correxit, vel scit correctum. Quod patet ex ipsa littera, quæ dicit (Si post admonitionem, id ipsum facere eum videritis.) Et est idem, siue ipse, qui inuenit, ipsum monuerit, siue sciat monitū ab alio, quia eadem est coniectura de vulneratione. Sed quid est, quòd dicit (potuerit inuenire.) Nunquid debet frater esse sollicitus, de indaganda culpa fratris? Respon. Est quædam sollicitudo suspicionis: & hæc non est bonarum mentium. Est alia compassionis, sicut quando aliquis videt aliquem infirmum conualuisse, ex compassione plus cogitat aliquando, si forte patitur aliquid recidiui, quàm cogitat de illo, qui nunquàm fuit infirmus, & hæc est charitas. Et ita, quando aliquis scit fratrem suū quandoq; peccasse: ex charitate potest plus circa illum esse sollicitus, ne relabatur, quàm circa aliū, quem nescit sic peccasse. Et sic ad religiosum pertinet, quando aduertit fratrem suum infirmum, indicare, ad hoc, vt subueniatur ei, ita & hic (quicumq; talem inuenit debet indicare.)

Cap. XCIII.

Prius tamen est alteri, vel tertio demonstrandum, ut duorum, vel trium possit ore conuinci, & cor porerenti seueritate coerceri.

¶ Dato mandato circa peccata indicanda: tradit mandata circa conuincenda, & Primo circa quædam antecedentia ad conuictionem, Secundo circa ipsam conuictionem: ibi (si autem negauerit) Antecedentia vero sunt duo. Vnum est procuratio testium: Aliud charitatiua admonitio coram solo prælato, circa quod tradit mandatum ibi (sed antequàm alijs demonstretur) Circa procurationem testium, Primo tradit mandatum circa modum procurandi. Secundo circa retractuum ab huiusmodi, ibi (nec vos iudicetis esse &c.) Dicit ergo (Prius tamen &c.) quasi dicat. Quamuis mandatum sit, quòd post admonitionem fiat indicatio de peccato inuento, tamen quia aliqui solent interdum negare culpam suam, prius quam iudicentur: coram alijs publice ostendatur culpa delinquentis, cum tamen intimauerit alteri, vel tertio: vt duorum, scilicet sui, & alterius, Quando vni soli ostenditur, vel trium scilicet sui & aliorum duorum, Quando tertio demonstratur, possit ore conuinci: secundum illud. Vt in ore duorum, vel trium stet omne verbum Mat. 18. Et competenti, secundum exigentiam culpæ, & aggrauationem negationis, seueritate coerceri, qui noluit per charitatiuam admonitionem corrigi.

Cap. XCIV.

SEd quæritur hic circa accusationes, quas faciunt religiosi in suis capitulis, ad quas pertinet præsens mandatum. Primo. Virum liceat accusare sine teste? Ad quod dicitur, quod in illis casibus, quibus non requiritur præsens admonitio, secundum distinctionem prædictam, nec requiritur solennitas

lennitas testimonij, quia non habent infamiam huiusmodi, & perirēt fructus accusationum huiusmodi, propter difficultatem quærendi testes in talibus. nec de talibus loquitur hic: sed solum de illis, in quibus præcessit admonitio, sicut patet in littera.

¶ Secundo quæritur. Vtrum vnicus testis sufficiat sic accusanti? Et videtur, quod sic, propter illud, quod dicit (alteri) In isto enim casu non habet accusans nisi vnum testem. Contrarium vero videtur per euangelium quod dicit. Non in ore vnus, sed duorum, vel trium stet omne verbum, ergo verbū Euangelij sic debet stare. Ad hoc dicitur: quando agitur de peccato, per modum denunciationis ad penitentiam: sufficit vnicus testis, cum denunciante, quia denunciatus habetur, in isto casu, pro primo teste eo quod agitur Dei negocium, cuius sunt testes vterque. Ita & verbū Euangelij seruatur, quia duo sunt testes in hoc facto. Cum vero agitur de peccato per modum accusationis, eo quod accusans agit proprium negocium, indiget duobus testibus alijs, in proclamationibus ergo religiosorum in capitulis: sufficit cum proclamante vnicus testis, eo quod huiusmodi proclamationes deuunctiones reputantur, & non accusationes secundū iura.

¶ Tertio quæritur. Quid faciendum sit in delictis, quæ non corriguntur, nec tamen iterantur, quia ibi non potest fieri, quod dicit August. videlicet vt demonstratur alteri, cum illud non iterum committatur. Verbi gratia. Aliquis est furatus aliquid, frater sciens hoc correxit eum secreto, postea non iterat furtum: tamen non reddit ablatum, & posset reddere. R. Si corrector aliquem conscius habet primi facti, vel aliquos, debet procedere, sicut hic dicitur. Si autem non habet, vel ipsi quos habet, nolunt

nolunt testificari, ei sufficit admonitio secreta primo, & postea dicere prælato, vel prudentibus, qui possunt prodesse, & non obesse. Ita tamen quod dicat prælato illum, vel illos, qui possunt testificari, vt eos compellat ad testimonium, si noluerint. Quod si fecerit, procedat, vt hic dicitur. Si autē noluerit corrigere, vel ipsi noluerint obedire, liberatus est ab huiusmodi processu, propter defectum restitutum. ¶ Quarto quaritur. Quid faciendum sit, in facto iterabili, quod iteratur, sed non inuenit, qui velit cum eo explorare, vel explorantes nequeunt depræhendere culpam? R. In primo casu debet recurrere ad prælatum, vt aliquos ad hoc compellat: Quod si noluerit, vel factum depræhendendi nequeerit, liberatus est, vt in casu præcedenti. ¶ Quinto quaritur. Vtrum quilibet teneatur procedere vsq; ad huiusmodi accusationem, cum potest; cum hoc videatur nimis laboriosum? R. Cum omnes teneamur pro salute fratrum animas ponere, multo magis & ad hoc tenemur: Vnde Dominus non solum dicit de correctione secreta facienda: sed etiam addit, de testibus adhibendis, & de dicendo Ecclesiæ Matth. 18. Militans vero sub regula Augustini: non solum ratione Euangelij, sed etiam ratione regulæ plus tenetur. Sunt tamen casus, in quibus absoluitur ab huiusmodi tentione, ad quam in genere tenetur regulariter. Vnus est, quando non est spes de fructu, vel propter defectum iudicis, vel assistentium, vel propter maliciam corrigendi. Alius est, quando prælatus, & alij communiter sciunt culpam corrigendi, extra forum confessionis. Alius est, quando aliquis vacat melioribus, vel æque bonis, quæ impediunt eum ab hoc facto prosequendo. Alius est, quando per alium sit negocium sufficienter.

cienter. Alius est, quando obedientia trahit eum ad alia: & alij forte plures. Nisi ergo propter casum aliquem rationabilem excusetur frater: quilibet tenetur ad prædictum processum, & pro loco, & tempore, & opportunitate seruanda, postquam admonitiones secrete non profunt. ¶ Sexto quæritur, quid sit faciendum, cum non possunt inueniri testes, nisi tales, de quibus creditur, quod si ostenditur eis, oberunt insultando delinquenti: & similia faciendo. Item quæritur: quando iudex & assistentes creduntur esse tales, quod idem accidet? R. Quattuor possunt esse huiusmodi testium procurandorum differentiæ. Possunt enim esse tales, quod creditur probabiliter, quod nec proderunt, nec oberunt: aut tales, qui oberunt, & non proderunt: aut tales, qui ad aliquid proderunt, & ad aliquid oberunt. In primo casu potest supersederi. In secundo debet supersederi. In tertio est procedendum omnino. In quarto est distinguendum, comparando nocumentum, cum utilitate. Si enim maior est utilitas, quam damnum, est procedendum: Si e contrario: non est procedendum. Verbi gratia. Si ex indicatione culpæ mortalis iste corrigitur, & non confunditur, nisi inter fratres suos: maior est utilitas, quam damnum: est procedendum. Si autem corrigitur, sed totus conuentus infamatur, in aliqua magna ciuitate, maius est quo ad bonum commune, nocumentum, quam utilitas, & non est procedendum. Idem autem quod dicitur de testibus, dici potest de iudice, & assistentibus. ¶ Vltimo Notandum, quod de accusationibus istis, sequuntur fructus idem, qui supra notati sunt circa fraternam admonitionem: Et præter illos fructus multa sunt quæ debent ad hoc inducere. Qui enim sciunt cul-

pas,

pas, & per accusationes possunt corrigere, & non faciunt, reputantur consentientes, secundum decretalem, quæ illos consentientes interpretatur, qui cum possunt resistere manifesto facinori, desinunt obuiare. Et ideo dicit Augustinus infra. Magis quippe innocentes non estis, si fratres uestros, quos indicando corrigere potestis, tacendo perire permititis, Item quando fit iusticia de delicto conuicto, boni redduntur cautiore ad cauendum simile. Prouer. 21. Multato pestilente, sapientior erit paruulus scilicet ad cauendum. Malorum etiam audacia reprimitur. Vnde Eccles. 8. dicitur a contrarijs. Quia non cito profertur contra malos sententia, idcirco absque vlllo timore filij hominum perpetrant mala. Patet ergo per huiusmodi, quod accusationes vtilis sunt proximis, & bonis, & malis, quando manifesta correctio cedit ad vtilitatem communem: pro qua debent viri charitatem habentes multum zelare, sicut homines mundi, pro bono cõmuni patriæ, vel communitatis. Et ideo repræhendit Dominus per Ezechielem. 33. hæc omittentes dicit. Non ex aduerso ascendistis, neque opposuistis vos murum pro domo Israel. Item Christus, qui in hoc apparuit, vt destruat opera diaboli, sicut dicitur. Iohan. 3. Petit in hoc auxilium contra malos dicens. Psal. 93. Quis confurget mihi aduersus malignantes; aut quis stabit mecum aduersus operantes iniquitatem? Quomodo ergo possunt se excusare, ab infidelitate homines sui, qui viriliter se non accingunt ad pugnandum cum eo aduersus peccatum, etiam vsque ad sanguinem, si fuerit necesse, sicut & ipse pugnavit. Et quantomagis vsque ad proclamationem? Item dicitur de Moyse. Exo. 32. quod ipse cum filijs Leui zelo Domini accensi con-

tra peccatores, occiderunt vna die quasi vigintitria millia. Numeri 4. Phinees eodem zelo interfecit Israelitem virum concubantem cum Madianitide. David Psal. 100. In matutino interficiebam omnes peccatores terræ: ut disperderem de ciuitate omnes operantes iniquitatem. Iudas Machabæus. 1. Mach. 3. Persecutus est iniquos perscrutans eos, & eos qui perturbabant populum suum succendit. Quid ergo dicent his consideratis exemplis homines, qui usq; ad accusationem nolunt consurgere aduersus peccatum. Vbi est spiritus ille, qui in igne apparuit super discipulos, in signum zeli secundum Greg. quem habere deberent? Item homines mundi infatigabiliter persequantur in iudicio iniurias suas, & suorum: Et heu nos secundum Chrysosto. in iniurijs Dei, parientes sumus. Quo contra Eccles. 4. Vsque ad mortem, certa pro iusticia. Si ergo nolumus inuolui in reatu delinquentium: si proximorū bonum uolumus, si pro communi bono zelamus: Si Christo fidelitatem seruare uolumus: si sanctorum exempla nos mouent: si Christi iniuriæ nos tāgunt: debemus pro loco, & tempore fratres proclamare in charitate pro correctione eorum.

Cap. XCV.

NEc vos indicetis esse maleuolos, quando hoc indicatis: magis quippe innocentes non estis, si fratres vestros, quos indicando corrigere potestis; tacendo perire permittitis. Si enim frater tuus vulnus habet in corpore, quod velit occultare, dum timet secari, nonne crudeliter a te sileretur, & misericorditer indicaretur? Quanto potius ergo debetur manifestare, ne deterius putrescat in corde?

¶ Aliqui

¶ Aliqui retrahuntur interdum a fratrum proclamatione existimantes, quod hoc non posset fieri sine peccato: Et ideo post mandatum de modo procurandi testes, tradit hic mandatum circa retracti-uum ab hoc. In quo tria tangit. Primo dicit, quod huiusmodi indicatio non est ascribenda maliciæ: Secundo ostendit contrarium potius esse peccatum dicens (magis quippe &c.) Tertio ponit huius rationem dicens (si enim frater tuus. &c.)

¶ *Circa primum notandum*, quodd triplex est timor, propter quem interdum retrahuntur aliqui a proclamationibus faciendis, scilicet Timor offensæ proximi. Timor proprij damni. Timor offensæ Dei. Quidam enim retrahuntur: quia timent turbare proclamatos, & hoc malum: quia salus eorum paci præferenda est. Et ideo dicitur Eccles. 4. Ne reuerearis fratrem tuum, in casu suo. Ne retineas verbum in tempore salutis. Alij quia timent, ne aliqua occasione, obueniant sibi aliqua mala in se, vel in amicis suis, & isti præferunt bona propria bonis Dei. Gre. Si ab increpatione idcirco reticemus, quia contra nos surgere odia formidamus: iam non lucra Dei quærimus, sed nostra. Alij quia timent peccare, & hoc maxime in viris sanctis solet accidere, quia trepidant frequenter timore, ubi non esset timendum: Solet autem eis hoc accidere interdum ex diaboli calliditate: Ipse enim sciens quantum bonum sequitur in religione ex proclamationibus, & sciens quod boni viri nullo modo desisterent ab hoc, quamdiu crederent illud esse bonum: suggerit eis, hoc procedere ex malicia: vt sic eos retrahat. Et est simile, quantum ad effectum, in Domini passione: quam postquam diabolus cognouit fructuosam esse mundo, sicut expositores nar-

rant,

rant, voluit eam impedire, sub specie boni suggerens vxori Pilati, vt virum ab hoc retraheret: mandando illi quanta passa fuerat in nocte per visum propter eum. Interdum ex simplicitate: Sunt enim aliqui, qui propter simplicitatem, quandoq; quod bonum est, reputant esse malum, vt zelum iusticiæ crudelitatem: & huiusmodi: quod non est laudabile, in discipulis Domini, qui iubentur esse non solum simplices, vt columbæ, sed & prudentes vt serpentes. Et ideo dicit Apostolus Rom. vlt. Volo vos sapientes esse in bono scilicet discernendo. Interdum ex magna bonitate, quæ facit eos timere peccatum. Gre. Bonarum mentium est, ibi culpam agnoscere idest timere, vbi culpa non est. Quamuis autē, vt dictum est, sit triplex timor retractius a proclamationibus: tamen circa tertium potius tradit mandatum, quia ille subtilius potest decipere religiosos, quam alij, qui clarius apparent mali, ¶ Et nota, quod non dicit: nec vos timeatis, sed vos iudicetis esse maleuolos: quia boni possunt omnia bona sua vereri, & habere suspecta de aliquo malo sicut Iob. Et non apparet, quid iudicent hoc diffinendo. Sed numquid potest hoc indicari ab illo, qui scit se ex malicia accusare? R. Potest. Et hoc non interdicit: sed dicit, quod ipsum simplex indicare, non debet iudicari esse malum.

¶ *Circa secundum notandum*, quod sicut peccatur lingua, in loquendo: ita peccatur in ea in tacendo, quia. Eccles. 3. dicitur. Tempus loquendi, & tempus tacendi. Gre. Sicut mali Deum exasperant, qui loquuntur, & faciunt mala: ita nonnunquam boni, qui tacent bona. Quod, vt ita sit, in casu proposito patet, Esaia. 6. dicit. Esa. lamentando. Veh mihi, quia tacui. Glo. quare? quia Oziam,

& alios libere non repræhendi. Item sancti de hoc sententiant valde terribiliter Gregorius. Qui proximi mala conspiciunt, & silentio premunt, quasi conspectis vulneribus vsu medicaminis subtrahunt: & eo mortis actores sunt, quo vulnus, quod curare poterant, nolunt. Augustinus. Tu vulnus fratris contemnis: Tu eum perire uides, & negligis: peior es tacendo, quam ille committendo. Item omnes magistri concordant, & docent, quod currens est cum fure, qui scit furtum, & non indicat. Et eadem ratione videtur particeps cuiuslibet delicti, qui scit ipsum, & non indicat ad corrigendum. Gregorius. Qui enim dare potest, & negligit; participem proculdubio se delicti constituit. Et iterum. Quæcumque loquendo corrigi possunt: silentium consensum esse pertimescamus. Cum ergo tantus propheta, super huiusmodi taciturnitate, tam grauius super se lamentetur: cum sancti tam graue hoc iudicent: cum secundum omnes magistros, hoc reputetur consensus in delictis. Bene dicitur. (Innocentes non estis, si fratres uestros, quos indicando corrigere potestis, tacendo perire permittitis.) Et vere non sunt tales innocentes. Nocent enim sibi labia polluendo alieno delicto, ut non sint digni Deum uidere. Esaie. 6. Veh mihi quia tacui, quia uir pollutus labijs ego sum, scilicet ex ista taciturnitate. Glosa. Quare? Quia Oziam, & alios non repræhendi libere. Ideo cum Angelis Deum laudare non merui. Et timeo, ne dicatur mihi. Quare tu enarras iusticias meas? Item nocent illi, qui est proclamandus. Et hoc dupliciter. Primo exemplum subtrahendo. Augustinus in Epistola ad Hiero. Obsecro te per mansuetudinem Christi, si læsi te, dimittas mihi: nec me uicissim laudando reddas

pro malo malum. Lædis enim si tacueris mihi erro-
rem meum, quem in factis meis, uel dictis inue-
neris. Et iterum malum inferendo interpretatiue.
Greg. tot occidimus, quot ad mortem ire tepidi,
& tacentes uidemus. Item nocent socijs, qui eorum
exemplo tacentes idem peccatum taciturnitatis in-
currunt. Mos enim est apud uiros disciplinatos, so-
cios suos pro reuerentia superiores arbitantes, &
non incipiunt prius loqui secundum consilium sa-
pientis: qui Eccles. 32. instruit minorem, ut dicat
maiori. Loquere tu maior natu: decet enim te pri-
mum uerbum, & ne impediās musicam, idest uerba
aliorum tacendo, sicut facit cantor, quando non in-
cipit cantum. Quomodo ergo sunt innocentes ta-
les, qui ex taciturnitate tam grauitè nocent & sibi,
& fratri proclamando, & consocijs suis? Vere nō
sunt innocentes, immo culpabiles ualde. Augusti.
in lib. de ciui. Dei. Culpabile est, quòd hi, qui dis-
similiter uiuunt, & a malorū factis abhorrent, par-
cunt tamen peccatis alienis, quæ obiurgare debe-
rent. Hoc autem non est verum, nisi quando indi-
catio prodest ad correctionem. Et ideo signanter
dicit (quos indicando corrigere potestis &c.)

Cap. XCVI.

Circa tertium. Notandum, quòd peccatum di-
citur uulnus secundū illud quod dicitur Luc.
10. De latronibus, qui homini descendenti de Hieru-
salem in Hierico imposuerunt plagas, quod intel-
ligitur de peccatis, Bene dicitur peccatum uulnus:
quia uulnus debilitat, & peccatum similiter. Vnde
Psal. Cor meum conturbatum est in me: scilicet per
peccatum Et post. Dereliquit me uirtus mea: idest

P fortitudo

fortitudo mea. Exemplum de Achab, qui vulneratus fecit se educi de prælio, quasi iam impotens ad pugnandum. 3. Regum vlti. Item vulnus infert dolorem: propter quod dicitur, Super dolorem vulnerum meorum addiderunt: ita & peccatum, Propter quod peccata dolores dicuntur in Psal. Quia dolores inferni. &c. Eccles. 3. Cor nequam grauabitur in doloribus. Tanta est enim Dei iusticia, quod numquam anima cum peccato est sine grauamine: amaritudine, & angustia affligente. Item vulnus humiliat. Exemplum de Alexandro, de quo dicitur, quod percussus sagitta dixit. Omnes vocant me filium Iouis, sed vulnus ostendit me esse hominem. Quot autem, & quanti post ruinam in peccatum, facti sunt humiliores? iuxta illud Psal. Priusquam humiliarer, ego deliqui. Psal. Tu humiliasti sicut vulneratum superbum. Non solum autem est vulnus: immo vulnus valde graue. Vulnus enim tanto grauius quanto profundius: Tale autem est peccatum secundum auctoritatem ecclesiæ dicentis. Peccata mea Domine sicut sagittæ infixæ sunt in me, scilicet quæ profunde penetrant. ita & peccatum vsquæ ad intima penetrans. Et est tractum istud de Psal. vbi dicitur. Quoniam sagittæ tuæ infixæ sunt mihi. Item vulnus tantò grauius est, quāto in parte nobiliori, vt in corde, vel cerebro. Vulnus autem peccati omne est in anima, quæ est nobilissima pars hominis. Bern. O anima insignita Dei imagine, decorata similitudine, dotata spiritu, redempta sanguine, deputata cum angelis, hæres beatitudinis. Item vulnera tanto grauiora sunt, quanto magis abscondita: talia autem sunt peccatorum vulnera. Gregor. in pastorale. Quis nesciat occultiora vulnera esse cogitationum, quam viscerum.

rum. Item ad grauitatem vulneris facit, cum propter sanationē vulneris in membro nobili oportet facere vulnus in membro nobiliori: ita est in casu proposito: In corpore enim mystico Christi ipse Christus, qui est nobilissimum membrum, vulneratus est propter vulnera aliorum membrorum sananda. Esa. 53. Vulneratus est propter iniquitates nostras. Ad quod attendendum hortatur Bern. dicens. O homo, quam graua sunt vulnera illa, pro quibus oportuit Christum Dominum vulnerari. Item ad idem facit, quod non potest vulnus sanari, nisi per preciosa, & insolita remedia, & ita est hic Bern. Filius Dei iubetur occidi, vt nostris vulneribus precioso illius sanguinis balsamo, medeatur. Item. Ad idem facit, quod non quilibet chirurgicus, sed solum paucissimi, & excellentes possunt subuenire vulnerato. Vulnerato enim per peccatū qui possit subuenire, non est nisi unicus, scilicet Deus. Eccles. 2. Quasi romphæa bis acuta omnis iniquitas, & plagæ illius non est sanitas scilicet nisi a solo Deo, sicut dicitur in morbis desperatis: quia non potest homo sanari: & intelligitur nisi a solo Deo, & non secundum cursum naturæ, ab alio. Cum igitur peccatum sit vulnus, & grauius omni vulnere corporali: bene arguit a minori uir sanctus dicens (Si enim frater tuus vulnus habet in corpore &c.) Et non, quod dicit (deterius putrescat in corde) Sicut enim vulnus spirituale deterius est, quam vulnus corporale: ita & putrefactio eius est deterior. Dicitur autem huiusmodi vulnus putrescere, quando non sanatur per correctionem: quia vulnus putrescens corrumpit magis, & magis totum: ita & peccatum, quod non per penitentiam sanatur, secundum illud. 1. Cor. 6. Modicum fermen

tum corrumpit totam massam. Item reddit fetorē, ita & peccatum non potest diu esse in corde, quin aliquis fetor egrediatur. Grego. Sicut bonus odor ex uirtute est: sic fetor ex uitio. ¶ Item fit grauius quasi insanabile per putrefactionem: ita & peccatum tanto grauius est, quanto diutius detinet animam infelicem: sicut dicit decretalis Exemplum de his tribus habetur 2. Mach. 9. de Antiocho; qui (sicut dicitur ibi) ita fuit corruptus, quod uermes scaturiebant de carne sua: Ita fetidus, quod intolerabilis erat fetor eius: Ita percussus, quod fuit plaga eius insanabilis. Mira ergo fatuitas est, uulnerato sic celare plagam. Propter quod dicit Psal. Putruerunt, & corruptæ sunt cicatrices meæ a facie insipientiæ meæ. Mira crudelitas: scire huiusmodi uulnera, & non indicare sananda. Propter quod dicit Augustinus crudeliter hoc celari, & misericorditer indicari.

Cap. XC VII.

SEd antequam alijs demonstretur, per quos conuincendus est, si negauerit: prius prapósito debet ostendi, si admonitus neglexerit corrigi: ne forte possit secretius correctus, non innotescere ceteris.

¶ Tradita sunt duo mandata prædicta circa testes procurandos, quod est unum præcedens conuictionem. Hic loquitur de ostensione facienda prælato, quod est aliud antecedens ad idem. ¶ Et nota, quod secundum expositionem regulæ, sensus huius clausulæ est, quod post admonitionem secretam, cum sit admonitus, non uult corrigi: debet fieri aliqua admonitio prælato, antequam procedatur ad conuictionem, coram multis: ut si forte sit

te sic frater corrigi uoluerit, superfedeatur a publicatione culpæ eius coram multis. ¶ Sed quæritur. Quomodo iste sensus eliciatur ex litera, cum potius contrarium uideatur contineri: cum hæc dictio, ne, includat in se negationem: & ita negatio ista, cum sequenti scilicet nō innotescere æquipollent uni affirmatiue: Et ita uideatur reddere talem sensum, quod secretius correctus possit innotescere ceteris? R. Hæc dictio, ne, est æquiuoca: quia quandoque idem est, quod ut non, & sic non possit elici sensus prædictus ex littera, immo contrarius, ut dictum est. Quandoque idem est, quod si 2. Timo. 2. Cum modestia corripientem eos, qui resistunt veritati, ne quando det illis Deus penitentiam. Glo. ne quando idest si aliquando, & ita accipitur hic, ut sit sensus (ne forte possit) idest si forte possit. Et huic sensui concordat quædam litera, quæ inuenitur, cum vna alia negatiue. di. ne quando non possit. Et pro ista litera accipitur ne in primo sensu: Et iste sensus (ne forte non possit) idest ut forte possit. ¶ Circa istam ergo ostensionem tria tangit scilicet. Cui facienda: quia prælato. Quo ordine: quia post admonitionem secretam, & neglectam: & ante procurationem testium: propter quod dicit (si admonitus) scilicet secretius (neglexerit corrigi, & antequam alijs demonstretur per quos &c.) Qua de causa? videlicet ut si noluerit adhuc secreto (corrigi) per prælatum, non publicetur alijs Et hoc est (ne forte possit &c.) Et nota circa primum, quod illam secundam correctionem, quam dominus docet faciendam coram vno, vel duobus. Math. 18. Augustinus hic restringit in religiosis, qui sunt non plene sui iuris ad prælatum tanquam ad illum, de quo potest magis præsumi, quod possit prodesse, &

non obesse. Triplex autem est utilitas, quæ potest sperari ex ostensione huiusmodi facta prælato. Utilitas scilicet delinquentis: quia multæ sunt causæ, quare potius debet prælati correctioni acquiescere, quam alterius. Item utilitas prælati, cui expedit agnoscere vultum pecoris sui. Item utilitas indicantis: quia per prælatum melius dirigi poterit, quid sit ei ulterius faciendum. Notandum tamen, ut qui busdam videtur, quod huiusmodi ostensio non est facienda prælato, coram reo de re graui, ne forte reus agat iniuriam contra denunciantem, si illud non possit probare. ¶ Item Nota circa secundum, quod est facienda ostensio huiusmodi, ante procurationem testium supradictam: ut habito prælati consilio, discretius procedatur ultra, si necesse fuerit in testibus procurandis. Item ut procedi possit efficacius, auctoritate interueniente: vel etiam compellente, ad testes habendos. Item ut maior charitas ostendatur, cum tentatur si prælati solius correctio possit prodesse, antequam etiam testibus culpa publicetur. ¶ Item notandum circa factum, quod lædere alterum infamia, est valde graue scilicet faciendo indebite. Melius est enim nomen bonum, quam diuitiæ multæ: sicut dicitur. Prouerb. 22. Ex quo sequitur, quod plus nocet, qui aufert famam, quam qui aufert diuitias multas. ¶ Præterea diuitiæ ablatae possunt restitui, sed fama vix; quia forte non crederetur illi, qui post lationem veller excusare. Potest etiam iam verbum delatum esse ad tot, quod quasi impossibile esset, ad tot deuenire excusationem: Et ideo bene dicitur in glosa super Lucam: famam esse rem lubricam: quia sicut aqua æris lubrica de facili effunditur, & quasi impossibile est eam recolligi: ita & fama. ¶ Præterea
lædens

lædens famam alterius, non solum illum lædit, cui detrahit, sicut fur illum solum, cui furatur: sed omnes quibus loquitur. Sic ille, qui mouet lutum, lædit per fetorem omnes, coram quibus mouet. Augustinus de verbis domini. Peccat in nos frater, si nobis scientibus peccat: quia quantum in eo est, nos in exemplo corrumpit. Ex quo patet, quòd audivere peccatum alterius, nocivum est audienti. Propter hoc dicit Ambrosius. Tollerabilius sunt fures, qui vestes, & alia bona nostra diripiunt: quam qui famam nostram lacerant. Et vere sic est: mains enim est, quod isti diripiunt: nec vnquam direptum restitunt, nec vni soli, sed multis nocent. Item dicit Apostolus. 2. Tim. 4. Opus fac euangelistæ, quod est bonum nunciare: Isti autem, qui infamant semper mala nunciant: ergo sunt contrarij euangelistis. ¶ Præterea super illud Luc. 3. Ad virginem desponsatam viro: dicit glosa. Maluit Dominus de suo ortu aliquos, quam de matris pudore dubitare. Cum ergo Christus tantum curauerit de fama aliena, ne sui occasione ortus, qui fuit tantum beneficium, lederetur: quantum sunt Christo contrarij, qui non curant diligenter cauere à læsione famæ alterius? Præterea ledere famam alterius est opus dyabolicum. Grego. Habet hoc proprium hostis antiqui inuidia, vt quos in prauorum actuum perpetratione, Deo sibi resistente superare non vallet: opiniones eorum dilacerat. ¶ Patet ex his, quod lædere famam alienam est contrarium euangelistis, & contrarium Christo, & malicia dyabolica. Et ideo quantum possibile est, salua iusticia, cauendū est ab huiusmodi læsione. Et ideo dicit Augustinus (si forte posset secretius correctus non innotescere ceteris) vt scilicet parcatur eius famæ, ¶ Si

v̄ro quærat̄ur. Vtrum peccet, qui om̄ssa huiusmodi ostensione coram prælato, procedit ad testes habendos? Potest dici, sicut dictum est supra de om̄ssione correctionis fraternæ secreta; in titulo de ordine fraternæ correctionis. quòd in casibus aliquibus est malum, & in aliquibus est bonum secundum distinctionem ibi positam.

Cap. XCVIII.

S*I autem negauerit, tunc neganti adhibendi sunt alij, etiam coram omnibus, ut possit non solum, ab uno teste argui: sed a duobus, vel tribus conuinci.*

¶ Datis mandatis circa antecedentem admonitionem: tradit hic mandata circa ipsam conuictionem, & innuuntur quattuor in hoc mandato scilicet. Quis conuincendus, quia negans. Propter quod dicit. (Si negauerit) Item: quando conuincendus est: quia post negationem factam coram prælato; Propter quod dicit (tunc) idest post negationem. Et est intelligendum, quod statim si habentur testes conscij culpæ, vel post, quando non habentur statim scilicet postquam fuerint procurati. Item coram quibus: quia etiam coram omnibus, nisi forte videatur prælato, quòd coram paucioribus fiat: & ideo dicit (etiam coram) Et per quot; quia a pluribus. Et ideo dicit (ut possit.) Non ab vno solo scilicet denunciante argui, sed a duobus, vel tribus conuinci. ¶ Et nota, quòd tria sunt quæ solent hominem retrahere a malo. Primum est amor: propter quod volens Dominus retrahere Iudam a peccato concepto per hunc modum dixit ei. Amice ad quid venisti? Mat. 26. Secundum est pudor: propter quod dixit. Qui intingit mecum

manum

manum in paropside, hic me tradet: ad ingerendū huiusmodi pudorem retractiuum in eodem. Tertiū est timor, propter quod dixit. Veli homini illi per quem tradetur. In eodem. Secundum hæc tria, Augustinus, tradit tria ad retrahendum a peccato scilicet correctionem secretam, quæ pertinet ad amorem, & hoc quo ad primum: Correctionem coram prælato, quæ habet pudorem, & hoc quō ad secundum; Conuictionem in iudicio, quæ habet timorem, & hoc quo ad terrium. Primum vbi dixit superius (Admonete ne cepta progrediantur) Secundum vbi prius dixit (præposito debet ostendi.) Tertium hic. Sunt autem multa, de quibus dubitatur circa istam materiam, quæ pertinent ad conuincenda peccata fraterna in publico coram prælato. Et primo videtur, quòd hoc nunquam liceat. Infamare enim fratrem coram vnico est semper malum, multo magis coram multitudine: Hoc autem fit cum in publico culpa eius nunciatur, & conuincitur. Præterea non sunt facienda mala, vt veniant bona; ergo cum infamare fratrem sit malū, non est faciendum hoc, etiam propter correctionē illius, vel aliud qualecunque bonum illius. Præterea non licet lædere fratrem in temporalibus bonis suis, propter bonum animæ illius: ergo cum maior sit fama, quam quodlibet bonum temporale: non licet lædere fratrem in fama propter bonum illius spirituale. Contra vero est illud Mar. 18. dic ecclesie. Ex quo patet, quòd culpa fratris potest dici coram multitudine. R. Dicere malum fratris est malum in se, non secundum se. Quantum enim de se, semper est malum: sed ex circumstantiā potest esse bonum. sicut affligere proximum est in se malum: Sed si affligitur in carne proximus infirmus, vt sa-

netur,

netur, potest esse bonum. Ita dicem malum alicuius propter bonum aliquod potest esse bonum: sed quantum est de se semper est malum: Dicendum est ergo, quod infamare dupliciter dicitur scilicet stricte, & large. Stricte idem est, quod malum alterius recitare sine causa bona, & sic semper est malum: Large idem est, quod malum alterius publicare, quacunque ex causa fiat hoc, & hoc semper non est malum: quia si fiat ex causa bona, potest esse bonum; & si fiat pro salute illius: quia salus preponenda est famæ. ¶ Ad primum ergo dicendum, quod & coram vno, & coram multis potest aliquis infamari, secundum acceptionem secundam, quando scilicet, fit ex causa bona. Ad secundum dicendum, quod illa, quæ sunt mala secundum se: vt furari, fornicari, nunquam sunt facienda propter aliquod bonum: sed illa, quæ sunt mala in se, non secundum se (vt occidere.) possunt fieri propter aliquod bonum, & tale est recitare proximi mala. Ad tertium dicendum, quod læsio proximi in temporalibus, vt cum aliquis furatur, uel aufert ei bona sua, & huiusmodi, est malum secundum se: Et ideo non licet illud facere propter aliquod bonum proximi: sed recitare malum proximi non est malum secundum se, Et ideo potest fieri propter bonam causam; sicut licet ostendere infirmitatem infirmi, vt sanetur. ¶ Secundo quæritur. Vtrum liceat proclamare de criminosis, cum non possunt probari, & videtur, quod sic. Licet enim talia dicere illis, qui possunt prodesse, & non obesse, etiam sine testibus; ergo si omnes de collegio sunt tales; licet coram illis sic proclamare. ¶ Contra. Iura dicunt, quod denunciatus, qui non potest probare crimen denunciatum, puniendus est, sicut dicitur extra de calum.

lum. Cum dilectus, nullus autem puniendus est sine culpa, ergo talis peccat? R. Concedendum est, quando fit in forma iuris. Ex quo patet solutio ad contrarium. Quando enim charitativè dicitur extra formam iuris, potest dici aliquibus, qui possunt prodesse, & non obesse, etiam si sint multi. Sed non sequitur, quòd ideo possit dici coram multis in forma iudicii; quia gravius est agere in iure contra aliquem, quam charitativè monere, vel facere moneri. Tertio quæritur. Si aliquis ex simplicitate bono zelo motus proclamat de crimine, quod non potest probare, vel credebat, quòd probare poterat, & deficit in probatione, vtrum sit puniendus, vel excusetur per decretalem prædictam, in qua dicitur, quòd denunciatus, qui non probavit crimen, suspendatur, donec canonice probaverit innocentiam suam, quòd non animo calumniandi ad huiusmodi crimina processit proponenda. Ex quo relinquitur. quòd qui non facit animo calumniandi, non videtur puniendus, & ita nec peccare videtur. Sed si hoc dicatur, tunc videtur, quòd stulti, & simplices sint melioris conditionis, quam sapientes: cum ex stulta simplicitate reportant commodum? R. Tales non excusantur a toto, sed a tanto, & puniendi sunt arbitrio iudicis plus, vel minus secundum quantitatem excessus. Ex hoc autem quòd dicit decretalis, quòd suspendatur donec probet suam innocentiam; non sequitur, quod nullo modo sit puniendus; sed tanta pena sit relaxanda. Quarto quæritur. Vtrum proclamante parato probare crimen, quod denunciat, iudex possit inquirere a denunciato super iniuria ante testium productionem, quòd respondeat: vtrum sit verum, quod ei imponitur, vel non. Si enim verum est, & respon-

dere

dere cogatur, aut mentiri cogetur, aut se ipsum infamare. Si autem non cogatur ad respondendum, quomodo producantur testes, qui non solent produci ante negationem rei? Et hoc ipsum videtur Augustinus dicere in hoc mandato, cum dicit (tunc neganti adhibendi sunt etiam alij &c.) &c. quòd si est denunciatio simplex de peccato, de quo non processit infamia inducens inquisitionem, non est cogendus denunciatus ad respondendum de veritate: Neq; enim durius debet agere pater spiritualis cū subdito, quam princeps sacerdotum, vel Pylatus, egerit cum, Christo. De quorum utroque legitur, quòd Christo accusato coram se, neuter inquisiuit de veritate dicenda. Sed princeps dixit Mat. 26. Nihil respondes ad ea, quæ isti aduersum te testificantur? Pilatus vero dixit ibidem. 27. Non audis quanta aduersum te dicunt testimonia? Est autem ad hoc argumentum ex eo, quod dicunt iuristæ, quòd quando proceditur cōtra aliquem de crimine per modum inquisitionis, quam aliquis promouet, non est imponendum iuramentum de dicenda veritate illi, contra quem est inquisitio, ne ex hoc aduersarius instruat: fortiori ratione, nec in isto casu. Eadem autem est vis, quo ad Deum, in iuramento, & in verbo simplici. Et ideo non est secundum Deum, quòd cogatur aliquis in hoc casu dicere, vel negare; sed potest dicere iudex sic proclamando. Ecce vos auditis, quid dicitur de vobis, quid dicitis vos ad hæc? Et est relinquendum voluntati suæ, vt vel deneger, vel concedat, vel dicat. Non recognosco, quod dicitur, vel paratus audire probationem, & similia. Quod autem dicit Augustinus, q̄ neganti adhibendi sunt testes, intelligi potest, quòd vocat negantem, non confidentem:

rentem: & in isto casu sufficit huiusmodi negatio ad procedendum ad testes. Si vero quærat, quare in processu per modum denunciationis non compellatur reus ad dicendam veritatem, sicut per modum inquisitionis in processu ex officio; uel per modum accusationis? Potest dici, quod in inquisitione tali, in qua agitur ad remouendum ab administratione, & in accusatione, in qua agitur ad degradationem, quæritur, quod tangit bonum non solum rei, sed aliorum. In denunciatione uero, in qua agitur ad correctionem solum, quæritur bonum rei: Et ideo districtius agunt contra reum, in duobus illis processibus, quam in isto tertio. Et districtius agi potest secundum Deum, ne ex remissione lædatur utilitas aliorum. ¶ Quinto quæritur. Vtrum subditus in isto casu teneatur obedire prælato, si forte præcipiat ei, quamuis male, quod dicat ueritatem de crimine, de quo est proclamatus. R. Potest dici, quod non, Sicut non teneretur subditus obedire prælato, si præciperet, quod diceret ei peccata sua extra forum confessionis; quamuis hoc facere sine peccato posset. Multa enim sunt, quæ non sunt peccata, in quibus tamen non teneretur religiosus obedire prælato, ut sunt aliqua, quæ sunt supra regulam, & uotum suum: & annexa his, cum ipse non promiserit obedientiam simpliciter, sed secundum regulam, & statuta aliqua. Quis enim auderet dicere, quod subditus teneatur confiteri sua peccata omnibus sacerdotibus de conuentu suo, si abbas hoc ei præcipiat, & multa similia, quæ tamen possunt fieri sine peccato? ¶ Sexto quæritur. Vtrum liceat procedere ad huiusmodi proclamationem, & conuictionem per testes, quando non speratur de proclamati correctione? R. Licet non speretur de fructu

fructu correctionis eius, si speratur de fructu in alijs scilicet, quia magis timebunt, vel alia utilitas congregationis idem sequatur, licet procedere, sicut licet probare de aliquo, quod ipse leprosus sit; non quia speretur, quod ex hoc sanetur, sed quia est utile alijs. ¶ Septimo quæritur, si in collegio, in quo hæc aguntur in publico, sunt aliqui, quibus cedit ad utilitatem, alij, quibus ad damnum, Vtrum sit dimittendum? R. Poteſt differri, vel quæri oportunitas, quod fiant iſta coram illis ſolum, quibus prodeſt. Si autem hoc non poteſt fieri, videtur, quod finaliter non ſit dimittendum bonum aliquorum propter malum aliorum in operibus iuſticiæ; maxime cum bonum ſequens maius reputetur, quàm damnum in genere ſuo.

Cap. XCIX.

COnuictus vero ſecundum præpoſiti, vel præbyteri, ad cuius diſpenſationem pertinet arbitrium, debet emendatoriam ſubire vindictam, quam ſi ferre recuſauerit; etiam ſi ipſe non abſceſſerit, de veſtra ſocietate proyiciatur. Non enim hoc fit crudeliter, ſed miſericorditer: ne contagione peſtifera plurimos perdat.

¶ Traditis mandatis circa peccata conuincenda. Tradit hic mandatum circa iudicanda. Et tanguntur hic tria, ſcilicet per quos ſunt iudicanda, quia per præpoſitum, vel præbyterum: ibi (ſecundum præpoſiti &c.) Item ad quam pœnam iudicanda; quia ad ſatiſfactionem emendatoriani, ibi (debet emendatoriam) Item quid faciendum de illo, qui recuſat de huiuſmodi pœnam ferre, quia expellendus; ibi (quàm ſi ferre &c.) Sed additur cauſa, cū dicitur

dicitur (Non enim & hoc fit. &c.) ¶ Et nota circa primum, quòd præsbyter interdum vocatur episcopus ciuitatis, ad Titū idest Vt ordinaret præsbyteros per ciuitates. Glo.episcopos. Et dicitur Episcopus præsbyter, quasi præbens iter scilicet exempli. Præpositus autem dicitur, qui sub Episcopo est maior in congregatione. Vnde præpositus quasi ante alios positus a maiore. Vnde habet respectum ad inferiores, eo quòd est præ illis; & ad superiorem: eo quòd non a se, sed ab alio ipse positus sit. Videtur autem, quòd tempore Augustini, esset ita ecclesia sua cathedralis ordinata, sicut adhuc sunt multæ in multis; quòd Capitulum habebat pro maiore ipsum Episcopum, vel sub ipso aliquem, qui præpositus dicebatur tunc, licet modo apud diuersas ecclesias diuersis alijs nominibus nominentur; & quia isti duo circa conuentum diuersas habebant iurisdictiones, dicit (secundum arbitrium præpositi, vel præsbyteri, ad cuius dispensationem pertinet arbitrium) ita quòd Episcopus in casibus ad se pertinentibus sententiaret.

¶ *Circa secundum nota*, quòd vindicta quandoquē stricte accipitur, pro redditione mali pro malo, & sic nulli licet se vindicare. Quandoquē large Pro pœna, iusticia exigente, inflicta a iudice, & sic licet. Debet autem prædictus prælatus non solum punire pro præteritis, sed aliquas cautelas apponere circa futura. Vt si quis offendit frequenter in locutorio, iniungere ei, vt non intrèt ad tempus. Si nimis loquatur cum muliere aliqua, iniungere ei, vt ei non loquatur ad tempus: & similia. Et ideo dicit (vindictam emendatoriam) vindictam, quo ad satisfactionem de præteritis, emendatoriam, quo ad cautelam de futuris.

¶ *Circa*

¶ *Circa tertium Notandum*, quòd vitium eorum, qui culpas committunt, & penitentiam recusant, dicitur incorrigibilitas: Huiusmodi autem incorrigibilitas est grauissimum peccatum. Est enim diabolicum: Ipse enim diabolus postquam peccauit, nunquam penitere voluit. Item est infirmitas periculosissima: Non enim est infirmitas adeo modica, quin per recusationem remedij verti possit in magnum periculum. Item hoc est vitium, quod totam religionem destruit, obedientiæ resistendo, in qua tota virtus religionis consistit. Item est summe contagiosum, sicut lepra, quæ non recipit curationem. Item hoc est: quod solum damnat homines; Nullus enim quantuncunque peccator aliter damnatur, nisi quia se non corrigit. Inter varias enim species peccati in spiritum sanctum, quod est horribile peccatum, in omni casu, videtur grauius id, quod est finalis in penitentia. Incorrigibilitas autem est huic annexa, propter hoc peccatum istud in nullo quantuncunque magno est tolerandum; & si forte alia aliqua interdum tolerantur, ex causa. Vnde Ambrosius cum Theodosium imperatorem abieciisset ab ecclesia propter culpas suas, aliquas, nunquam voluit eum reconciliare, quousque publicam penitentiam egit: Et cum diceret ei imperator, quòd Dauid adulterium, & homicidium commiserat: illico dixit ei Ambrosius, Secutus es errantem, sequere corrigentem: Ad quod verbum compunctus publicam penitentiam fecit. Propter hoc etiam omnes solent insurgere contra tales, & nullus de conuentu audet in aliquo talibus præstare fauorem: & si in alijs eisdem faueant interdum: propter quod dixit dominus Mat. 18. Sit tibi sicut æthnicus, & publicanus, quos scilicet omnes fideles

les abhominantur. Propter hoc etiam dicit nunc Augustinus ipsos gravissime puniendos. Quæ enim pœna potest gravior excogitari, quam de societate expelli. Et sciendum, quod istam expulsionem quidam interpretantur quoddam genus excommunicationis; ut quando interdicitur fratri, ne veniat inter alios in choro, vel refectorio, vel quod nullus ei loquatur, & similia: Alij intelligunt hoc de sequestratione, qua aliquis in aliquo loco quasi in carcere includitur: Alij vero intelligunt de eiectione ab ordine habitu, ablato. Sed melius est, ut dicatur, quod secundum diuersas circumstantias personæ, & culpæ, quandoquæ est primum faciendum, quandoque secundum, quandoque tertium; ita quod semper mirior pœna præligatur, dummodo credatur, quod sit æque medicinalis, & scandalum aliorum, & conseruatio iusticiæ ad aliud non inducat. ¶ Item sciendum, quod in corrigibilitas dicitur viciū contagiosum; quia tales exemplo manifesto, & verbis, quibus se defendere solent, & tolerantia, qua alijs solent præstare audaciam ad similia, corrumpunt alios. Et ideo cum peccent in societate ipsam corrumpendo in eo, in quo delinquant, expedit, ut de societate expellantur. Et ideo bene dicit (de vestra societate proijciantur, ne contagione pestifera plurimos perdant) Nec est ascribendū crudelitati, sed potius misericordiæ; quia maioris est pietatis compati multis super damno spiritali, quam vni parcere a pœna aliqua sua medicinali. Sed sunt multa de quibus dubitatur circa huiusmodi expulsionem. ¶ Et primo quæritur. Vtrum pro sola incorrigibilitate, sit religiosus expellendus a societate aliorum; an etiam pro alijs culpis. *℞* Religiones aliquæ approbatæ habent in

visu expellere fures, percussores, sodinitas: Primi enim nocent in rebus; Secundi in corporibus; Tertij in animabus; sed hoc non est approbatum, nisi quando non speratur de talium correctione, & habentur præsumptiones probabiles: in quo casu præsuntur incorrigibiles. Sola ergo incorrigibilitas vel vera, ut quando recusatur penitentia; vel præsumpta; ut in casibus prædictis inducere debet prædictas expulsionem, si accipiat prima expositio pro excommunicatione iuris. Si vero accipiat pro quacunque sequestratione, vel a refectorio, vel a capitulo, & similibus, secundum quod accipit Benedictus in regula sua: potest hæc pœna infligi pro multis alijs delictis, sed corrigibilibus. Sed esto quod aliquis offendat frequenter in aliquo, tamen semper offert se ad penitentiam: nunquid talis potest expelli? R. Non potest expelli, quo ad excommunicationem iuris, secundum primam expositionem: quia talis sententia fundatur super facta, non super præsumptiones. Vnde quamvis non præsumatur de correctione in futuro: quia tamē offert se ad penitentiam de præterito delicto: non potest pro præterito delicto excommunicari: potest tamen quo ad expulsionem sequestrationis, vel eiectionis de ordine puniri: in casibus maxime prædictis, in quibus est damnosa societas eius congregationi, cum non speratur de correctione: propter facta aliqua præcedentia, quæ faciunt præsumere contrarium eius, quod verbo dicit offerens se penitentiam, & correctioni. Prouidendum tamen est, quod non expellatur de ordine, si sit talis persona, de qua probabiliter credatur, quod eiecta destruet in res, sicut faciunt aliqui comburentes bona monasterij, vel similia faciendo: vel in personas: ut interficiendo,

do, vel verberando: vel si credatur, quòd ad peccata multa alios inficiet: vt sodomitæ, vel hæretici: sed includatur in loco forti, vt minus possit nocere. Si vero non est locus aptus ad hoc, recurrendum est ad maiores, vt per eos consilium apponatur. Illi vero nociui, de quibus non timetur, quòd eiectionis cedat eis ad correctionem: securius possunt ab ordine expelli, vt humiliati sic in melius emendentur. ¶ Sed nunquid peccant illi, qui fratres onerosos, & tēdiosos propter importabilitatem suā expellunt, vel dissimulant, si egrediuntur? R. Postquam sunt professi, & pro culpis semper parati satisfacere, nisi sint tales, qui damnificent in rebus, vt fures, vel personis, vt percussores: vel inficiant peccatis alios, vt hæretici, & sodomitæ, & seminantes discordias, & sollicitantes alios de apostatando, & similes: nullo modo propter quodcunque onus ipsorum sunt expellendi, sed portandi, tanquam qui forte sunt dati a Deo, ad patientiam, & charitatem fraternam excitandam: nec sine graui peccato possunt, qui habent eorum curam, dissimulare eorum apostasiam. ¶ Sed quid faciendum est, cum eiectionis petunt recipi? R. Si culpæ incorrigibilitatis, propter quas iuste eiectionis sunt, adhuc durant, non tenentur eiectiones eos recipere: immo ex eisdem causis ex quibus iuste sunt eiectionis, iuste possunt a receptione repelli. Nec obstat decretalis, quæ dicit, fugitiuos esse requirendos, quia hoc intelligitur, quando sunt tales, qui cum vtilitate congregationis possunt tolerari; aliter non: sicut ouis morbida non solet reduci ad ouile, sed potius relinquitur ipsis lupis. Si vero credatur probabiliter, quòd sint de culpis correcti, & quòd cessabunt: te-

nentur eiectores eos recipere, salua disciplina ordinis, & etiam requirere pro loco, & tempore. ¶ Sed quid iterum faciendum est, si eiectus, de cuius correctione non speratur, offert se ad carcerem? R. Potest dici, quod si ille, qui sic petit recipi, est talis, quod facit scandala & multiplicat mala, recipiendus est ad carcerem: dummodo habeatur talis locus, in quo secure possit custodiri. Per hoc enim, & ei prouidetur: quia a multis malis sic cessabit: & congregationi non nocebit, propter sequestrationem. Potest autem in tali casu recipi sine habitus redditione: sed processu temporis, si signa bona appuerint in eo, recipi poterit ad gratiam ampliorem. Si vero talis est, quod scandala non facit in saeculo: nec peccata noua committit, & creditur, quod ex difficultate receptionis, cauior fiet in antea: potest differri receptio: licet finaliter non sit neganda. ¶ Si autem quaeratur circa praedicta, quomodo propter furtum, quod est damnum temporale, abijciendus sit frater, propter quem Christus mortuus est? Dicitur potest, quod fures in religione desperati, non solum nocent in rebus temporalibus, sed in spiritualibus, subtrahendo ea, quae ad seruiendum domino sunt necessaria; & conturbando sanctam congregationem: & sic impediunt bonum aliorum spirituale. ¶ Item electio eorum non fit solum propter bonum aliorum: sed etiam propter bonum ipsorum: vt ex hoc per confusiones, & tribulationes ad cor reuertantur. Et ideo propter bonum eorum, & etiam aliorum spirituale licet eis infligere poenam iustam. ¶ Sed iterum quaeritur. Ponatur, quod eiiciendus ab ordine petat licentiam transeundi ad aliam religionem mitiorem: vbi possit melius cauere a peccatis, quam in saeculo:

lo: est ne danda? *R.* Non est danda a prælato: nisi forte haberet aliquod priuilegium, per quod posset hoc. Nam de iure communi hoc non licet: nec faciendum est ab aliquo aliquod illicitorum, propter bonum alterius quodcumq;: Potest tamen dissimulari interdum, vt hoc faciat propria auctoritate. Vel potest dici a prælato: concedo, si possum, vel quantum possum: maxime quando timetur, ne peius faciat. Si autem intrauerit aliquam religionē ita permissiue: & credatur, quod ibidem faciat mala consueti: & ignoretur ibidem conditio eius, de notificando statum illius prælato, sub cuius cura se posuit, faciendum est a prælato illius, quod sibi vellet fieri in hac parte. ¶ Potest iterum quæri. Si eijciendus petit absolui ab ordine, vel retineri, quid faciendum sit? *Respon.* Neutrum est faciendum, nequē enim pastor quando eijcit ouem morbidam a grege, tenetur propter hoc cedere dominio illius: immo ad hoc expellit, vt si forte sanetur, reducat eam post sanationem: ita & hic. Et si forte aliquis ex simplicitate, vel alia de causa, absoluit huiusmodi eijciendum ab obedientia ordinis, non valeret; quia esset contra rationem; ¶ Potest iterum quæri, Si petat talis licentiam transeundi ad ordinem arctiorem: cuius interest dare licentiam talē? *R.* dixit Hugo, quod ad prælatum cum consensu conuentus pertinet: adducens argumentum ad hoc, quod solus prælatus non potest alienare bona temporalia monasterij, & multo magis nec personam. Licet autem hoc verum forte sit in monasterijs, vbi prælatus non habet super se maiorem: tamen in ordine fratrum prædicatorum, solus magister, cui sūt professiones omnes: vel prouincialis prior, cui data est ex constitutionibus eadem potestas in

sua prouincia, quam habet magister in toto ordine; possunt dare huiusmodi licentiam: vel alij eorum auctoritate. Et quamuis prior conuentualis, cum conuentu possunt recipere fratres: tamen non possunt de obedientia magistri, vel prioris prouincialis, quibus acquisiti sunt, eos subtrahere præter voluntatem eorum. ¶ Sed iterum potest quæri. Si illi, qui licentiare possunt ad aliam religionem: possunt licentiare ad parem? R. Certum est, quòd ad leuiorem non possunt: Item certum est, quòd ad arctiorem euidenter, si aliqua sit talis, possunt de pari vero, propter rationes, quæ sunt ad utramquæ partem, est ita dubium, quòd non est securum, nec consuetum nisi auctoritate Papæ, uel priuilegiorū, si quæ super hæc haberentur, hoc fieret. ¶ Sed nunquid auctoritas Episcopi sufficit in hac parte? R. q non est cōsuetum, quòd pro dispensationibus circa uotum religionis recurrant ad Episcopum. Et est argumentum iuris ad hoc. Ipsi non possunt dispensare in uoto crucis, quod minus est, quàm uotum religionis: huiusmodi uero continuatio uoti de pari in par, non potest fieri, nisi dispensatiue, & auctoritate maioris, & ita non uidetur iste casus pertinere ad Episcopos. ¶ Postremo sciendum est, quòd quando datur licentia religioso de transeundo ad aliam religionem: nunquam prælatus dans huiusmodi licentiam liberatus est a cura sua, quocumque modo detur; quousque licentiatus, secundum modum licitum, in alio ordine sit professus: alicui enim esset aliquis Cœnebita & tamen sub cura nullius. Dixerunt tamen aliqui: quòd si aliquis de sua uoluntate licentiatus est de transeundo ad arctiorem religionem, quæ eum recipiat: non tenetur licentians reuertentem recipere. Quod etiam si esset

si esset uerum: non est tamen contra prædicta, potest enim esse casus, in quo est aliquis de cura aliquis adhuc: & tamen non tenetur eum recipere in aliorum societatem.

Cap. C.

ET hoc quod dixi de oculo non figendo: etiam in ceteris inueniendis, prohibendis, indicandis, conuincendis, indicandisque peccatis diligenter, & fideliter obseruetur, cum dilectione hominum, & odio uitiorum.

¶ Tradita sunt mandata, circa culpas repræhendendas, in materia particulari secundum distinctionem prædictam: Hic autem tradit mandatum circa idem in genere: dicens quattuor scilicet Quid seruandum in omni peccato, circa eius deprehensionem: quia idem, quod dictum est de oculi fixatione. Item quo ad quæ, & quot: quia quo ad quinque scilicet inueniendis &c. Item qualiter: quia diligenter, & fideliter. Item quali motu, scilicet quod caueatur, ne fiat aliquid circa hoc, ex personæ odio: sed ex dilectione personæ, & odio uitiorum. Et hec patent in litera.

¶ *Circa primum Notandum*, quod sunt quædam religiones, in quibus & si magno zelo zeletur carnis peccatum: tamen interdum alia multa mala tolerantur: Hoc autem est dyabolicum posse non ex toto destruere. Contra quod dicitur 1. Reg. 15. Va de, & percutite Amalech, & de molire vniuersa eius, non parcas ei, nec concupiscas ex rebus eius aliquid. Quod quia non fecit Saul, retentis aliquibus de bonis eius, quæ sibi, & exercitui suo placuerunt, priuatus est regno: in signum, & argumentum, quod

prælati sic facientes non sunt digni regimine. Et etiam si multos habeant sub se, qui hæc consulant, & acceptent. Item tales religiosi sunt sicut Samaritæ, qui ex vna parte colebant Deum, & ex alia parte retinebant idola, sicut dicitur 4. Re. 17. Contra tales vero dicit Helias. 4. Reg. 18. Vsq; quo claudicatis in duas partes? Item prælati taliū sunt sicut illi reges, de quibus frequenter dicitur in libro Reg. quod multa mala corripiebant: verum tamen excelsa non auferebant, semper aliqua incorrecta relinquentes 4. Reg. 14. & 15. ¶ Et Nota, quod religio est sicut hortus Domini. Quid autem prodest in horto remouere aliquas herbas malas, vel spinas, & relinquere alias? Ideo dicitur Hier. 6. Nouate vobis nouale, & nolite ferere super spinas, sicut qui faciunt noualia, diligenter purgant; quod nullam spinam dimittunt. Item est sicut spiritalis camera habitationis: peccata vero diuersa, sunt stercorea animalium diuersa. Luxuria enim est sicut stercus equinū: sicut & ipsi equi significāt luxuriosos: Gulositas vero est sicut stercus porcorum: Detractio sicut stercus canum, & sic de alijs multis. Quis autem volens cameram domini sui mundare, remouet inde vnum genus sordium; & dimittit alia & non potius remouet omnia? Ideo dicitur Iacobi. 1. Abicientes omnem immundiciam. Quod quidem faciendum est specialiter in domo illa: quam specialiter decet sanctitudo. Item est sicut templū Deo consecratum: In tali autem non debet remanere aliquod vestigium idolatriæ dyabolicæ, quod est peccatum: sed solum imagines sanctorum, quæ sunt virtutes. Ideo legitur quod sanctus Bonifacius eliminata omni spurcicia dæmonum, a templo Pantheon, Beatæ virginis, & omnibus sanctis illud

consecrauit. In huius autem figura dicit Balaam Num. 23. Non est idolum in Iacob. nec videtur simulacrum in Israel: Dominus Deus eius cum eo: quia scilicet ea quæ Dei sunt solum, & non ea, quæ sunt dyaboli, debent inueniri in viris Israelitis. Quia igitur tot inconuenientia sequuntur, cum sustinentur aliqua in religione; etiam alijs correctis: bene dicit vir sanctus: vt illud, quod dixit obseruandum circa fixationem oculi, pertinens ad incontinentiam seruetur in omnibus alijs peccatis: vt non solum contra vnum genus peccati, sed contra omnia peccata ad ipsa extirpanda zelus sanctus accendatur.

¶ *Circa secundum notandum*, quòd circa inuenienda peccata dedit mandatum: ibi (Cum ergo simul estis &c.) Circa prohibenda per admonitionem fraternam, ibi (& si hanc; de qua loquor &c.) Circa iudicanda, ibi (si autem & post admonitionem.) Circa conuincenda: ibi (prius tamen alteri, vel tertio est &c.) Circa indicanda: ibi (conuinctus vero &c.) Et vide quam sufficienter mandat, quicquid potest fieri contra peccata. Quid enim amplius potest excogitari, nisi vt apponatur diligentia ad inuenienda. Si autem inueniuntur, vt statim corrigantur: quod si correctio fraterna non prodest, quòd indicentur: quòd si indicanda negantur, quòd probentur: quòd si probata fuerint; quòd per iudicium iuste puniantur. Item nota per huiusmodi recapitulationem in quinque prædictis quam rationabiliter, & ordinate procedit in omnibus Augustinus. Quis enim nisi ipse recapitulasset, aduerteret mandata prædicta versari circa ista quinque præcise? Quod claret euidenter ex recapitulatione. Proinde est argumentum, quòd
etiam

etiam in alijs rationabiliter, & ordinate procedit, quamuis per huiusmodi recapitulationem, vel verbis alijs, hoc non declaret expresse.

Cap. CI.

Circa tertium. Notandum, quod illud dicitur fieri diligenter, quod fit cum vehēmenti applicatione. Cum ergo mandat Augustinus, quod circa peccata inuenienda: prohibenda: indicanda: conuincenda: iudicandaque vsque ad expulsionē etiam delinquentis, diligentia, & fidelitas obseruetur: patet, quantum zelum vult haberi contra peccata omnia in religione. Porro ad hoc debet incitare exemplum diuinum. Dum enim peccatum spirituale superbiæ in cœlo commissum; carnale vero gulæ in paradiso perpetratum; saculare vero de negociatione in templo inuentum tanto zelo puniuit: vt illos, qui deliquerant in talibus locis, de illis expelleret: præter alias pœnas; quibus puniuit eosdem. Cum ergo religioso sit quasi quoddam cœlum, in quo habitant viri spirituales, sicut in cœlo spiritus: & quædam paradysus in terra: & spirituale Domini templū: quanto zelo persequenda sunt in ipsa peccata siue spiritualia, siue carnalia, siue sacularia. Item tria sunt, propter quæ solent res aliquæ cum diligentia maiori purgari. Vnum preciositas, sicut vas aureum, vel argentēum, si contrahat aliquam rubiginem: ita viros religiosos quanto meliores sunt, tanto conuenit magis purgari. Ideo Malach. 3. dicitur de filijs Levi, qui debent esse meliores, quam alij. Et purgabit filios Levi, & colabit eos, quasi aurum, & quasi argentum. Colatura vero huiusmodi est efficacissima ad purgan-

purgandum. Aliud est sanctitas: Nimis enim male sedent sordes in re sancta. Et ideo dicitur 1. Machabæorum. 4. Et mundauerunt sancta. Aliud est utilitas: sicut purgantur arbores hortenses, ut fructificent melius. Et sic de homine. Ioh. 15. Et omnem; qui fert fructum, purgabit eum, ut fructum plus afferat. Cum ergo religio sit status preciosissimus, status sanctissimus, & hortus Domini spiritualis, habens arbores diuersas ad fructus optimos producendos: cum quanta cura sunt rubigines, & sordes, & excrescentiæ malæ ab ea purgandæ? Item religiosi succedunt in hæreditate uiris sanctis: Et ideo ualde graue est, si in hæreditate eorum, in qua ipsi tam nobiliter quo ad uirtutes uixerunt, rusticitates peccatorum committunt. Ideo dicitur Esa. 26. In terra sanctorum iniqua gessit, & non uidebit gloriam Dei. Ipsi etiam uiuunt de bonis Domini habentes continue bona ab eo stipendia: Quanta est ergo perditio, si tales faciunt aliquid contra eum? Ideo dicitur contra tales in Psal. Si inimicus meus maledixisset mihi, sustinuissem utique. Tu uero, qui simul mecum capiebas cibos. &c. Et post. Veniat mors super illos, & descendant in infernum uiuentes. Ipsi etiam ad hoc electi sunt, & sequæstrati a mundo, ut sint sancti. Leuiter. 20. Sancti eritis mihi: quia ego sanctus sum: & separaui uos a cæteris gētibus, ut essetis mei: Quanta ergo est ingratitude, cum illi, quibus tanta gratia facta est a Domino, in tali electione, uiuunt prophane? Quantum ergo persequenda sunt peccata talium, qui tantum tenentur ad contrarium; & ratione successionis sanctorum, & ratione stipendiorum diuinorum, & ratione electionis diuinæ? ¶ Item tria sunt, quæ solent multum excusare a peccato.

cato. Primum est ignorantia: sed istam non habent religiosi: quia habent scripturas, habent doctrinam, habent sapientes, a quibus semper possunt certificari de dubijs: Et ideo dicuntur uiri Israëlitarum id est cognoscentes Deum, quia magnam habent noticiam diuinorum. Secundum est mala societas, quæ frequenter impellit ad malum: sed & istam non habent: immo econuerso bonam trahentem ad bonum: Et ideo sicut peruertitur homo cum peruersis: & ipsi cum sanctis deberent esse sancti. Tertiū est negocia mundi, quæ frequenter dant occasionē peccati: ut onus domus regendæ, auariciæ negociationes, mendaciæ, discursus malus concupiscenciæ eorum, quæ videntur & similia. Propter quod dicitur Ioh. 5. Totus mundus in maligno positus est, id est in malo igne, id est in occasionibus inflammantibus ad malum. Religiosi vero, & maxime claustrales non habent huiusmodi occasiones: cum non habeant vacare nisi soli Deo. Cum ergo peccata eorum non habeant excusationes, sicut peccata multorum aliorum, plus sunt merito persequenda. Item peccata in religione perdunt animas eorum, qui propter salutem suam religionem intrauerunt. Perdunt etiam famam: Sicut enim stercorea non possunt diu esse in loco quantumcunque occulto, quin fateant: ita nec peccata: Perdunt etiam temporalia: quia perdita fama, deuotio hominum, quæ temporalia conferebat, citius aufert; quam conferat. Si ergo abbas dissipator temporalium tam odibilis est hominibus: quantum sunt peccata odienda in religione, quæ & hæc, & plura multa meliora dissipant? Item cum peccata in religione non extirpantur, multiplicantur: sicut herbe malæ in horto, vel in agro. Prouer. 14. Per agrum pigri hominis

nis transiui. Et post. Et ecce totum repleuerunt vetricæ. Et hoc est, quia piger non extirpauerat statim orienres. Non solum autem augentur, sed indurantur, ita vt fiant quasi incorrigibilia. Augustinus. Dum consuetudini non resistitur, fit necessitas. Non solum fiunt incorrigibilia, sed quod malorum est extremum, non reputantur peccata. Augustinus. Obijciuntur Iacob quattuor vxores: quod quando mos erat, peccatum non erat, idest nō reputabatur secundum vnā expositionem. Cum ergo ex tolerantia peccatorum tot inconuenientia subsequantur: non sunt (vt dicit Beatus Benedictus in regula) aliquatenus dissimulanda: sed statim, vt orta fuerint, radicitus amputanda. Pater ergo ex prædictis, quòd si consideratur religionis locus, & status: peccatorum quoque religiosorum grauitas, & in excusabilitas, damna iterum, quæ inferunt, & incorrectorum pericula: animandi sunt omnes religiosi ad zelandum feruenter contra peccata.

¶ *Circa quartum notandum est, quòd virorum bonorum est a peccato declinare. Psal. Declina a malo, & fac bonum: non solum hoc est eorum, sed quod melius est fugere peccatum Eccles. 22. Quasi a facie colubri fuge peccatum, immo quod optimum est eorum odisse peccatum Rom. 12. Odientes malum. Et vere odiendum est a bonis peccatū. Deus enim noster nihil odit nisi peccatum, & ipsum summe odit, & ideo amici eius debent summe odisse peccatum. Psal. 96. Qui diligitis dominum, odite malum, sicut scilicet ipse odit.*

Cap. CII.

PRæterea naturale est odisse rem nociuam : sicut
 ouis odit lupum naturaliter. Et ideo dictum
 est. Odio habebis inimicum tuum. Mat. 5. Non quod
 scriptura hoc alicubi præcipiat, sed nimis adhæ-
 rentes naturæ hoc dixerunt: peccatum autem sum-
 me notet: Sicut ergo cum lupus nociuus gregi com-
 paret: & pastores, & canes, & totus grex comoue-
 tur, tanquam in rem odiosam: Ita quantuncunque
 alicui apparet peccatum, debent omnes in illud
 tanquam in rem odiosam exurgere. ¶ Præterea
 nuncius, qui semper nunciat odiosa, solet multum
 haberi odio, de peccato vero nunquam auditur bo-
 na cantio, sed semper mala prænoſticator omnis scri-
 ptura loquens de eo. Si ergo Achab oderat Micheã:
 quia non nunciabat ei nisi malum, sicut dicitur 3:
 Reg. 22. Quantum odiendum est malum omnibus,
 quod innumerabilia mala, & prænoſtica adducit.
 Sed sciendum est, quod aliqui quo ad aliquos ma-
 le moti sub specie persequendi peccatum, homines
 persequuntur interdum; Iſti sunt sicut Scribæ, &
 Pharisei, qui non ex charitate, propter inuidiam,
 & odium, quod habebant ad Christum, accusabāt
 eum, modo de Sabbathi violatione, modo quod
 se filium Dei vocabat, & de similibus. Sunt iterū
 sicut rex Aabylonis, qui sub specie potus dedit Se-
 dechiæ potionem laxatiuam, de quo confusus est
 coram omnibus, lacerato ventre: sicut dicitur in
 hystorijs. Ita & isti sub specie charitatiuæ corre-
 ctionis homines confundere intendunt. Sunt etiā,
 sicut principes, & satrapæ Babylonis, qui non quæ-
 rebant accusate Danielelem, vt cessaret a malo: sed
 quæ-

quærebant malum, vt inuenirent occasionem contra eum. Daniel. 6. Psal. Scrutati sunt iniquitates. Sunt alij, qui licet non ex proposito in correctionibus homines persequantur; tamen ex defectu veræ dilectionis, sic incaute agunt interdum, calamum quassatam confringentes, & linum fumigans extinguentes; quod correctio, quæ deberet correctis esse ad vitam; cedit eis plerumque ad mortem. Sed dilectio, quam quis habet ad vas vitreum suum, docet eum, quod lauando ipsum, sic caute tractet, ne stringat, & confringat. Item dilectio, quam habet mater ad filium suum paruulum, docet eum, quod abstergendo sordes a naso, sic leniter faciat, ne sanguinem eliciat. Dilectio, quam habet quis ad lumen lucernæ, docet eum, vt sic discrete emungat, ne lumen exstinguat, & factorem inducat. Cum quis alium ergo corrigendo, sic incaute confringat. iuxta illud. Psal. 88. Destruixisti eum ab emundatione: sic emungit fortiter nasum eius, quod elicit sanguinem, prout dicitur. Prouer. 30. Sic lucernam mundat sine arte emungendi: Propter quod præcepit dominus fieri emunctoria. Exod. 35. Quia totum extingui patet: quia hoc accidit ex defectu dilectionis, & charitatis, quæ docet de omnibus faciendis. Quia ergo vitia sunt odienda, & quando propter malum motum, vel præter dilectionem corriguntur, sequuntur inde mala prædicta tam in corrigente, quam in correcto: bene dicit vir sanctus, quod fiat correctio cum dilectione huiusmodi, & odio uitiorum.

Cap. CIII.

Q Vicunque autem in tantum fuerit progressus malum, vt occulte ab aliquo litteras, vel quodlibet

*bet munus acceperit, si hoc ultro confitetur, parcat-
tur ei, & oretur pro eo. Si autem depræhenditur, &
conuincitur: secundum arbitrium presbyteri, vel præ-
positi grauius emendetur.*

¶ Tradita sunt mandata circa correctionem vi-
riorum, quæ depræhenduntur ab illo loco: ibi
(Quando ergo simul estis) usque huc (quando au-
tem.) Hic autem tradit circa illa, quæ gratis reco-
gnoscentur. Sicut autem supra mandata posuit cir-
ca particularem materiam primo, postea in genere.
Ita hic ponit materiam particularem. Et quia de si-
milibus simile debet esse iudicium: Intelligendum
est, quod idem obseruetur in omnibus alijs: sicut
dicit supra in alijs; quamuis hoc ibi expresse non
dicat. Quia vero, quæ pertinent ad inhonestatem
impudiciæ, quasi nunquam inueniuntur, nisi
comprehendantur. Quæ vero pertinent ad tracta-
tum alicuius rei temporalis indebitæ, facilius reco-
gnoscentur: quia non habent ad recipiendum tan-
tam verecundiam: supra in depræhendendis descen-
dit ad illam materiam, hic vero ad istam. ¶ No-
tandum vero, quod ad recipiendum literas, exten-
dere manum homini, cuius voluntas est in alterius
potestate, uel quodlibet munus aliud, quantuncun-
que modicum illi, qui nihil potest habere, est cul-
pa non modica: licet quidam non multum ponde-
rent. In vicijs enim spiritualibus, cum effundun-
tur usque ad manum, reputatur esse in summo gra-
du, sicut in ira. Grauis enim est cum est in corde:
grauior cū uerbis effunditur: sed grauissima quan-
do usque ad manum percutiendo prorumpit. Si-
militer in carnalibus grauis est impudicitia in men-
te: sed grauior est in uerbis; sed grauissima cum
usque ad tactum impudicum procedit. Eadem ra-
tione

tionem in secularibus graue est delictum, rem quam non licet habere, concupiscere: grauius, cum verbis procuratur: sed grauissimum, cum actu perpetratur. ¶ Præterea inter membra humana quædam sunt, quæ rebellant spiritui omnino, ut genitalia: Quædam quæ, & si omnino non rebellant, tamen difficile obediunt, ut pedes: Sed manus valde obediens est, & mobilis, modo huc, modo illuc in omnem partem. Et ideo tanto inexcusabilior est spiritus, si aliquid mali perpetrat in accipiendo illicitum, quanto est ei obedientior manus. ¶ Præterea quidam sunt sensus, quorum organa, velit, nolit homo, patiuntur ab obiecto, ut auris, nares: quia non habent a natura operculum defendens. Quidam vero, quorum organa a natura habent de sensuum, ut oculi palpebras: Et ideo quia possunt se defendere, cum vult spiritus per opercula huiusmodi, non patiuntur, nisi cum vult spiritus. Sensus vero tactus, cuius speciale organum manus est, non egreditur in actum tangendi, etiam si velit homo, nisi cum labore quodam, & difficultate: eo quod oportet ipsam manum appropinquare ad rem distantem: quia tactus non est per medium sicut visus; sed est rei immediatæ. Tum ergo quod habet maiorem difficultatem ad sui perperationem, hoc ipso sit grauius: non est sine grandi malo, cum manus extenditur ad aliquod illicite accipiendum. Tum quia malitia in tali facto effunditur usque ad manum: Tum quia manus super alia membra obediens est spiritui: Tum quia tardior est ad actum suum: eo quod nisi cum difficultate a spiritu, & per illum trahatur. Et ideo signanter dicit vir sanctus (in tantum progressus fuerit malum) Innuens, quod est non leue malum, sed magnum valde, quod

religiosi aliquid illicite accipiant, idest sine licentia: quod vocat occulte fieri: quia fit sine licentia praelati. Quamquam autem hoc semper sit vitandum, & tanquam malum cauendum: tamen specialius caueant viri sancti a literis, & munusculis recipiendis a mulieribus. Et ideo dicit Hiero. Dulces literas, & crebra munuscula sanctus amor non habet. Huiusmodi enim sunt amantium stulto amore; & sunt species mali, a qua cauendum est. secundum Apostolum. Item per hæc inspecta reducitur mulier ad memoriam, per quod solet sanctos diabolus infestare. Item per hæc nutritur, & augetur affectus circa mulieres, quod est valde periculosum, quia de facili degenerat in malum. Item per hæc familiaritas mulieribus acquiritur, quæ quam sit reprehensibilis, patet ex dictis. Item huiusmodi munera sunt quasi inutilia & recipienti, & alijs: Et ideo tanquam a superfluis caueant, qui nõ curant nisi de necessarijs in hoc mundo. ¶ Item Notandum, quod quidam sunt, qui ratione antiquitatis, vel alicuius excellentiæ qualiscumque solent aliquando plus excedere in huiusmodi receptione reputantes, quod verecundum sit eis, vel indecens licentiam assidue petere pro huiusmodi minutis recipiendis. Et praelati quidam, qui in minoribus fratribus ista rigide corrigunt, maiores vero non audent corrigere. Praelati isti sunt sicut Mirmitholeon, qui dicitur leo formicarum, qui in formicas desæuit, ita & isti in minores. Contra vero faciebat Dauid, qui pugnavit cum leonibus: quod quidem est probitatis: Primum autem ignaviæ.

Cap. CV.

ET attende, quòd tale delictum, siue aliud quodcumque magis est corrigendum in maioribus. Ipsi enim sunt exemplar minorum, Exemplar vero, vnde alia transcribuntur, primo, & diligentius solet corrigi. Item ipsi sunt caput minorum. Sapient enim medico maior est cura de infirmo per totum corpus in patiente de curatione capitis: eo quòd inde fluunt bona, & mala in alia membra. Item ipsi sunt fons, vnde fluunt riuuli exemplorū. Non possunt autem riuuli esse clari fonte turbato: Et ideo primo purgandus est fons, vt puri sint riuuli. Hinc est, quòd in purgatione Israelitici populi à mulieribus alienigenis, primo inceptum est a maioribus scilicet a filijs Iosedeck, & fratribus eius: sicut habetur 3. Esdre. 9. Hinc est etiam, quòd Dominus plus increpat maiores inter Iudæos scilicet scribas, & pharisæos, quam minores, licet omnes essent reprehensibiles. Hinc est iterum, quòd in die cœnæ primo lauatur maius altare, quam minora: quia ad purgationem maiorum primo, & principalius est intendendum. Et ideo Ezech. 9. Dicitur viris deferentibus vasa interfectionis, a sanctuario meo incipite. Ceperunt ergo a viris senioribus, qui erant ante faciem domus. Cum ergo tot rationes ostendant, quòd maiores magis sint corrigendi: quanto magis absque acceptione personæ, cum sub eodem voto viuant, sunt sicut alij corrigendi. Et ideo dicit vir sanctus (quicumque) quasi dicat quicumque ille sit absque acceptione personæ.

Cap. CVI.

Item attendendum est, quòd ille, qui gratis recognoscit culpam, videtur magis pœnitens, quàm ille, qui non recognoscit, nisi conuictus. Et ideo dignus est maiori misericordia Lucæ. 18. Si pœnitentiam egerit dimitte. Præterea quò benignius agitur cum illo, qui gratis culpā suam recognoscit: eò magis videntes hoc animantur ad similia, sicut ad dominum Iesum audacius appropinquabāt peccatores propter benignitatem, quam eis exhibebat. sicut patet Lucæ 15. Præterea reus quanto plus fatigat actorem, & iudicem: tanto, si finaliter inuenitur in culpa, dignus est pœna maiori: Et quanto minus fatigat, dignior est gratia. Qui autem nō recognoscit culpam nisi conuictus, multum laborem præstat iniquitate sua accusanti, & iudici: Qui autem gratis recognoscit, quasi nullum laborem præstat eis. Ex his ergo patet, quòd recognoscens culpam suam gratis, multo minus est puniendus, quam conuictus. Et ratione sui, quia pœnitens videtur. Et ratione assistentium, qui ad bonum ex hoc pronocantur: Et ratione contra eum agentium, quos minus fatigat: Et propter hoc bene dicit (parcatur illi) quòd intelligendum est, non quò ad totum, sed quò ad tantum. (& oretur pro eo) vt sicut benigne agitur cum eo ab homine: ita & Deus etiā pie agat cum eo. Sic igitur circa prædictum mandatum declarata sunt tria: Vnum est, quòd non parum est malum religioso aliquid, quantuncunque modicum, sine licentia accipere: Quòd innuit August. cum dicit (in tantum progressus fuerit malū &c.) Aliud est: quòd istud corrigendum est in omnibus

nibus absque personæ acceptione, quod innuit cum dicit (quicumque autem &c.) Aliud est, quod leuius est istud puniendum in confesso, quam in conuicto, quod tangit cum dicit (si hæc ultro &c.) quod intelligendum est similiter faciendum in omnibus alijs culpis gratis confessis.

¶ Quartum capitulum regulæ.

VEstes vestras in unam habeatis, sub uno custode, vel duobus, vel quot sufficere possint ad eas excutiendas, ne a tinea ladantur.

Cap. CVII.

HOc est quartum capitulum regulæ, in quo agitur de his, quæ pertinent ad religiosos, in quantum sunt in statu necessitatum multarum. Primo autem tradit mandata circa huiusmodi necessitates: Secundo circa officiales, qui circa hæc sunt necessarij. ibi. (siue autem qui cellario, siue qui vestibus præponuntur) Licet autem sint variæ necessitates religiosorum: tamen duæ sunt maiores, & circa quas solent fieri frequentius defectus, scilicet indigentia vestium, & infirmitas. Et ideo circa hoc specialiter tradit mandatum: Circa secundum ibi. (lauacrum etiam corpori &c.) Circa primum hic. ¶ Et notandum, quod interdum offenditur in religione in negligentia custodiendi vestes: & ideo tradit mandatum circa custodiam vestium dicens (Vestes vestras &c.) Interdum circa carentiam: & ideo tradit mandatum circa prouisionem dicens. (& sicut pascimini &c.) Quandoque circa distributionem: & ideo tradit mandatu

circa, hoc dicens (si fieri potest &c.) Quandoque circa operationem : & ideo tradit circa hoc mandatum dicens (tamen si vestra toleratur infirmitas . &c.) Quandoque circa receptionem uestium collatarum : & ideo tradit mandatum circa hoc dicens (consequens est &c.) Quandoque circa lotionem : & ideo tradit mandatum circa hoc dicens (indumenta vestra &c.)

¶ *Circa primum attendendum est*, quòd aliqui, licet custodiant vestes a lotionibus, & igne, & huiusmodi magnis læsionibus : tamen non a modicis, sicut est a corrosione vermium, & similibus : Alij vero ita sunt solliciti custodire vestes suas, quòd reponunt eas in arcis suis, & non in loco communi, Aliquando vero, cum ponuntur in loco communi, sunt tot vestes, & tam pauci custodes communes, quòd non sufficiunt, & ideo in isto mandato, quod est circa custodiam vestium, tria dicuntur contra ista tria. Contra primum (ne a tinea lædantur.) Contra secundum (in vnum habeatis.) Contra tertium. (sub vno custode, vel duobus, vel quot sufficere possunt &c.)

Cap. CVIII.

ESt autem argumentum ex hoc manifestum, q̄ res communes monasterij siue ad vestitum, siue ad victum, siue ad alia quęcumque pertinentes sunt cum magna diligentia conseruandę, quantumcunque sint modicę Hinc est, quòd sicut supra dictum est, legitur in lib. collationum, quòd cum quidam frater in sua hebdomada lauaret legumina, & tria grana lenticulę per eius negligentiam cecidissent in terram collap̄sa de manu eius : quidā alius per-

pertransiens, & videns hoc denunciauit abbati :
& iudicatus quasi sacri peculij neglector suspensus
est ab oratione, nec aliter remissus est, nisi eū prius
publica pœnitentia diluisset. Hinc est etiam, quòd
dicit dominus Io. 6. Colligite fragmenta, ne pere-
ant. Hinc est iterum, quòd diues euangelicus pro-
pter micam mensæ suæ male custoditas, cum canes
illas comederent, & Lazarus non posset de eis ha-
bere, punitus est in inferno gutta aquæ negata.
Greg. Guttam petijt, qui micam negauit. ¶ Porro
multiplex est ratio, quare a religiosis, & maxime
cum sint pauperes, huiusmodi, licet modica dili-
genter seruanda sunt. Si enim diuites sæculi huius
male custodiunt; non oportet eos alias grauari quę
rendo, cum adhuc abundant: pauperes vero reli-
giosos, his perditis, oportet quærere ab alijs: &
quanto plus quęrunt, tanto plus eos grauant. Pau-
lus ne grauaret subditos, qui tenebantur ad stipen-
dia, laborabat manibus suis. sicut dicitur 1. Thessa.
4. Quanto magis tales elaborata ab alijs debent cu-
stodire, ne iterum grauent eos? Item apud sæcula-
res vt frequenter veteres vestes, & residua bono-
rum aliorum male expenduntur, apud religiosos
vero expenduntur in pauperes: Si ergo secundum
verbum Apostoli operandum est manibus proprijs,
ut habeat quis, unde tribuat necessitatem patienti-
bus: Eph. 4. quanto magis isti debent seruare dili-
genter, quę sunt futura pauperum? Item frequen-
ter ea, quę habent religiosi, sunt de necessitatibus
pauperum, quę sibi subtrahendo largiuntur eis dē:
Cum qua ergo conscientia possunt hæc negligenter
custodiri a seruis Dei, quę propter eos uitæ suæ
pauperes subtraxerunt? Quale fuisset si Helias pa-
nem paruulum, quem sibi dedit pauper uidua, de

suæ vitæ necessitate dimisisset perire? Non sic fecit, sed ipse, & ipsa, & domus eius comedit, & meritis eius, diuina virtute, in viduæ vsus farinula, & lechitus olei non defecerunt 3. Regum. 17. Item huiusmodi, quæ dantur religiosis pauperibus, dantur pro peccatis, & ideo sunt pretium animarum. Quale autem est, denarium, quod est animarum pretium non curare qualiter tractetur? 2. Regum. 23. dicitur de Dauid, quod noluit bibere periculum animarum, de aqua cisternæ de Bertheem sibi apportatæ. Quanto magis cauendum est Dei seruus, ne pretium animarum inutilius pereat apud eos? Item sicut personæ religiosæ sunt domino consecratæ; ita & bona, quæ eis dantur, domino consecrantur: res autem sacræ solent diligentius custodiri. Ideo dicitur in libro collationum de antiquis patribus. Omnia quæ sua sunt, credunt domino consecrata: propter quod, si quid fuerit in monasterio illatum, vt sacramentum, cum omni decernunt reuerentia debere tractari. Certum autem est, quod illud, quod sic tractatur, diligenter custoditur. Item sunt quidam Domini, qui non exigunt districtam rationem a suis ministris de bonis manibus eorum commissis, & ideo ministri eorum solent negligentius bona eorum custodire: Dominus autem non est talis, immo adeo requirit rationem districtam, quod ponit in carcere ministros suos, donec reddant nouissimum minutum, sicut dicitur. Luce. 12. Cum ergo religiosi sint non domini, sed ministri bonorum eius, cum quanta sollicitudine debent illa custodire, de quibus exigetur ratio tam districta? Attendant ergo religiosi pauperes, quod ea, quæ habet monasterium, data sunt eis tanquam pauperibus, & quod eis superfluit, est in pauperes

expendendum. Ipsi quoque qui largiuntur, interdum sunt pauperes, & quod data eis sunt animarum precium: Sunt etiam ipsa Deo consecrata: & quòd de eis oportebit districtam reddere rationē. Et ne pereant, aut inutiliter consumantur, vel ex aliqua negligentia deteriorescentur, vel in aliquo lædantur, custodiant diligenter.

Cap. CIX.

E*T sicut pascimini ex vno cellario, sic induamini ex vno vestiario.*

¶ Hoc est mandatum, quod traditur circa vestiū provisionem. Et tanguntur hic tria scilicet Substantia mandati, cum dicitur (inducamini) Modus implendi, cum dicitur (ex vno vestiario) Ratio mandati a simili tracta: cum dicitur (sicut pascimini ex vno cellario.)

¶ *Circa primum notandum*, quòd multa mala solent sequi ex negligentia prouidendi competenter religiosis in vestibus. Sequuntur enim ex hoc infirmitates corporum, quæ facile ex frigore contrahuntur, quas & interdum mors sequitur. Hinc est, quòd ille summus abbas postquam primi parentes facti sunt passibiles, & mortales: fecit eis (sicut dicitur. Genesis. 3. Tunicas pelliceas, quæ valent contra frigus, relinquens in hoc exemplum alijs abbatibus, vt suis subditis competenter prouideant in vestibus contra morbos, & mortes. Item vitia animorum scilicet contentiones, & murmura: cum conqueritur aliquis se dererius accepisse, quàm prius habuerat: & indignum se esse, quòd non ita vestitur, sicut alius frater vestiebatur: sicut dicit infra Augustinus. Item contemptus apud imperitos, qui
videntes

videntes pauperem in sordido habitu, non honorant eum, sicut vestitum decenter: sed contemnentes dicunt ei. Tu sta illic, aut sede sub scabello pedum meorum, sicut dicitur. Iacobi. 2. Et ex hoc confurgit, quòd minus decenter vestiti apud homines mundi, non habentes accessum, non possunt apud eos proficere, sicut expedit eorum saluti.

¶ Item honor religionis. Honorant enim multi vestimentum, vel speciem. Et ideo hoc videntes in religiosis, fugiunt eorum religionem, qui propter hoc potest dicere illud. Psal. Qui viderunt me foras, fugerunt a me. Item infamatio eiusdem. Exemplum. Cum diceret quidam coram quodam philosopho de duobus, quorum vnus erat pauper, alter diues, quòd essent amici. Dixit Philosophus. Cū ergo vnus pauper est, alter diues: amicus non est, qui fortunæ particeps non est. Item possunt dicere multi videntes istum bene vestitum, alterum male: quæ est ista fraternitas, quæ est apud istos, qui sic dissimiliter sunt vestiti? Item charitas sic male prouidentium in vestibus suis subditis superatur a natura: cui summa cura est de bene vestiendo omnia, quæ sunt sub cura eius. Non solum enim gressilibus dedit pedes, & volatilibus plumas, & natatilibus coria, sed etiam terræ nascentibus pulchrum colorem. Ideo dominus Matth. 6. Docet hoc considerare dicens. Considerate lilia agri: dico autem vobis, nec Salomon in omni gloria sua coopertus est, sicut vnum est istis. Quid potest paternæ cura ad hæc dicere, considerata naturæ diligentia erga suos? Propter ergo prædicta mala cauenda valde curandum est correctoribus religionum, quòd fratribus prouideatur in vestibus diligenter.

Cap. CX.

Circa secundum Notandum, quòd in quibusdam religionibus maxime possessiones habentibus, prouidetur canonicis hoc modo: videlicet quòd datur cuilibet certa summa pecunię, quolibet anno, de qua prouidet sibi in vestibus, sicut vult. Sed hoc est expresse contra regulam, quę dicit supra (distribuatur victus, & tegumentum, vel vestimentum, non æqualiter omnibus: quia non æqualiter valetis omnes.) Per huiusmodi modum equalitatis prouidetur plus, & minus indigenti. Præterea hoc vel est proprietas, vel saltem proprietatis species manifesta: quorum vtrumque cauendum est. Item per hoc datur interdum occasio expendendi, quod pro vestibus datur, in vsus alios præter Domini voluntatem, quod furtum reputatur, & adhuc remanet eadem indigentia vestium. Propter hoc alij hæc inconuenientia declinare volentes faciunt aliter, ordinantes, quòd illud, quod datur pro vestibus fratri, siue deintus, siue de foris, siue in panno, siue in pecunia, seruetur eidem sub communi custodia: ita tamen quòd alij nunquam detur. Sed hoc iterum est contra regulam: quę vult omnia esse communia. Et infra dicit expresse de huiusmodi, quòd in locum communem redactum cui necesse fuerit præbeatur. Præterea per hoc auferitur uiris sanctis illa confidentia de Deo, quę dicit eis non esse cogitandum de crastino, cum ipsis per hoc prouideatur vsque ad annum, uel magnum tempus certitudinaliter de uestibus per huiusmodi ordinationem: contra illud Matth. 7. Et de uestimento quid solliciti estis? Item hoc non caret

caret specie proprietatis: Ita enim proprietarius est ille, qui facit sibi aliquid ab alio illicite seruari: sicut ille, qui seruat apud se. Propter hoc alij reprobantes hos modos, tenent alium modum præcipue in pauperibus religionibus dantes licentiam singulis, ut sibi provideant tempore necessitatis querendo ab amicis, uel familiaribus: sed hoc uidetur iterum reprobandum: quia sequitur ex hoc multa inæqualitas: cum uidelicet unus habet à quo requirat, alter non: Vnus cum facilitate multa potest acquirere, alter non sine multa difficultate: Vnus inuenit, qui dat ei bonas uestes, alter non nisi uiles. Si autem apud seculares tantum curatur de æqualitate, quod abundantia diuitum debet supplere indigentias pauperum, secundum Apostolum 2. Cor. 8. ut fiat æqualitas, quanto magis uiris eiusdem professionis? Præterea ex huiusmodi ordinatione coguntur homines resumere curam sui, quam deposuerant contra illud Ber. Qui nobis semel curam uestri commisistis, quid iterum de uobis nos intro-mittitis? Item ex tali ordinatione minuitur meritum charitatis, quæ communia anteponens magis proficit: sicut dicitur infra (hic autem relictis pertinentibus ad commune, proprijs intenditur) Propter hoc istis tribus modis reprobatis, ordinandum est apud pauperes, quod ita quærat, quicquid quæritur pro uestibus, quod etiam in communi ponatur, quicquid datur, quicquid habetur pro uestibus, & ex uno uestiario provideatur omnibus, sicut dicit uir sanctus. Nec est diffidendum, quin bonis uiris modum istum magis sanctum seruantibus provideat ille, qui quærentibus iustitiam promittit. Mat. 6. non solum uictum, sed etiam uestitum.

¶ *Circa tertium notandum, quod uictus, & uestitus*

stitus habent simile aliquid: quia utrumque est necessitatis humanæ, propter quod Paulus coniungit ea dicens. 1. Tim. 6. Habentes alimenta, & quibus regamur, his contenti simus. Et eadem de causa Dominus iungit eadem in euangelio dicens Mat. 7. Ne solliciti sitis animæ vestræ, quid manducetis, neque corpori vestro, quid induamini. Et ideo bene adducit August. unum ad probandum alterum. dicens (sicut pascimini &c.)

Cap. CXI.

Sed cum probans debeat esse certius probato, relinquitur ex hoc pro certo, quod magis seruanda est communitas in uictu, quam in uestitu: cum hanc ostendit per illam. Quam reprehensibile est ergo in religione, quod aliqui procurant sibi singulares comestiones in pitantijs, & uinis, & huiusmodi in hospitij, in infirmitorio, quæ communiter non habentur, hoc est per quod prouisio conuentus negligitur. Exemplum. Fuit quædam abbatia, in qua de consuetudine reseruabatur quoddam bonum uinum pro conuentu usq; ad tempus, quo solebant uina corrumpi: Semel autem appropinquante tempore illo, uenit cellarius, & alij officiales ad abbatem, qui uir sanctus reputabatur, & dicunt ei: Domine abbas habemus graue debitum: nec uidemus, unde possumus soluere, nisi uendamus uinum istud. Quod audiens abbas, & compatiens conuentui dixit eis. Pro Deo uideatis diligenter, si habemus lanam, uel caseos, uel bladū, uel aliquid aliud, quod posset uendi: quia nimis graue erit conuentui subtrahere (qui multum sustinet laborem) recreationem, quam solent habere
de

de uino isto: At illi dixerunt, Satis deliberauimus, & cogitauimus super hoc: sed non inuenimus aliud consilium: Tunc abbas dixit: Venite cras ad capitulum, & ordinabimus de hoc aliquid: Ipsis ergo, & alijs præsentibus dicit Abbas conuentus necessitatem, quam habebant de vendendo vinum illud. Et inducens eos ad patientiam multis modis, inter alia subiunxit: Propter hoc magis sustinete patienter: quia promitto vobis bona fide: quia per totum istud tempus ego non bibam aliud vinum, nisi si quod vos bibetis, & præcipio in virtute obedientiæ cellario, & omnibus alijs officialibus, quòd nulus in domo, vel extra bibat nisi illud, quod bibit conuentus. Solutio ergo capitulo, cum aliquot dies bibissent cellarius, & alij officiales malum vinum conuentus, inceperunt conferre ad inuicem, si possent aliud inuenire, vnde debitum solueretur. Et inuenientes regressi ad abbatem dixerunt. Domine abbas, inuenimus tale, & tale consilium, per quod possumus soluere debita sine venditione vini illius: Quod audiens abbas dixit Deo gratias: bonum est consilium, fiat ita: Quis autem dubitet, quòd ex hoc negligatur prouisio conuentus: quia maiores habentes suas recreationes singulares extra conuentum, nec exemplo Domini mouentur, vt sint solliciti de turba conuentus, quid comedat, vel bibat? Item per hoc non solum negligitur conuentus: immo quod peius est, subtrahitur ei, quod suum erat futurum. Frequenter enim personæ deuotæ, quæ huiusmodi singularia conferunt personis singularibus, conferrent hæc, vel alia communitati: Sed non sufficit communi molendino ministrare aquam, quæ est ad proprium iam attracta; Et sic petit charitas, quæ communia proprijs anteponit.

Item

Item refectoryum relinquitur, sicut domus deserta, quæ est maledictio prædicta a Domino sup iudeos. Propter huiusmodi enim singularitates, & bonas refectiones, quas habent extra refectoryum, fugiunt refectorij durtiam, & vitæ communis: propter quod viri sancti amatores religionis dant operam omnem, vt etiam melius habeatur in refectorio, quam extra: vt per hoc attrahantur omnes, etiam imperfecti ad sequendam vitam communem: quia hoc sine dubio plus inducit multos ad hæc, quam possunt inducere admonitiones, vel mandata quæcumque. Exemplum dicitur, quod cuidam nobili abbatiæ quidam diues reliquit quandam optimam vineam hoc pacto, quod de vino illius non posset aliquis bibere extra refectoryum. Singulis autem annis cum istud vinum bibebatur in refectorio, illi, qui frequenter toto anno erant extra refectoryum, tunc temporis veniebant ad refectoryum, siue senes, siue debiles, siue etiam contracti cum pitantijs. Sic nimirum volatilia, & animalia cuncta libentius ad bona pascua congregantur, sicut tangitur. Apoc. 19. Item per hoc in loco communitatis magna inæqualitas consurgit: Cum alius esurit, alius ebrius est. Cuius contrarium faciendum ostendit Dominus in deserto: cum manna de cælo veniens æqualiter dedit minoribus, & maioribus. Rom. 11. Omnes eandem escam spiritualem manducauerunt, scilicet manna, tam Moyse, & alij maiores, quam alij minores. Item ex hoc scandalizantur infirmi, cum scilicet vident maiores, & qui deberent in dando exemplum durioris vitæ alios præcedere, sequi magis vitam delicatam, Contra quod dicit Apostolus. 1. Cor. 8. Si esca mea scandalizat fratrem meum, non manducabo carnes in æternum. Item ex hoc accidit,

accidit, quòd homines carnales, qui scilicet dati sunt ventri, spiritualibus preponuntur in domo Dei: cum isti delicate, illi dure tractantur: quod est contra iustitiam, cum isti indigni sint pane, secundum Augusti, illi vero digni sint angelorum cibo. Plus ergo debetur illis, quam istis: omnibus autem debita sunt reddenda secundum Apostolum Rom. 13. Propter hæc igitur mala non sunt tolerandæ huiusmodi procuraciones singulares in claustris, sed de vno communi cellario procurandi sunt omnes multo fortius, quam de vno communi vestiario vestiendi.

Cap. CXII.

S*I fieri potest: ad vos non pertineat, quòd vobis indumentum pro temporum congruentia proferatur: utrum hoc recipiat unusquisque, quod deposuerat, an aliud, quod alter habuerat: dum tamen unicuique, prout cuique opus fuerit, non negetur.*

¶ Hic incipit tradere mandata circa distributionem vestium, circa quam solent accidere duo ex parte recipientium: Vnum est imperfectionis: alterum iustæ reprehensionis. Primum est, quando quis non solum querit recipere, quod est necessitatis, sed querit varietatem secundum temporum congruentiam: vel contendit recipere, quod deposuerat, tanquam ius habens maius in illo: & circa hæc traditur hoc mandatum. Secundum est, cum contentiones, & murmurationes recipiendarum vestiũ orjuntur: Et circa hoc traditur sequens mandatum: ibi (Si autem hinc inter vos &c.) ¶ Et notandum circa primum mandatum, quòd non est prudentis facere mandata circa illa, quæ commode seruari non

non possunt propter infirmitatem humanam, pauci autem sunt illius fortitudinis, & perfectę virtutis, qui non habeant libenter alias vestes in frigore, & alias in calore: sicut concedit etiam beatus Benedictus in sua regula monachis: Et pauci sunt etiam, qui non refugiant alienas vestes propter alienas immundicias, quas magis abhominatur natura, quā proprias. Ideo non dicit simpliciter in isto mandato (ad vos non pertineat) sed pręmittit (si fieri potest) quasi dicat. Si humana fragilitas hoc permittit (ad vos non pertineat) idest ita vos habeatis, quasi ad vos non pertineret (quod vobis &c.) quasi dicat, non sit vobis curę de his, dummodo quod opus est, vobis conferatur.

Cap. CXIII.

HOC autem est perfectorum, qui in domo Dei non solum non curant de his, immo etiam quandoquē abiectiores vestes affectant. Ipsorum enim est nihil superfluum quærere, sed solum necessarijs, & minus quā necessarijs esse contentos. Et ideo dicitur 1. Timo. 6. Habentes alimenta, & quibus tegamur, his contenti simus. Item ipsorum est, non solum patienter sufferre paupertatem, sed & ipsam amare; propter quod dicuntur pauperes spiritu idest animo, qui ducuntur ab amore, & ideo diligunt vestium paupertatem. Ipsorum etiam est propter humilitatis, quam habent, perfectionem, non quærere honorem in domo Dei, sed abiectionem. Psal. Elegi abiectus esse in domo Dei: Huiusmodi autem abiectio maxime consistit in vestium humilitate: Item ipsorum est propter mala, quę de se sentiunt, indignos se reputare victu, & vestitu,

stitū, exemplo Iacob, qui dicit Domino Gen. 32. Minor sum cunctis miserationibus tuis: Et ideo cū gratiarum actione recipiunt, quantumcūquē modicum sit, quod eis confertur. Item ipsorum est, esse quasi continue in luctu in mundo isto, iuxta illud quod dictum est eis a Domino. Plorabitis, & flebitis vos; & ideo libenter habent vestes pauperes; quia luctui sunt aptæ. Exemplo Hester, de qua dicitur Hester 14. Fletibus, & luctui vestimēta apta suscepit. Item Christus ab initio ingressus sui in mundum pannis vilibus fuit indutus, Et beatus Martinus dyabolo sibi apparenti in habitu purpureo, & simulanti se Christum esse, dixit. Christū purpuratum non noui. Propter hoc ipsi respicientes ad exemplar suum, & nolentes esse maiores Domino suo, secundum verbum illius pauperes vestes diligunt, & abiectas. Item primus sanctus noui testamenti, scilicet sanctus Iohannes Baptista fuit indutus vilibus, quia, de pilis camelorum; similiter & vltimi scilicet Enoch, & Helias erunt induti vilibus: quia saccis: sicut dicitur Apoca. 11. Vt ergo medium non exeat ab extremis, & sint rectæ semitæ Dei nostri, decet, vt viri sancti, & perfecti medijs similiter sint induti. Licet ergo patres monasteriorum debeant habere curā diligentem de prouidendo fratribus competenter in vestitu: tamen ad perfectum subditum pertinet magis abiectas vestes diligere, quā nimiam curam de his habere pro se.

Cap. CXIIII.

SI autem hinc inter vos contentiones, & murmurationes oriuntur, cum conqueritur aliquis se deterius accepisse, quā prius habuerat, & indignum se esse,

esse, quòd non ita vestiatur; sicut alius frater vestiebatur: hinc vos probate, quantum vobis desit in illo interiori sancto habitu cordis, qui pro habitu corporis litigatis.

¶ Hoc est secundum mandatum, quod pertinet ad reprehensibilem circa vestium distributionem.

¶ Et nota primo, quòd contentiones, & murmura differunt: quia murmur, ut frequenter est circa maiores, contentio verò potest esse & ad maiores, & pares, & minores: Item murmur potest esse contra absentem, contentio verò solum cum præsente: Item murmur inducit contentionem, quasi sit eius origo, contentio verò est effectus. ¶ Item nota secundo, quòd duæ solent esse causæ huiusmodi viciorū ratione vestium: Vna, quando deterius providetur eidem vno tempore, quàm alio: Alia, cum deterius providetur vni, quàm alij, quæ duo notantur cum dicitur (Cum conqueritur aliquis &c.) Et cum iterum dicitur (Et indignum se esse &c.) ¶ Item notandum tertio, quod huiusmodi vitia non prohibet, quia sufficit, quòd sunt lege Dei prohibita: sed mandat, ut per hæc, cum oriuntur, veniat quis ad suam intrinsecam cognitionem, dicens (Hinc vos probate &c.) ¶ Circa primum dimisso vitio contentionis, quod pertinet ad litem, de qua dicitur infra, ubi dicitur (Lites autem nullas habeatis &c.) Dicendum est aliquid de vitio murmuris, quòd facile solet oriri in claustris contra facta, vel dicta maiorum:

¶ *Ad huius igitur detestationem, Sciendum est, quòd istud vitium specialiter reputatur esse contra Deum. Cum enim omnis potestas sit a Deo: sicut qui resistit potestati, Dei ordinationi resistit: secundum Apostolum Rom. 13. Ita qui murmurat contra eam,*

contra Deum dicitur murmurare. Gre. Qui contra super positam sibi potestatem murmurat: liquet, quod eum redarguit, qui eandem potestatem homini dedit. Et ideo dicunt Moyses & Aaron. Exo. 17. Non est murmur vestrum contra nos, sed contra Dominum. Item hoc peccatum filios Israel transeuntes per desertum exclusit a terra promissionis, licet eis promissa sit multotiens. Nu. 14. Omnes qui murmurastis contra me, non intrabitis in terram, super quam leuaui manum meam, ut habitare vos facerem. Sic etiam nunc excludit a regno cœlorum Gre. Regnum cœlorum nullus, qui murmurat accipit. Item hoc est peccatum, quod non solum in futuro, sed etiam in presenti Deus horribiliter punit, propter hoc enim Maria soror Moysi percussa est lepra Numeri. 12. Propter hoc ignis diuinitus accensus deuorauit extremam partem castrorum. Numeri. 11. Propter hoc Datham, & Abiron absorpti sunt a terra viuentes Num. 16. Propter hoc ignis egressus a Domino combussit. ccl. viros. In eodem. Propter hoc misit Dominus serpentes ignitos in populum, qui eos subito occidebant. Num. 22. Item adulatio, mendacium, & multa similia non sunt sui diffusiuia, Murmur autem valde sui diffusiuum est: quia sicut porco grinniente, alij idem incipiunt; ita murmur vnius facile facit alios murmurare. Ideo dicitur Num. 14. de illis, qui regressi de terra promissionis detraxerunt, quod murmurantes reuersi murmurare fecerunt contra Moysen omnem multitudinem. ¶ Item dicitur, quod cum quidam volens ingredi religionem, quæreretur a quodam viro sancto, quid esset ei faciendum, dixit ei. Tu, & asinus vnum estote; Asinus enim quando non habet, quid comedat, vel quando ei imponitur hoc, uel illud onus,

nihil

nihil reclamation, vel murmurat: ita & religiosus debet facere. Psal. Iumentum factus sum apud te. Per murmur ergo ponitur religiosus extra statum suū: Ideo dixit Abbas Pastor in vitis patrum. Qui quæ rulosus est, monachus non est: Ex quo patet, quòd murmur facit de monacho non monachum. Item dicit auctoritas, quòd hoc fuit proprium vicium iudæorum, in deserto, in quo grauitè, & frequenter offenderunt Deum, scilicet murmurando contra Moysen, & Aaron. Hoc ergo uitium in deserto religionis illos, qui deberent esse perfectissimi Christiani, transfert ad statum infidelium Iudæorum. Patet ex his, quàm detestabile sit uitium murmuris in claustris, cum hoc sit spiritualis Dei offensa, a qua summe debent cauere; exclusio a regno, ad quod summe debent suspirare; occasio grauis & subitæ uindictæ, quam etiam omnes debent timere ualde; corruptio sociorum, quæ ualde est periculosa in congregatione; mutatio status religiosi in statum alium, quod est ualde horribile; imitatio iudæorum, qui sunt a Domino reprobati: quod est miræ insipientiæ. Ideo dicit Ber. Nihil sic horrendum, ut murmur in congregatione.

¶ *Circa secundum notandum*, quòd Dominus melius facit alicui creaturæ suæ tempore vno, quàm alio: & in eadem specie melius interdum vni eiusdem speciei, quàm alij. Item natura quandoquæ plura producit vno tempore quam alio, & in rebus eiusdem generis plus interdum confert vni quàm alij. Vna enim arbor plures habet fructus vno anno, quàm alio interdum: & plures vna, quàm alia eiusdem generis: & sic de alijs. Item Domini mundi sic etiam faciunt suis: Interdum enim tempore caristiæ strictius prouident, quàm tempore abundantiae,

dantiæ, & etiã strictius alijs, quàm alijs. Quanta ergo abusus est, quòd religiosus requirat, quòd ita fiat sibi semper, sicut aliquando sibi factum est: vel sicut fit alijs, & nisi hoc fiat, murmurat, & contendit: cum nec Deus, nec natura, nec homines mundi hoc faciant illis, quibus habent prouidere? Nunquid non licet patrifamilias interdum facere, quod vult? Vbi est apud istos illa scientia Apostolica, qua sciunt abundare, & penuriam pati pro tempore? Nunquid est contra viscera pietatis, quod mater ostendat interdum plus dilectionis vni filiorum, quàm alijs: & eidem vno tempore, quàm alio, causis varijs emergentibus? ¶ Non est ergo rationabile, quòd contendat aliquis, vel murmuret, si deterius accipit interdum vno tempore, quàm alio, vel deterius, quàm alius: sed est defectus virtutis, ad quòd cognoscendum inducit Vir sanctus, cum dicit. (hinc vos probate.)

Cap. CXV.

Circà hoc, nota, quòd est quartum notandum, quòd sunt aliqui magis curiosi de exterioribus, maiorem interdum dant operam ad sciendum defectum solis, & lunæ, quàm ad cognoscendum defectus animarum suarum. Aug. Per ipsam superbiam recedentes a te, & a tanto lumine tuo deficientes defectus solis multo tempore ante prauident, & defectum suum in presenti positum non vident. Non autem sic faciunt viri sancti: sed cura est eis multa de cognoscendo defectus suos. Vnde rogat Dauid dicens ut sciam, quid desit mihi. Et hoc est utile valde. Pater enim familias cum nescit, quid desit in domo sua, siue vinum, siue bladum, non cogitat

cogitat de habendo, cum autem scit, est sollicitus de procurando. ¶ Porro intrinseca hominis perpenduntur per extrinseca, hæc enim sunt, quæ annunciant de homine. Murmur ergo, & contentio exterior indicant uacuitatem intrinsecam, sicut resonantia dolum: Item defectum unctionis intrinsece, sicut rota carri murmurantis. Propter quod dicitur econtrario de martyribus. Non murmur resonat, non querimonia, & hoc quia fuerunt pleni gratia, & uncti spiritu sancto. Huiusmodi uero gratiæ spirituales, quæ large loquendo, quæcunq; sint, uocantur uirtutes, dicuntur habitus interior animæ triplici de causa. Cooperiunt enim turpitudinem peccatorum: sicut uestis operit turpia hominis. Psal. Et quorum tecta sunt peccata, scilicet per uirtutes infusas cum remissione peccatorum. Item ornant sicut uestis. Greg. Ornamenta cælorum sunt uirtutes prædicantium. Item calefaciunt sicut uestis Iob. 32. Nonne uestimenta tua calida sunt, cum perflata fuerint austro. Murmurans ergo & contendens de habitu corporis potest ex hoc perpendere defectum interioris habitus se habere: quia numquam sic murmuraret, nisi defectum interioris uirtutis haberet. Dicitur Esa. 53. de Christo propter patientiam eius, quod sicut agnus coram tondente se obmutuit, & non aperuit os suum, cum uidelicet auferentes ei uestes spoliauerunt eum. Cuiusmodi ergo patientiam habet, qui non ex eo, quod auferuntur, sed ex eo, quod non sibi pro sua uoluntate dantur, murmurat? Ipse Dominus uoluit adeo suos deponere curam carnis, quod noluit eos esse sollicitos etiam de uestibus. Mat. 6. Et de uestimentis quid solliciti estis? Quomodo obsecro carent huiusmodi sollicitudine, qui non cauent pro uesti-

bus murmurare? Item secundum Ber. Verus humilis non uult humilis prædicari, sed uilis reputari: Quomodo ergo habent ueram humilitatem, qui refugiunt malas, & pro bonis uestibus contendunt? Et hoc idem patet in multis alijs uirtutibus. Constat igitur, quòd murmur prædictum indicium est manifestum defectus uirtutum. Et ideo benedicit (hinc uos probate,) idest ex tali mumure, quãtum uobis desit, in illo interiore sancto habitu cordis, idest in uirtutibus intrinsecis, qui pro habitu corporis litigatis.

T Amen si uestra toleratur infirmitas, ut hoc recipiatis; quod posueritis in unum, tamen locũ sub communibus custodibus habete, quod ponitis: ita sane, ut nullus sibi aliquid operetur: sed omnia opera uestra in unum fiant maiori studio, & frequentiori alacritate, quã si uobis singuli propria faceretis. Charitas enim, de qua scriptum est, quòd non querit, qua sua sunt, sic intelligitur: quia communia proprijs; non propria communibus anteponebat. Et ideo quanto amplius rem communem, quam propria uestra curaueritis, tanto uos amplius proficere noueritis: ut in omnibus, in quibus utitur transitoria necessitas, superemineat qua permanet charitas.

¶ Hic tradit mandatum circa uestium operationem, quia uero posset credi, quòd sicut toleratur interdũ, quòd aliquis recipiat uestes proprias, quas deposuit, non quas alius deposuit: ita proprium locum posset quis habere, in quo reponeret eas, uel faceret reponi, quod nequaquam est faciendum: Ideo dicit, quòd si, & hoc toleretur: illud tamen non est tolerandum, sed uno tantum loco sunt uestes omnium reponendę: & in communi omnia operandã.

randā. Secundo dicit, qualiter huiusmodi opera communia faciendā : ibi (maiori studio. &c.) Tertiō reddit causam illius modi, probans illum modum per auctoritatem. ibi (Charitas enim) & per rationem. ibi (& ideo &c.) Et sic patet, quod in hoc mandato tria tanguntur, scilicet substantia mādati, & modus exequendi, & causa modi illius.

Cap. CXVI.

NOtandum autem, quod ex hoc quod dicit (uestra toleratur infirmitas) elicitur argumentum, quod infirmitas fratrum est toleranda : siue ipsi propter infirmitatem in aliquibus. Hinc est quod Apostolus dicit Rom. 15. Debemus nos firmiores imbecillitatem infirmorum sustinere : sicut scilicet columnæ fortiores supportant cætera infirma domus. Hinc est etiam, quod dicit Bern. Tu, qui in congregatione uiuis, bene uiuis, si uiuis socialiter, & post socialiter discas non solum patienter, sed & libens infirmitates aliorum portare, tam morum, quàm corporum. Hinc est iterum, quod dicit Dominus de seipso Osee 11. Ego quasi nutrix eius Effraim portabam eos in brachijs meis. Sicut enim nutrix paruulum, qui facit ei multa tædia, & grauamina, non proijcit, sed sustinet omnia eius amore deuicta : ita facit Dominus de nobis, & suo exemplo docet nos ita de infirmis alijs faciendum. Quid possunt ad hæc respondere illi, qui fratres onerosos propter infirmitates, uel mores aliquos graues non cessant uentilare procurando crudeliter expulsionem eorum de domo in domum ? Isti sunt, de quibus dicitur Ezech. 34. Cornibus uestris uentilabatis omnia pecora infirma. Isti, qui sic onus fratrum

fratrum proijciunt, quomodo obsecro implent legem Christi, de qua scriptum est Gal.6. Alter alterius onera portate, & sic adimplebitis legem Christi? Item si pes unus infirmatur, nonne alius portat eum? Si & quodcumque membrum propter infirmitate graue est alijs: nunquid propter hoc proijciunt eum alia membra, & non magis iuuant, & supportant? Si autem in membris constituentibus unum corpus per naturam hoc fit: quanto magis debet fieri in membris constituentibus unum corpus per gratiam? ¶ Exemplum. Fuit Parisijs quidam ciuis diues, qui tenebat secum capellanium quendam propter Deum: Cum autem esset grauis moribus omnibus de domo: semel vxor cum filijs, & alia tota familia conuenerunt, & rogabant Dominum, vt expelleret eum de Domo. Cum autem quaereret causam, quare hoc petebant, dixerunt: Domine adeo grauis est iste homo, quod nullus potest eum portare: Tunc ille dixit, si ita est, ergo si expellerem eum, moreretur fame: quia nullum inueniret, qui portaret eum; & ideo volo eum sustinere, ne moriatur fame. Si autem sic fecit homo secularis de tolerando extraneo; quid faciendum est viro spirituali de fratre proprio? ¶ Exemplum. Quidam prior prouincialis in ordine fratrum praedicatorum vir totius sanctitatis, & perfectionis quando inueniebat aliquem fratrem valde onerosum in aliquo conuentu, & ex causis aliquibus expediebat eum transferri ad alium conuentum, recogitabat quos priores conuentuales habebat, qui essent multum viri spirituales, & charitatiui, & ad aliquem illorum mittebatur eum, insinuans, quod talem fratrem mittebat ei, cum quo multum posset lucrari exercendo suam patientiam, & alias multas virtutes

virtutes circa eum: Vnde tanquam spirituali amico mittebat eum sibi pro magno encamio, ut multum super hoc deberet gaudere, & ei gratias multas reddere. Item uidi ego priorem quendam conuentualem, qui nunquam rogauit priorem prouincialem, uel alios maiores suos pro remouendo aliquem fratrem onerosum de domo sua, licet multos haberet tales. Immo cum ad fratrum suorum instantiam uellet prouincialis aliquem fratrem talē de suo conuentu remouere, compatiens illi fratri dedit operam, ut dimitteret eum, aestimans quod ipse, qui iam eum plenius nouerat, melius sciret eum portare, quā alij multi. Proinde patet, quod bonorum uirorum est supportare inuicem infirmitates mutuas, quod licet fiat, tamen peccata, uel ea, quæ sunt in damnum religionis, nunquam sunt sustinenda. Vnde Apoc. 2. dicitur in laudem Angeli Ephesi. Non potest sustinere malos, non dicit onerosos: quia si sint onera mutua sustinenda: tamen maliciæ nunquam. Et ideo bene dicit uir sanctus (Si uestra toleratur infirmitas) ut hoc recipiatis, quod posueritis, quod scilicet est humanæ fragilitatis: non tamen est tolerandum, quod sequestratim uestes deponantur: uel singulariter sibi quisquē circa hæc faciat aliquid operari: quia huiusmodi singularitas nimis derogaret bono charitatis in quo maxime consistit religio, & hoc est, quod dicit (in unum tamen locum &c.)

Cap. CXVII.

ET notandum circa hoc, quod reperiuntur interdum aliqui religiosi, qui ad opera communia modo sunt impotentes, modo negligentes, modo

do querulosi, & tristes, ad propria uero fortes, & diligentes, & lati, hoc est, quod in loco commun-
 nitatis singularitatem inducit; singularitatis enim
 est talia sectari Ber. Singularis ad omnia sua est stre-
 nuus, ad communia piger. Hoc est, quod seruos
 Dei præparat ad periculosa tempora Antichristi,
 de quibus dicitur. 1. Tim. 4. In nouissimis diebus
 instabunt tempora periculosa, & erunt homines se-
 ipsos amantes; ex huiusmodi enim amore priuato
 procedunt ista. Hoc est, quod charitatem, de qua
 summe curandum est, destruit. Amor enim reci-
 procus non est charitatis Greg. Nemo proprie ad se
 habere charitatem dicitur, sed dilectio semper in
 alterum tendit, ut charitas esse possit. Hoc est ite-
 rum, quod naturæ contrariatur, ipsa enim omnia
 producit ad utilitatem cōmunem. Tullius de offi.
 Præclare scriptum est a Platone. Non nobis soli na-
 ti sumus, & post in hoc deberemus naturam sequi
 ducem, & communes utilitates in medium profer-
 re. Item hoc est, quod poeticæ sententiæ aduersa-
 tur Senecæ. Non potest quispiam bene uiuere, qui
 se intuetur, qui omnia ad suas utilitates conuertit:
 Alteri uiuas oportet, si tibi uis uiuere. Item do-
 ctrinæ sanctorum repugnat: Nam dicit Gre. in regi-
 stro. Nemo nostrum, neglecta utilitate communi,
 sub lucro prospiciat. Et Ambrosius. Qui perfecte sa-
 pit, nescit sua spectare cōmoda: sed ad illud, quod
 honestum est, toto affectu intendit: quærens non
 quod sibi utile est, sed omnibus. Et Ber. Dominus
 communi disciplina, communi uita, communibus
 studijs delectatur, usq; quo miser diuerticula cap-
 tas? Item hoc est contra mandata Apostolica, im-
 mo contra mandata principum Apostolorum. Di-
 cit enim Paulus ad Philipens. 2. Non quæ sua sunt
 singuli

singuli considerantes, sed quæ aliorum. 1. Pet. 4. dicitur. Vnusquisquē sicut accepit gratiam, in alterutrum illā ad ministrantes. Item hoc est, quod facit a christi vestigijs deuiare; propter quod e contrario dicit Chris. Imitatores fieri Christi est, ad communem vtilitatem omnia negociantes, & non quæ sunt nostra quærentes. Item hoc est, quod ipsum hominem reddit sibi inutilem. Ambrosius Nil iudicandum utile, nisi quod in commune proficit. Et post. Mihi crede: nou uidetur, qui inutilis est omnibus, sibi utilis esse posse. Item hoc est, quod religionem destruit: Quantæ enim abbatix sunt, & temporaliter, & spiritualiter destructæ: quia relictis communibus bonis, uacauerunt multi suis proprijs commodis? Et ideo bene dicitur in. Psal. Singularis ferus depastus est eam; id est uineam domini: quia huiusmodi singularitates religionem destruunt. Propterea ex aduerso dicit Tullius. Præceptum est Platonis, ut qui rei publicæ prodesse uolunt, ad utilitatem ciuium sic uehantur: ut quæcumquē agunt, ad eam referant obliti commodorum suorum. Quia ergo tot mala sequuntur in religione, cum relictis communibus singuli uacant proprijs; bene dicit uir sanctus. Ut omnia in unum fiant studiosius, & alacrius, quàm propria: quia hoc requirit charitas, & cedit ad profectum maiorem. Si enim multum meretur charitas uni seruens, quanto magis qui seruit multitudini magnæ?

Consequens ergo est, ut etiam, cum quis filijs suis, aut aliqua necessitate ad se pertinentibus in monasterio constitutis aliquam contulerit vestem: siue quodlibet aliud inter necessaria deputandum: non occulte accipiatur; sed sit in potestate prepositi, ut in

rem communem redactum, cui necesse fuerit, præbeatur, quòd si aliquis rem sibi collatam cœlauerit, furti iudicio condemnatur.

¶ Secundum distinctionem supra positam, tradit hic mandatum circa collatorum uestium receptionem. ¶ Et notandum, quòd sicut omnia opera circa uestes debent fieri in communi: ita & uestes collatæ debent poni in communi: Et ideo infert a simili dicens (Consequens ergo est &c.) Et hæc est ratio mandati, quæ primo ponitur. Secundo ponitur ipsum mandatum continens tria, scilicet quid cauendum in recipiendo; scilicet occultatio; Et ideo dicit. (Non occulte.) & cætera. Quid faciendum de receptis, scilicet quia ponenda in præpositi potestate; & ideo dicit (sed sit &c.) Quare faciendum sit: & ideo dicit (ut in rem communem redactum) Tertio ponitur pœna transgressionis huius mandati, cum dicitur. (quòd si aliquis) Porro utilitas mandati consistit in tribus. Vnum est, quòd quicquid religioso alicui obuenit, in cõmuni ponatur, Aliud est, quòd positum in communi, non cuiquẽ, sed cui necesse fuerit, præbeatur: Tertium, quòd celandes, quæ sibi collata sunt, ut fures puniendi sunt.

Cap. CXVIII.

Circa primum notandum, quòd illud requirit fraternitas spiritualis. Aug. Melior est fraternitas Christi fraternitate sanguinis: Illa enim inter se communia diuidit cum æmulatione: Hæc autem sua communicat cum gratulatione. Item hoc requirunt iura, quæ uolunt, quòd quicquid acquirit religiosus, quod ei debetur, uel alio modo quocunque obuenit ei, totum cedat in ius communitalis.

tis. Item natura hoc monstrat in quibusdam animalibus uiuentibus in communi, ut sunt formicæ, quæ quicquid elaborant in granis colligendis, totum ponunt in communi. Item ad hoc faciendum confortat nos Chrys. in sermone dicens. Omne, quod nostrum est, tunc nostrum magis erit, si sit nobis commune cum fratribus. Item dicit Amb. super Lucam. Volatilibus cœli id circo sine labore pabulis usus exuberat, quod fructus ad communem escam speciali sibi quodam nesciunt uendicare dominatu. Quod si sic est de uictu, eadem ratione est simile de uestitu: cum de utroquē illorum similiter Euangelium loquatur. Ex quo patet, quod ex huiusmodi communicatione sequitur etiam temporalis abundantia, Item dicit Seneca. In hoc gaudeo aliquid discere, ut doceam: nec me res ulla delectabit, licet sit eximia, & salutaris, quam mihi uni sciturus sum. Ideo si laudabilius uidetur in philosopho rem quamcunquē communicare, quàm sibi retinere, sicut scientiam, quanto magis in religioso?

Cap. CXIX.

Circa secundum notandum, quod sunt quidam, qui dispensando bona communia, non attendunt interdum indigentias fratrum, sed personas, dum conferunt illis, qui non indigent, & indigentes relinquunt inanes. Contra illam dispensationē dicitur. Esurientes impleuit bonis, & diuites dimisit inanes. Isti sunt, sicut hortulanus, qui terram aquosam rigat, & aridam dimittit. Quo contra dicitur Esa. 35. Et erit arida in stagnum: & sitiens in fontes aquarum. Isti sunt, sicut medicus, qui ualentibus

lentibus confert medicinam, & relinquit male habentes, contra quod dicitur Ezech. 34. Quod contractum fuerat alligabo, & quod infirmum consolidabo. Sunt etiam isti sicut ille, qui super faciem poneret vestem, quæ non indiget, & posteriora, quæ indigent, nuda dimitteret, contra quod dicitur 1. Cor. 12. Quæ putamus ignobiliora esse membra corporis, his honorem abundantiorum circumdamus, non est illud opus misericordiæ, quæ miseras respicit; & ideo dicitur misericordia quasi miseris dans; & ideo in disceptatione de operibus misericordiæ non dicitur. Saturatus fui, & non dedisti michi manducare: vestitus fui, & non operuisti me, & sic de alijs. Matth. 25. Item non est hoc officium charitatis, ipsius enim est curare ad necessitates fraternas. Vnde 1. Iohan. 3. Qui habuerit substantiam mundi, & viderit fratrem suum necesse habere, & clausit uiscera sua ab eo: quomodo charitas Dei manet in eo? Item non est istud fidelitatis; quomodo enim esset fidelis dispensator hospitalis, qui egenis neglectis, bona hospitalis ipsius in suis familiaribus large expenderet? Sic faciebat Iudas, qui bona egenorum asportabat, & expendebat in suos. Cum ergo religio sit hospitalis Dei, quomodo ab infidelitate possunt se excusare, qui similia faciunt in ea. Ber. Vbi nec necessitas, nec utilitas est, non fidelis est dispensatio.

Cap. CXX.

Circa tertium notandum, quod res collata dicitur celari tribus modis. Vno modo, cum ponitur in aliquo loco occulto animo occultandi: Qui autem sic faciunt, sunt sicut coruus, qui ponit
dena-

denarium, vel alias res interdum in loco occulto ad cælandum. Alio modo quando quæritur res, & non propalatur: sicut Rachel fecit Gen. 31. Quæ scrutanti patri suo Laban cælauit idola sua. Alio modo, quando tempore opportuno, seu debito non ostenditur: sicut dicitur fur, non solum qui rem surripuit, sed etiam qui furtum non manifestat tempore opportuno. Ita non dicitur solum cælare rem receptam, qui ponit in occulto, & qui non prodit quærenti; sed etiam qui non reuelat tempore scrutiniij in religione, vel si morose detinet, & non ostendat, cui est ostendenda. Verum si quis religiosus rem collatam accipiat sine licentia: sed tamen proposito ostendendi, & petendi licentiam si ne mora; quamuis non sit hoc sine culpa, non est tamen dicendum propter hoc solum cælare rem collatam, nisi aliquod de tribus prædictis interueniat.

¶ Porro religiosus, qui rem collatam cælat, iuste dicitur fur; quia rem non suam, sed communis, & inuito Domino scilicet illo, ad quem pertinet dispensatio, cum de eius rati habitatione non presumitur, pertractat occultè; quæ tria constituere solent furtum proprie acceptum, & ideo est puniendus. ¶ Et sciendum, quod triplici pœna puniendus est fur secundum scripturam: Vna est confusio, & hoc quo ad animam, cuius est verecundia. Eccl. 5. Super furem confusio: Alia est redditio rei furatæ. Exod. 22. Quod si furto ablatum fuerit, restituet damnum Domino: Tertia punitio corporalis. Iosue. 7. Non ero vobiscum, donec conteratis eum, qui huius sceleris reus est.

Cap. CXXI.

Indumenta vestra secundum arbitrium præpositi lauentur, siue a vobis, siue a fullonibus; ne interiores animæ sordes contrahat munda vestis nimius appetitus.

¶ Hoc est septimum, & vltimum mandatum circa vestium necessitatem, scilicet de lotione earum, de qua quidam sub specie sanctitatis possent nimis curare, ideo tradit mandatum præsens continens tria circa lotionem vestium. Vnum est, quòd lauentur, cum dicit (Indumenta vestra) Aliud a quo lauentur, cum dicit (siue a vobis, siue a fullonibus.) Tertium quando lauentur, cum dicit (secundum arbitrium præpositi) & addit causam dicens (ne interiores animæ sordes &c.)

¶ Circa primum nota, quòd non solum spiritualis, sed etiam carnalis mundicia placet Deo Exo. 23. Ipsi lauent vestimenta sua, & sint parati in diem tertium. Item homines quodammodo naturaliter horrent sordes in cohabitantibus: propter quod personarum acceptores pauperi introeunti ad se in sordido habitu dicunt illud Iaco. 2. Tu sta illic. Item sicut nimius splendor in veste sapit vitium: ita & sordes. Vnde Seneca. Non splendeat toga, nec sordeat. Cum ergo religiosi frequenter astare habeant coram Domino: & continue cum alijs conuersando, & ad cauendum vitiosa, inuigilare: curandum est eis de vestium mundicia, & propter Deum, & propter semetipsos, ne vitium incurrant. propter quod bene dicitur eis (Indumenta vestra lauent) Sed quia sunt aliqui, qui dedignantur hoc facere in propria persona: addit (siue a fullonibus) conde-

condescendendo infirmitati eorum. A vobis vero dicit: quia potius a fratribus est faciendā semper, vel saltem frequenter. Et hoc tribus de causis. Primo propter vitandum infirmorum scandalum, interdam enim in vestibus maxime, quæ carni adherent inveniuntur immundiciæ, etiam quæ accidunt sanctis in somnis, quasi res pudentiæ sæcularibus, & maxime semper mulieribus. Religiosorum est enim tanquam perfectorum cauere etiam a licitis propter scandalum infirmorum. Secundo propter maius præmium: Meritum enim surgit ex opere proprio, non alieno: quia vnusquisque propriam mercedem accipiet, secundum suum laborem: secundum Apostolum. Tertio propter humilitatis exemplum, vt sanctus Martinus etiam famulo seruebat. Hinc est etiam, quòd in religionibus approbatis, ipsimet lauant scutellas, pedes, capita: nec per extraneos permittunt ista fieri. Noui ego quendam, qui in sæculo magnæ fuit auctoritatis, & vanitatis, qui factus frater, obseruata hora, & accepta aqua, ibat per cameras mundans sedes deturpatas. Quid autem mirum si hoc faciunt homines Deum timentes, cum ipse filius Dei lauit pedes discipulorum? Non debent ergo aliqui dedignari in religione, si imponitur eis, vt lauent indumenta. Et si aliquando per fullones ista fiant: tamen per lotrices mulieres nunquam est faciendum.

Cap. CXXII.

L Auacrum etiam corpori, cum infirmitatis necessitas cogit, minime denegetur.

Traditis mandatis circa vestium necessitatem, tradit mandatum circa necessitatem infirmitatum:

Sunt autem quattuor, quibus interdum indigent infirmi; Vnum est balneum, circa quod hic tradit mandatum, continuans lauacrum corporis cum lauacro vestium: Aliud est medicina, circa quod tradit secundum mandatum: ibi (fiat sine murmure) Aliud est itineratio, quam oportet interdum ad balnea, vel ad alia loca subire, occasione infirmitatis, circa quod tradit mandatum: ibi (Nec eant ad balnea) Aliud est prouisor, qui de eis curam gerit sollicitam: circa quod tradit quartum mandatum: ibi (Ægrotantium cura &c.) ¶ Nota, quòd quidam religiosi nunquam, vtuntur balneis pro quacunque necessitate. Tum quia reputant hoc femineum, Exo. 20. de Pharaonis filia; Tum quia reputant nimis verecundum: cum non possit fieri sine denudatione; pudicæ vero mentes sic erubescunt huiusmodi nuditatem, quòd non solum coram alijs: sed nec etiam soli possunt eam sustinere; propter quod religiosi iacent vestiti: Tum quia reputant hoc pœnitentiæ posteritati Adæ impositæ contrarium, non est improbandum, sed venerandum, præcipue cum Hiero. de illustribus viris, in laudem magnam beati Iacobi dicit, quòd nunquam balneis fuit vsus. Verum beatus Augustinus, sicut beatus Benedictus humanius agens, non prohibet balnea, sed concedit: tamen cum multo temperamento, quia non propter lasciuiam: nec vt abstergantur sordes; sed propter infirmitatem. Ideo dicit (cum infirmitatis necessitas cogit minime denegetur) innuens, quòd non concedatur nisi pro sola infirmitate, & quæ adeo sit grauis, quòd cogat: & vsque ad petitionē infirmi, vel medici potest differri.

¶ *Quare medicinalia, & qualiter sint ministranda religiosis.*

Cap. CXXIII.

Fiat sine murmure de consilio medicina, usque medicus consulatur.

¶ Hoc est secundum mandatum penes necessitates infirmitatum, quod tradit circa medicinalia. quod continet tria: Mandat enim, quod prouideatur infirmis de medicinalibus, scilicet quando ars medicinæ hoc consulit: ideo dicit (Fiat de consilio medicinæ) Item qualiter, ideo dicit (sine murmure) Item quomodo diuersimode circa diuersos est habendum, & hoc est quod dicit (ita quod etiam si nolit &c.) ¶ Nota, quod quidam religiosi ex magno sanctitatis feruore non curant uti medicinalibus, reputantes carnalitatem, & imitari volentes beatam Agatham, quæ dixit. Medicinam carnalem nunquam corpori meo exhibui: sed non sunt ideo reprobandi, qui utuntur. Ezechias usus est medicina scilicet Esa. Prophe. 38. cap. Item Tobias de consilio angeli 10. ca. Item Eccl. 38. Altissimus creauit de terra medicinam. Sunt autem tria, quæ incitant ad subueniendum fratri in medicinalibus: Primum est natura compassionis; Si vnum membrum patitur, compatiuntur ei cætera membra: Secundum, communis vtilitas, quæ impeditur durante infirmitate: Tertium mercedis expectatio. Mat. 25. Infirmus fui, & visitastis me; quanto magis gratum habet, si prouideatur factò? ¶ Nota etiã, quod infirmitas est occasio humanæ fragilitatis facile murmurandi de ipsa infirmitate: & cum super infirmitatem additur defectus remediorum, facilius murmurat. Et ideo boni prælati est liberaliter prouidere infirmis, etiam si alia causa non esset, ut

auferatur ab eis causa murmurandi: Exemplo Moyſi qui rogauit Dominum, vt daret aliquam aquam miraculoſe filijs Iſrael, vt vel ſic ceſſarent a murmure. Num. 20. Item ſunt aliqui prælati, qui & ſi interdū hoc faciant: tamen faciunt cum difficultate, & triſtitia, & quaſi murmurando, & ſic multum diminitur de merito ſuo: quia hilarem datorem diligit Deus. Et ideo vir ſanctus volens omne murmur excludere: dicit (fiat ſine murmure) ſcilicet ægrotantium, miniſtrantium, & aſſiſtentium. ¶ Nota etiā, quòd aliqui præ ſeruore ſanctitatis contemnunt medicinalia: aliqui nimis curant: aliqui vero frequenter allegant ſe inſirmos, primi ſunt compellendi, cū eis expedit: ideo dicit (ita vt etiam ſi nolit &c.) Secundi non ſunt audiendi, cum eis non expedit: ideo dicit (Si autem velit &c.) Tertijs in parte eſt credendum de infirmitate, in parte non ſcilicet de medicinalibus: ſed medicus eſt conſulendus. Ideo dicit (denique ſi latens eſt.) ¶ Nota etiam circa primos, quòd qui nimis volunt ieiuare, & refugiunt recreationes, ſiue medicinas, & huiusmodi, non eſt eis acquieſcendum: Primo ne religioſus, qui propriæ voluntati renunciavit, in ea nutriatur, quia ex hoc ſolet conſundi religio. Prouer. 29. Puer, qui dimittitur voluntati ſuæ, confundit matrem ſuam ſcilicet religionem, in qua quilibet debet eſſe puer ſub virga diſciplinæ. Secundo ne iumentum corporis ſui, quod non ſolum ſuo, ſed communis ſeruitio deputatum eſt, inutile reddatur. Pſal. Fortitudinem meam ad te cuſtodiam. Hiero. De rapina holocauſtum offert, qui vel ciborum nimia egeſtate, vel ſomni penuria corpus immoderate affligit. Tertia ne inducatur ſingularitas ad religionē, quæ ipſam deuiaſtat Pſal. Singularis, ſerus, depaſtus eſt

est eam. Quarto ne cura corporis, quæ tradita est alij, auferatur, cum vult religiosus corpus suum regere secundum voluntatem suam. Bern. Qui vestri curam semel nobis commisistis: quid rursus de vobis intromittitis? Quinto ratione superbiæ, quæ oriri solet ex his? vt patet in pharisæo, qui ieiunauit bis in sabbatho, & reputauit se maiorem publicano. Ber. Quæ maior superbia, quam vt homo toti congregationi iudicium præferat, tanquàm ipse solus spiritum Dei habeat. Sexto quia huiusmodi sacrificium minus acceptum est Deo. Ber. Si in die ieiunij inuenitur voluntas vestra, non tale ieiunium elegit sponfus; nec sapit illi ieiunium, quod non liliū obedientiæ, sed vitium propriæ voluntatis facit. Econuerso cum prælati sint patres, medici, & rectores subditorum, non debent satisfacere eis in carnalibus, cum non expediat; prohibitum est enim homini ne curam carnis propriæ faciat in desiderijs. Et secundum August. Plus debet diligere quilibet animam proximi, quàm carnem: Sed carnalia desideria sunt contra animam: igitur &c. Bene ergo dicit, quòd si velit aliqua medicinalia, & non expediunt, suæ cupiditati non obediatur. Aliquando enim, etiam si noceat, prodesse creditur, quod delectat, vt patet de pomo, quod Eua comedit, de edulio lentis Esau, de escapiscis in hamo, de vino splendente in vitro. Nec etiam omni spiritui credendum est de infirmitate. Et ideo bene debet (famulo Dei dicenti, quid sibi doleat.) Nam sunt quidam, qui ex his, quæ in eis videntur, apparent veri serui Dei. Sicut dicitur de Simpliciano, qui apparebat Augustino verus seruus Dei, & lucebat in eo gratia diuina. Signa seruorum Dei sunt seruire Deo die ac nocte, voluntarie, humili-

ter, & deuote obedire prælato in his, quæ nõ sunt contra Deum, vel regulam; quærere bonum commune, & non priuatum, ædificare proximum verbo, & exemplo. Tali famulo Dei dicenti, quid sibi doleat, sine dubitatione credatur.

- 211170

Cap. CXXIIII.

NEc eant ad balnea; siue quocunque ire necesse fuerit, minus quam duo, vel tres. Et ille, qui habet aliquo eundi necessitatem, cum quibus præpositus iusserit, ire debet.

¶ Hoc est tertium mandatum, quod tradit circa itinerantes, quod interdum requirunt aliquæ infirmitates, & huius occasione ampliat mandatum ad omnem itjnerationem, quacunque necessitate fiat. Sunt autem hic duo mandata. Primum est circa societatem in via habendam semper. Secundum est circa modum habendi socium: ibi (Et ille) De primo multa sunt dicta circa hoc mandatum (Quando proceditis.) ¶ Sed nunc quæritur, vtrum prælatus possit dare licentiam eundi solitarie? R. quod ex causa rationabili, licet hoc raro, & non sine magna causa faciendum. Nam decretalis Inno. dicit, quod abbas non potest dispensare in voto paupertatis abdicatæ, sicut nec in voto continentiae: quia sunt de substantia ordinis. Ex hoc habetur argumentum a contrario sensu, quod in his, quæ non sunt de substantia ordinis, potest dispensare, & tale est illud. ¶ Circa secundum nota, quod frater itinerans non debet assumere propria voluntate socium, sed secundum arbitrium præpositi. Primo propter bonum obedientiæ, vt in domo obedientiæ omnia secundum obedientiam fiant. Secundo propter discretio-

secretionem, quia prælatus, qui omnia noscere debet, animas iumentorum suorum scit melius de hoc ordinare. Tertio propter commune bonum, quia forte assumptus erat in conuentu pro communitate necessarius. Ad hoc docent nos exempla sanctorum; Moyses descensurus in Ægyptum assumpsit Aaron sibi a Domino datum Exod. 3. Mariæ peregrinaturæ prouisum est de Ioseph, iubente Angelo, Mat. 2. & sic de alijs multis; prælatus vero, qui habet de socio prouidere, cum multa cautela debet hoc facere. Si enim itineraturus est minus religiosus, numquam debet ei associare nisi virum sanctum, ut cum eo proficiat in sanctitate, iuxta illud. Cum sancto sanctus eris: Si minus prudens, assignet prudentem, ut ille discat. Prouerb. 13. Qui cum sapientibus graditur, fit sapiens, si vero sit iuuenis, difficile debet ei concedi, quod egrediatur, vel si oportet, assignetur ei grandæuus; debili fortis detur; facili ad peccandum numquam est concedendum, quod vadat cum alio, vel alius cum eo. Item duo superbi non bene iunguntur; quia vnus nescit se alteri humiliare, & ideo de facili se conturbant. Prouerb. 13. Inter superbos semper iurgia sunt. Nonne hæc tentatio inuasit discipulos Domini, de quibus dicitur, quod inter se disputauerunt in via, quis eorum esset maior. Quantum ergo timendum est alijs magis dispositis ad superbiam? ¶ Porro ad hoc, quod aliquis sit socius amabilis, valere solent ista. Primo amor. Seneca. Si vis amari, ama. Secundo mansuetudo Eccle. 3. Fili in mansuetudine opera tua facito, & super gloriam hominum diligeris. Tertio affabilitas. Eccles. 21. Sapiens in verbis amabilem se facit. Quarto supportatio fraternæ infirmitatis, quo ad infirmitates

tes morum, & corporum: Ista ponit Bern.

Cap. CXXV.

Post hec notandum, quòd sicut sunt aliqui inepti ad societatem aliorum; ita sunt aliqui, qui laborant hoc vitio, quòd vix potest inueniri socius, qui eis placeat. Isti sunt, qui quandoque refutant alios, qui solent esse custodes fratrum diligentes, & eorum defectus non tacere. Isti sunt similes infirmis, qui nolunt habere medicos, qui eorum infirmitatem videant, & remedium apponant, contra hos dicit Bern. ad Eugenium. Contubernales tuos habeas, qui vitæ tuæ custodes sint, & testes. Si autem hoc faciendum est Papæ, quomodo minores audent hoc renuere? Quandoque vero refutant alios timore peccati; timent enim fragilitati suæ, ne cum eis incutrant peccatum aliquod impatientie, vel iracundiæ, & huiusmodi. Sed ipsi debent confidere, quòd propter bonum obedientiæ Deus custodiret eos, ne intrarent in tentationem, si fortè inuaderet. Item quandoque refutant alios ratione maioritatis volentes magis præesse, quàm subesse socio. Sed contra hoc est exemplum Christi, qui fugit, ne præficeretur in regem. Ioh. 6. Subiectus tamen voluit esse parentibus Lu. 2. hoc etiam idem voluit obseruari in discipulis Mat. 22. Quicumque voluerit inter vos maior fieri, erit minister vester. Item quandoque ratione in flexibilitatis; sunt enim aliqui, qui ambulantes in sua propria voluntate, & sensu non possunt trahi ad aliorum voluntatem. Isti nolunt socios, nisi quos possunt ducere ad suam voluntatem. Sed contra hos est vitium propriæ voluntatis, quod valde reprehensibile est in religioso.

so. Item quandoquē ratione delictorum; sunt enim proni aliqui ad culpas committendas; Sed sicut aliquando bonus Angelus deberet deferere peccatorem, quod non facit; sic boni viri non debent abhorre societatem malorum, sed potius sicut medici debent eis assistere in spe meliorationis. Sene. Illos tecum admitte, quos meliores facere posses. Item quandoquē ratione religionis; sunt enim aliqui, qui viris valde religiosis nolunt adiungi, similes illis, qui Sap. 2. dixerunt, Grauis est nobis ad videndum, quoniam dissimilis est alijs vita illius; & tales sunt stulti, quis enim indigens non vadat potius ad abundantes domos, quàm ad vacuas. Indigens fructibus non vadat potius ad arbores plenas, quàm ad steriles. Vnde viris magnæ religionis debemus nos diligenter adiungere, vt de plenitudine eorum accipiamus. Ex iam dictis tria eliciuntur scilicet, quod prælatus debet esse discretus in associando subditos, & quod omnes debent se socios exhibere, & quod nullus debet sibi assignatum socium refutare.

¶ *De diligentia circa infirmos.*

Cap. CXCVI.

A Egrotantium cura, siue post aegritudinem resciendorum, siue aliqua imbecillitate, etiam sine febribus laborantium, vni alicui debet iniungi, vt ipse de cellario petat, quod unicuiquē opus esse prospexerit.

¶ Hoc est mandatum, quod quarto traditur circa necessitates infirmorum, quod versatur circa specialem curam, quæ est exhibenda eis; nam quando non assignatur specialis prouisor infirmis, in multis negliguntur; quia communis prouisor non sufficit

ficit. Item cum non ministratur de communi infirmis competenter, datur occasio multis reservandi aliquid pro infirmitatis necessitate, quod sapit proprietatem, si fiat etiam sine periculo proprietatis de licentia. ¶ Porro ad habendam magnam curam de infirmis fratribus, sicut hic tangitur, multa mouent fratres, & maxime praelatos. Primum est miseria: inter omnes enim miserias, ad quas solet se extendere misericordia, nulla est adeo afflictiva. Item nulla facit ita impotentem hominem ad releuandam suam miseriam. Item nulla miseria est, quæ non facilius releuari possit. Præterea religiosus propter Christum reliquit sua, de quibus poterat subueniri in infirmitate, reliquit & seipsū, qui sibi poterat illis deficientibus aliqua procurare, quod modo non potest sine alterius voluntate. Quanta ergo impietas esset, si illi, qui hoc pro Christo reliquit, Vicarius Christi, & serui Christi non adhiberent curam sollicitam in sua infirmitate: Christus enim exemplar nostrum non legitur tantam curam habuisse de aliquibus miserijs, sicut de infirmis; non enim legitur vestisse nudos, recepisse hospites, visitasse incarceratos, famelicos legitur recreasse; sed raro, de infirmis vero legitur curam diligentem habuisse, modo confortando dicens cōfide fili, modo tangendo propria manu etiam leprosum, modo erigendo, modo plene sanando. ¶ Item hoc est proprium officium praelati; ipsi enim sicut boni pastores debent curam gerere de oue ægrotante. Ne dicatur eis illud Ezech. 34. Quod infirmum erat, non consolidastis. Item sunt medici, cuius est magis curare de infirmis, quàm de sanis Matth. 9. Non est opus medicus valentibus, sed male habentibus. Item sunt matres: Sed heu quidam praelati

lati sua duricia implent illud. Threno. 4. Manus mulierum misericordium coxere filios suos: Quia dum debent esse misericordes ad subditos suos, duris operibus nimis vexant eos, quasi carnes in leberte. Non est hæc natura mulierum erga infirmos; immo ipsæ sunt, quæ curam maiorem habere solent de infirmis Eccles. 36. Vbi non est mulier, in gemit æger.

¶ De mutuo seruitio fratrum.

Cap. CXCVII.

Sive autem qui cellario, siue qui vestibus, siue qui codicibus praponuntur, sine murmure seruiant fratribus suis.

¶ Sicut dictum est in initio quarti capituli regulæ. Hic incipit tradere officiales circa seruitium fraternarum necessitatum. ¶ Et est notandum, quod officiales quandoquæ offendere solent in modo seruiendi scilicet quando seruitium faciunt cum murmure, quandoquæ in modo distribuendi res ad suum officium pertinentes; circa primum traditur hic mandatum, circa secundum postea; quando dicitur (Codices certa hora &c.) ¶ Circa mandatum præsens nota, quod quædam sunt necessitates circa spiritualia, ut libri circa studium; Quædam circa temporalia, & hæc circa duo præcipue scilicet circa victum, & vestitum; Et secundum hæc scilicet tria distinguit tria genera officialium dicens (siue qui cellario) quo ad victum (siue qui vestibus) quo ad secundum scilicet vestitum (siue qui codicibus) quo ad studium: Et idem intelligendum est in alijs officialibus, scilicet quod seruiant fratribus suis, & hoc sine murmure faciant. Ex hoc mandato eliciuntur

ciuntur tria: Primum est, quòd officiales sunt in monasterio constituendi circa diuersa diuersi dicēs (sive qui cellario, sive qui vesti &c.) Secundum quòd fratres debent sibi inuicem seruire. Tertium quòd sine murmure. Primum faciendum est a praelatis propter semetipsos, vt ipsi melius vacent spiritualibus, quæ magis ad eos pertinent, cum circa necessitates proximorum alij pro eis occupantur. Exemplum autem sic faciendi reliquunt Apostoli, qui constituerunt ministros, qui vacarent mensis. vt dicitur Act. 6. Considerate fratres viros ex vobis boni testimonij, plenos spiritu sancto, & sapientia, quos constituamus super hoc opus, nos vero orationi, & ministerio verbi ministrantes erimus; & inde laudabilem modum constituendi officiales, non enim subito: sed cum deliberatione, & consilio constituerunt eos. Considerate inquit, quasi deliberate habete consilium. Item non cum consilio extraneorum, sed suorum; vnde dicunt. Fratres vos qui estis scilicet fratres nostri. Item non constituerunt ad hoc sexum muliebrem, sicut permittitur alicubi, quòd vetulæ cognatæ seruiunt aliquibus, quod abhominabile debet esse apud religiosos; ideo dicunt viros. Item non extraneos, sicut fit in quibusdam monasterijs, in quibus sæculares constituuntur; ideo dicunt ex vobis. Item non quoscunque viros, sed boni testimonij; vnde addunt: plenos spiritu sancto, & sapientia. Officiales enim propter alios debent esse famosi: quia habent occasiones multas peccandi, nisi sanctitas eos retrahat, & ideo debent esse sancti. Quia vero habent dispensare multa, quæ sine sapientia bene fieri non possunt; requiritur in eis sapientia. Item faciendum est hoc propter subditos, quia sic
eis

eis seruitur sufficientius. Exemplum de Moyse, qui ad consilium Ietro diuisit onus suum in plures, vt melius seruire populo sufficeret. Item faciendum est propter ipsius religionis exigentiam, in qua omnia debent fieri ordinate. Multum autem valet ad confusiones euitandas, quando diuersi in diuersis seruiunt, & scit officium suum vnusquisque, sicut fuit in curia Salomonis, de qua scriptum est 3. Reg. 10. quod regina Sabba videns ordinem, scilicet in curia eius, non habuit vltra spiritum. ¶ Item ad secundum debet mouere exemplū Angelorum, qui (vt ait Apostolus) Omnes sunt administratorij spiritus, in ministerium missi. Exemplum virginis Mariæ, quæ licet puella tenera, & prægnans, ascendit in montana cum festinatione ad seruiendum Elisabeth Luc. 1. Maxime autem exemplum Iesu Christi, qui cum in habitu regio non posset seruire hominibus, accepit formam serui, vt in ipsa nobis seruiret. Ego autem inquit in medio vestri sum; sicut qui ministrat Luc. 22. Nec debet apud religiosos esse consuetudo, quod sæculares eis præsentialiter seruiant discalciando, pedes lauando, & similia facientes: Et hoc triplici de causa, Primo quia hoc sapit sæcularitatem quandam; Secundo propter infirmitatem sæcularium, qui possent videre multa; quamuis licita apud viros sanctos; in quibus scandalizarentur; si assisterent eis in huiusmodi seruitijs. Tertio propter periculum infamiæ; lingua enim sæcularium multum lubrica est, & de facili apud extraneos deferrent aliqua, quæ vident, & augent frequenter. Et ideo sibi inuicem seruientes non debent recipere sæculares ad sua seruitia; nisi forte interdum a longe in coquina, sutoria, & in similibus, quæ in absentia eorum fiunt. Ad hoc facit

facit exemplum Christi, & Apostolorum, qui nunquam leguntur huiusmodi famulos habuisse.

¶ *Circa tertium vero* notandum, quod quidam, licet interdum seruiant fratribus suis; tamen hoc faciunt cum murmure similes demonibus exeuntibus ad mandatum Domini, sed cum clamore. Item sunt sicut rota, quæ faciendo seruitium alios inquietat. Eccles. 32. Præcordia fatui, quasi rota carri. Et bene dicitur fatuus; quia & opus fatui facit, & mercede se priuat. Item facit sicut cocus, qui in cibo, quem parat, ponit fel.

¶ D E S T V D I O.

Cap. CXXVIII.

Codices certa hora singulis diebus petantur, extra horam qui petierit, non accipiat.

¶ Sicut errant officiales seruiendo cum murmure, ita errant interdum dispensando indebite. Et ideo hic tradit mandatum circa secundum, in quo erratur dupliciter, aut quando datur, quod dari non debet; aut quando non datur, quod dari debet. Circa primum traditur hic mandatum in spirituali cum materia circa libros, circa secundum traditur, ibi (vestimenta vero & calceamenta) Porro intentio huius mandati est, quia amore studij in libris, aliqui religiosi interdum dimittunt orationes, vel diuinum officium, vel alia ad obseruantias regulares pertinentia, quod est reprehensibile, propter quod dicit. (Codices certa hora singulis diebus petantur) Ex hoc mandato eliciuntur quinque, scilicet quod libri procurentur, vel habeantur, quod habiti diligenter custodiantur, quod custodiri in

vsum ponantur, quòd religio propter studium non negligatur; quòd tales recipiendi sunt ad ordinem, qui ad studium habeant aptitudinem.

§ LIBRI PROCVRENTVR.

Cap. CXXIX.

Circa primum nota, quod sapientia cœlestis est sicut fons, qui de cœlo venit per canale librorum. Eccles. 24. Ego quasi aquæductus exiui de Paradiso, quasi dicat, ad modum aquæductus veni per scripturam librorum. Sed heu sunt aliqui religiosi, qui magnam sollicitudinem ponunt, & magnas expensas faciunt ad habendum aquæductum, per quem veniat fons aquæ materialis in domum suam, ad purgandum sordes corporeas, ad irrigandum hortos, ad commoditates multas habendas per singulas officinas, & de conductu sapientiæ cœlestis, per quam sordes peccatorum purgantur, corda ad omne bonum proferendum irrigantur, parum curant. Non sic dicitur de Salomone, qui non solum super omnia temporalia, sed super salutem, & omnem pulchritudinem, seu speciem corporis diligens, & estimans sapientiam, sicut dicitur Sap. 7. deprecatus est Dominum dicens. Mitte illam de se de magnitudinis tuæ, ut mecum sit. Item auctoritates, quæ sumuntur de verbis sacris, sunt quasi arma, quibus & defendimus nos, & impugnans inimicum. Cum religio sit domus regis; ibi semper debet esse armatorium, in quo inveniuntur huiusmodi arma. Constat etiam, quòd arma prædicatoris sunt auctoritates sumptæ de libris, iuxta illud. Gladius spiritus, qui est verbum Dei. Item re-

ligio est quasi castrum obsessum a dæmonibus, vbi necessaria sunt duo scilicet arma, & victus. Item dicit Magister in hystorijs. Et Vincentius in Speculo hystoricali: quòd Ptolomeus studiosus, & librorum cupidus Demetrium bibliothecæ suæ præfecit, cumquè inquisisset numerum librorum ab eo, respondit 20. millia adesse, hic non contentus libris gentilium, audiens in Iudæa libros esse legis petiuit septuagintaduo interpretes, scilicet de vnaquaque tribu sex, vt de hebræo in græcum transferrent: quod vt facilius obtineret. 120. millia iudeorum, qui in regno suo erant serui, restituit libertati, dans pro capite Dominis eorum 120. drachmas argenti. Plato etiam fuit tantus amator librorum, quòd sicut Hiero. ait, scribens mortuus est. Sed (prohdolor) quidam religiosi plus curant de ædificijs corporalibus, quàm de libris, quibus ædificantur mores. Non fuit talis Augustinus, qui tot libros proprio labore composuit. Et sic voluit a professoribus suæ regulæ fieri, cum velit eos studere quotidie certa hora, & ad hoc libros petere; quod esse non potest, nisi habeantur.

¶ DE CVSTODIA LIBRORVM.

Cap. CXXX.

CIrca secundum nota, quòd apud quosdam, qui diligenter custodiunt caseos a muribus, poma, & pyra a putrefactionibus, vestes a tineis; ita male custodiuntur libri sacri, quòd modo per irreuerentiam in eorum manibus viliter deturpantur; modo per negligentiam amittuntur; modo per incuriam destruuntur; quòd est valde reprehensibile.

Huius-

Huiusmodi enim libri sunt res sacre. Quod sic patet, dicit Magister in hystorijs, & Vincentius in Speculo hystoricali, quod cum Ptolomeus predictus vellet dare operam, vt libri legis diuinæ sibi transferentur. Demetrius librarius suus dixit, quod hoc opus non poterat fieri nisi per cultores Dei, dicens quod Tiopontius, cum hystorijs suis, quas scribebat, voluisset eos inferere, versus est in amentiam per dies triginta, Theodoctus queque pro eadem causa cæcus est factus. Ex quo patet magna sanctitas librorum legis diuinæ, propter quam sic puniuit Deus eos, qui indigne tractauerunt. Item Deuter. 21. Moyses præcepit deuteronomium poni in archa cum manna, & virga, rebus miraculosis. Et beatus Franciscus quando inueniebat aliquam cedula in terra, in qua erat scriptum nomen Iesu, eleuabat illam cum magna reuerentia, & ponebat in loco honesto. Certe iste thesaurus non est vilis, sed preciosissimus Sap. 7. Diuitias nihil esse duxi in comparatione illius; nec comparaui illi lapidem preciosum; quoniam omne aurum in comparatione illius arena est exigua, & tanquam lutum estimabitur argentum in conspectu illius. Cum maxima ergo diligentia libri sunt custodiendi, in quibus talis, & tantus thesaurus continetur.

¶ DE VSV LIBRORVM.

Cap. CXXXI.

Circa tertium nota, quod licet quidam habeant libros, & bene custoditos; tamen raro, vel numquam legunt in eis. Dicitur, quod Rex Franciæ Ludouicus, cum quidam religiosi ostenderent

ei libros pulcherrimos, dixit eis, Bonum esset, & essent magis deturpati; notans quòd parum legerent in eis. Isti similes sunt auaro, qui habet multas diuitias, de quibus nunquam comedit. ¶ Legitur de beato Grego. quòd quamquam quotidiano languore tabesceret; tamen propter hoc non dimittebat, quin legeret, vel scriberet, vel dictaret. Vide Hiero. quantum se fatigauit in scripturis, vt in strato suo iacens funiculo ad trabem appenso erigeretur. August. Palatum febricitantis habet, cui mel cæli insipidum est, & vocat mel cæli dulcedinem sacræ scripturæ. Item scripturæ sunt quasi speculum, in quo recognoscit quis semetipsum. Et ideo sicut Dominæ magnæ quotidie semetipsas respiciunt in speculo; sic & sancti in scripturis. Greg. Scriptura sacra oculis mentis, quasi speculū quoddam opponitur, & interior nostra facies in ipsa videtur, & fēda nostra, & pulchra nostra agnoscimus. Item sentimus quantum proficimus, & a profectu quantum distamus. Item in scripturis sacris sunt consolationes multæ, ad quas confugiunt viri sancti in tribulatione positi. Item quia anima non inuenit plenitudinem in aliqua re, delectatur varijs; Et ideo viri sancti vtuntur varietate operum spiritualium, quæ sunt cibus animæ, sicut carnales varietates ferculorum; Vnde sanctus Augustinus supra dixit (orationibus instate) & nunc dicit (Codices certa hora singulis diebus petantur.) Hiero. Orationi lectio, lectioni succedat oratio. Item libri aliarum scientiarum, licet illuminent intellectum; non tamen accēdunt affectum; diuini vero libri vtrumquē faciunt secundum Isido. Sic igitur patet, quòd lectio sacra valet ad fructuum productionem, ad cœlestis desiderij inflammationem,

ad cauendum dæmonum insidias, ad sui cognitionem, ad commorandum cum Deo, ad animæ refectionem, ad salutaria remedia, ad consolationem in tribulatione, ad spiritualem delectationem; ad carnalia desideria reprimenda. Hiero. Ama sacras literas, & carnis delicias non amabis. Propter has igitur utilitates studendum est frequenter in libris a professoribus beati Augusti. certa hora.

DE UTILITATE STUDII IN
ordine predicatorum. Cap. CXXXII.

NOtandum vero, quòd licet omnibus religiosis expediat libenter legere, tamen fratribus prædicatoribus magis incumbit, & hoc propter utilitatem, quam assecutus est ordo eorum, & assequitur ex studio. ¶ Prima est prærogatiua quædam super alios ordines: Cum enim omnis religio sit bona, & studium sacrum bonum sit; hoc illi additum facit magis bonum. Sicut Cherubim, in quibus non solum quiescit Deus, sed splendet (quia interpretatur plenitudo scientiæ) est super Thronos, in quibus quiescit: ita & ordo cum scientia præfertur illis, in quibus est sola sanctitas, quæ est locus Dei. Et hanc prærogatiuam confert scientia per studium. Prouerb. 4. Accipe illam scilicet scientiam, & exaltabit te. ¶ Secunda bonarum personarum acquisitio: Multæ enim personæ numquam venissent ad prædictum ordinem, nisi esset ibi studium, & multæ venientes tenues factæ sunt per studium valde magnæ. ¶ Tertia maior deuotio mundi; quia ad personas literatas maiorem deuotionem solent habere, & exhibere eis honorem. Sap. 8. Habebo propter hanc, scilicet scientiam, claritatem

ad turbas, & honorem apud seniores. ¶ Quarta est fructus ad alios, qui maior potest fieri per sapientes, quàm per simplices licet sanctos. Hiero. Sancta rusticitas solum sibi prodest: non sic autem docta iustitia; immo ad iustitiam erudit plurimos. ¶ Quinta est debitum sustentationis, quod magis debetur seminanti spiritualia; quod fit per scientiam, quàm quiescenti in domo. Apostolus. Si spiritualia vobis seminamus, non est magnum si carnalia vestra metamus, & post. Ordinauit Dominus his, qui Euangelium annunciant, de euangelio viuere. ¶ Sexta est victoria tentationũ; Plus enim valet sapientia ad vincendum, quàm vires, & ideo multi succumbunt in bello dyaboli in multis peccatorum generibus propter scientiæ defectum. Sap. 7. Sapientia vincit malitiam. ¶ Septima est informatio interioris hominis. Regulæ enim, & statuta informant in religione exteriorem hominem in moribus, sed sacra scripturæ interiorem, Sap. 8. Sobrietatem, & prudentiam docet, & iustitiam, & virtutem, quibus in vita nihil melius est hominibus. ¶ Octaua est euitatio errorum, quos multi incurrunt; vt in simonijs, & alijs huiusmodi. Psal. Nescierunt, nequè intellexerunt; in tenebris ambulant. Hoc non accidit scripturas scientibus. Psal. Lucerna pedibus meis verbum tuum, & lumen seminis meis. ¶ Nona est sustentatio infirmitatis, multi enim infirmi corruunt; qui non habent apodiametum. Studium vero est ad sustentandum infirmitatem. Vnde Plato. Litteras infirmo animo, sicut baculum infirmo, repertas constat. ¶ Decima fortificatio ad labores; Multi propter defectum cibi deficiunt in laboribus viarum, sed sacrum studium, per quod masticatur panis verbi Dei, corroborat.

borat. Psal. Panis cor hominis confirmet. ¶ Vndecima occasio proficiendi in omni bono: quantum enim homo proficit in charitate, tantum proficit in omni bono; Cognitio vero Dei, quę plus, & plus habetur per studium, facit proficere in eius dilectione, quantum enim agnoscis, tantum diligis. ¶ Quis est, qui nouerit statum prædicatorum, qui nesciat has utilitates prouenisse? Ideo ordinis illius amatores solent pro studio promouendo zelare non modicum.

¶ DE STUDIO PHILOSOPHIAE.

Cap. CXXXIII.

Sed quid de libris philosophicis? respondeo quod quidam fratres omnino sunt inepti ad proficiendum in illis, quidam vero apti sed non multum; quidam vero habent aptitudinem magnam ad illa, & speratur magnus fructus circa diuinam scripturam. Primis nullo modo permittendum est, ut studeant in talibus. Secundis est concedendum aliquid, sed raro. Tertijs vero sunt laxandę habendę circa studium huiusmodi propter multa utilia. Vñum est fidei defensio, sicut hæretici, & pagani impugnant fidem; ita & quidam per philosophiam. Propter quod dicit Apostolus. Col. 2. Videte, ne quis vos decipiat per philosophiam, & inanem fallaciam. Sicut autem non potest se defendere a fallacijs, qui nihil nouit de illis; ita nec a talibus philosophantibus, qui nichil nouit de philosophia. Vnde Iulianus apostata contra Christianos legem dedit (ut legitur in ecclesiastica historia) ne liberales artes audirent. Aliud est destructio errorum eorum; Apud homines enim sunt errores multi, & veritates

tes multæ, sicut in serpente venenum, & theriaca. Et sicut theriaca est efficacior omnibus alijs contra venenum; ita & veritas contra errores eorum; quoniam veritates fidei ipsi non recipiunt. Inde est, quod Augustinus in libro de ciuitate Dei ostendit, quod Plato, & Porphirius quædam dixerunt, per quæ error eorum de resurrectione corporis cõuincitur. Plato dicit animas sine corporibus non posse in æternum viuere. Porphiribus dicit animam purgatissimam, cum redibit ad patrem, nunquam ad hæc mundi mala redituram esse. Ponatur vterque verum dicere, sequitur, quod redibit ad corpus, sed non miserum; quod dicit fides de resurrectione. Tertium est intelligentia scripturarum. Innumerable enim sunt in textu, in glosis, in originalibus sanctorum, quæ impossibile est intelligere sine aliqua scientia philosophica: Et ideo spolijs ægyptiorum ditantur hebræi. Quartum est fidei corroboratio. Sunt enim multa apud eos ad fidei confirmationem multum valentia. Quintum est acuitio ingenij ad sciendum sacram scripturam: ferrum enim ferro acuitur. Sextum est ordinis honor: Multi religiosi contemnuntur; quia sunt ignari. Septimum est philosophicę scientiæ contemptus: multi enim, qui non nouerunt ea, quæ sunt apud philosophos, reputant ea maiora, quàm sint. Et postquàm ea nouerunt, non sapiunt eis in comparatione ad theologiam. Propter ista ergo potest concedi studium philosophicum. Sed cauendum est, ne cuilibet concedatur: Sunt enim in illis libris quædam bona, & quædam mala: sicut in horto herbæ quædam bonæ quædam malæ. Bonum est, quod dicit Aug. se legissè in libris Platonis: licet non eisdem verbis: In principio erat verbum, & verbum erat

erat apud Deum. Malum est, quod legitur apud eos de reuolutione circulari in anno magno, & similia multa: & ideo non est tutum cuilibet legere, nisi sciat discernere hoc ab illo: ne forte colligat herbas malas pro bonis. Exemplum in Ecclesiastica histo. de Dionysio Episcopo, cui reprehenso a fratribus, quod legebat libros hæreticorum, apparuit visio dicens, Lege omnia, quæcunque veniunt ad manus tuas; quia omnia probare, & discernere potes. Ex quo relinquitur, quod his, qui nesciunt bene discernere, non est securum mixta bonis, & malis legere; ne forte bonum cum malo colligant. Ideo dicit Theophilus. Lector Origenis ita bonum carpat, ne spinam attingat.

¶ *CONTRA ILLOS, QUI NEGLIGUNT*

religionem propter studium.

Cap. CXXXIIII.

Circa quartum nota, quod sunt quidam qui propter inordinatum suum amorem dimittunt interdum ea; quæ sunt religionis, modo in scribendo, modo in audiendo, modo in legendo, & in alijs huiusmodi ad studium pertinentibus multipliciter se occupando, sic adhærent studio, quod etiam obedientiam postponunt; similes primis parentibus, qui instigatione dyabolica propter appetitum scientiæ inobedientiam incurrerunt. Contra quos est illud celebre, & præclarum exemplum Marci monachi, qui ad vocem abbatis eum vocantis in auditu auris obediens reliquit imperfectam literam, quam scribebat. Cum igitur tota religio consistat, vel in obedientia ad maiores, qui sunt loco Dei, vel in sanctis affectionibus quo ad proprium animum,

num, vel in fraternis obsequijs quo ad proximum, quę omnia huiusmodi inordinatus amor studij impedit: patet quoniam qui huiusmodi sunt, religionem propter studium relinquunt, quod est multum reprehensibile. Nam scientia sine virtute multa mala committit occasionaliter. Multa enim sunt, quę non sunt peccatum nescienti, quę sunt peccatum scienti; cum non facit ea, & scit facienda. Iaco. 2. Scienti bonum, & non facienti peccatum est illi. Item aggrauat peccata. Gregorius. Vbi maius est donum scientiæ, transgressor maiori subiacet culpæ. Item conseruat in peccato. Proprium est enim sapientum illud quod faciunt, licet malum, per scientiam suam defendere. Item inducit superbiam Apostolus 1. Cor. 8. Scientia inflat. Item indignationem facit ad alios, quos despicit Ecclesias 1. In multa sapientia multa indignatio. Item inducit ad hæresim: non enim simplices, sed studiosi hæresim confixerunt 1. ad Tim. 6. quàm scilicet scientiam profitentes circa fidem exciderunt. Item per abusum vertitur in malum. Bernar. Quidam scire volunt, vt sciant, & ambitiositas est, quidam autem vt sciantur, & vanitas est, quidam vt ditentur, & cupiditas est. Item scientia in tuturo accusabit coram iudice: Huiusmodi enim scientes portabunt literas, quę ostendent eos inexcusabiles de ignorantia. sicut lex Moyfi accusat iudæos. Iohan. 5. Et Moyfes, qui vos accusat id est lex Moyfi. Vnde sequitur. De me enim ille scripsit. Item obligat ad rationem arctiorem reddendam, eo quod plus datum est illis; & crescentibus donis, rationes crescunt donorum secundum Grego. Item facit reum maioris pænæ. Luc. 11. Seruus sciens voluntatem Domini sui, & non faciens plagis vapulabit multis

Item

Item in præfenti decipit: multi enim ex scientia, quam habent innirentes prudentiæ suæ estimantes se sapientes, stulti fiunt, & multas stulticias faciunt. Esa. 47. Sapientia tua, & scientia tua hæc te decipit. Item cito potest quis bonus fieri; sed cum magno labore scientia vix potest haberi. Eccles. 1. Qui addit scientiam, addit laborem. Item multi ex amore scientiæ senescunt in studio: & nihil boni inde faciunt in vita sua. Psal. Corrupti sunt in studijs suis. Ex prædictis patet, quod non est aliquatenus religio, quæ est ad virtutem propter studium, quod est ad scientiam, negligenda. ¶ Notandum vero, quod quædam sunt reprehensibilia circa studium religiosorum, quædam circa libros eorum, quædam circa auditores; quædam circa lectores, quædam circa scriptorum factores, quædam circa disputatores, quæ omnia annexa sunt scientiæ, & expedit cognoscere, ut caueantur: quia non potest vitari malum, nisi cognitum. Si autem scientia dimittenda est propter religionem, multo magis ista, quæ sunt reprehensibilia circa scientiam.

¶ *DE REPREHENSIBILIBVS
circa studium. Cap. CXXXV.*

Circa primum sciendum, quod quidam interdum volunt scrutari per studium ea, quæ non per rationem naturalem, vel scripturam diuinitus inspiratam sunt patefacta, quæ potius sunt admiranda, quàm inuestiganda secundum illud Apostoli, ad Rom. 11. O altitudo diuitiarum sapientiæ, & scientiæ Dei, quàm incomprehensibilia sunt iudicia eius, & inuestigabiles viæ eius. Contra quos dicitur

dicitur Eccles. 3. Altiora te ne quæsieris &c. Alij
 sunt, qui se occupant circa, quædam reprehensi-
 bilia magis quàm vtilia. Contra quos Seneca dicit.
 Quid te torques, & maceras circa illam quæstio-
 nem, quam subtilius erat contempsisse, quàm sol-
 uisse. Alij sunt, qui in nulla re certa student; sed
 sicut qui vadunt spaciando per diuersa loca; ita &
 ipsi per diuersos libros vagantur. Contra quos di-
 cit Seneca. Vide ne lectio authorum multorum,
 & omnia generis voluminum aliquod vagum ha-
 beat, & in stabile. Alij sunt, qui legendo sic velo-
 citer transeunt omnia, quòd vix capiunt aliquid de
 sententia. Et ideo nunquàm proficiunt. Nam se-
 cundum Catonem. Legere, & non intelligere est
 negligere. Alij sunt, qui intelligunt; tamen non
 retinent, & ideo parum eis prodest, sicut cibus co-
 mesus, nec retentus in stomacho. Contra quod di-
 cit Hiero. Diuinæ scripturæ iugiter in mente vol-
 uantur. Alij sic illaqueantur dulcedine quadam
 scientiæ, quòd omnia alia prætermittunt, licet me-
 liora. Alij licet crescant in scientiâ; tamen in ope-
 re parum, aut nihil. Contra quod dicitur Phil. 1.
 Hoc oro, ut charitas vestra magis, ac magis abun-
 det in scientia, & in omni sensu, quia quanto ma-
 ior est sensus, & scientia in homine; tanto plus de-
 bet abundare in operibus charitatis. ¶ Exemplum.
 Quidam religiosus venit Parisios ad audiendam
 Theologiam, & prima die, qua ingressus est scho-
 las, fuit lectio de illo mandato. Diliges Dominum
 Deum tuum ex toto corde tuo, & ex tota anima tua,
 & ex omnibus viribus tuis, & proximum tuum, si-
 cut te ipsum. Regressus ad hospitium fecit parari
 equos ad repatriandum. Cum autem super hoc ad-
 mirantes socij quærerent causam, quare tam cito
 recedere

recedere vellet; ait illis. Propono cum Dei adiutorio dare operam ad faciendam istam lectionem, & sufficit mihi tantum scire de Theologia omnibus diebus vitæ meæ. Vnde bonorum est ex parua scientia multum facere, non ex multa parum. Alij sunt, qui sic insipienter student, quòd nec finem aliquem ponunt in studio. Contra quos dicit Hiero. 18. Dirigite studia vestra scilicet ad finem debitum, quod est ad gloriam Dei, salutem propriam, & edificationem proximi.

§ DE REPREHENSIBILIBVS
circa libros. Cap. CXXXVI.

Circa secundum nota, quòd circa libros est reprehensibilis nimia preciositas, & maxime in libris religiosorum, qui maxime debent prætere paupertatem. Hiero. Vult codices, non tam pulchros, quàm emendatos. Item falsitas quæ multum impedit profectum in scientia. Aug. de doctrina Christiana. Codicibus emendandis prius debet inuigilare solertia eorum, qui scripturas diuinas nosse desiderant. Item multitudo. Sunt enim quidam, qui habent libros sufficientes omnibus diebus vitæ suæ: Adhuc non cessant cumulare libros, & inutiliter conseruare: in quibus quandoquæ nunquàm legunt. Item nimia confidentia in libris: propter quàm quidam nihil sciunt, aut parum: quia nihil ponunt in corde confidentes, quòd in libris suis inueniant omnia. Contra hos est verbum Pythagoræ dicentis. Caue, ne armarium doctius habeas, quàm pectus. Item reprehensibilis est nimia affectio ad libros, propter quod multi mala incurrunt; Ex hoc enim

enim accidit, quòd quando non habent, sunt molesti super hoc prælatis: cum habēt nolunt alijs mutare; cum ab alijs in aliquo maculantur, grauiter perturbantur; cum auferuntur, ferunt impatienter. horum occasione cum scriptoribus litigant: pro his acquirendis amicis, & familiaribus precibus importunis instant, & alia quædam committunt, quæ numquàm fierent, nisi in eorum excederent amore. Non tale reliquit nobis exemplum beatus Dominicus, qui adhuc sæcularis necessarios libros vendidit, & indigentibus precium distribuit.

§ *CIRCA AUDITORES.*

Cap. CXXXVII.

Circa tertium nota, quòd quædam sunt reprehensibilia circa modum auditorum: quædam circa negligentiam audiendi: quædam circa recusationem magistrorum aliquorum. § Porro circa modum auditorum sciendum est, quòd aliqui sunt, qui sic sunt tepidi circa lectiones, quòd propter modicum laborem retrahuntur, vt si longe oporteat ire eos, vel intemperiem aliquam sustinere, & huiusmodi. Contra hos poterit surgere in iudicio regina Austri, quæ licet delicata, & tam nobilis, tamen venit a finibus terræ audire sapientiam Salomonis. 3. Regum 10. Alij sunt, qui licet audiant lectiones; tamen raro, quia discontinuant, & ideo non possunt proficere, quia lectiones sic dependent ab inuicem vna ex alia, quòd amissa vna, amittitur intellectus alterius, & ex vna intelligitur alia frequenter: sicut dicit Augustinus, & Prouer. 8. Beatus qui vigilat ad fores meas quotidie. Alij continuant

nuant lectiones; tamen ita tarde veniunt, quod magnam partem lectionis amitunt. Contra quos dicitur Iaco. 1. Sit omnis homo velox ad audiendum. Alij sunt asistentes, sed dormitant, vel corde vagantur, ita quod non intelligunt. Contra quos dicitur in Evangelio. Audite, & intelligite. Alij sic prolixitatem fastidiunt, quod finem lectionum nequaquam expectant. Contra hos est deuotio Iudeorum ad lectionem legis. Hester. 9. Esdras a prima luce vsque ad vesperam legebat coram viris, & mulieribus, & dederunt sensum ad legem. Alij de dubijs nunquam interrogant. Quod contra dicitur de Christo Audiente illos, & interrogante. Quod constat eum fecisse, vt nos doceret interrogare. Alij sunt, qui de auditis nihil retinent corde, nec repetunt, nec conferunt, nec scribunt. Contra hos dicitur. Audi Israel precepta Domini, & ea in corde tuo, quasi in libro scribe. ¶ Sciendum iterum, quod aliqui dimittunt studium propter causas, quę sunt ex parte Magistrorum. Aliqui enim aliquos fugiunt propter malam vitam, quod non expedit. Et si enim mala faciant, mala tamen non audent dicere. Aug. Audiuntur utiliter, qui utiliter non agunt. Aliqui propter insufficientiam; sed non ne est pauperis famelici recurrere ad reliquias, quę dantur in domo diuitis? Alij propter contemptum personę, cum est iuuenis, vel aliter contemptibilis. Contra hos dicit Salomon. Sapientiam discendam a formica Prouer. 6. Quanto persona contemptibilis: tanto tua humilitas, & maior, & preciosior. Exemplum in vitis patrum. Quidam frater ieiunauit per septem hebdomadas rogans Deum, vt reuelaret ei quoddam uerbum de scripturis obscurum, quod cum non fuisset ei reuelatum, posuit se

se in uia, ut iret ad quendam fratrem, ut quæreret ab eo sermone illum. Et ecce obuiavit et Angelus dicens. Septem hebdomadæ, quas ieiunasti, non meruerunt, quod petebas, nunc autem, quia humiliatus es, ut pergeres ad fratrem, missus sum indicare tibi sermonem, & indicato sermone recessit.

SCIRCA DOCTORES.

Cap. CXXXVIII.

Circa quartum nota, quòd circa doctores, quoad actus eorum, est reprehensibilis in ordinatus appetitus Magisterij. Ascensus enim ad Magisterium obligat doctorem ad multa, de quibus oportebit reddere rationem Iac. 2. Nolite plures fieri magistri, fratres mei, scientes, quòd maius iudicium sumitis. Item refutatio officij est pertinax in eo, qui habet sufficientiam; oportebit enim eum reddere rationem de talento abscondito. Greg. Secretum quietis diligunt, secessum contemplationis petunt, de quibus si districtè iudicentur, proculdubio tenentur, quantis uenientes ad publicum prodesse potuerunt. Item nimia intermissio lectionum, quæ multum nocet cordi humano, cum enim sit aridum, quotidie rigandum est Luc. 19. Erat quotidie docens in templo. Item circa ea, quæ docent, reprehensibilis est dubietas. Non enim sola erronea, & falsa cauenda sunt in doctrina, sed etiam dubia secundum Augu. dicentem. Tene certum, & dimitte incertum. Apostolus ad Tit. 2. Tu autem loquere, quæ decent sanam doctrinam. Sana doctrina dicitur, quæ non potest esse occasio aliquis morbi. Item inutilitas. Et ideo dimissis curiosis

riosis, uacandum est utilibus. Item impropor-
 tionabilitas. Nam secundum Greg. secundum capacita-
 tem auditorum formandus est sermo doctorum,
 exemplo Pauli, qui paruulis dabat lac, inter perfe-
 ctos vero loquebatur sapientiam. Item circa mo-
 dum est reprehensibile, cum quis non sententiam
 sanctorum sequitur, sed suam in exponendo volun-
 tatem. Hiero. ad Paulinum. Viriosissimum genus
 docendi est deprauare scripturas, & ad voluntatem
 suam trahere renitentem. Item inuolutio verbo-
 rum; prudentis enim doctrina facilis est. Vnde di-
 citur Iob. 38. Quis est iste inuoluens sententias. Itē
 immoderantia: Sunt enim aliqui nimis prolixi; ali-
 qui nimis breues. Contra quod Hiero. Nimia pro-
 lixitas onerat sensum legentium, Et immoderata
 breuitas præscindit studiosorum desiderium. Item
 iterum aliqui sunt nimis tardi in pronunciando: ali-
 qui nimis veloces. Postremo reprehensibile est in
 doctore super omnia morū defectus, propter quod
 dicit Apostolus. Qui alium doces, teipsum non
 doces. Tanto enim turpiores apparent deformita-
 tes morum suorum, quanto lumen scientiæ egre-
 diens de ore suo ea de viciniori manifestat.

§ CIRCA DISPUTATIONEM.

Cap. CXXXIX.

Dimisso quinto membro diuisionis superius fa-
 ctæ: circa sextum nota, quod triplex est di-
 sputatio scilicet Scholastica, Ecclesiastica, & Ex-
 traordinaria. Scholastica est, quæ in scholis ma-
 gistrorum fit ad indagationem veritatis. Circa
 hanc disputationem multa interdum accidunt re-
 prehens-

prehensibilia. Vnum est nimia audacia; quia scilicet aliqui minus sufficientes aperiunt os suum. Aliud est nimia taciturnitas ex nimia pusillanimitate, vel nescio qua humilitate, vel pigricia prouidendi, vel timore alicuius confusionis, siue alijs de causis, aliqui nunquam opponunt, vel respondent in scholis. Et tamen est tempus loquendi, & tempus tacendi Hiero. Disciplina Pythagoricorum est per quinquennium tacere. Tertium est ostentatio, allegando aliquos ignotos Philosophos. Quartum appetitus vincendi: Sunt enim aliqui, qui ad modum puerilem plus intendunt vincere disputando, quàm veritatem reperire. Quintum est pertinacia, quæ est, quando aliquis, postquam incepit ad hæere alicui sententiæ, siue vera, siue falsa sit, nunquàm auelli potest ab ea. Sextum est perturbatio, quæ apparet in modo loquendi, & in gestibus inordinatis: quæ specialiter vitare debet religiosus. Septimum multitudo verborum, præcipue cum inuicem proferuntur. Octauum nimia inquisitio rei, cum plene non possit veritas sciri de multis in præsentia. Item sunt aliqui, qui videntes aliquos disputare, statim se immiscet, sicut canes, qui videntes alios canes rixantes statim iuuant vnum, quod est stultitiæ signum. Prouer. 18. Labia iusti non miscent se rixis contra quos prudentis est hoc caute declinare, ad Titum. 3. Contentiones deuita. Item sunt alij, qui non solum immiscet se, sed totam disputationem alijs auferentes, sibi assumunt. Prouer. 26. Sicut qui apprehendit auribus canem; sic qui transit impatiens, & commiscetur rixis alterius. Hæc enim natura est canis apprehensi per aurem, quòd si rixatur cū alijs statim dimittit alias rixas, & insurgit in apprehendentem suam aurem,

& remanet tota rixa inter eos solos. Item quidam adeo se clamose habent in disputando, quòd non videntur esse de discipulis illius, de quo scriptum est Mat. 12. Non contendet, nequè clamabit, nequè audietur in plateis vox eius. Item sunt aliqui, qui inutiles suscitant disputationes, vt de lana caprina, & huiusmodi. Item quidam de non pertinentibus ad se, vt de guerris principum. Vnde rex Franciæ quibusdam monachis dixit. Miseri monachi eatis legere psalmum vestrum, quid habetis vos intro-mittere de negocijs, quæ sunt inter nos reges? Erat enim guerra inter regem Angliæ, & Franciæ, de qua illi disputabant. Sunt etiam aliqui malitiosi, qui intendunt hominem capere in sermone, vel confundere ostendendo ignorantiam eius, uel ad irreligiositatem ipsum prouocando. Et ideo valde cauendum est de talibus Prouer. 24. Non cõtendas cum homine pessimo.

DE CAUTE LA CIRCA RECI-
piendos. Cap. CXL.

R Estat prosequi de quinto notabili, quod dicitur ex isto mandato. (Codices) Nam recipiendos, quos conuenit esse tales, quod ea, quæ sunt in codicibus, intelligant competenter, cum in eis quotidie legere dicantur secundum illud mandatum. Sciendum igitur, quod regulariter cauendum est, ne personæ minus sufficientes recipiantur in ordine prædicatorum. Cum enim sit contrariū, fit interdum, quòd huiusmodi personæ graues tentationes incurrunt, cum vident se non posse facere, quod socij sui faciunt, siue in prædicando, siue in consulendo, & similibus, propter quod prohi-

bitum fuit in lege. Deuter. 22. Ne aretur in boue,
 & asino; quia asinus non potest facere propter debilitatem, quod facit bos. Et ideo in tali societate grauarentur. Item sequitur ex hoc periculum non modicum animarum, cum oportet interdum tales exponi ex quadam necessitate ad ea, quæ alij faciunt circa animarum salutem: Et ideo cum sint cæci, & cæcos ducunt, ambo in foueam cadūt. Item sequitur ordinis contemptus. Sicut enim propter personas uenerabiles ordo veneratur; ita propter contemptibiles contemnitur. Item multi magni viri propter hoc resiliunt a proposito veniendi ad ordinem. Item sequitur ruina ordinis subtrahitis lapidibus gradibus; sicut dicitur de domo supra arenam fundata Mat. 7. ¶ Sed sciendum, quod plus, & minus oportet hoc obseruare pro tempore, & loco: quia sicut in fundatione Ecclesiæ Dominus dedit viros magnos, scilicet Apostolos; ita in fundatione ordinis a principio solet inspirare viris magnis, ut ad eorū fundationem intrent huiusmodi homines, quales post lapsum temporis non ingrediuntur: Et ideo nisi reciperentur minus sufficientes, nulli reciperentur pro loco: quia aliquæ sunt regiones, quæ non abundant in personis multum sufficientibus: & ideo oportet in illis minus sufficientes recipere, & postea enutrire diligenter: Nā & in fundatione humani generis Deus primos parentes fecit perfectos ætate, & scientia: Sed postmodum oportebat, quod ipsi, & successores eorum laborarent circa filios ad producendum eos ad perfectum. Sic etiam fecit Christus in principio Ecclesiæ dans magnos viros, quos ipsemet perfecit scientia, & uirtutibus; sed postmodum oportuit, quod Ecclesia magnam curam apponeret ad habendum

dum similes successores : sicut etiam faciunt ædificantes . Non enim expectant semper, quòd apporentur eis lapides expoliti, & ligna leuigata; sed huiusmodi elaborant, ut faciant apta operi suo .

¶ *DE NECESSARIIS SINE MORA ministrandis. Cap. CXXXXI.*

V *Estimenta vero, & calceamenta : quando indigentibus fuerint necessaria, dare non differant, sub quorum custodia sunt, quæ poscuntur.*

¶ Ex hoc mandato tria eliciuntur . Primum est, quòd ministri cauere debent, ne protrahant moram in eis, quæ tradenda sunt . Propter quod dicit (dare non differant.) Secundum est, quòd hoc resirigendum est ad necessaria tantum, quia alia nec peti debent, nec tradi : Et ideo dicit (quando indigentibus fuerint necessaria.) Tertium est quòd dam notabile circa horum custodiam : cum dicit (sub quorum custodia sunt, quæ poscuntur.) Circa primum nota, quòd ad officiales tria pertinent, ut faciant bene sua officia . Primum est, ut ea faciant diligenter, propter quod dictum est supra . (Omnia autem opera uestra iu unum fiant maiori studio, & frequentiori alacritate, quàm si uobis singuli faceretis propria.) Aliud est, quòd seruiant sine murmure; Et ideo iterum dictum est supra . (sine murmure seruiant fratribus suis.) Aliud est, quòd tradant tradenda . ¶ Nota circa primum principale, quòd non debet Dei seruus esse morosus in tradendis necessarijs fratribus, & hoc propter fratrem, ne eum affligat, propter seipsum, ne seruitij sui gratiam amittat; ne apud Deum minus meritum habeat : quia secundum Greg. Cor

Deus non substantiam pensat, nec perpendit quid in eius sacrificio, sed ex quanto proferatur. Et Proverb. 3. Ne dicas amico tuo uade, & reuertere, & cras dabo tibi, cum statim possis dare.

¶ *DE SUPERFLVITATE*
cauenda. Cap. CXLII.

Circa secundum notandum; quòd licet circa omnia cauenda sit superfluitas viris religiosis; tamen magis circa vestimenta, & calceamenta. Narrauit Magister Iordanus, me audiente, quòd cum duo religiosi familiares valde in Deo condixissent, vt, qui prius moreretur, rediret ad alterum, & diceret ei de statu suo: Contigit autem unum pramortuum redire ad alterum: Videbatur autem uiuenti, quòd ille mortuus in claritate magna esset a cingulo supra, & inferius in magna obscuritate; Et cum quæreretur a defuncto, quid hoc esset; quia credebatur continens fuisse. Non est inquit propter hoc, quia uirginitatem seruauimus per Dei gratiam: Sed alia die, quando fuerunt mihi datæ caligæ nouæ, tradidi obliuioni reddere ueteres, & ideo punior in tibijs; Sed obsecro, ut uadas ad lectum meum, & inuenies eas in tali loco, & redde eas. Et sic disparuit.

¶ *DE CUSTODIA VESTIVM.*
Cap. CXLIII.

Circa tertium nota, quòd aliquis locus specialiter debet haberi ad vestium custodiam deputatus. Et huius est triplex ratio, Prima est, ne vestes dimissæ pereant: Si enim hoc cauendum est

in

in fragmentis panis secundum uerbum Domini Ioh. 6. multo magis in his, quæ melius valent. Secunda est, ne singularem sollicitudinem, quàm Dominus inhibet circa vestimenta. Mar. 6. quilibet cogatur habere de suis, cum eas dimittit, cum sit communis custodia. Tertia ne ab extraneis lectiones fratrum uisitantibus uideantur multa in multis locis, quæ oculos eorum offendant; cum secundum regulam cauendum sit, ne aliquid in fratribus uideatur, quod offendant intuitum aliorum.

¶ *Quintum capitulum Regula.*

¶ *DE LITIBVS CAUENDIS.*

Lites aut nullas habeatis, aut quàm celerrime finitis; ne ira crescat in odium, & trabem faciat de festuca, & animam faciat homicidam. Sic enim legitis. Qui odit fratrem suum, homicida est.

¶ Hic incipit quintum capitulum, in quo de his agitur, quæ pertinent ad religionem, in quantum est status fraternitatis. Porro ad religionem, in quantum est status huiusmodi, pertinet fraterna dilectio. Ut autem hæc semper uigeat inter religiosos modo debito, cauendum est eis ab illis, qui eam perturbant. Item laborandum est eis, ut turbata reparetur. ¶ Item Sciendum est eis qualis esse debeat. Et ideo in hoc capitulo ponit mandata circa hæc tria. Primum hic. Secundum ibi (quicumque autem.) Tertium ibi. (Non autem carnalis.) Porro turbatio dilectionis fraternæ solent esse lites: Et ideo circa istas ponitur hic mandatum, & continet duo. Vnum est de cauendis litibus, propter quod dicit (lites aut nullas habeatis) Aliud est de-

terminandis : ibi (aut quàm celerrime finiatis.)

Cap. CXLIV.

Circa primum nota, quòd litigare non est res, quæ deceat viros. Sen. Litigare muliebre est. Item ribaldorum est commorantium in tabernis : prouer. 23. Cui rixæ : nonne his, qui morantur in vino, & student calicibus epotandis ? Item demoniacum est. Aug. Nihil est similius actibus dæmonum, quàm litigare non erubescunt. ¶ Legitur in vitispat. quòd dictum fuit Sancto Machario, qui fuit excellentissimæ vitæ quòd nondum venisset ad mensuram duarum mulierû, quæ erant inciuitate : Et cum venisset illuc, & requisuisset de vita earû, inuenit, quòd erant vxores duorum fratrum, & quindecim annis insimul commoratae fuissent, & numquam litigassent inter se. ¶ Sciendum, quòd tria solent esse occasio litium. Primum est rerum proprietas, quia vnus dicit, hoc est meum, & alter meum. Sen. Quietissime viuerent homines, si tollerentur ista duo pronomina meum, & tuum. Aliud est carnalis necessitas : vt cum non prouidetur alicui, sicut caro sua requirit, Iaco. 4. Vnde lites in vobis : nonne ex concupiscentijs vestris, quæ militant in membris vestris ? Tertium est superbia. Prouer. 13. Inter superbos semper iurgia sunt. Quàm longe debent ergo esse lites a religiosis, qui nihil possunt habere proprium, qui debent esse ex toto secundum carnem mortificati, & summe humiles spiritu. Vnde Apostolus. Seruum Dei non oportet litigare sed mansuetum esse ad omnes. ¶ Porro ad cauendum lites sunt multa remedia. Primum refrenatio interioris cômotionis per silentium : Cum enim

enim qui dimittit aquam, caput fit iurgiorum: sicut dicitur Prouer. 17. Ecce contrario qui continet huiusmodi impetum, causa est quietis, & pacis. Et ideo bene dicitur Eccles. 28. Ne struas ligna in ignem linguati: Quod fit cum habentur cum eo verba litigiosa. Tertium est deuitatio verborum habentium materiam litigiosam. 2. Tim. 2. Stultas, & sine disciplina quaestiones deuita sciens, quod generant lites. Quartum est cauere ab illis, quæ sunt occasio litis, vt iactantia. Prouer. 28. Qui se iactat, & dilatat, iurgia excitat. Item derisio. Prouer. 22. Eijce derisorem, & exhibit cum eo iurgium. Item iracundia Eccles. 28. Homo iracundus intendit litem. Item peruersitas Prouer. 26. Homo peruersus suscitatur lites.

Cap. CXLV.

Circa secundum nota, quod quando lis orta non cito terminatur, sumit magnum damnum, sicut de igne, quando accensus non cito extinguitur. Et ideo beatus August. circa terminationem duo ponit, videlicet quod terminetur non solum cito, sed celerrime. Et causam subiungit dicens. (Ne ira crescat in odium.) Quantum autem malum sequatur ex ira crescente in odium, ostendit per duo, quæ ex hoc sequuntur scilicet. Excitatio animæ in iudicando. Propter quod dicit (& trabem faciat de festuca) Aliud est homicidium eiusdem: ideo addit (& animam faciat homicidam) Quod probat per illud 1. Iohan. 3. Qui odit fratrem suum, homicida est. Porro ad terminandum litem exortam multa sunt, quibus solent vtiri viri sancti. Vnum est, quod recedunt caute de loco, in quo est lis. Exemplum
de

de quodam Philosopho, cui, cum quidam malediceret, dixit; Vt tu linguæ tuæ, ita & ego aurium mearum Dominus sum. Aliud est, quòd cogunt se ad silentium ponentes custodiam ori suo, dum consistit aduersus eos litigator. Prouer. 26. Qui imponit stulto silentium, iras mitigat. Aliud est, quod reprimit impatientiam suam; ita vt nec verbo, nec signo, nec facto videatur moueri, prouerb. 15. Qui patiens est, mitigat rixas suscitatas. Aliud est dulcis responsio. Prouer. 15. Responsio mollis frangit iram, sermo durus suscitatur furorem. Aliud est, quia cedunt causæ litis. Exemplum de Abraham, qui recessit a Loth. Aliud est, quia se humiliant erga iniuriantem petentes veniam ab eo. ¶ Et nota, quòd nisi cito terminentur lites, in corde sequitur odium, quod excæcat animam: In ore malum verbum, quod offendit proximum: In opere percussio,

Q Vicunque ergo conuicio, vel maledicto, vel etiã criminis obiectu aliquem læserit, meminerit satisfactione quàm citius curare, quod fecit, & ille, qui læsus est sine disceptatione dimittere.

¶ Postquàm tradidit mandatum circa turbationem charitatis fraternæ: hic tradit mandatum circa reparationem dilectionis turbatæ. Circa hoc autem prosequitur duo. Primo enim dicit, quid sit ad hoc faciendum. Secundo, ponit diuersitates eorum, quæ circa hoc male se habent secundum plus, & minus: ibi (melior est autem) Porro turbatio dilectionis fraternæ solet accidere quandoque ex culpa vnius solum, quandoque ex culpa duorum. Et ideo circa reparationem eius tradit mandatum in vtroque casu. Circa primum hic. Circa secundum ibi (Si autem inuicem se læserint.) Porro ad

repa-

reparationem charitatis inter offendentē, & offensum sunt duo necessaria scilicet satisfactio ex parte offendentis, & remissio ex parte offensi.

¶ DE SATISFACTIONE.

Cap. CXLVI.

CIrca primum nota, quod conuictum prout, proprie accipitur, dicitur exprobratio alicuius vilis conditionis, quæ potest esse sine peccato, sicut aliquis vocatur filius spurius & similia. Sic conuiciatus est Saul filio suo Ionathæ. 1. Reg. 22. Fili mulieris ultro capientis virum. Maledictum est imprecatio alicuius mali alterius: sicut faciebat Goliath David 1. Reg. 17. Maledixit philistæus David in dijs suis. Obiectio vero criminis est impositio alicuius facti culpabilis: sicut accidit coram Salomone de duabus mulieribus 3. Reg. 3. Vix autem inuenitur aliquod genus verborum, per quod litigantes se lædant, quod reduci non possit ad aliquod istorum. ¶ Et nota, quod valde grauis est plaga linguæ; Vix enim inuenitur aliquis adeo armatus patientia, qui non saucietur a lingua. Exemplum de Iob: qui non fuit motus ad damna rerum, vel corporis, & tamen videtur motus fuisse ad linguam vxoris dicens ei. Quasi vna de stultis mulieribus locuta es. Quilibet autem tenetur ad satisfactionem læso. Apostolus Eph. 4. Sol non occidat super iracundiam vestram. Exemplum in vitis patrum. Abbas Agathon solebat dicere, Numquam dormiui in lite, nec litem habentē mecum dormire permisi, quantum ad virtutem meam pertinet, nisi in pace prius reuerterer cum eo. Triplex autem potest esse huiusmodi satisfactio: Vna est per verba, cum

cum quis petit veniam ab offenso. Sic faciebat August. scribens Hieronimo & dicens. Obsecro te per mansuetudinem Iesu Christi, si la si te, ignosce mihi: Alia est per corporis humilitatem, Sic fecit se mei David, cui maledixerat 2. Reg. 19. Prostratus coram eo dixit ad eum. Ne reputes mihi ad iniquitatem: nequè memineris iniuriam serui tui. Alia est per obsequia, sicut Iacob uoluit muneribus placare fratrem suum Esau. Apostolus Ro. 12. Si esurierit inimicus tuus, ciba illum: Si sitit, potum da illi, quasi diceret, per hoc placabis eum, & redibit amicitia. ¶ Vtrum offendens teneatur ad reconciliandum fratrem statim, antequàm accedat ad offerendum aliquid Domino in altari, cum hoc videatur Dominus mandare Mat. 5. Respondetur; si est absens sufficit offendenti propositum satisfaciendi sine mora, cum poterit, sicut in restitutionibus, nec oportet in hoc casu, q̄ vadat pedibus, sed sufficit animo secundum Augustinum. Si vero est præsens, aut offensa est levis, ita quòd non creditur offensus grauitur turbatus, potest differri satisfactio vsquè ad tempus moderatum, si vero grauis, debet sine mora satisfieri. ¶ Quaritur. Si aliquis posuit alij culpam, & læsus non vult accipere satisfactionem a lædente, nisi dicat se mentitum fuisse, nunquid tenetur ad hoc lædēs? Respondetur. Si offendens scit se dixisse verum: nullo modo debet dicere contrarium, nec hoc debet ab eo requiri: Si autem scit vel credit se dixisse falsum, vel dubium, secundum quod est in sua conscientia, sic restituere tenetur; potest tamen adijcere aliqua alleniantia culpam suam, videlicet quòd ex animi perturbatione hoc dixit, vel quòd ita audierat, vel credebatur esse; licet modo reputet falsum. Ad hoc autem, quòd

quòd dicat se mentitum fuisse, non tenetur, quia per hoc reuelaret secretum mentis sue, & peccatum suum, quod sibi multum noceret, & alijs non proderet, quia ita restauratur alij fama per hoc, quòd recognoscit se falsum dixisse; sicut si diceret se mentitum fuisse.

DE REMISSIONE INIURIARUM.

Cap. CXLVII.

Circa secundum nota, quòd quidam inueniuntur, qui ita discordes sunt ad remittendum iniuriam, quòd vix, vel nunquàm possunt duci ad remittendum: Isti vere non sunt viri Christiani, qui inunguntur ad habendum cor molle ad pietatem: sed sunt sicut iudæi sine vnctione, duri ad vindictam, volentes oculum pro oculo, dentem pro dente. Immo sunt sicut Holofernes, de quo dicitur, quòd ferocitatem animi eius mitigare non poterant. Immo quod peius est, sicut dyabolus, de quo dicit Gregorius, quòd nullo potest placari obsequio. Contra hos est, quod dicitur de Cæsare, quòd nullius solebat obliuisci, nisi iniuriarum. Vnde Seneca. Remedium iniuriarum est obliuio. Scriptum est etiam apud naturales, quòd leo parcat prostratis. Item sanctorum est non solum remittere, sed etià benefacere inimicis, vt dicitur Matth. 5. Item Christus orauit pro crucifigentibus dicens. Pater ignosce illis: quia nesciunt, quid faciunt. ¶ Præterea qui non remittit proximo, nec Deus remittet peccata sua. Matth. 6. Si non dimiseritis hominibus, nec pater vester cœlestis dimittet vobis peccata vestra. Immo quod peius est, dimissa repetit, vt patet in Euangelio de seruo ne q̄ Matth. 18. Immo,

In mo, quod magis timendum est, cum graui poena extorsit, eum tradens tortoribus. Ideo dicitur Eccles. 3. Cor durum scilicet ad remittendum male habebit in nouissimo: quia scilicet non inueniet remissionem. Sed sunt aliqui, qui discutientes culpas offendentium multam prætendunt difficultatē, modo quia grauis est offensa, modo quia multæ sunt, modo quia multotiens commissæ, & remissæ. Non sic facit dominus, qui & magna dimittit. Ioel. 2. Et præstabilis super malitia: Malitia enim sonat culpam grauem. Et multa etiam dimittit. Esa. 55. Multus est ad ignoscendum. Item multotiens. Mathei. 18. Non dico tibi Petre septies, sed vsquē septuagies septies.

Si autem inuicem se laeserint, inuicem sibi debita relaxare debebunt propter orationes vestras, quas utiquē quanto crebriores habetis, tanto sanctiores habere debetis.

¶ Tradito mandato circa reparationem charitatis fraternæ turbatæ ex culpa alterius, ponit hic mandatum circa idem, cum turbatio procedit ex turba vtriusquē. Continet autem hoc mandatum tria. Primo substantiam mandati. Secundo causam. Tertio causam causæ. Secunda: ibi (propter orationes vestras) Tertia: ibi (quas utiquē) ¶ Circa primum sciendum, quod aliter se habent ad inuicem mali, aliter boni. Mali enim male se habent corde per inuidiam. Gal. 6. Inuicem inuidentes, ore per mutuam corrosionem, opere per iniurias: quandoque etiam male iudicando, vel inuentiando, vel mutuo se defraudando. Econuerso boni bene ad inuicem se habere debent, & hoc multis modis; debent enim sensum suum alijs conformare, de se-
ipsis

ipsis sollicitam curam gerere, tanquàm eiusdem corporis membra, de altero meliora sentire, onera mutuo patienter portare, beneuolentiam sibi mutuo exhibere, honore inuicem præuenire, propter Deum se sibi subijcere, ad bonum se inuitare, diligenti ab alijs desiderare, mutuas offensas liberaliter relaxare.

§ IMPEDIMENTA ORATIONIS.
Cap. CXLVIII.

Circa secundum nota, quòd tria sunt præcipue quæ impediunt orationis effectum. Primum est peccati gravis conscientia; Qui enim cum tali peccato, de quo non pœnitet, accedit ad orandum, quomodo a Domino obtinebit aliquid, cum illud ante oculos deferat, quo summe eum offendit. Psal. Iniquitatem fr̄ asperi in corde meo; non exaudiet Dominus. Secundum est in misericordia. Prouer. 2. Qui obturat aurem suam ad vocem pauperis, clamabit ipse; & non exaudietur. Tertium est crudelitas in alterum. Esa. 1. Cum multiplicaueritis orationes vestras non exaudiam; manus enim vestrae plenæ sunt sanguine.

§ QUAE SUNT SERVANDA IN
oratione. Cap. CXLIX.

Circa tertium nota, quòd viri spirituales debent in orationibus specialiter habere tria sci licet mentis intentionem. Apostolus. Orabo spiritu. Et ad hoc induxit Augustinus superius cum dixit (Cum oratis Deum, hoc versetur in corde, quod profertur in ore.) Item frequentia assiduitatis.

ris Apostolus. Orationi instantes. Et ad hoc induxit superius, cum dixit (orationibus instate) Item munditia sanctitatis exemplo Iob dicentis, Cum haberem mundas ad Deum preces: Sanctum enim idem est, quod mundum.

Melior est autem qui quamvis saepe irascitur, tamen impetrare festinat, ut sibi dimittat, cui se fecisse agnoscit iniuriam; quam qui tardius irascitur, & ad veniam petendam tardius inclinatur. Qui autem nunquam vult petere, aut non ex animo petit, sine causa est in monasterio, etiam si inde non proyiciatur.

¶ Traditis mandatis circa reparationem turbatae dilectionis, hic subiungit diuersitates eorum, quæ circa hoc se habent diuersimode, ut ex hoc appareat, quæ circa hoc sunt culpabiles plus vel minus. Sunt autem tres differentiae horum, sicut patet ex litera. Quidam enim facile irascuntur, & cito veniam petunt; & hi sunt sicut aqua, quæ cito calefit, & cito frigescit, & hoc est minus malum. Quidam tardius irascuntur, & inclinantur tardius ad veniam petendam hi sunt sicut ferrum ignitum, quod tardius calefit, & tardius frigescit, & hoc est peius. Quidam autem sunt qui numquam volunt petere veniam, & hi sunt sicut lapis Abeston, qui accensus semel, numquam extinguatur, sicut dicit Aug. de ciuitate Dei, & hoc est pessimum. Propter quod dicit de istis, quod (sine causa sunt in monasterio.)

¶ DE VENIA PETENDA.

Cap. CL.

Circa primos nota, quod non dicuntur meliores propter iræ frequentiam; cum secundum Iaco.

Iaco. Omnis homo debeat esse tardus ad iracundiā, sed propter celerem satisfactionem (quia ira turbat oculum rationis) iratus, ut frequenter quod malum est, putat iustum. Prædicti vero cito cognoscunt culpam suam: Et ideo eorum ira non videtur multum gravis: quia non multum obscurat eorum iudicium. Item signum est bonæ naturæ, cum cito se purgat a nociuo, ut bona complexio a superueniente infirmitate. Ita bonæ conscientiæ est, cum sentit se læsam esse, statim compescere. Vnde super illo verbo. Psal. Irascimini, & nolite peccare, dicit glo. Iustitia est iræ celeri pœnitundine mitigare. Item sicut dicit decretalis. Delicta tanto grauiora sunt, quanto diutius tenent obligatam animam infelicē. Iniuria vero, quam non sequitur celer satisfactio, diutius tenet animam. Et ideo melior est, qui post offensam licet frequentem cito satisfacit, quàm qui tardius. Tres ergo sunt causæ, quare talis est melior, videlicet quia cito culpam cognoscit, & cito se purgat ab illa, & iniuriam in alium commissam non prolongat. Bene igitur dicit Apostolus. Sol non occidat super iracundiam vestram.

CIrca secundos nota, quòd ille, qui tardat veniam petere post offensam commissam, charitatem fraternam, quam turbauit, differt reparare; satisfactionem suæ salutis necessariam protrahit facere, iram Dei cōtra se exortam occasione commissi in suum seruum contemnit placare: Vnde tale videtur laborare vitio accidiæ, quia tarditas ad bonum pertinet ad accidiam. Similiter vitio iræ, quæ nondum videtur ab eo sedata: Similiter vitio superbiæ, ex superbia enim procedit, quòd lædēs læso satisfacere dedignatur, est ergo triplex funiculus in eius

collo, quo trahitur a dæmonibus ad infernum. Dirumpamus (ait Psal.) vincula eorum.

Circa tertios nota, quòd tribus de causis solet contingere, quòd aliquis non petit veniam a læso. Vna est cordis cæcitas: Ira enim obscurat animam, & non recognoscit quis interdum se culpam habere, vbi habet, & quia non cognoscit culpam, non petit veniam: istud autem multum elongat a salute; quia cum secundum Senecam initium salutaris sit cognitio peccati, e contrario elongatio est a salute hoc initium non habere. Alià est simulata iustitia; cum quis dicit; non expedit illi, vt ego me sibi humiliem; quia inde esset superbior, & similia: Si autem hæc ratio bona esset, tunc non debuit se Christus humiliasse; quia eius humilitas multis fuit in ruinam. Tertia est superba duritia cordis, quod habebit male in nouissimo die: Deus enim populum humilem saluum faciet, & oculos superborum humiliabit. Bene ergo sanctus Aug. dicit, q̃ (talis sine causa est in monasterio) cū salutem eius, propter quàm sunt monasteria, impediatur. Nam sicut non dimittitur peccatum, nisi restituatur ablatum, ita non dimittitur, nisi satisfaciatur læso. Dicitur in vitis patrum, quòd dixit quidā senex. Quia si quis dicat alicui, ignosce mihi, humilians se comburit dæmonum tentationes.

Proinde vobis a verbis durioribus parcite, quæ si emissa fuerint ex ore vestro, non pigeat ex ipso ore proferre medicamenta, unde facta sunt vulnera.

¶ Traditis mandatis ad cauendum perturbationem dilectionis fraternæ, & ad reparandam eandē dilectionem, ponit hic exhortationem ad vtrumq̃, quæ

quæ sequitur ex primis. Et propter hoc dicit (proinde) Primo ponit principale; deinde quoddam incidens circa illud. ibi (quando autem necessitas &c.) Principale vero mandatum continet duo: Primo exhortationem ad cauendam dictam perturbationem: cum dicit (proinde vobis) Est enim sensus, idest à verbis durioribus infirmitatis humanæ vitio prouidentes (cauete.) Secundo reparationemurbationis. ibi (quæ si emissæ.)

Circa primum nota, quòd est duplex duritia scilicet in Deum, & in proximum. Prima est triplex scilicet cordis, contra quod dicit Psal. Si vocem eius audieritis, nolite obdurare corda vestra; Quædam verborum. Iudicum primo Arguet impios de duris verbis, quæ locuti sunt contra eum: Alia vero operum. Io. 8. Tulerunt lapides, per quos intelliguntur opera dura, vt iacerent in eum. Secunda etiam triplex, quædam in corde per incompassionem in necessitatibus fraternis. Bern. Cor durum est, quòd nec compassione mouetur; & ideo iustum est, vt male habeat in nouissimo, sicut dicitur Eccl. 3. Vt non inueniat apud Deum misericordiã; sicut nec proximus inuenit apud eum. Prouer. 28. Qui vero mentis est duræ, corruet in malum scilicet in fine. Alia est in verbis. Gene. 42. Quasi ad alienos durius loquebatur eis. Alia est in operibus. Exo. 10. Ad amaritudinem ducebāt vitam eorum operibus duris. Et licet cordis, & operum duritia sit valde reprehensibilis, tamen frequens verborum duritia plus nocet; nam generat summam perturbationem, inducit grandem rebellionem, subtrahit amicos. In huius signum dixit Dominus ad Esau, Caue, ne loqueris contra Iacob quicquàm durius;

Si ergo cauendum est Esau viro malo & in fratrem, qui multum in eum deliquisse videbatur, quanto magis cauendum est viro sancto, ne dure loquatur fratri suo in Christo? Et ideo bene dicit (vobis a verbis durioribus parcite.)

¶ *DE MALIS, ET BONIS
lingua. Cap. CLI.*

Circa secundum nota: quòd os quantum ad locutionem, cum sit organum speciale rationis, ex quo solo procedunt bona, & mala, est super omnia membra humana habile ad bonum, & malum. Hinc est, quòd lingua dicitur habere manus scilicet sinistram, quo ad mala, quæ facit, quæ ducunt ad mortem, dextram vero ad bona, quæ facit, quæ ad vitam ducunt. Prouer. 18. Mors, & vita in manibus linguæ. Hinc est etiam, quòd Dominus dicit. Mat. 12. Ex verbis tuis iustificaberis, & ex verbis tuis condemnaberis. Et Iaco. 3. Ex ipso ore procedit maledictio, & benedictio Eccles. 37. Ex corde quattuor partes oriuntur, bonum, & malum, mors, & vita; & damnatrix illorum est assidua lingua. ¶ Deinde notandum, quòd sicut lingua dicitur vniuersitas iniquitatis. Iacobi. 3. Ita & abundantia bonorum egreditur ab ore; quæ sunt confessio fidei, confessio peccatorum, oratio, correctio peccatorum, edificatio proximi, consolatio eiusdem, laudatio Dei, gratiarum actio, honoratio. De his prouerb. 12. De fructu oris sui vnusquisquè repletur bonis suis.

Quando autem necessitas disciplina in moribus coercendis dicere vos dura verba compellit, *scilicet etiam*

etiam ipsi vos modum excessisse senseritis, non a vobis exigitur, ut a vobis subditis veniam postuletis; ne apud eos, quos oportet esse subiectos, dum nimium servatur humilitas, regendi frangatur auctoritas.

¶ Quoniam præcedenti mandato in quo dictum est, quod si emissa fuerint dura verba ex ore, eodem ore petatur venia, posset credi, quod hoc in omni casu esset faciendum; ponit incidentaliter casum, in quo est exceptio, scilicet in prælato, & subdito. Determinat autem duo circa hoc: Primo de modo se habendi in hoc casu prælati ad subditos: Secundo de modo se habendi ad Deum ibi. (Sed tamen petenda est venia.)

¶ Circa primum nota, quod posset contingere, quod prælatus in duris verbis posset excedere erga subditum non causa regiminis, sed alia de causa mala, ut odij, invidiæ, & huiusmodi. Item causa regiminis posset excedere in eisdem casibus, in quibus non concurrit necessitas disciplinæ, ut in quibusdam minimis, quæ non sunt alicuius necessitatis. Item posset excedere in casu, in quo non compelleretur ad hoc; ut cum aliquibus alias simplicibus verbis exhiberent se subditi corrigibiles; in his autem casibus reprehensibile est prælato duris verbis uti ad subditos. Et ideo dicit. (in moribus coercendis) Contra primum: Et (necessitas disciplinæ,) contra secundum: Et (compellit) contra tertium, ostendens in quo casu sit hoc tolerabile. Item in hoc, quod dicit (non a vobis exigitur) non negat, quin possit fieri, & ad hoc excusatur prælatus. Item subdit causam huius cum dicit. (Ne apud eos.) Tria autem tanguntur in hoc casu, scilicet circumstantia casus, cum dicit. (Quando autem.) Excusatio ab humiliatione sequente, cum dicit. (Si etiam

ipſi vos) Et cauſa huius, cum dicitur: (Ne apud eos quos oportet.)

¶ P R A E L A T I P O S S U N T D U R E
loqui. Cap. CLII.

EX primo patet reprehensio quorundam, qui putant, quòd prælatus numquàm debeat dure loqui ſubditis, ſed ſemper manſuete. Sicut enim propter duros lapides inuenti ſunt mallei duriores; ſic quorundam duritia requirit, vt cauſa diſciplinæ duris verbis corrigantur. Apoſtolus. Increpa illos dure. Huiusmodi exemplum reliquerunt nobis Patriarchæ. Quid enim durius niſi quod dixit Noe Gen. 9. Maledictus Chanaam puer? Item. Gen. 49. dixit Iacob ad Ruben. Non creſcas. Et ad Symeonem & Leui. In conſilium eorum non veniat anima mea; maledictus furor eorum. Heli cum poſteritate ſua reprobatus eſt a ſacerdotij ſui dignitate: quia non dure, ſed molliter correxit filios ſuos; & ideo duros dure conuenit reprobare. Eſa. 48. Ad populum Iacob. Scio, quia durus es, & neruus ferreus ceruix tua, & frons tua ænea eſt. Et Hieremias. 30. ad populum. Propter multitudinem iniquitatum tuarum dura facta ſunt peccata tua. Item Act. 5. Petrus: cur tentauit Sathanas cor tuum mentiri te ſpiritu ſancto? Paulus ad Gal. 5. O inſenſati Galathæ, quis vos ſcincinauit, & ſimilia. Stephanus etiam Act. 7. ad Iudeos. Dura ceruice, & incircumciſi cordibus vos ſemper ſpiritu ſancto reſtiſtiſti, ſicut & patres veſtri. Item Moyſes legiſlator, licet eſſet manſuetiſſimus omnium hominum, qui erant ſuper terram, tamen dure locutus eſt iudaico populo dicens. Scio contentionem tuam, & ceruicem

ceruicem tuam durissimam Deut. 31. Et Dominus iudeis. Vos ex patre diabolo estis. Bene ergo dicit vir sanctus, (quando necessitas disciplinæ dicere vos dura verba compellit) quia hoc aliquando sine dubio contingit.

Cap. CLIII.

Circa secundum nota, quodd licet causa disciplinæ liceat prælaro in dura verba prorumpere, non tamen sic excedendo tenetur se humiliare vsq; ad petendam veniam; non enim omnis humilitas est virtus, est enim quædam humilitas necessitatis. Psal. Propter iniustitias suas humiliati sunt. Et hæc nec est bona, nec mala, nisi propter vsum, vel abusum. Alia est adulatoria, vt cum quis alicuius beneficio indiget, humiliat se varijs modis. Eccl. 29. Donec accipiant, osculantur manus dantis, & in promissionibus humiliant vocem suam. Alia est falsa, vt Hypocritarum, vt efficacius possint nocere. Eccles. 19. Est qui nequiter se humiliat; & interiora eius plena sunt dolo; Quæ etiam potest dici malitiosa, sicut vulpis, quæ se humiliat ad terram applicans ventrem, vt melius capiat gallinam non se obseruantem ab ea. Alia est stulta, vt cum quis ex simplicitate sustinet non sustinenda. Eccles. 13. Noli esse humilis in sapientia tua; ne humiliatus in stulticia seducaris. Alia est nimia, vt cum quis se humiliat vltra, quàm deceat statum suum. Eccl. 19. Est iustus, qui se summittit nimium a multa humilitate, & sic facit prælatus, qui propter excessum in duro modo loquendi petit veniam a subdito, quod quia non est necessitatis, bene dicitur (non a vobis exigitur.) ¶ Dubitatur, cum hoc possit fieri, & non

fieri, quid sit melius. Potest dici, quòd secundum diuersas conditiones eorum, a quibus petitur *venia*, & sic secundum abstinentioniam potest hoc iudicari. Si enim tales magis ex hoc in bonum proficiunt, poterit fieri; si autem inde abutuntur ad superbiam, vt cum quis putat ex hoc se minus reum, vel prælatus magis culpabilem, vel fit audacior ad culpas, & similia: melius est non fieri. Neq; enim Dominus iudæis scandalizatis ex eius dictis, vel factis legitur vnquam satisfecisse; & hoc quia sciebat, quòd non proficerent ex hoc; quamuis discipulis interdum simili causa satisfecerit.

¶ *DE REGIMINIS AVCTORITATE conseruanda.* Cap. CLIV.

Circa tertium nota, quòd Rector vniuersitatis non solum habet summam prudentiam, per quam gubernat omnia, & summam bonitatem; per quam omnia disponit; sed etiam summam potentiam, cum in suo regimine non possit resisti illi. Istā potentiam communicauit Angelis, corporibus celestibus, & hominibus. Verum auctoritas prælati eneruatur quādoquē ex causis extrinsecis, quandoquē per indiscretas distributiones, vt cum per constitutiones humanas indiscrete restringuntur prælati, quādoquē per stultas exemptiones, vt cum aliqui eximuntur sine causa multum rationabili à potestate sui prælati, quādoq; per nimiam subiectę multitudinis libertatem, vt cum subiectis conceditur libertas nimia in prælatorum suorum limitatio ne, in eorū potestate reprimenda. Sunt enim multi, qui nimis mali inueniuntur more puerili, qui libenter frangunt virgas eos disciplinantes, & excutiunt

cutiunt a se magistrum hoc facientem. Ab intrinsecis vero quandoquē per culpam propriam, ut cū quis suo malo vitam suam auctenticam maculat, & contemptibilem reddit; quandoquē per defectum facti auctentici, ut cum quis non inuenitur talis in facto, qualis in verbo; quia non facit factum aliquod suæ conueniens dignitati; quāuis habeat verba magna; quandoq; ex indiscreta ad subiectos humilitate, ut in præsentī capitulo hæc enim omnia infringunt rectoris auctoritatem: Cum ergo omni regimini annexa debeat esse auctoritas, & ex minoratione eius multa mala sequantur, & per humiliationem nimiam ad subditos eneruetur: benedicit vir sanctus. (Non a vobis exigitur, ut a vobis subditis veniam postuletis: ne apud eos, quos oportet esse subiectos, dum nimium seruatur humilitas, regendi frangatur auctoritas) quæ scilicet annexa semper debet esse regimini; & illæsam expedit conseruari.

Cap. CLV.

Sed tamen petenda est venia ab omnium domino, qui nouit eos, quos plus iusto fortè corripitis, quanta beneuolentia diligatis.

¶ Tradito mandato de modo se habendi ad subditos in excessū durorum verborum casu, ponit hic mandatum de modo se habendi ad Deum in eodem casu. Dicit autem duo. Vnum de petitione veniæ a Deo in hoc casu; Aliud de confidentia obtinendi; ubi dicit. (Qui nouit.) ¶ Sed quæritur circa primū. Vtrum talis peccet in proximum. Si dicatur, quòd sic, tunc tenetur ei de incuria, & per consequens de satisfactione; Si non; tunc non videtur in aliquo peccasse;

peccasse; quia aliquod genus peccati non commisit; quare ergo petet veniam a Deo? R. Potest esse, & talis excedit in modo correctionis, & tamen non peccat in proximum; quia ille dignus est forte tanta, vel maiori correctione; quamuis corrigens eam in debito modo exerceat. Præterea si deliquit in proximum, tamen non tenetur ei ad satisfactionem veniæ; si ex hoc læditur bonum commune scilicet auctoritas. Item si etiam potest fieri talis satisfactio sine læsione prædicta, tamen non tenetur tantum subdito suo, qui est quasi res sua, quantum alieno. Sicut nec seruo suo quis tantum tenetur.

CASVS, IN QVIBVS EST VENIA
petenda a Domino. Cap. CLVI.

ET notandum, quod sunt quædam, super quæ viri sancti solent petere ueniam a domino, quâ uis hominum communitas hoc non faciat. Petunt enim veniam ab occultis, quæ uidelicet formidant se habere, quamuis nesciant. Psal. Ab occultis meis munda me Domine, item ab alienis, quæ contrahuntur ex cohabitatione cum malis eis adulando, uel eos non corrigendo, uel in aliquo malo participando. Psal. Et ab alienis parce seruo tuo. Item a peccatis pluribus. Psal. Delicta iuuentutis meæ ne menineris. Item a peccatis omissionis, quæ multi non reputant peccata. Vnde ecclesia. Mandatis tuis non obediimus, sed da gloriam nomini tuo, & fac nobiscum secundum multitudinem misericordiarum tuarum. Item a peccatis ignorantèr commissis. Psal. & ignorantias meas ne memineris.

DE MODO DILECTIONIS IN-
ter fratres. Cap. CLV. II.

Non autem carnalis, sed spiritualis debet inter
vos esse dilectio.

¶ In hoc capitulo quinto, quod est de dilectione,
fraterna, tradit mandatum ultimum circa dilectio-
nis modum dicens tria scilicet. Inter quos debeat
esse, quia (inter uos) Et qualis non debeat esse, quia
(non carnaliter) Et qualis debeat esse, quia spūalis.

¶ Circa primum nota, quod ad hoc, ut esset magna
dilectio inter suos, Christus super hoc dedit specia-
le mandatum dicens Io. 13. Hoc est præceptū meū,
ut diligatis inuicem. Item speciale dedit de hoc
exemplum dicens; Sicut dilexi uos; Item specialem
super hoc reliquit executionem, ut patet in Episto-
lis Iohannis. Quod licet sit inter omnes seruandū,
tamen inter religiosos eiusdem professionis magis
debet uigere huiusmodi dilectio. Similitudo enim
est causa dilectionis. Eccles. 13. Omne animal dili-
git sibi simile. Item membrum quodlibet alicuius
corporis naturaliter diligit eiusdem corporis mem-
bra. Apostolus. 1. Cor. 12. Si quid patitur vnū mem-
brum, compatiuntur omnia membra, quod est pro-
pter mutuam dilectionem naturalem. Item inter
Christi discipulos non debet esse inuidia, vel dis-
cordia, sed dilectio mutua Io. 13. In hoc cognoscēt
omnes, quod mei estis discipuli, si dilectionem ha-
bueritis ad inuicem. Cum ergo religiosi sint pro-
fessionis eiusdem, & simillimi sint in omnibus, &
eiusdem corporis membra, & Christi speciales di-
scipuli, quanta debet esse dilectio inter eos; Præte-
rea si secundum legem Christi debemus inimicos
diligere,

diligere, similiter etiam extraneos, similiter etiam malos Mat. 5. quanto magis fratres, qui vt amici, & domestici, & viri sancti debent intime diligere.

Cap. CLVIII.

Circa secundum nota, quòd carnaliter dilectio dici potest vno modo, qua diligit quis ad carnalia; sicut diligit mundus, quos ad ea diligit, quæ mundi sunt: Alio modo diligitur quis dilectione originata a carne; sicut diligunt propinqui carnales, & compatriotæ. Non ita dilexit Christus suos, quos docuit temporalia contemnere; sed in finem (inquit Ioh. 13.) Dilexit eos idest ad bona spiritalia, quæ sunt finis, ad quem debent omnes tendere. Item non propter carnales gratias, sed propter spirituales diligit. Vnde Iohannem, qui virgo, & quasi innocens fuit, specialiter dicitur dilexisse Io. 19. Item non ex naturali propinquitate solum, quia sic magis Angelos dilexisset, quos tamen nusquam apprehendit; sed ex spiritali radice charitatis; propter, inquit, charitatem qua dilexi vos. Et quia non vult huiusmodi dilectiones carnales esse in nobis: ideo Io. 13. dicit. Hoc est præceptum meum, vt diligatis inuicem, sicut dilexi vos; hoc est non sicut mundus, qui diligit ad bona temporalia; non sicut mali, qui diligunt ad carnalia; non sicut propinqui, qui solum diligunt dilectione ex carne nascente; sed sicut ego.

DE TURPI DILECTIONE.

Cap. CLIX.

Circa tertium nota, quòd est quædam turpis dilectio hominum ad inuicem, quæ oritur ex vitio

rio concupiscentiæ carnalis, & hæc est mala, nec vnquam debet esse, nec etiam debet nominari inter seruos Dei. Alia est naturalis, quæ oritur ex natura carnis secundum illud. Quis vnquam carnem suam odio habuit? & hæc, cum sit naturalis, non est bona, vel mala meritorie, nisi per excessum, vel diminutionem; & hæc solum non debet etiam esse inter eos. Tertia est, quæ oritur ex virtute. Apostolus. 2. Timo. 1. Dedit nobis spiritum virtutis, & dilectionis; & hæc debet esse inter eos. ¶ Porro duæ primæ possunt dici carnales; quia a vitio carnis, vel a natura oriuntur. Hæc autem spiritualis, quæ oritur ex charitate, quæ per speciem diffunditur in cordibus. Hæc dilectio differt ab alijs in multis, quæ sunt ad eius laudem. Est enim quædam dilectio, quæ versatur quandoquæ circa inhonestam aliquam, contra quam Valerius maximus narrat, quod cum quidam rogaretur ab amico suo, quod faceret quoddam, & rogatus attendens, quod illud esset inhonestum, respondit, quod hoc non faceret, eo quod esset inhonestum. Et rogans cum diceret, quid prodest mihi amicitia tua, si non feceris aliquid inhonestum pro me? rogatus respondit, & tua quid mihi prodest, si pro ea facerem inhonestum? Inde est, quod Tullius dicit. Hæc est lex in amicitia, vt nihil turpe rogemus, nequæ rogati faciamus. ¶ Item est dilectio, quæ in sola apparentia consistit. Ecclesi. 17. Est amicus solo nomine: Contra quod ad Rom. 12. Dilectio sine simulatione. Et talis non est dilectio charitatis. Apostolus. 2. Cor. 2. In charitate non ficta, quæ scilicet nescit fictionem. Item est alia dilectio verbosa. Iob. 16. Verbosi amici mei. Psal. Dilexerunt eum in ore suo, & lingua sua mentiti sunt ei, cor autem eorum non erat rectum

cum cum eo. Non talis est dilectio charitatis, immo ex intimis cordis. Apostolus 1. Tim. 1. Finis autem præcepti est charitas, de corde puro, & conscientia bona, & fide non ficta. Item sunt, qui diligere se dicunt, sed nunquam ostendunt hoc in effectu, contra quos dicitur de quodam philos. quòd dixerit. Tantum diligo inimicum, qui nihil mali mihi fecit, sicut & amicum, qui nihil boni mihi fecit. Talis dilectio charitas non est, quæ secundum Greg. numquam est otiosa. Item sunt aliqui, qui & si aliquid faciunt pro dilecto, tamen non magna, contra quos de charitate dicit Grego. Operatur magna, si est. Et Iohannes in Epistola. In hoc cognoscimus charitatem Dei, quia ille animam suam posuit pro nobis, & nos debemus animas pro fratribus ponere. Item sunt alij, qui non diligunt nisi diligentes se prius. Dilectio vero charitatis sine meritis præcedentibus exhibetur. Iohannes in Epistola 1. Io. 4. In hoc est charitas, non quasi nos dilexerimus eum, sed ipse prior nos dilexit. Item sunt alij, qui diligunt propter spem dilectionis humanæ, & dilectio huiusmodi reciproca negociatio dici potest. Hiero. Ista, quam tu describis, negociatio est, non amicitia. Dilectio vero charitatis utilitatem respicit dilecti, etiam si tribuatur malum pro bono, & odium pro dilectione. Felix igitur dilectio, & omni laude dignissima, quæ nichil habet inhonestatis, vel fictionis, quæ non in verbis solum, sed in corde, nec in corde solum, sed in opere consistit, quæ magna agit, & sine meritis præcedentibus, & sine spe retributionis humanæ. ¶ Sciendum, quòd beatus Iohannes, cui fuit specialis cura de dilectione fraterna inter homines habenda, ponit sex utilitates huiusmodi dilectionis. Prima est certi-

certitudo de resurrectione spiritali. Vnde dicit. Nos scimus, quoniam sumus translati de morte ad vitam; quoniam diligimus fratres, Secunda est illuminatio mentis; sicut enim recedente fumo remanet claritas in domo, ita recedente turbatione a fratre, quæ mentem obscurat, remanet claritas, quæ clare facit videre, & iudicare de rebus. Ideo dicit. Qui diligit fratrem suum, in luce manet. Tertia est euitatio scandali passivi; sicut enim mater ex dilectione, quam habet ad filium, sustinet omnia, quæ facit ei, licet graua. Ita & dilectio fraterna omnia sustinet; Eodem modo qui diligit fratrem suum, scandalum in eo non est. Quarta est diuinæ dilectionis indicium. Iohannes in canonica. Qui non diligit fratrem suum, quem videt, Deum, quem non videt, quomodo potest diligere? Glo. Frater tuus ymago Dei est; Si non diligis imaginem, nec eum, cuius est ymago, diligis. Quinta habitatio diuina. Sicut enim ubi sunt turbationes, & odia, habitat dyabolus ibi; econtra ubi dilectio sancta, ibi Deus 1. Ioh. 4. Si diligimus inuicem; Deus in nobis manet. Sexta est filiatio Dei. Per peccatum enim fiunt homines filij dyaboli, sed per hanc filij Dei 1. Iohan. 4. Omnis qui diligit fratrem suum, ex Deo natus est.

¶ *Sextum capitulum regulæ.*

¶ *DE OBEDIENTIA.*

P Reposito tanquam patri obediatur multo magis presbytero, qui omnium vestrum curam gerit.

¶ Hoc est capitulum sextum regulæ, quæ est de pertinentibus ad statum subiectionis, quod facit obe-

obedientiā. Et ideo circa hoc tradit hoc vnicum pertinens ad obedientiam; & non plura, quia satis in hoc continentur in genere ea, quæ pertinent ad debitam obedientiam.

¶ *Ad quod notandum*, quòd duplex est obedientia bona, quædam est sufficiens, sed imperfecta, & est illa, qua quis obedit solum in his, ad quæ tenetur; alia est abundans, & perfecta, cum quis obedit in aliquibus bonis, licet non teneatur ex debito. Porro circa istam perfectam obedientiam, quia nemo ad eam ex aliqua regula arctatur, non tradit August. aliquod mandatum, sed circa primam, ad quam omnes regulares arctantur ex professione. Determinat autem quattuor in isto mandato ad istam obedientiam pertinentia, scilicet cui debeatur, & cum debeatur pluribus, quo ordine debeatur eisdem, & qualis debeat esse, cum redditur; & in quibus sit reddenda.

Cap. CLX.

SCiendum enim, quòd licet quidam viri sancti ex perfectione obedientiæ inueniantur obedire non solum maioribus, sed etiam paribus, immo etiam inferioribus interdum; cum secundum beati Benedicti regulam. Obedientiæ bonum non solū abbati exhibendum est ab omnibus; sed quòd etiā fratres sibi inuicem obediant. Tamen nullus religiosus quantacunque perfectionis tenetur obedire nisi maioribus suis, secundum illud Hebræ. 13. Obedite præpositis vestris, id est illis, qui vobis præferuntur. Et ideo determinans, quibus sit obediendum in religione, dicit Augustinus (præposito, & presbytero.) ¶ Item nota, quòd inter prælatos,

latos, est quidam prælatus, qui habet plenitudinē potestatis quo ad omnes, & quo ad omnia scilicet Papa, & huic quilibet religiosus, & regularis plus tenetur obedire, quàm cui libet prælato ecclesiastico: Alij vero sunt prælati, qui habent particularem potestatem, & quo ad subditos, & quo ad iurisdictionem; sed istis tenentur non omnes, sed solum subditi sui; & non nisi ad ea, quæ pertinent ad iurisdictionem. Item inter istos sunt, qui habent eisdem subditos, sed iurisdictiones distinctas in quibusdam, sicut abbas non exemptus, & Episcopus, quorum utriusque sunt monachi: & isti in quibusdam plus tenentur uni, quàm alteri, & e contrario. Nam in his, quæ pertinent ad disciplinam ecclesiasticam, plus tenetur monachus Episcopo, quàm abbati: In his vero, quæ pertinent ad suam religionem, cuius regimen habet abbas, tenetur plus abbati. Alij sunt, qui habent iurisdictiones non distinctas; tamen secundum plus, & minus. ut prior claustralis, & abbas; & hic plus tenetur subditus obedire superiori. Et cum Ecclesia Augustini esset ita ordinata, quòd Episcopus tenebat ibi locum abbatis, præpositus locum prioris, ut dictum est supra, cumq; adhuc idem seruetur in aliquibus Ecclesijs; Ideo volens ostendere, quo ordine obediendum sit in hoc casu maioribus, dicit præposito obediendum, sed multo magis presbytero, id est Episcopo. Alioquin, quomodo diceret ipsum presbyterum, vel præpositum curam habere ipsorū fratrum?

¶ DE MULTIPlici OBEDIEN-
tia. Cap. CLXI.

NOtandum etiam, quòd quædam est obedientia servilis iuxta illud. Servi obedite per omnia

nia Dominis carnalibus, ad Col. 3. Alia est filialis ibidem. Filij obedite parentibus per omnia. ¶ Porro seruilis obedientia, quam timor inducit, quod facit, facit inuite: Filialis vero, quàm amor inducit, quod facit, facit libenter. Illa cum murmure, ista simpliciter sine querela, & discussione; Illa cum tristitia, ista hilariter; Illa pigre, ista velociter; Illa fecte, ista viriliter; Illa superbe reputans se multa fecisse, ista humiliter reputans se seruum inutilem; Illa cito quiescit, ista infatigabiliter laborat vsq; ad mortem. Et isti septem gradus obedientiæ sunt secundum Bern. Et ideo volens Augu. determinare, qualis debet esse obedientia, dicit, tanquàm patri, non Domino vt sit obedientia filialis, sicut decet filios ecclesię, non seruilis, sicut fuit sub lege. Grego. Obedientia non seruili metu, sed charitatis affectu seruanda est. Hęc autem tanto laudabilior est, quanto laudabiliores ex se elicit circumstantias; sicut dictum est.

¶ *QUANDO NON OPORTET
obedire. Cap. CLXII.*

NOta insuper, quòd licet obediendum sit prælatis regulariter, tamen multi sunt casus, in quibus non tenentur subditi eis obedire. Primus est, quando præcipit cõtra Deum: quia magis oportet obedire Deo, quàm hominibus. Act. 5. Secundus, quando maior secundum distinctionem prædictam præcipit contrarium: Tertius, quando eximitur quis ab eo, qui potest, a potestate prælati sui: Quartus, quando præcipitur aliquid in derogationem iurisdictionis maioris prælati: vt si præciperet minor prælatus, quòd maiori visitanti non diceret aliquid

aliquid de reuelandis in visitatione. Quintus, quando nullo modo potest fieri, quod præcipitur. Nemo enim potest ad impossibile obligari, extra de regul. iure lib. 6. Sextus, si aliquid mandatur, per quod eiiciatur de obedientia promissa, ut si præciperet prælatus subdito suo, quod intraret alium ordinem. Septimus, cum præcipitur aliquid, quod est supra, vel infra, vel contra professionem factam; cum nemo teneatur ultra, quam alij tenentur, nisi ad id quod promisit: Octauus secundam quosdam, cum præcipitur aliquid impertinens ad professionem, ut si præciperet abbas monacho, quod tota die respueretur aues, præcipue si hoc faceret sine causa rationabili; nam si hoc faceret causa probandi obedientiam, vel ad exercendum patientiam, vel alia causa annexa professioni, esset secus.

§ DE COMMENDATIONE OBEDIENTIA. Cap. CLXIII.

DEinde notandum, quod inter omnes virtutes religioni necessarias, & de præcipuis est obedientia perfecta. Hæc enim est, quæ religioso dat pacem; qui enim minus est obediens, habeturbationes frequentes; quia non est promptus ad multa, quæ sibi imponuntur, ad quæ si esset promptus, haberet pacem. Prouerb. 13. Qui timet præceptum, in pace versabitur. Item hæc est, quæ acquirit homini gratiam maiorum suorum. Exemplum de abbate Siluano, qui cum quæreretur a quibusdam; cur discipulum Marcum plus alijs diligeret, duxit eos per cellas fratrum, & vocans vnum, hic non statim venit, similiter & multi fecerunt; cum autem venisset ad cellam Marci, & vocasset eum, ipse scri-

bebat, & relicta littera imperfecta, statim venit ad
 eum; quo viso dixit abbas eis, ecce quare diligo
 eum. Et illi, vere plus diligendus est a te; quia Deus
 plus diligit eum. Item hæc est, quæ totam congrega-
 tionem, quam inobedientia perturbat, pacificat
 1. Mach. 4. Siluit terra omnibus diebus Simonis, qui
 interpretatur obediens. Item hominem utilem fa-
 cit suæ congregationi; bonus enim obediens est,
 sicut asina, quæ erat in Hierusalem communis, quæ
 quilibet poterat accipere ad quoscunque vsus. Item
 facit hominē nobilissimē triumphare de hoste for-
 tissimo, scilicet animo suo, cui qui dominatur me-
 lior est secundum Salomonem expugnatore vrbiū.
 Prouerb. 21. Vir obediens loquetur victorias. Greg.
 Dum alienæ voci humiliter obedimus, nosmetip-
 sos in corde superamus. Item facit Deo sacrificium
 acceptissimum 1. Reg. 15. Melior est obedientia,
 quàm victimæ; quia secundum Grego. Per obedien-
 tiam propria voluntas mactatur 7. Moralium. Item
 facit preces apud Deum efficaces. Gregorius. Si
 obediētes fuerimus præpositis nostris, obediet
 Deus orationibus nostris, & hoc iustum est; qui
 enim huiusmodi præpositos audit, Deum audit, &
 tales ille exaudit. Item summe ditat meritis; quia
 lucratur circa omnia opera sua. Item custodit a pe-
 riculis peccatorum: Exequens enim obedientiam
 est negociator regis cœlestis, cuius mandatum exe-
 quitur, & ideo securior est, quàm qui in proprio
 scilicet mercatur. Item ad maiorem perducit glo-
 riam: vnde in vitis patrum vidit quidam quattuor
 ordines sanctorum in cœlo, infirmantium, & gra-
 tias agentium, infirmis ministrantium, in solitu-
 dine degentium, sub obedientia viuientium, &
 hic erat super omnes, cuius ratio dicta est; quia alij
 quod

quod faciunt, faciunt secundum voluntatem suam; hi autem proprias voluntates abdicantes, quod faciunt, faciunt secundum voluntatem patris spiritualis, quod est maius. Et ideo ducit ad gloriam maiorem. Multum ergo custodienda est obedientia, quæ tanta bona facit. Ber. Mementote fratres; Christus ne perderet obedientiam, perdidit vitam; sic etiam nobis cauendum est, ne obedientiæ bonum perdamus.

¶ *Septimum, & ultimum capitulum Regule.*

VT ergo cuncta ista seruentur; & si quid seruatum minus fuerit, non negligenter prateratur; sed ut emendandum, corrigendumquæ curetur; ad prepositum precipue pertinebit, ut ad presbyterum, cuius est apud vos maior auctoritas, referat, quod modum, vel vires eius excedit.

Traditis mandatis, quia parum hæc prodescent, nisi diligenter obseruarentur, agit in hoc capitulo septimo, & ultimo de diligentia obseruandi ea. Sunt autem tria, quæ multum ad hoc valent. Primum est conditio prælatorum, de quo agit hic. Secundum est paterna oratio, de quo ibi (donet Dominus) Tertium iugis mandatorum memoria, de quo ibi (ut autem vos.) ¶ Porro ad hoc quod prælati mandata faciant obseruari, requiruntur duo ex parte ipsorum, videlicet cura, & conditio bona ipsorum; & ideo primo tradit hic mandatum circa istam curam: Secundo ostendit qualis debet esse prælatus, ut ei melius obediatur: ibi (ipse vero qui vobis &c.)

¶ *DE CURA DEBITA CIRCA SER-
uandam religionem. Cap. CLXIV.*

NOtandum, quòd sunt quidam, ad quos pertinet huiusmodi cura de regula obseruanda, qui ponunt interdum curam, quòd habeatur regula bene scripta, in qua possint bene legere fratres: Item quòd frequenter audiat; sed quia hoc non sufficit ad salutē sine obseruantia iuxta illud Apoc. 1. Beatus qui legit, & qui audit verba prophetiæ huius, & seruat ea, quæ in ea scripta sunt. Ideo vir sanctus iussit, vt huiusmodi prælatus, cui incumbit de subditorum salute, habeat curam non solum de scribenda regula, & frequentius legenda, sed & obseruanda, dicens (ut ergo cuncta ista seruentur.)

¶ Item interdum contingit, quòd aliqui habent curam maiorem circa obseruantiam admonitionum, consuetudinum, ac constitutionum quarundam, quæ additæ sunt super regulam, quàm de mandatis ipsius regulæ. Isti sunt similes pharisæis, quibus exprobrando dicit Dominus. Relinquentes mandatum Dei tenetis traditiones hominum. Magna stultitia est curare minus de stabilitate fundamēti, quàm eorum, quæ super ædificantur; quia illo deficiente, necesse est illa corruere, & non econuerso. Et ideo dicit, ut seruentur ista mandata regulæ, de quibus est specialiter curandum. Item sunt aliqui conuentus, in quibus & si multa mandata obseruantur, tamen aliqua dimittuntur, & ideo tales fiunt omnium rei. Iaco. 2. Qui totam legem obseruauerit, offendat autem in uno, factus est omniū reus. Et ideo est cura habenda, ut tota regula obseruetur, ideo dicit (cuncta) Item contingit interdum,

dum, quòd praelati transgressiones aliquas non corrigant, aut ex pusillanimitate cordis, aut ex humilitate superstitiosa, aut diffidentia proficiendi, aut ex ignorantia, quia nesciunt culpas fratrum, nec apponunt curas ad sciendum, aut propter pacem propriam, quam nolunt turbare, aut propter Verecundiam, quia sic in quibusdam manifeste excedunt, quòd sine verecundia alios corrigere non possunt, aut propter delicti conscientiam; conscientia enim mala, & si nesciatur, tamen timidiorem reddit hominē ad alios corrigendum; aut propter timorem odij, quia timet incurrere indignationem in corrigendo; aut propter praelationis amorem, quā timet amittere, subditos contra se prouocando; aut defectum zeli, aut ex negligentia, quæ multum est inconueniens statui praelationis. Vnde Ber. Inter abusiones claustrī hanc ponit scilicet, Prælati negligens. Et ideo vir sanctus dat speciale mandatum de ista cauenda circa transgressiones dicens (non negligenter prætereatur) Bern. in regula dicit. Non dissimulet abbas peccata; sed mox vt oriri cœperint, ea radicitus amputet memor de filio Heli sacerdotis. Item sunt aliqui, qui in corrigendo curam apponunt, vt puniantur præterita; sed non vt caueantur futura; aut non multum curant de præteritis puniendis; sed vtrumquē debet esse in vera correctione, scilicet vt caueantur futura, & puniantur præterita. Ideo dicit (non negligenter prætereatur; sed vt emendandum) quo ad futura (corrigendumquē) quo ad præterita (curetur.) Item sunt aliqui, qui quando inueniunt aliqua difficilia ad corrigendum, quasi desperantes solent dimittere; sed boni praelati est hoc ad maiores deferre. Vnde Exodi. 18. dixit Ietro Moysi, Quicquid maius

fuerit referant ad te, & ipsi tantummodo minora iudicent. ¶ Dicitur de quodam bono sacerdote, quòd quando habebat aliquos in parrochia sua, quos corrigere non poterat, ponebat nomina eorū in cedula, & deferens illa ad Episcopum dicebat ei. Domine istos, quos commisistis mihi inter alios, resigno, & relinquo, faciatis de eis, quicquid placeat; quia ego eos corrigere non possum, & supra vires meas est eorum correctio. Et ideo dicit vir sanctus (ad præpositum præcipuè pertinebit) ita scilicet (ut ad presbyterum, cuius est apud vos maior auctoritas) referat (quod vires) quo ad posse (vel modum) quo ad scire (eius excedit.)

Ipsæ vero, qui vobis præst, non se existimet potestate dominante, sed charitate seruiente, felicem.

¶ Dicto quòd ad prælatum pertinet cura de regula obseruanda, quia melius hoc potest præficere, si bonas habuerit conditiones, determinat conditiones, quæ debent esse circa prælatum. Et primo circa charitatem, Secundo circa honorem ibi (honore coram vobis,) Tertio circa timorem ibi (timore coram Deo.) Quarto circa officij executionē ibi (circa omnes seipsum bonorum operum.) Quinto circa disciplinas ibi (disciplinam libēs habeat.) Sexto circa animi interiora ibi (Et quamuis vtrūquē). Et licet circa plura extendantur conditiones bonæ prælatorum; tamen ista præ-

elegit Augustinus tanquàm val-

de necessaria in religio-

sis prælatis.

DE MODIS CIRCA PRÆLATIONEM. Cap. CLXV.

Circa primum igitur, quod continetur in isto mandato nota, quod viri religiosi, qui appetunt præesse ambitiosi, & non prodesse, primo solent appetere prælationes. 2. Reg. 1. Adonias eleuabatur dicens Ego regnabo. Econuerso viri sancti fugiunt exemplo Domini Iohannis. 6. Item isti adeptis prælationibus se fœlices reputant; viri spirituales econuerso Iob. 6. Ecce gigantes gemunt sub aquis. Gregorius, Illis populis quisquẽ mente superponitur, quibus dignitate præponitur: Vnde sancti, quia onus sentiunt, quantuncunquẽ digni sunt scientia, vel virtute, in prælationibus sciunt non se fœlices, sed miseros reputantes gemunt. Vnde cum legeretur beati Augustini regula in quodam conuentu, & lector illud legendo. Vnde & uos non solum uestri, sed etiam ipsius errando subiungeret, miserrimi, & corrector emendaret, miseremini, Prior dixit correctori, Frater, dimitte eum dicere, miserrimi. O quantum sensit istam miseriam Moyses, qui Numeri. 11. dixit Domino. Cur afflixisti seruum tuum: quare non inuenio gratiam coram te; & cur imposuisti pondus uniuersi populi huius super me? Non possum solus sustinere omnem hunc populum; quia grauis est mihi. Sin aliter uidetur tibi, obsecro, ut interficias me, & inueniam gratiam in oculis tuis, ne tantis afficiar malis. Quid autem mirum, si fœlices hæc sentiunt spirituali illũ minatione, cum quidam uiri hoc idem uiderunt per rationem. Cum enim cuidam gentili oblata esset uestis imperialis cum corona, respiciens uestem ait. O pannum magis nobilem, quàm fœlicem, quàm si quis

ſi quis attendat quantis ſollicitudinibus, periculis, & miſerijs ſit refertus, nec iacentem in luto tolleretur. Item iſti aſſecuta prælatione abutuntur ea in ſuperbia dominandi, iſti vero vtuntur ea in humilem famulatum, iuxta illud Math. 21. Principes gentium dominantur eorum, & qui maiores ſunt, poteſtatem exercent in eos: Non ita erit inter vos; ſed quicumq; voluerit inter vos primus eſſe, erit ſeruus veſter; vnde Auguſtinus. Locus ſuperior, & ſi adminiſtretur, vt decet; tamen indecenter appetitur. ¶ Nota tamen, quòd ſunt tria, quæ ſolent inducere aliquos ad recipiendum prælationem interdum. Vnum eſt diuina vocatio; reputant enim aliqui præcipue in eccleſijs, quando canonicè eligunt, quòd ſit à Domino; & ideo non reputant ſe male facere Iuxta illud Hebr. 5. Nemo aſſumit ſibi honorem, ſed qui vocatus eſt à Deo, tanquàm Aaron: Secundum eſt charitas proximorum, & hoc eſt melius. Aug. Otium ſanctum quærit charitas veritatis, negotium iuſtum ſuſcipit neceſſitas charitatis. Aliud eſt obedientia, & hoc eſt melius. Hinc eſt, quod de multis legitur, quòd & ſi prælationes fugerunt; tamen finaliter obedientes receperunt: ſed quia tales in prælationibus non debent ſibi complacere, nec vti in ſuperbiam nominandi, ſicut ambitioſi, dicit (ille qui vobis præeſt non ſe exiſtinet poteſtate dominante, ſed charitate ſeruiente foelicẽ.)

DE CHARITATIVO SERVITIO

Praelati ad ſubditos. Cap. CLXVI.

ET nota, quòd ſupremus prælatus vocat ſe ſeruum ſeruorum Dei iuxta illud Apoſtoli. Nos autem ſeruos veſtros propter Chriſtum. Item angeli

geli seruiunt hominibus Hebr. 1. Omnes sunt ad ministratorij spiritus, in ministeriū missi propter eos, qui hæreditatem capiunt salutis. Item ipse filius Dei formam serui accipiens seruiuit hominibus. Mat. 21. Ego autē in medio vestri sum, sicut qui ministrat. Et ideo cum tot, & tanti seruiant hominibus, non est indecens, immo valde conueniens, & salutare, vt quilibet prælatus se seruum exhibeat subditorum. Sunt autem multa, in quibus boni prælati subditis seruiunt. Interdum in temporalibus, illa ad eorum seruitia procurando, iuxta illud Apostoli. Non enim debent thesaurizare filij parentibus; sed parentes filiis. Interdum in corporalibus exemplo Domini Ioan. 13. Exemplum dedi vobis, scilicet de pedibus lauandis, vt vos ita faciatis. Item in spiritualibus in multis, quæ solent magna seruitia ab hominibus reputari. Magnum seruitium reputat mater filio exhibere, cum portat eū, & hoc faciunt boni prælati. Numeri 12. Nunquid ego concepi omnem multitudinem hanc, aut genui, vt dicas mihi, porta eos in sinu tuo, sicut solet portare nutrix infantulum. Item bonum seruitium exhibet alij, qui ministrat spiritualia ad pascendum eum; Sic faciunt boni prælati 2. Petri 5. Seniores, qui in vobis sunt, obsecro ego consenior, pascite, qui in vobis est, gregem Domini. Item magnum seruitium exhibet ciuitati, qui pro ea custodienda uigilat tempore hostili, & ipsi sunt uigiles, qui custodiunt ciuitatem. Cantic. 3. Item magnum seruitium exhibet regi, qui pro eo custodiendo uigilat, cum ipse dormit; & ipsi hoc faciunt pro animabus. Ipsi enim præpositi, scilicet peruigilant, quasi reddituri rationem pro animabus vestris. Hebræ. ult. Item magnum seruitium exhibet alij, qui

qui pro eo defendendo pugnat contra hostes. Et ipsi sic faciunt Canti. 3. Lectulum Salomonis, scilicet Ecclesiam sexaginta fortes ambiunt ex fortissimis Israel, qui sunt omnes tenentes gladios, & ad bella doctissimi, quod exponitur de praelatis. Item magnum exhibent seruitium hominibus, qui eos ducunt per inuia, & ipsi sic faciunt. Psal. Deduxisti sicut oues populum tuum in manu Moyse, & Aaron. Item magnum exhibent seruitium alij, qui ipsum intinctum sordibus lauant, & ipsi sic faciunt Iob. 1. Sanctificabat filios suos, quod pertinet ad praelatum. Beati praelati, qui in his & similibus seruiunt subditis suis per charitatem. Si enim quod sit cuilibet de minimis a quocunque, Christus reputat sibi factum, & daturus est talibus in fine regnum; quanto magis praelatis, qui propter ipsum in hoc supra alios se humiliant. Sicut ergo superbia dominandi ducit praelatos ad inferos; ita humilitas seruiendi ducit eos ad superos. Et ideo bene dicit (existimet se charitate seruiente felicem)

¶ DE HONORE AD PRAELATOS.
Cap. CLXVII.

H *Onore coram vobis praelatus sit vobis.*
 ¶ In hoc mandato tanguntur duo. Bona conditio praelati, & quod a subditis habeatur in reuerentia, & honore, & hoc iustum est. Malach. 1. Si ego pater, ubi honor meus? ¶ Et Notandum, quod quidam minus interdum honorant praelatum propter aliqua eius vitia. Gen. 9. Cum vidisset Cham verenda patris sui esse nudata, nuncianit duobus fratribus suis, &c. Alij interdum propter simplicitatem, quam quidam, & si vitijs careant, habent.

habent. Iob. 12. deridetur iusti simplicitas: O quot propter hoc praelatos suos contemnunt, contra quod dicitur Eccles. 3. Et si defecerit sensus, veniam da & ne spernas eum in tua virtute. Alij interdum propter noticiam familiarem; sicut dicitur de viro rurali qui minus veneratus est crucifixum Ecclesiae suae, quia factus est de nuce hortus sui. Mat. 12. Non est propheta sine honore, nisi in patria sua. ¶ Porro ex huiusmodi irreuerentia sequuntur tria mala. Vnum est maledictio Deuter. 27. Maledictus, qui non honorat patrem. Secundum est propria confusio. Eccles. 3. Dedecus est filij pater sine honore. Tertium est contumelia Dei; huiusmodi enim irreuerentiam suam reputat Deus. Lu. 11. Qui vos spernit, me spernit; ut ergo ista mala vitentur, honorandus est semper praelatus; ad hoc autem faciendum admonet sacra scriptura. Eccles. 11. In medio fratrum rector illorum in honore. Item hortatur natura apum, quae regem suum egredientem de alueari suo comitantur, & ei faciunt cellam singularem. Item monet ratio; honor enim exhibitus praelato exhibetur Deo, quia ipse dicit Luc. 12. Qui vos audit, me audit. Et ideo cum homo teneatur Deum honorare, debet praelatum honorare, in corde eum diligendo, in sermone reuerenter ei loquendo, reuerenter eum audiendo, in opere propter obediendo, deuotè seruiendo, reuerenter assistendo.

¶ *DE TIMORE IN QVO DEBET
esse praelatus. Cap. CLXVIII.*

Timore coram Deo substratus sit pedibus vestris.
¶ Hic ponit mandatum circa tertiam bonam condi-

conditionē prælatis; & est sensus. Quamuis vobis præponatur honore; tamen timore debet vobis supponi. ¶ Et nota, quòd licet omnis homo semper debet esse pauidus, tamen prælatis est magis timendū, quàm subditis; ipsi enim habent reddere rationem non solum de se; sed etiam de subditis. Heb. vltim. ipsi enim peruigilant, quasi reddituri rationem pro animabus vestris. Cum autem animæ sint res preciosæ, & valde dilectæ Deo, & valdè facile pereant; quantum debet timere, qui sic eas accipit in custodia, quòd de eis redditurus est rationem. Ideo Augustinus timens dicebat. Quid faciam, cum a me exigetur ratio tot animarum quæ pendent a collo meo? Ideo ipsi sunt quasi principes exercitus; ideo ipsis victis, facile totus exercitus dissipatur 1. Mach. 9. Cecidit Iudas, & reliqui fugerunt. Et ideo dæmones acrius eos impugnant. 1. Regum. 13. Totum pondus prælij versum est in Saul. Si autem ovis naturaliter timet suum hostem, quanto magis homo? 1. Reg. 28. Vidit Saul castra Philistijm, & timuit, & expauit cor eius nimis. Item sicut de patre impio conqueruntur filij: ita de multis prælatis Iob. 31. Ita me caui, quòd terra mea non habet aduersum me querelam. Quod exponit Greg. de prælatis, & subditis. Item August. de prælato. Quanto in loco superiori, tanto in periculo maiori versatur. Si ergo in maiori periculo, igitur timor debet esse maior. Item signum est diuini amoris, cum quis non exponitur occupationibus prælationis. Gre. Misericors Deus, quos tenerè diligit, ab occupationibus exterioribus abscondit. Nam & paterfamilias ad eum laborem seruos mittit, a quo filios suspendit. Signum vero diuinæ iracundiæ est occupatio in prælatione. August. In nullo magis mihi Deum iratum sentio,

sentio, sicut in hoc: cum essem indignus poni ad remum, positus sum ad gubernaculum. Item inter septem Episcopos Asiæ, qui propter sui excellentiam vocati sunt Angeli, multi reperti sunt, contra quos Dominus aliqua habuit, licet pauca. Quid ergo faciunt prælati, qui longe sunt a statu Angeli? Item Sapientiæ 6. Iudicium durissimum in his, qui præsunt fiet: Propter hæc omnia dicit vir sanctus (Timore coram Deo.)

¶ DE PERTINENTIBVS AD
Prælatum. Cap. CLXIX.

Circa omnes seipsum bonorum operum prabeat exemplum, corripiat inquietos, consoletur pusillanimes, suscipiat infirmos, patiens sit ad omnes.

¶ Hic dat mandatum circa quartam boni prælati conditionem, quæ pertinet ad officij executionem: licet autem secundum prædicta plurima pertineant ad prælati officium, tamen August. hic tangit quinque, quæ sunt tracta ab Apostolo. ¶ Et nota, quod inter omnia, quæ sunt magis necessaria prælato, est bonum exemplum: sine hoc enim carent efficacia, quæcunque facit. Secundum est malorum correctio; quid enim prodest ei benefacere, si mala sustineret? Tertium est afflictorum consolatio, non enim solum contra vitia debet adhibere remediū; sed & contra desolationes. Quartum est compassionis exhibitio per effectum; quid enim prodest verbis consolari, si ubi requirit infirmitas mentis, vel corporis, non exhibeatur opus compassionis? Quintum est patientia; cum enim in his, quæ habent agere, multa graua oriantur in subditis, parum est omnia bona facere, si desit patientia in grauaminibus, quæ inferuntur a subditis.

¶ DE

¶ DE PRAELATORVM BONO
exemplo. Cap. CLXX.

Circa primum nota, quòd praelato non sufficit solum docere more Scribarum, & Phariseorum, qui dicunt, & non faciunt; sed debent exemplo Christi facere, & docere: ita summè pertinet ad eum facere. Gre. in pastorali. Sit rector operatione praeipuus, vt rectè viam subditis bene uiuendo denunciet, & grex, qui pastoris vocem, morem, què sequitur, per exempla melius, quàm per uerba gradiatur; qui enim loci sui exigitur necessitate summa docere, hac eadem necessitate compellitur summa monstrare. Propter hoc bene dicit (operum) quasi dicat. Non sit contentus uerbis bonis ad subditos; sed potius inuitator bonis operum exemplis; Sicut & Benedictus in regula loquens de abbate dicit. Omnia bona, & sancti factis amplius, quàm uerbis ostendat. Item non sufficit ei facere bona occulta, nisi & faciat manifesta. Vnde Matth. 5. dicitur primitiuis praelatis. Sic luceat lux uestra coram hominibus, ut uideant bona opera uestra; & ideo dicit (exemplum.) Item non sufficit ei cauere a malo exemplo, nisi det & bonum; unde in Euangelio de eisdem dicitur. Sint lumbi uestri praecincti, quod pertinet ad declinationem a malo, & lucernae ardentes in manibus uestris, quod pertinet ad ostensionem boni exempli, & ideo dicit (bonorum.) Item non sufficit ei dare exemplum in uno bono, nisi det & in omnibus, & non solum ali- quibus, sed omnibus; ideo dicit (circa omnes.) ¶ Notandum etiam, quòd licet omnes debeant dare exemplum iuxta illud. Romano. 14. Prouidentes bona,

bona, non tantum coram Deo, sed etiam coram omnibus hominibus; & tamen prælati ad hoc magis tenentur; unde ad hoc facit spetialem exhortationem Paulus Timotheo Episcopo dicens. Exemplū esto fidelium in verbo, in conuersatione, in charitate, in fide, in castitate; huius autem sunt multæ rationes. Prælatus enim est in alto statu, & ideo non potest abscondi, sicut ciuitas supra montem posita; & ideo si aliquid est turpe in eo, quanto a pluribus videtur, tanto fit derisio maior in eo. Sicut ergo qui ascendit per scalam, sollicitus est vestes suas restringere, & aptare, ne aliquid turpe in eo videatur, ita curandum est prælato, eo quod in alto positus spectaculum est multorum, vt nihil inhonestum appareat in eo; sed potius omnis decor, honestas, pulchritudo. Item prælatus est sicut exemplar, a quo alij libri transcribuntur; & ideo sicut omnes libri scripti ad malū exemplar sunt corrupti; ita exemplum prælati, nisi sit bonum; est causa corruptionis in omnibus subiectis; & ita sicut magna cura ponenda est circa primum exemplar librorum, quod sit multum bonum; sic est de prælato. Item prælatus est sicut ductor gregis secundum illud. Psal. Deduxisti sicut oues populum tuū in manu Moyse, & Aaron. Et ideo si vadit per viam malorum operum, sequitur eum populus per eandem. Gre. Vnde fit, vt cum pastor per abrupta graditur, per præcipitium grex sequatur, Et ideo dicit idem Greg. Scire debent prælati; quoniam tot mortibus digni sunt, quot exempla perditionis ad subditos transmittunt. Idem Grego. Non debet hominum habere ducatum, qui nescit homines bene viuendo præire. Item prælati sunt ministri Dei; & ideo sicut famuli regis incedūt pulchrius, quàm

cœteri populares; ita & ipsi debent pulchriorem virtutum conuersationem ostendere. Item prælati sunt sicut signum positum ad sagittas obloquentiũ de eis facile: Et ideo dicit, expedit, vt circa hoc remediũ apponant, hoc non potest aliter bene fieri, nisi per bonum exemplum 2. Pet. 2. Hæc est voluntas Dei, vt beneficientes obmutescere faciatis imprudentium hominum ignorantiam. Item prælati sunt sicut corpora superiora, quæ lucida sunt, & illuminant terram; ita ipsi subditos. Item opus exempli efficaciam præstat verbo; quia secundũ Greg. plus exempla quàm verba mouent; Cum ergo prælatus sit docere, debet exemplum addere, vt vox sua vocem habeat virtutis. Gregorius. Auctoritas verbi perditur, cum vox opere non iuuatur. Item prælatus habet officium medici, & ideo coram infirmis non debet aliquam infirmitatem portare, ne dicatur ei illud Euangelij, Medice cura teipsum. Quia præsumptione alios mederi properat, qui in facie vulnus portat? Ne ergo eius officium contēnatur, debet coram alijs omnimodam sui ostendere sanctitatem. Item filiorum est imitari patrem secundum illud Ioh. 5. Quæcunquẽ pater facit, hæc & filius similiter facit; & ideo cauendum est prælato, ne sit de illis, de quibus dicitur Math. 23. Secundum opera eorum nolite facere; sed potius cum Apostolo dicere. Imitatores mei estote.

¶ *DE CORRECTIONE, QUAE VIGERE debet in prælatis. Cap. CLXXI.*

Circa secundum nota, quòd quidam sunt prælati circa correctiones subditorum negligentes, contra quos dicitur in Psal. Corripiet me iustus
in

in misericordia, & increpabit me, Sicut enim Domini terrarum, qui iusti sunt exercent iustitiã contra delinquentes, ita ad prælatum iustum pertinet corrigere; nec hoc est malitia, sed misericordia. Item prælati negligentes assimilantur secundum Isidorum dormienti, de cuius manu cadit baculus pastoralis. Et pictores pingunt talem quasi accubantem in cathedra super cubitum, somno grauatum, & cadentem de manu eius baculum pastorem, & bene sic assimilantur. Ex dormitione enim negligentiae verbum correctionis amittunt; & ideo ad euigilandum dicitur eis in persona summi prælati. Simon dormis. Item sunt sicut Potestates, qui ante se ferri faciunt gladium, & tamen sine causa; quia sunt ita inertes, quòd nunquàm eo vtuntur, contra quos dicitur. Si malum feceris time Potestatem, non enim sine causa gladium portat. Item sunt sicut ymago Beati Nicolai mortua tenens baculum in manu, quo nunquàm vtitur. De tali dicitur Zach. 11. Pastor, & idolum. Præterea isti sunt, qui nunquàm scire volunt culpas subditorum, immo & grauant, cum eos ad corrigendum incitant, omnia dissimulare volentes; contra quos dicit Benedictus in regula. Non dissimulet abbas peccata delinquentium; sed mox vt oriri cœperint, radicitus ea, vt præualet, amputet. Isti sunt, qui nunquàm vtuntur irascibili potentia ad bonum, non irascentes contra delicta; sed omnia cum quadam stulta patientia, quasi insensibiles, sustinentes; contra quos dicit Bernardus. Non irasci, vbi irascendum, est peccatum. Isti sunt, qui in excusatione ignauiae suæ dicere solent, quòd subditi magis regendi sunt benignitate, quàm seueritate; magis amore, quàm timore; quod licet interdum habeas

veritatem; tamen nō semper. Vnde Austustinus ad Bonifacium. Quidam dixit, pudore, & libertate liberos retinere sāctius esse credo, quā metu; hoc quidem verum est, sed sicut meliores sunt, quos diligit amor, ita plures sunt, quos corrigit timor. Et Isid. Qui blandē castigatur, & non corrigitur, acrius necesse est; vt arguatur; cum dolore enim abscindenda sunt, quæ cū lenitate sanari non possunt. Et nota, quōd negligentiam corrigendi multa mala sequuntur, Quorum quoddam redundat in prælatus, aliud in delinquentem, aliud in vniuersitatem. Sunt autem mala tria, quæ redundant in prælatus. Primum est confusio; sicut est enim honor patri bonos habere filios; ita redit in confusionem malitia eorum. Eccles. 22. Confusio est patris de filio indisciplinato. Secundum est culpa, Transeūt enim in prælatus culpæ subditorum, quos non corrigit. Exemplum in medico, qui reus est mortis infirmi suscepti sub cura, nisi faciat, quod in se est de infirmo curando. ¶ Aliud exemplum de pedagogo, cui culpa attribuitur, si puer suę instructioni cōmissus indisciplinatus ex sua negligentia inueniatur. ¶ Aliud exemplum ponit Benedictus in regula, de pastore dicens. Sciat abbas culpę pastoris incumbere, quicquid pater familias in ouibus minus utilitatis poterit inuenire. Tertiū est pœna temporalis; Punientur enim non solum in futuro, sed et in præsenti prælati negligentes pro culpis subditorum. Vnde iratus Dominus dixit ad Moysen. Tolle cunctos Principes populi, & suspende eos contra Solē in patibulis. Vide exemplum de Heli sacerdote. ¶ Sunt iterum alia tria mala, quæ redundant in damnum delinquentis. Primum est excæcatio; credit enim delinquens interdum, cum non corrigi-

tur

tur illud, quod fecit, non esse malum, vel non esse tantum malum, ut est. Ideo dicit Greg. in pastoral. Nonnulla vehementer increpanda sunt, ut dum culpa ab actore non cognoscitur, quanti ponderis sit, ab increpantis ore sentiat; & ideo bene dicitur. Prouerb. 29. Virga, & correctio tribuit sapientiam. Secundum est delicti multiplicatio; delictum enim, quod non corrigitur facilius multiplicatur; Bernar. Impunitas est insolentiae mater, radix impudicitiae, transgressionum nutrix Eccles. 8. Quia cito non profertur contra malos sententia, idcirco absq; timore vlllo filij hominum perpetrant mala. Tertium est finalis perditio; quia enim non corriguntur, & ideo facilius delicta continuantur, finaliter pereunt. Sicut patet de Adonia dicente. Ego regnabo, quem pater non corripuit, & finaliter est interfectus. ¶ Sunt & alia tria mala, quae redundant ad damnum vniuersitatis. Primum est infectio; sicut enim morbida ovis, nisi sanetur, inficit gregem; ita peccatum incorrectum. Secundum difficultas corrigendi. Tertium rebellio ad omne bonum: Delictum enim incorrectum non solum inficit alios, sed etiam inhabiles reddit ad omne bonum.

¶ DE INQUIETIS.

Cap. CLXXII.

NOtandum est, qui sint, quos vocat inquietos, & de causis huius inquietudinis, & de reprehensionibus circa tales, & quare specialiter dicantur corrigendi. Inquieti secundum Glo. i. Thes. 5. dicuntur curiosi, siue girouagi; ex quo elicitur, quod inquieti proprie dici possunt, qui curiositate exagitati secum consistere non possunt, sed modo intus,

modo extra, modo in porta cum extraneis, modo in locutorio cum fratribus, modo in hospitio, modo in infirmitorio, modo in horto, modo in coquina, & sic de alijs locis. Dixit quidam tali derisorie. Tu es sicut Deus, qui ubiq; inueniris. ¶ Porro huiusmodi homines sunt sicut musca animal inquietum, quæ modo super vnum residens, modo super alium omnes molestat: Sic & isti discurrendo modo istum scandalizant, modo cum illo litigant, modo illum derident, modo illum concitant, & similia, contra hos Apostolus dicit. Rogamus fratres, vt deris operam, vt quieri sitis. Sunt iterum sicut pullus equus habes sub cauda spinam, qui ubiq; discurrens nusquam potest quiescere. ¶ Circa causas huiusmodi inquietudinis nota, quod possunt esse tres. Vna leuitas cordis, sicut accidit in soliuagis, qui ex leuitate huiusmodi discurrent ubiq; secundum impetum cordis. Alia est intrinseca: sicut accidit in paupere, qui, cum deficiunt ei bona sua, cogitur discurrere huc, & illuc, vt inueniat in quo reficiatur. Alia est ægritudo animæ: Sicut enim ægritudo corporalis non finit hominem quiescere, sic etiam animæ. ¶ Nota, in vitis patrum frater quidam interrogauit abbatem Antonium dicens. Quid custodiens placebo Domino? Respondit ille. Quocumq; vadis, habe Deum præ oculis, & in omnibus, quæ agis, adhibe testimonium scripturarum diuinarum, & in quocumq; sederis, non cito mouearis; hæc tria custodies, & saluus eris. Vnde Hieronymus. Monachum se esse non loquendo, & discurrendo, sed tacendo, & sedendo quisq; nouerit. ¶ Nota etiam, quod propter tria aliquod vitium est magis corrigendum. Primo quando est manifestum. Secundo quando alios tur-

bat.

bat. Tertio quando ex dissimulatione leuius, aut nullum reputatur; & ideo, cum omnia ista concurrant in vitio inquietudinis, dicitur specialiter corrigendum.

¶ DE CONSOLATIONE PRAELATI.

Cap. CLXXIII.

Circa tertium notandum, quòd quidam sunt praelati tantam austeritatem praeferentes in verbis, in vultu, & in factis; quòd turbati fratres in infirmitatibus, vel tentationibus, vel alijs angustijs nunquam inveniunt apud eos aliquam consolationem. Isti, licet sint vicarij Christi, qui dicitur vnctus, tamen ei contrarij magis vtuntur cauterio, quàm vnguento. Isti licet in custodia receperint fauciatum; tamen non nouerunt vulneribus eius apponere, nisi solum vinum. Isti sunt medici, sed non nouerunt conficere vnctiones suauitatis. Isti habent in arca virgam correctionis, & tabulam praeceptorum, sed non manna dulcedinis. Isti sunt qui in loco mellis ministrant absinthium. Isti filijs petentibus panem, ouum, vel piscem consolationis dant lapidem, vel serpentem, vel scorpionem austeritatis. Thren. 4. Filia populi mei crudelis, quasi struthio in deserto. ¶ Sciendum autem, quod ex defectu huius consolationis multa mala solent accidere in subditis. Interdum enim propter hoc ducunt vitam in amaritudine, interdum dimittunt bona consuetudina, interdum facit vacillare circa statum suum mutandum, interdum facit deficere in labore; propter quod Dominus dedit manna laborantibus in deserto, ne deficerent. Et ideo dicit Apostolus. Omnia possum in eo, qui me confortat; Interdum

facit cadere in desperationem . Item facit grauiā concipere contra prælatum . Quia ergo tot mala sequuntur ex defectu consolationis, multum pertinet ad prælatum subditorum consolationibus operam dare . Possunt autem ad hoc ipsum multa incitare, & primo exempla, & inter ista, exemplū Dei, qui secundum Apostolum consolatur nos in omni tribulatione nostra, & est Deus totius consolationis . Exemplum angeli Zach. 1. Respondit Dominus Angelo, qui loquebatur verba bona, & consolatoria . Exemplum bonorum virorum . Iob cum federet, quasi rex circumstante exercitu, erat tamen merentium consolator. Iob. 29. Item Tobias quoti die pergebat per cognationem suam, & consolabatur . Paulus absens mittebat Timotheum discipulum suum, vt consolaretur corda discipulorum. Secundo incitare potest officium prælati, cuius est exercere circa subditos officium matris . Vnde Bernard. ad prælatos . Discite matres subditorum vos esse, non dominos . Matris autem est de filiorum consolatione esse sollicitam . Tertio facta munda . Dauid misit seruos ad regem filiorum Amon, vt consolarentur eum super patris interitu . Tres amici venerunt singuli de locis suis, vt pariter consolarentur Iob. Iob. 11. Legitur, quòd multi Iudæi venerunt ad Mariam, & Martham, vt consolarentur eas de fratre suo . Si isti tam solliciti fuerunt de consolatione desolatorum, quorum curam non habebant ; quanta crudelitas est, si ille, qui habet curam alicuius desolati, & eum coram se videt quotidie, non habet eum de consolando ipsum ; Bene ergo dicit Augustinus prælato, vt consoletur, sed quos ? pusillanimes .

DE PVSILANIMITATE.

Cap. CLXXIIII.

Circa quod nota, qui vocantur pusillanimes, & quare specialiter dicantur consolandi, & de his, quæ possunt valere ad consolationem. Pusillanimitas, dici potest timor immoderatus ex animi paruitate procedens. ¶ Porro ista pusillanimitas facit interdum æstimare de re, quæ non est peccatum, quodd sit peccatum; sicut accidit in multis religiosis, præcipue de nouo conuersis, qui in multis æstimant peccatum, vbi non est; sicut diues timidus, quando videt pauperem æstimat furem, quando videt diuites æstimat prædones, & cum sit pax, insidias suspicatur. Psal. Illic trepidauerunt timore, vbi non erat timor. Interdum vero facit timere, quæ non sunt timenda, licet habeant effigiem timendam, vt aduersitates, & verba hominum, & huiusmodi; sicut pueri timent laruas. Bernar. Timet, quæ non oportet. Interdum retrahit ab aggressionem futuri laboris; ardua inchoata facit dimittere ex diffidentia consummationis. ¶ Circa consolationem istorum notandum; quodd confortatio pusillanimum est opus magnæ pietatis, cedit in bonum commune, confortat contra maliciam dæmonum, ideo specialiter sunt confortandi. Ad quorum consolationem multa possunt valere. Vnum est verbum diuinum. Ipse enim Deus est, qui dicit Luc. 12. Nolite timere pusillus grex. Si magna est consolatio existenti in periculo maris, vel infirmitatis, vel belli, quando dicit sapiens gubernator nauigantibus, sapiens medicus infirmantibus, sapiens dux pugnantibus, nolite timere, quanta debet esse consolatio illis, quibus tantus, & tam sapiens dicit.

Nolite

Nolite timere? Aliud est spes de diuino auxilio; Sperare enim potest omnis seruiens, quod non deferit eum, quem suo sanguine redemit: Nam ipse per Esa. dicit. Noli timere, quia ego redemi te. Si autem spes omnis est consolatoria, iuxta illud. Spe gaudentes, quanto magis talis spes? Aliud est promissio huius auxilij, quod magis est, quam spes. Vnde Esa. 41. Seruus meus es tu, elegi te, & non abieci te, ne timeas, quoniam ego tecum sum. Si obsessus est magna consolatio, quando aliquis potens mandat eis, quod cum eis erit, & iuuabit eos; quanto maior debet esse consolatio illis, quibus dicit Dominus se non futurum, sed adesse? Aliud est societas magna, & bona. Quis est enim adeo timidus; quem bona societas non confortet? Speratur enim, quod seruientes Deo non solum habent secum in societate angelos, immo & bonos viros. Aliud est contrariorum prostratio. Quicquid enim est in mundo terribile, siue peccatum, siue dyabolus, siue prospera, siue aduersa, & huiusmodi, totum victum est à Domino. Et ideo dicit Iob. 16. Confidite, ego vicimundum: Sicut ergo minus timet, qui debellato hoste pugnaturus est; Ita postquam deuictus est mundus, magna consolatio fiducia potest oriri in cordibus omnium, qui habent cum ipso pugnare. Aliud est beneficium gratiae. Gratia enim est sicut gladius, quo sufficienter potest se homo defendere, propter quod dicit Dominus Apostolo. Sufficit tibi gratia mea, scilicet ad defendendum te. Aliud est remunerationis consolatio. Gregor. Quicquid intolerabile pusillanimitas asserit, hoc leue, & facile spes remunerationis ostendit. Lucæ 12. Nolite timere pusillus grex; quia complacuit patri vestro vobis dare regnum.

DE MODO SE HABENDI
Prælati ad infirmos. Cap. CLXXV.

Circa quartum notandum, quòd multiplex est infirmitas; Quædam est corporalis ægrotudinis. Luc. 4. Omnes qui habebant infirmos varijs languoribus, ducebant illos ad Iesum, & ipse singulis manus imponens curabat eos; huius autem exemplo, tales infirmi suscipiendi sunt à prælato in visceribus compassionis ad medicinalia pro salute. Vnde Augustinus supra. Fiat sine murmure de consilio medicinæ; ita ut etiam si nolit, iubente præposito faciat, quod faciendum est pro salute. Alia est corporaliter. Matth. 26. Caro autem infirma, idest debilis. Sic infirmi sunt, qui habent complexionem debilem. Et tales suscipiendi sunt piè dispensatiue ad aliquas spirituales recreationes. Vnde supra (Et si eis, qui venerunt ex moribus delicatioribus ad monasterium, aliquod alimentorum, operimentorum, vestimentorum ve datur, quod alijs fortioribus, & ideo scælicioribus non datur, non debet alijs molestum esse.) Alia est infirmitas concupiscentiæ carnalis; ex qua contingit, quòd aliquis interdum patitur lubricum turpe, vel frequens, licet occultum; tales suscipiendi sunt cum omni benignitate in foro confessionis. Alia est infirmitas morum, siue vitiorum. Bernar. An non mali mores sunt mali humores? mali autem humores sunt morbi causa. Tali autem infirmitate laborant homines iracundi, impatientes, impetuosos, inobedientes, tales suscipiendi sunt inter brachia patientiæ, ut sint materia ad merendum. Alia est infirmitas vacillationis, de qua Sapient. 3. Figura infirmè posita à vento circummouebitur. Huiusmodi autem sunt,

sunt, qui non sunt firmi in statu suo, & tales suscipiendi sunt sollicitè ad confirmandum . Apocal.4. Esto vigilans, & confirma reliqua, quæ moritura erant . Alia est infirmitas dubitationis . Et hæc est duplex ; quædam circa credenda . Apostolus . Infirmitum in fide assumite ; quædam circa agenda, de qua Apostolus . Conscientia ipsorum, cum sit infirma , polluitur ; Huiusmodi autem infirmitate laborant, qui vel tentantur in fide, vel pusillanimitate conscientiæ in agendis vacillant, tales suscipiendi sunt in spiritu mansuetudinis ad instruendum . Apostolus . Vos qui spirituales estis , instruite huiusmodi in spiritu lenitatis , illos scilicet qui præoccupantur in aliquo delicto ; tales autem huiusmodi infirmi, qui non ex malitia , sed ex ignorantia cadunt interdum , sunt sicut cæcus in via . Alia est infirmitas perfectionis , tales autem sunt nouitij, & alij, qui non ascenderunt ad perfectionem in Christo , & isti sunt charitatiuè suscipiendi , tanquàm paruuli . Apostolus . Tanquam paruulis in Christo lac potum dedi vobis , non escam . Sed sunt aliqui prælati (quod cum dolore referendum est) qui infirmis non viscera pietatis , sed potius crudelitatis ostendunt , non condescendentes eorum infirmitatibus ; non sunt isti sicut beatus Nicolaus, qui super afflictos pia gestabat viscera ; non sicut Iob , cum quo ab infantia creuit miseratio ; non sicut Paulus, qui dicebat . Quis infirmatur, & ego non infirmor ? Isti sunt medici animarum , sed non eis est cura de male habentibus ? Isti sunt illi pastores maledicti , de quibus loquitur . Ezechiel dicens . Veh pastoribus Israel . Et post . Quod infirmum fuit, non consolidastis , quod contractum , non alligastis ; quod ægrotum , non sanastis , & quod abiectum , non re-

duxistis ;

duxistis; & quod perierat, non quaesistis. Item de spiritu sancto legitur. Ro. 8. quod adiuuat infirmitatem nostram. De Paulo iterum legitur Actuum. 20. quod ipse laborabat manibus proprijs, ut haberet, vnde susciperet infirmos, & sic faciendum exemplo suo monstraret. Natura iterum docuit omnia volatilia, & animalia, quod maiorem curam habent de fetibus adhuc debilibus, quam quando sunt fortes. Contrarij ergo sunt spiritui sancto, Paulo, naturæ prælati ad infirmos crudeles. Item prælatus potius sumitur ad onus, quam ad honorem; & ideo illos subditos, qui propter infirmitatē mentis, vel corporis, sunt onerosi, non debet proijcere, sed potius humeros ad portandum supponere.

¶ *DE PATIENTIA PRAELATI
ad subditos. Cap. CLXXVI.*

Circa quintum nota, quod tria sunt, quæ solent dare occasionem impatientiæ. Vnum est magnitudo status. Facilius enim solent irasci viri magni, qui non habent supra se reprimentem, quam iuniores. Prouer. 28. Secundum ligna siluæ, sic exardescet ignis, & secundum virtutem hominis, id est potentiam, sic iracundia erit. Aliud est grauamen, sicut est in infirmo. Exemplum de Iob, qui quasi grauatus infirmitate videtur multa quasi impatiens dixisse amicis consolari eum volentibus. Aliud est multitudo negotiorum; hæc enim sunt muscæ pungentes; & ideo quanto plura sunt, tanto magis molestant. Ista autem tria sunt in prælato, & ideo multas habet occasiones impatientiæ. Verum impatientia prælati multum est periculosa, ad ipsum enim propter regimen cuncta pertinet facere sapienter.

Impa-

Impatientia vero perturbat sapientiam; Prouer. 3. Impatiens operatur stultitiam; qui vero patiens est, multa gubernatur sapientia. Ad ipsum iterum pertinet iuste iudicare, iuste corrigere, & iuste omnia facere. Impatientia vero peruersè, & iniuste omnia facit. Iac. 1. Ira viri iustitiam Dei non operatur. Item impatiens est quasi furiosus; furia vero magis periculosa est in soluto, quàm in ligato; Prælatus vero est quasi solutus; quia non est ligatus per obedientiam, sicut subditus. Et ideo sua impatientia totam domum perturbat, sicut furiosus solutus. Contra quam dicitur Eccles. 4. Noli esse sicut leo in domo tua, euertens subiectos tuos, & opprimens eos. Patet ex his, quàm periculosa est impatientia prælati, cum perturbet eius sapientiam, & peruertat eius iustitiam, & faciat abuti potentia. ¶ Notandum autem, quòd sicut prælatus habet alios portare; ita & ipse indiget portari a subditis; nihil autem est, quod faciat eum magis importabilem, quàm impatientia, prouer. 18. Episcopum ad irascendum facilem, quis poterit sustinere? Nec mirum, quia sicut dicitur Eodem. 27. Graue est saxum, & arena onerosa; sed ira stulti utroquè grauior. Item debet esse talis, ad quem debent omnes recurrere; impatienti vero vix audet aliquis appropinquare; sicut scriptum est de Nabal. 1. Reg. 25. Ipse est filius Belial, ita quòd nemo possit ei loqui. Item prælatus est quasi signum ad sagittam, contra quem aliquis obloquitur, alius murmurat, alius iudicat, alius insipientem dicit, alius in tali defectu, alius in delicto tali, & ita nisi sit patiens, semper erit turbatus, & numquàm tranquillus, quod valde est contrarium statui prælationis. Sicut enim Deus, qui omnia regit, in summa est tranquillitate; ita prælatus

tus in tranquillitate debet omnia disponere, & non turbari aliorum turbinibus. Vnde de Dauid. 2. Reg. 14. dicitur. Sicut Angelus Domini, sic & dominus meus rex; vt nec benedictione, nec maledictione moueatur. Bene ergo datur prælato mandatum de patientia habenda ad omnes; quia & occasiones multas habet impatientia; & periculosa est valde impatientia eius, & necessaria est ei patiētia propter multa. Ideo dicit August. (Patiens sit ad omnes) vt patet ex dictis.

Disciplinam libens habeat, metuendus imponat. ¶ In hoc quinto mandato circa bonas condiciones prælati determinatur quomodo se debeat habere circa disciplinam. ¶ Et notandum, quòd disciplina tripliciter accipitur. Quandoquē dicitur correctio prouer. 23. Noli subtrahere a puero disciplinam, quandoquē dicitur religiosa morum tentio. Hugo de sancto victo. Disciplina est membro rum omnium motus ordinatus, & dispositio decens in omni habitu, & actione; quandoquē dicitur opus pœnitentiale, vt sunt abstinentia, vigiliae, & huiusmodi. Heb. 12. Omnis disciplina in præsenti videtur non esse gaudij, sed meroris, & hoc modo accipitur hic.

¶ *DE RELIGIOSIS, IN QVIBVS PERIJE vita austeritas. Cap. CLXXVII.*

ET notandum est, quòd in quibusdam religionibus, ita perit austeritas, quòd nec apud maiores, nec apud minores seruatur; in alijs religionibus & si seruatur a minoribus, non tamen apud maiores; Apud quosdam vero seruant maiores, sed non

non minores; quia ad hoc non compelluntur. Ber-
 ecce parcitas reputatur auaritia, sobrietas austeri-
 tas creditur, silentium tristitia reputatur; econuer-
 so remissio discretio dicitur, effusio liberalitas, lo-
 quacitas affabilitas, cachinnatio iocunditas, mol-
 lities vestimentorum honestas, lecti superfluous cul-
 tus munditia. De prælatis idem dicit. Vides quos-
 dam de maioribus lautius comedere, sapidius bi-
 bere, indui pulchrius, cubare mollius, loqui licen-
 tius, orare rarius; hæc enim est abusio in tota ec-
 clesia, vt sicut sunt homines in statu sublimari, sic
 & magis velint viuere delicatè. Non sunt isti præ-
 lati secundum ordinem Apostolorum, de quibus
 dicit Apostolus. Vsquè in hanc horam esurimus,
 & nudi sumus, sed secundum ordinem scribarum,
 & pharisæorum, qui imponunt onera grauiâ, &
 importabilia in humeros hominum; digito autem
 suo nolunt ea mouere. Dauid autem rex sitiens no-
 luit bibere aquam; quam tres fortes cum periculo
 vitæ asportauerunt ei; sed libauit eam Domino di-
 cens. Propitius sit mihi Dominus, ne faciam hanc
 rem; num sanguinem istorum hominum, & anima-
 rum periculum bibam? 2. Reg. 13. Multi autem de
 statu humili transeuntes ad qualemcunquè statum
 altiozem faciunt sibi magnas delicias assiduè de his,
 quæ pauperes fratres cum multo labore corporis,
 & angustia cordis conquirunt. Legitur in hysto-
 ria Tripartita, quòd cum Theodosius imperator
 esset in quadam expeditione, in qua exercitus labo-
 rabat siti: Quidam videns eum æstuantem siti ob-
 tulerit ei potum limpidissimum confectum ex aro-
 matibus aqua frigida superfusa, qui vincens ani-
 mum suum noluit bibere, sed offerenti reddidit vt
 alijs, cui vellet, offerret, & hoc fecit, vt corda alio-
 rum

rum intuentium propter hoc animarentur ad tollerantiam sitis. Simile legitur de Alexandro magno. Mira res; homines sæcularis dignitatis abstinere, ut suo exemplo alios animent, & prælati ecclesiastici, immo religiosi non curant; sed subditi eorum durum victum ducentes exemplo suorum excessuū in cibis, & potibus scandalizantur. Moyses, & Aaron principes populi eodem cibo, & potu vti sunt, quo populi in deserto. 1. Cor. 10. Omnes eandem escam spiritaleni idest spiritualia significantē manducauerunt, & eundem potum. Et quidam prælati, vel officiales religiosorum non dignantur comedere, vel bibere, sicut conuentus. ¶ Legitur de sancto Germano Episcopo, qui fuit nobilissimus ante episcopatum, & delitijs deditus valde, postquam factus fuit Episcopus, vsquē ad terminum vitæ suæ scilicet annos. 30. corpus sic afflixit, quod numquam comedit panem frumenti, nec vinum bibit, nisi in die Natiuitatis, & Paschæ; nec oleum, nec sal pro sapore comedit, & cineres in refectiōe prælibabat, & nullam habuit vestem præter ciliciū, & cucullam; lectulus eius cineres, & quotidiana impressione duratos, supposito tantum vno sacco, cum cilicio continebat; numquam vestimentum, vel calceamenta extrahebat: Quid dicent ad hoc homines rusticani, qui promoti ad modicas dignitates in religione nil volunt austeritatis sustinere in vita, sed semper singulares in cibis, & potibus, & lectisternijs, & vestibus cōmunibus numquam sunt contenti? Rechabite propter præceptum Ionadab patris sui abstinere a vino perpetuē: sicut dicitur, Hi. 35. Et quidam prælati, qui debent esse filij Dei per imitationem, nolunt abstinere a superfluis delicijs. Deniquē pastor dicitur a pascendo non se,

sed gregem, iuxta illud 1. Pet. 5. Pascite, qui in vobis est, gregem Dei, Isti vero non curant de pascendo grege conuentus, sed solum de se; & ideo maledicti a Domino dicuntur. Ezech. 33. Veli pastori- bus Israel, qui pascebant semetipsos, nonne greges pascuntur a pastoribus? Ex his pater, quàm reprehensibile sit, cum apud maiores in religione vitæ austeritas non inuenitur.

¶ *CONTRA PRÆLATOS MOLLES*
ad subditos. Cap. CLXXVIII.

DE tertio nota, quòd sunt quidam prælati, qui licet viuant discipline: tamen ex quodam defectu, vel pusillanimitate, vel timore sunt ita molles ad subditos, quòd quasi numquàm pro excessibus duram pœnitentiam, vel aliquam duram obedientiam, vel necessitatem obseruandi austeritatem ordinis imponunt eis, Propter quod apud eorum subditos perijt huiusmodi disciplina. Tales prælati sunt sicut formidines positæ in agris ad timorẽ auium, vel bestiarum, quæ tenent arcum extentum, & nunquàm percutiunt. Baruch. vltim. Sicut formidines sunt in cucumerario. Sunt iterum sicut reges non habentes baculum, nisi arundineum; sicut derisive factum est Christo, contra quos dicitur in Psal. Reges eos in virga ferrea. Sunt etiam sicut burgenses ciuitatum, qui filios suos exponunt voluptatibus, & delicijs omnibus, & non tenent eos sub aliqua virga, & ideo finaliter confundunt se, & parentes, contra quos ad Ephe. 6. dicitur. Educate filios vestros, in disciplina, & correctione Domini. Non reliquit huiusmodi mollitiei exemplũ Christus, qui flagello vsus est ad verberandum delinquentes.

linquentes in templo; Non Apostolus, qui fornicatorem sathanæ tradidit; Non Petrus, ad cuius imprecationem proprietarij morte subitanea perierunt; Non est sapientis medici semper vti lenibus, quia plus prosunt interdum corpori ad salutem aspera, & cum dolore abscindenda sunt, quæ leniter sanari non possunt. Apostolus. Peccantem coram omnibus corripe, vt cæteri timorem habeant. Ergo boni prælati est arguere viriliter, vt ab omnibus alijs timeatur. Et ideo bene dicit vir sanctus (disciplinam metuendus imponat) idest ita strennuè imponat, vt timeatur. Patet ex iam dictis, quàm reprehensibile sit cum in religione perijt disciplina, siue austeritas, vel apud omnes, vel apud maiores solum, vel apud minores solum; & ideo, vt apud omnes vigeat, dicit vir sanctus prælato (disciplinam libens habeat, metuendus imponat.)

ET quamuis utrumquè sit necessariũ; tamen plus a vobis amari appetat, quàm timeri, semper cogitans Deo se pro vobis esse redditurum rationem. Vnde & vos magis obediendo, non solum vèstri; sed etiã ipsius miseremini, qui inter vós quanto in loco superiori, tanto in periculo maiori versatur.

¶ In hoc sexto loco ponitur mandatum circa bonas condiciones prælati, quantum ad animi interiora; Sunt autem hæ duæ scilicet actiones, & cogitationes circa quarum vtrumq; tradit mandatum, circa primum cum dicit. (& quamuis &c.) circa secundam cum dicit (semper cogitans.)

¶ Circa primum notandum, quòd licet ad prælatum pertinet, & timeri, & amari; tamen secundum est melius. Et ideo cum dixisset in præcedenti mandato (metuendus imponat) subdit, quòd quamuis

utrumq; sit necessarium ; appetendum est tamen plus
secundum .

NECESSARIUM EST PRÆLATO
to, quod timeatur. Cap. CLXXIX.

Sciendum ergo, quòd secundum quòd hic dici-
tur necessarium est prælato, quòd timeatur, &
hoc propter subditorum vtilitatem. Multi enim
illorum sunt, qui frequenter magis timore indu-
cuntur ad bonum: August. Sicut meliores sunt, quos
amor dirigit ; ita plures sunt, quos timor corrigit .
Item propter status sui exigentiam ; indecens enim,
& inconueniens est, quòd aliquis præsit aliquibus,
& non timeatur ab eis ; & ideo Dominus, qui dedit
homini dominium super animalia, immisit cū hoc
timorem super ea. Gene. 9. Terror vester, & tremor
sit super cuncta animantia terræ . Item propter Dei
honorem ; non enim est ad honorem regis, sed ad
confusionem, cum eius baculus non timetur . Et
ideo dicitur Lucæ 10. prælatis. Qui vos spernit, me
spernit. Porro huiusmodi exemplum, videlicet,
quòd prælati timeantur, habetur in natura . Inter
animalia omnia illud, quod magis timetur ab om-
nibus animalibus, est illud, quod natura fecit su-
per alia, videlicet Leo . Item habetur exemplum in
potestatibus sæcularibus . Romano. 13. Si malum
feceris, time potestatem ; non enim sine causa gla-
dium portat . Item habetur in principibus Aposto-
lorum : Nam dicit Paulus. In virga veniam ad vos,
aut in charitate, & spiritu mansuetudinis . Petrus
vero occisis proprietarijs incussit timorem omni-
bus . Actuum. 5. Factus timor magnus in vniuersa
ecclesia . Sunt autem tria, quæ valent ad hoc, vt
præ-

prælatus timeatur. Primum est morum grauitas; sicut enim quando conformat se quotidianis leuitatibus, multotiens fit ex hoc contemptibilis prælatus; sic grauitas facit eum haberi in timore venerabili, propter hoc dicitur de Iob. 20. Videbant me iuuenes, & abscondebant se. Secundum est auctoritas; sunt enim quidam, qui nunquam prodeunt ad aliquod opus virile, ex auctoritate quam habent, & ideo dicit Apostolus ad Timotheum. Argue cum omni imperio; nemo te contemnat, quasi dicat. In hoc fac imperiosè, ne vertaris in contemptum. Tertium est rigor iustitiæ, cum videlicet talis est, quod non creditur, quod aliquo modo a iustitia flectatur; & ideo de Herode dicitur Marci 6. Herodes metuebat Iohannem, sciens eum virum iustum, & sanctum.

¶ P R A E L A T O E S T M A G I S

*curandum de amore subditorum, quam
timore. Cap. CLXXX.*

NOtandum, quod licet necessarium sit prælato, quod timeatur; tamen magis est ei curandum de amore subditorum, & hoc multis de causis, quarum aliæ sunt ex parte subditorum, aliæ ex parte prælati, quod sic patet. Illud quod imponitur amanti, licet difficile sit, tamen fit facilius, quam quod imponitur timenti; nihil enim amanti difficile fit. Itaque quod fit à tali, quod fit hilariter, & non cum tristitia, sicut quod fit ex timore, acceptum est Deo. Unde Apostolus. Non ex tristitia, aut ex necessitate; hilarem enim datorem diligit Deus. Item timentis est fugere, diligentis vero adhærere. Et ideo ubi timentes fugiunt, interdum ipsi adhærent prælato infatigabiliter, sicut Lucas Paulo secundum Hiero.

Et ideo secundum Apostolum charitas dicitur vinculum perfectionis. Item praelati in multis indigent portari à subditis; hoc autem facit amor. August. Tantum quisque portat, quantum amat. Item indigent iuvari in multis, hoc autem dilectio facit: Amici est iuare amicum, & pro adiutorio solet vnus ad alium recurrere. Item frequenter à subditis molestantur; sed dilectio non nouit hoc facere, quia dilectio proximi malum non operatur. Quantum ergo debent praelati appetere, vt à subditis diligantur, cum subditos hoc faciat facilius obedire, & acceptabilius Deo seruire, & fortius eis in bono adhærere, & ipsos praelatos faciat portari in defectibus, & eos iuare in negocijs, & ad eos se habere quietius. Ideo non solum August. sed & Bernar. dicit ad praelatos. Studete magis amari, quam timeri. Et Isidor. Talem te redde subditis, vt magis ameris, quam timearis. Quis ergo dubitet, quin hoc à Spiritu sancto sit, in quo tres tantum doctores vno ore concordant? ¶ Sed notandum, quod ad hoc vt praelatus diligatur à subdito, cauendum est à superbia, quæ non diligit, sed odiosum reddit Eccles. 5. Odibilis est coram Deo, & hominibus superbia. Item à duritia, quæ reddidit Roboam odiosum populo. Et ideo dicitur e contrario in Ecclesiastico. In mansuetudine operata perforce, & super gloriam hominum diligeris. Item à singularitate, cum enim conformatur se alijs praelatus, & est in illis quasi vnus ex illis, ex hoc acquirit sibi aliorum amorem. Eccles. 13. Omne animal diligit sibi simile.

DE REDDENDA RATIONE

à Pralato. Cap. CLXXXI.

REstat videre post huiusmodi appetitum pertinentem ad affectum, de cogitationibus prælari pertinentibus ad intellectum; inter omnes autem cogitationes pertinentes ad statum eius hoc est de magis necessarijs, vt non ad horam, sed semper cogitet de ratione reddenda Deo pro subditis; propter quod dicit (semper cogitans Deo se pro vobis redditurum rationem.) Nam quandoq; exigitur ratio de rebus parum valentibus: Prælari vero habent reddere rationē de rebus preciosis scilicet animabus. Hæb. ult. Ipsi peruigilant, quasi reddituri rationem pro animabus vestris. Item Dominus requirit rationem de numero. Hiere. 30. Adhuc transibunt greges ad manum minantis. Et quia prælatus debet habere curam sollicitam de custodia omnium exemplo Saluatoris, qui dicit Ioan. 13. Quos dedisti mihi; ego custodiui, & non perijt ex eis, nisi filius perditionis. Item de fructu Benedictus in regula. Sciāt abbas culpæ pastoris incumbere, quicquid in omnibus parer familias minus vtilitatis poterit inuenire. Et ideo debet prælatus dare operam diligentem circa subditos, vt debitum fructum reddant exemplo illius boni pastoris, qui dicit Gen. 31. Oves tuæ, & capræ tuæ steriles non fuerunt. Ex his apparet, quod iudicium durissimum in his, qui præsumunt, fiet: Durum, quia de singulis animabus commissis oportebit rationem reddere: Durius, quia anima pro anima punietur: Durissimum, quia pro sola negligentia hoc incurrere possunt, vñ multis prælatis, qui hoc non cogitant: Et ideo dicit vir sanctus. Semper cogitans Deo se pro vobis reddi-

turum esse rationem. Attendendum vero est, quod cum anima prælatis sit in maiori periculo, quam animæ subditorum, & ideo propter eos multum tenentur compati animabus eorum, & dare operam, ne propter eos ipsas perdant; hoc autem faciunt, cum benè obediunt, & ideo incidenter subdit. (Vnde & vos magis obediētes, non solum vestri, sed etiā ipsius miseremini; qui inter vos quanto in loco superiori, tanto in periculo maiori versatur.)

Donet Dominus, ut obseruetis hac omnia, tanquā spiritualis pulchritudinis amatores, & bono Christi odore de bona conuersatione fragrantēs; non sicut serui sub lege, sed sicut liberi sub gratia constituti.

Hoc est secundum, quod facit ad regulæ obseruantiam, scilicet paterna oratio. Nam boni doctoris est non solum studere sapientiæ, ut sciat, quid doceat, & non solum docere verbo, vel scripto, ut instruat, sed & dare operam, ut obseruetur, quod dicit, ut proficiat. Quia vero non est seminantis, nec terræ seminatae fructum producere; sed Dei solius; ideo recurrit bonus doctor super hoc ad orationem. Inde est, quod doctor egregius in fine doctrinæ in Epistolis semper orat dicens; Gratia Domini nostri Iesu Christi, cum omnibus vobis, qui scilicet moneat, & iuuēt ad faciendum, quod docui. Eodem modo orat August. dicens; (Donet Dominus, ut obseruetis hac omnia) Quasi dicat. Quid prodest me in istis studuisse, & vobis ita tradidisse, nisi obseruetis. Ideo ro-

go Dominum, ut ille, qui solus potest, donet, ut hac obseruetis.

¶ CONTRA RELIGIOSOS, QVI

non observant ordinem suum.

Cap. CLXXXII.

NOtandum autem primo, quòd sunt quidam religiosi, qui tradita sibi à Deo mandata parvi-
pendunt, eo quòd passim transgredientes ordinem
dissipant, Similes illi, cui dicitur Hieme. 2. A sæculo
confregisti iugum meum, Rupisti vincula, & dixi-
sti, non seruiam. Isti sunt sicut Rhinoceros, quod
animal secundum Grego. in moralibus adeo est in-
domitum, quòd si ligetur, moritur, vel vinculum
dissolvit. ¶ Sciendum autem, quòd multa sunt,
quæ valent ad hoc, quòd religiosi observent ordi-
nem suum. Vnum est exemplum priorum. Legitur
Hierem. 35. quòd Rechabab propter mandatum
patris sui Ionadab nunquam bibunt vinum; Phari-
sæi, & Iudæi propter traditiones seniorum, nisi cre-
bro manus lauent, non manducant. Legem Persa-
rum, & Medorum nullus audet violare. Quanto er-
go magis religiosi Christiani servare debent man-
data Sancta Sanctorum patrum suorum? Et nisi
faciant, timendum est eis, ne illi contra eos surgant
in iudicio; & condemnent eos. ¶ Aliud est promif-
sionis obligatio facta per professionem, qui enim
promittit, & non reddit, ipse sibi laqueum mortis
parat. Vnde Benedictus in regula. Qui aliquando
aliter fecerit, à Deo se damnandum sciat, quem ir-
ridet. ¶ Tertium est apparentia exterior: Quid
enim prodest nomen, vel habitus religionis, ubi
desunt opera religionis à Ambrosius. Quod sumus
professione, actione potius, quàm nomine demon-
stremus, ut actio respondeat nomini, & nomen re-
spondeat actioni. ¶ Quartum est successio sancto-
rum;

rum; Viri enim religiosi tanquam filij succedunt in hereditatem sanctorum; & ideo si vere sunt filij, & non adulteri, debent eos imitari in operibus. Vnde Dominus dicit Iudæis: Si filij Abraham estis, opera Abraham facite. Eadem ratione, Si filij Augustini, Benedicti, Dominici, Francisci estis, opera eorum, quæ fecerunt, & facienda tradiderunt, facite. ¶ Quintum est conditio cohabitationis; nā secundum leges eorum, cum quibus habitamus, debemus vivere. ¶ Sextum multitudo inconuenientium. Nam Eccles. 5. dicitur, quod displicet Deo stulta, & infidelis promissio. Item dicitur Eccle. 36. Vbi non est sepes, diripietur possessio. Cum ergo obseruantia regulares sint quasi sepes, sequitur ex eorum dissipatione direptio omnium bonorum spiritualium. Item si omne mendacium est reprehensibile, quanto est maior, cui mentitur, tanto reprehensibilius est mendacium. Tales autem Deo, cui se obligauerunt, mentiuntur, & ideo valde timendum est de morte subitanea; sicut accidit Anania, ex eadem causa Act. 5. Non es mentitus hominibus, sed Deo. Audiens autem Ananias hæc verba cecidit, & expirauit. Item tales sunt sicut statua David, in qua aliud non est inuentum, nisi solum vestes, & pelles caprarum. 1. Reg. 19. in qua illusum est regi Saul, & non sine indignatione eius. Quare inquit sic illusisti mihi? Nunquid non est illusio similis, quando non inuenitur in religione nisi habitus? Item sicut 1. Esdræ. 3. Seniores, qui viderant templum, cum esset aliter fundatum hoc templum, in oculis eorum flebant. Et causa, quia quasi nihil erat illud in comparatione ad primum. Quantam ergo materiam doloris habent viri perfecti, qui vident religionem tam grauiter corruisse à statu antiquo

quo. Item religio via est ad Paradisum, qui ergo dissipant eam, faciunt, ne sequentes possint per eam illuc transire. Esa. 33. Dissipatae sunt viae, cessauit transiens per eam. Item multi videntes religionem dissipatam, amittunt deuotionem intrandi ad eam: Baruch. 4. A multis derelicta sum propter peccata filiorum meorum, quia declinauerunt à lege Dei. Item saecularibus propter hoc factum est in derisum. Treñ. 2. Plauserunt super te manibus omnes transeuntes per viam, sibilauerunt, & mouerunt capita sua super te filia Hierusalem. Vide etiam de illo, qui dixit matri. Volo saluare animam meam, & tandem negligens fuit in religione.

¶ CONTRA ILLOS, QUI NON

integre seruant ordinem suum.

Cap. CLXXXIII.

NOrandum secundo, quod sunt aliqui, qui non integre seruant ordinem suum, sed aliquam partem seruant professionis suae, aliquam non. Isti sunt sicut Samaritani, qui partim colebant Deum partim idola. Isti sunt, qui sequuntur Dominum claudicando, contra quos dicit Helias 1. Reg. 18. Usquequo claudicatis in duas partes. Sunt iterum sicut adultera, quae licet à viro non recedit omnino; tamen iuxta eum recipit alterum. Sunt iterum sicut pica, quae partim est alba; partim nigra. Et isti sunt partim mali, partim boni. Quod obstupescens Dominus dicit Hier. 12. Nunquid auis discolor haereditas mea mihi? ¶ Sciendum est autem, quod ex huiusmodi partiali ordinis transgressione sequuntur multa mala. Tales enim sunt sicut vas perforatum, & bona alia, quae faciunt per partem religionis,

nis, quam frangunt, amittunt. Eccl. 9. Et qui in vno peccauerit, multa bona amitteret. Exemplum in vitis patrum de quodam, qui est visus haurire aquam de puteo, & ponere in lapide perforato, & inde tota exibat. Vnde etiam Iaco. 2. dicitur. Qui in vno offenderit, factus est omnium reus. Exemplum. Quidam miles inuenit quendam stultum monachum, qui amore vxoris suæ fecerat vestem quandam, quæ partim erat religiosa, partim sæcularis, & apprehendens eum dixit. Domine monache ex parte ista, quæ est religiosa, non audeo vos tangere, ne essem excommunicatus; sed ex parte ista sæculari bene possum vos tangere; & ex illa parte tantum verberavit eum, quod mortuus est: ita ac si per totum corpus verberasset eum. Non est autem dubium, quin similiter homines Deus huiusmodi cõdemneret, ac si totam professionem transgredierentur. Itē tales sunt deturpati, sicut nuncijs Dauid, quando rasa fuit barba eorum dimidia, & vestes mediæ præcisæ vsq; ad nates, & non sunt digni stare in conspectu Dauid. Et ideo dicitur eis. Manete in Hierico, donec crescat barba vestra, 2. Reg. 10. Item per fracturam religionis ingrediuntur hostes. Iob. 30. Quasi rupto muro, & aperta ianua irruerunt super me. ¶ Item tales omnia, quæ promiserunt, debent reddere; & ideo si partem reddant, & non totum, non euadunt tortores. Matth. 18. Iratus Dominus eius tradidit eum tortoribus, quousq; redderet vniuersum debitum. Quia ergo indecens est, semiple-
nè religionem seruare, & tot mala indè se-
quuntur, dicit Vir sanctus (vt ob-
seruetis hæc omnia.)

NOtandum tertio, quòd sicut est quædam pulchritudo corporalis, ita est quædam spiritalis scilicet virtutum, de qua Salomon multum prophetauit in libro Canticorum. Hæc est, quæ reddit hominem similem pulcherrimo Deo. Vnde quod homo factus dicitur ad similitudinem Dei, dicunt sancti referendum ad virtutes, per quas homo assimilatur Deo. Hæc est, quæ sola reddit Deo amabilem, Vnde. Psal. Audi filia, quod est obedientiæ, inclina autem tuam; quod est humilitatis, & obliuiscere populum tuum, quod est extinctionis carnalis affectus, quæ omnia sonant virtutem. Et sequitur. Et concupiscet rex decorem tuum. Item pulchritudo hæc non est mutuata sicut multæ pulchritudines corporales; sed est consubstantialis, & naturalis ipsi virtuti. Seneca. Nullo honestamento indiget virtus; quia ipsa magnum decus sui est; & ideo maior, sicut pulchritudines naturales in floribus. Item pulchritudo corporalis cito marcescit. Iaco. 1. Non sic autem pulchritudo virtutum. Et ideo dicitur Cant. 6. Anima sancta pulchra, vt luna, cuius pulchritudo non deficit. Legitur de beato Antonio, quod cum vidisset quandam mulierem valde ornatam, fleuit dicens. Ignosce mihi omnipotens Deus, quia vnius diei istius meretricis ornatus totius vite meæ superauit ornamenta; ista tanta pro mundo composuit, & ego immortalī Domino placere proposui, & similia per meam negligentiam nunquam impleui; propter hoc ergo bene dicit vir sanctus. (tanquam spiritalis pulchritudinis amatores.)

DE ODORE BONAE FAMAE.
Cap. CLXXXV.

Quarto notandum, quòd in scriptura sancta bona fama dicitur odor multis de causis. Fœtor enim egreditur a rebus vilibus, vt est lutum, vel stercus; sed odor de rebus preciosis, vt est cinnamomum, balsamum, & huiusmodi. Eodem modo fama bona a preciosa sanctitate bonorum egreditur. Iudith. 8. Hæc erat omnium famosissima; quia timebat Dominum valde. Item bonus odor, cum sentitur, indicat rem cuius est; ita bona fama indicat Christum esse apud eos, qui sic redolent. Apostolus 2. Cor. 2. Christi bonus odor sumus. Itē sicut bonus odor reficit, sic bona fama. Prouer. 15. Bona fama impinguat ossa. Item sicut bonus odor, licet regulariter conferat, tamen quibusdam venenatis nocet, vt bufoni; ita bona fama. Vnde Apostolus. Christi bonus odor sumus his, qui salui fiunt, & his qui pereunt. Alijs quidem odor mortis in mortem; alijs odor vitæ in vitam. Glos. Illi, qui inuidebant bonæ famæ Pauli, vel Christi bono odori, peribant. Noli ergo inuidere, & non occider te bonus odor. Item sicut odor ex odorifera re contusa magis elicitur; ita & fama bonorum. Cant. 3. Perfla hortum meum, & fluent aromata illius. Glosa. Ecclesia pulsata, & probata odorem constantiæ suæ, & abundantioris virtutis ubiquè diffundit. Item bonus odor attrahit. Vnde dicitur de panthera, quòd propter bonum odorem aliæ feræ sequuntur eam; ita bona fama. Canticorum 1. Curremus in odore vnguentorum tuorum. Exemplum de regina Sabba, quam Salomonis famam traxit de finibus

bus terræ, Hiero. Ab ultimis Hispaniarum, Galliarumquæ finibus quosdam venisse legimus, & quos ad sui contemplationem Roma non traxit, unius hominis fama perduxit. Item bonus odor secundum medicos resoluit; ita & bona fama resoluit multos in deuotionem. Vnde Tobia. 7. Audito nomine Tobia senioris, misit se Raguel, & cum lachrymis est osculatus Tobiam iuniorem, & plorans supra collum eius dixit. Benedictio sit tibi fili mi, quia boni, & optimi Viri es filius.

¶ ERRORES CIRCA FAMAM.

Cap. CLXXXVI.

NOtandum autem, quod a multis multis modis erratur circa huiusmodi famam. ¶ Sunt enim aliqui, qui omnino non curant de sua fama. Contra quos Eccles. 41. Curam habe de bono nomine. Alij sunt, qui propter confidentiam bonæ conscientia, famam negligunt, contra quos Hiero. Non habeas illud, sufficit mihi conscientia mea; non curo quid de me loquantur homines: Apostoli prouiderunt bona non solum coram Deo, sed etiam coram hominibus. Alij sunt, qui bonam famam amittunt non ex malitia, sed ex negligentia, contra quos August. Sancta conuersatio tanta debet esse, ne forte cum mala uita sit per lasciuiam, mala fama fiat per negligentiam. Alij sunt, qui non parcentes famæ suæ audacter aliqua committunt cum dispendio famæ suæ, contra quos est illud Gregor. in registro. Quicquid potest grauare opinionem tuam, omnino fugias, & committere illud nullius suasioni consentias. Alij sunt, qui dummodo a uiris malis caueant, non curant malis similia declinare, contra

tra quos dicit Apostolus 1. Thes. 5. Ab omni specie mali abstinete uos. Alij sunt, qui & si in uno loco relinquunt bonam famam, tamen non sic in alijs, contra quos Apostolus 2. Cor. 7. Odorem notitiæ suæ per nos manifestat in omni loco. Sunt autem multa, propter quæ boni uiri debent apponere diligentiam ad habendam bonam famam. Vnum est utilitas proximi. August. Nobis necessaria est uita nostra, alijs fama nostra; Nam sicut crudelis est, qui famam suam negligit; sic qui non curat alijs subuenire. Secundum est utilitas propria. Tertium consolatio amicorum, Aug. Qui nos amant, quærunt, quid laudent in nobis, qui autem nos odium, detrahunt nobis; Nos autem in utroq; medio constituti & uitam nostram, & famam nostram sic custodire debemus, ut non erubescant detractoribus laudatores. Quartum est dilectio inimicorum. Apostolus ad Titum 2. In omnibus præbe teipsum exemplum bonorum operum, ut uereatur is, qui ex aduerso est, nichil mali habens dicere de uobis: Quintum est proprius decor, pro quo solent multum zelare. Ber. Fortitudo tua confidentia fidelis conscientia, decor tuus est bonæ opinionis, uel famæ splendor. Sextum est fructus diuturnitatis. Fama enim non solum proficit alijs, dum homo uiuit, sicut doctrina; sed etiam post mortem. Eccles. 41. Bonæ uitæ numerus dierum, bonum autem nomen manebit in æternum. Septimum est reuerentia diuini nominis. Mat. 5. Sic luceat lux uestra coram hominibus, ut uideant opera uestra bona, & glorificent patrem uestrum, qui in cælis est, ¶ Notandum tamen, quod est quædam fama, quæ oritur ex aliquo malo perpetrato. Psal. Quoniam laudatur peccator in desiderijs animæ suæ, & iniquus benedicitur,

Sunt

Sunt autem aliqui, qui solent in tali fama lætari, & sunt similes quibusdam, qui ex corruptione magna solent in fœtoribus stercoreum delectari. Alia est de factis sæcularibus, quæ pertinent ad potentiam, uel sapientiam, uel diuitias. Iste autem odor non est diuinus, sed meretricius; quia ergo uiri religiosi tantum curare debent de bona fama, ut prædictum est, & solum de fama oriente ex sanctitate, & purè propter Christum, bene dicit uir sanctus. (Seruetis hæc omnia, tanquam Christi bono odore de bona conuersatione fragrantés.) Vnde per hoc quod dicit (bono) ostendit, quòd nunquàm de malo debent quærere famam, & per hoc quod dicit (conuersatione) declaratur, quòd non ex factis sæcularibus, sed solum ex operibus bonis est eis fama quærenda. Per hoc uero quod dicit (bono Christi odore, notatur, quòd in fama sua nihil debent quærere nisi Christum.

V*T autem vos in libello hoc tanquàm in speculo possitis inspicere, ne per obliuionem aliquid negligatur, semel in septimana uobis legatur.*

¶ Hic agitur de tertio, quod ualet ad regulæ obseruationem, quod est memoria mandatorum eius: quia uero ista memoria habetur per regulæ lectionem. Primo tradit mandatum circa huiusmodi lectionem. Secundo circa ea, quæ facienda sunt post lectionem: cum dicit (Et ubi uos inueneritis, &c.) Licet autem frequenter debeat legi Regula à suis professoribus; tamen ne circa hoc fiat aliqua ommissio, arctat ad certum tempus legendi, cum dicit (semel in septimana uobis legatur.) Item causam assignat huius, cum dicit (ut autem uos in libello hoc tanquàm in speculo possitis inspicere.) Item utilitatem

huius declarat, cum dicit (ne per obliuionem aliquid negligatur.) ¶ Sunt autem notabilia, quæ eliciuntur ex hoc mandato. Vnum est, quòd cauendū est, ne fiat aliquid quantumcumq; modicum ex contemptu, cum dicit (Ne aliquid negligatur.) Aliud, quòd non debent cadere à memoria, quæ pertinent ad salutem, cum dicit. (Ne per obliuionem aliquid negligatur.) Aliud est, quòd ad vitandum huiusmodi obliuionem insistendum est lectioni frequenter, quod notatur cum dicit (semel in septimana.) Aliud est, quod legens, vel audiens regulam, debet intendere, cum dicit. (Et vt vos in libello hoc &c.)

¶ AD CAVENDAM NEGLIGENTIAM.
Cap. CLXXXVII.

Circa primum notandum, quòd ad cauēdum negligentiam quamcumq; circa salutaria mandata ponit Dominus speciale mandatum dicens, Deut. 8. Obserua, & caue, ne quando obliuiscaris mandata eius, atq; iudicia, & cerimonias. Non solum autem dat circa hoc mandatum, sed addit duram comminationē Leuit. 20. Si negligens populus terræ, & quasi paruipendens imperium meum dimiserit hominem, qui dedit de semine suo Moloch, ponam faciem meam super hominem illum, & cognationem eius, succidamq; illum. Non solum autem ponit super hoc comminationem; sed & pœnā grauem legitur inflixisse. Exo. 9. Qui neglexerit sermonem Domini, dimiseritq; seruos suos, & iumenta in agris, & post. Et percussit grando in omni terra Ægypti eunқта, quæ fuerunt in agris ab homine, vsq; ad pecus. Præterea dicitur Hieremiæ 48. Maledictus homo, qui facit opus Domini negligenter.
Cum

Cum ergo obseruantia regulæ sit opus Domini, qui circa hanc committit negligentiam maledictus est à spiritu, qui loquitur in propheta. Item Prouer. 19. dicitur. Qui custodit mandatum, custodit animam suam: Qui autem negligit viam suam, mortificabitur. Cum ergo regula religiosi sit via sua: sicut qui negligit viam suam interdum incurrit periculum mortis, ita qui in suam regulam negligentiam committit. Item dicitur Eccles. 9. Qui spernit modica, paulatim decidet. Sicut ergo domus, cuius reparatio negligitur, subito cadit, ita & talis. Sunt autem tria, quæ solent esse occasio huius negligentia. Primum est minor timor Domini, qui enim multum timet Dominum, cauet negligentiam. Eccles. 7. Qui timet Deum, nihil negligit. Secundum est minor cura animæ suæ, si enim homines tantum curarent de salute animæ suæ, sicut curant de salute corporis, nihil negligenter eorum, quæ pertinent ad animæ salutem. Tertium est occupatio circa alia negotia. Eccles. 26. Difficile exiit negotians à negligentia.

DE REBUS SÆCULARIBUS
non habendis in mente. Cap. CLXXXVIII.

Circa secundum nota, quod secundum philosophos memoria est thesaurus specierum, quæ scilicet per virtutes apprehensiuas inducuntur in animam. Inter omnia autem bona, quæ debet vir bonus habere in memoria, sunt Dei mandata. Eccle. 3. Quæ præcepit tibi Deus, cogita illa semper. Et Prouerb. 7. Fili liga legem meam in digitis tuis, & Deuter. 6. Meditaberis sedens in domo tua, & ambulans in itinere, dormiens, atq; consurgens, & li-

gabis, quasi signum in manu tua, eruntq; & non mouebuntur ante oculos tuos, scribesq; ea in limine, & in postibus domus tuæ. Osee 4. quia oblita es legis Dei tui, obliuiscar filiorum tuorum & ego. Vnde dicitur de beato Bernardo, quod apud se frequenter dicebat. Bernarde, Bernarde, Bernarde ad quid venisti? reducens sibi ad memoriam professionem suam, & hoc conueniens est. Dicitur enim Hierē. 2. Nunquid potest obliuisci uirgo ornamentum suum? Cum ergo regula sit ornamentum spirituale, & valde pulchrum viro religioso; quomodo conuenit, ut eum tradat obliuioni? Item dicitur in vitis patrum, quod tres sunt virtutes Sathanæ, Obliuio, Negligentia, & Concupiscentia. Oliuio est mater negligentia, de negligentia vero oritur concupiscentia, de concupiscentia corrumpitur homo. Obliuio ergo professionis initium est totius ruinæ in religione; & ideo bene dicit (ne per obliuionem aliquid negligatur.)

*¶ DE REGVLA FREQUENTER
legenda. Cap. CLXXXIX.*

Circa tertium notandum, quod quia ea, quæ sciuntur, vel intelliguntur, vel audiuntur, vel dicuntur, vel fiunt, facile de memoria elabuntur, & ideo adinuenta sunt scripturæ, ut ea, quæ expedit habere in memoria, per scripturam perpetuentur. Exod. 17. Scribe hæc in monumentum in libr. r. ob memoriam. Sed sunt aliqui religiosi, qui ita fastidiunt legere in scripturis, quod raro, vel nunquam se occupant in eis, contra quos Augustinus supra. (Codices certa hora singulis diebus petantur.) Sunt alij, qui cum legunt, libentius legunt in libris gentiliū,

tīlium, quàm in sacris, propter quod Hieronymus raptus ad iudicium fuit grauiſſime flagellatus vſq; ad abiurationē. Sunt alij, qui & ſi libenter legunt in ſacris ſcripturis, tamen parum ſciunt, vel ſcire curant de regula profeſſionis ſuæ: Iſti ſunt ſicut ſtulti aduocati, qui nunquam ſtudent in textu, vel gloſ. de materia, ſuper qua ferenda eſt ſententia à Iudice. Secundum enim regulam ſuæ profeſſionis quilibet eſt iudicandus. Vidi e contrario ego quen-
dam monachum, qui quaſi ſemper ferebat in mani-
bus regulam Sancti Benedicti, modo legens in ea,
modo ſtudens, modo quærens eius dubitabilia cum inueniebat virum diſcretum. Pharifæi decalogum ſcriptum in brachio ſiniſtro ferebant. Deuter. 17.
dicitur. Poſtquàm rex ſederit in ſolio regni ſui,
deſcribet ſibi Deuteronomium legis huius in volu-
mine, legetq; illud omnibus diebus vitæ ſuæ; quan-
to magis religioſi hoc facere debent? Proinde ſo-
lent prælati diſcreti ordinare, quòd illi, qui ex oc-
cupatione aliqua, vel negligentia hoc non faciunt,
alio tempore ſuppleant.

E*T ubi vos inueneritis ea, qua ſcripta ſunt, facien-
tes, agite gratias Domino bonorum omnium lar-
gitori.*

¶ Dato mandato circa regulæ lectionem, tradit mandata circa ea, quæ ſunt poſt huiusmodi facien-
da. Sciendum autem, quod conſideranti ſe, qualis ſit, duo occurrunt ſcilicet qualis ſit in bono, & qua-
lis ſit in malo. Bernar. Vigilanter cerne, qualis ſis
ex te, & qualis ex dono. Primum conſiderans in
ſpéculo regulæ, interdum inuenit ſe ſcripta facien-
tem, & hoc bonum non facientem, interdum & hoc
malum; circa primum tradit hoc mandatum, vide-

licet de gratiarum actione; circa secundum ibi. (ubi autem quicumq; vestrum.)

¶ *DE GRATIARVM ACTIONE*
de bonis. Cap. CXC.

Circa primum notandum, quod sunt quidam, qui cum considerant se, facientes quod facere debent, inaniter extolluntur, similes Philosophis, qui non glorificauerunt Deum, aut gratias egerunt, sed euanuerunt in cogitationibus suis. Rom. i. contra quos dicit Apostolus. Quid habes, quod non accepisti, si autem accepisti, vnde gloriaris, quasi non acceperis? Alij sunt, qui non solum extolluntur inaniter in se; sed & super alios in his deficientes gloriantur, similes Phariseo hypocritæ dicenti. Lucæ 18. Gratias ago tibi Domine, quod non sum sicut ceteri hominum, contra quos Apostolus. Noli gloriari aduersus ramos, scilicet fractos. Alij sunt, qui licet sciant, quod quicquid boni faciunt, ex Dei dono habent; tamen ex quadam rusticitate non referunt ei gratias, immo quamuis assidua recipiât Dei beneficia, tamen semper remanent ingrati, contra quos Colos. 3. Et grati estote. ¶ Porro ex huiusmodi ingratitudine sequuntur tria mala. Primum est spoliatio de bonis acceptis. August. Quod Deus dederat gratis, abstulit ingratis. Secundum est impedimentum accipiendorum. Bernar. Non est dignus dandis, qui non refert gratias de datis. Tertium est punizio etiam corporalis: Vnde dicit Iosephus, quod Ezechias licet immolasset Dño post triumphum de Sennacherib: tamen quia non reddidit dignas Deo gratias faciendo ei nouum canticum, sicut in talibus patres consueuerunt, ægrotauit

tuit vsq; ad mortem; vel quia non duxerat vxorem, ex quo per illam lineam Christus debebat descendere. Ex gratiarum vero actione econtrario tria sequuntur bona. Primum est conseruatio bonorum iam perceptorum. Aliud est bonorum multiplicatio. Tertium promotio ad maiora in futurum. Dñs de beneficijs omnibus vult, quòd homo habeat totam vtilitatem, ipse uero gloriam, propter iam dicta sanctus uir incitat nos ad gratiarum actiones.

V*Bi autem sibi quisq; vestrum viderit aliquid deesse, doleat de præterito, caueat de futuro, orans ut sibi debitum dimittatur, & in tentationem non inducatur.*

¶ Post mandatum præcedens traditum de gratiarum actione pro his, quæ lecta in regula de illa inueniuntur obseruata, subiungitur hic mandatum de pœnitentia pro his, quæ inueniuntur non seruata. Quia uero pœnitentia uera secundum Ambro. est præterita mala plangere, & plangenda iterum non committere. Ideo secundum hoc duo mandat. Vnum cum dicit. (doleat de præterito.) Aliud cū dicit (caueant de futuro.) Quia uero in utroq; eorum est necessarium donum Dei, subiungit (orans ut sibi debitum dimittatur) quantum ad primum. (Et in tentationem non inducatur) quantum ad secundum.

¶ *DE DOLORE SUPER TRANSGRESSIONe Regula. Cap. CXCI.*

Circa primum vide, cum dicit (doleat) quanta cura beati Augustini fuit de regula strictè seruanda; superius enim dixit (si quid seruatum minus

fuerit, non negligenter prateratur) Præterea dixit (ne per obliuionem aliquid negligatur;) nunc aut dicit (vbi autem sibi quicumq; vestrum viderit aliquid deesse, doleat de præterito.) Item aliqui prælati abutentes potestate sibi cōmissa interdum omitunt aliquid de regula, ad quod alios cogunt. Alij quia officiales ratione occupationum ab aliquibus se excusant; Claustrales enim simplices interdum continuam obseruantiam regulæ intolerabilem putant. Et beatus Augustinus nullum excipiens ab obseruantia regulæ dicit (quicumq; vestrum) scilicet prælatus, vel officialis, vel simplex claustralis viderit aliquid sibi deesse. Item sunt aliqui, qui & si transgressionem regulæ confiteantur interdum, vel se accusent, tamen rarò dolent ex corde vero, vel rarò se corrigunt. Et quia sine his prima non sufficiunt; ideo dicit (vt doleant, & caueant) quia melius est, quàm confiteri solum, & accusare. In vitis patrum legitur, quod abbas Siluanus raptus ad iudicium, videntq; multitudinem de habitu religioso euntes ad tormentum, & reuersus ad se fiebat inconsolabiliter nolens exire de cella, & si quando compellebatur exire, operiebat caput suum caputio dicens: Quid necesse est videre lumen illud, in quo nihil vtile est? Si aut iste fleuit pro alijs religiosis iam damnatis, quanto magis dolendum est religioso super transgressione suæ professionis, ne damnetur? ¶ Ibidem legitur, quod cum abbas Nestor de Schiri venisset ad senes de monte Nitrio vocatus ab eis, & rogassent eum, vt faceret eis verbum: Ille plorans dixit. Fratres ploremus, & producant oculi nostri lachrymas, antequàm eamus hinc, vbi lachrymæ nostræ corpora nostra comburant. Et fleuerunt omnes cadentes in facies suas, dicentes. Ora pro

pro nobis pater. Vnde cum lectio regulæ ostendat religioso, quæ bona de sunt ei & quæ mala habet: sicut speculum ostendit mulieri fœditatem suam. Quæ ostensio est sibi causa tristitiæ: Bene dicit (vbi autem quicumque vestrum viderit sibi aliquid deesse, doleat de præterito.)

¶ *DE PECCATI PLACENTIA, ET
recidivo. Cap. CXCI.*

CIrca hoc quod dicit (caueat de futuro) notandum, quòd in omni delicto est aliqua complacentia propter aliquid, quod in eo delectat: Item est in eo aliqua audacia, quòd delinquens contra Deum non veretur. Et ideo sicut virgo post corruptionem propter delectationem iam expertam eam attrahentem facilius inclinatur peccatis secundarijs, quàm primis; & latro videns nihil mali sibi accidisse ex primo furto audacius committet alia furta: Ita in omni delicto accidit, quòd post prima homo facilius inclinatur ad secunda, vel alia perpetranda; & ideo reddens Augusti. circa hoc religiosum cautum dicit (caueat de futuro) innuens, quòd de facili cadit in idem, nisi caueat diligenter. ¶ Attendendum autem, quòd peccati recidivatio aufert fructum totius purgationis præteritæ, siue per contritionem, confessionem, & satisfactionem. Eccles. 34. Qui baptizatur a mortuo, & iterum tangit mortuum, quid prodest lauatio eius? Item vilificat nobilissimam creaturam Prouerb. 26. Sicut canis rediens ad vomitum, sic imprudens, qui iterat stultitiam suam. Item redigit in maiorem potestatem dyaboli. Luce 11. Tunc scilicet quando reuertitur immundus spiritus in domum suam, vadit, & assumit

imit alios spiritus nequiores se, & ingressi habitant ibi. Item priuat labores vtilitate. Ecclesiastici. 44. Vnus ædificans, & alter destruens, quid prodest illis, nisi labor? Item aggrauat peccatum, sicut recidiuatio infirmitatem. Lucæ. 11. Et fiunt nonissima hominis illius peiora prioribus. Et prouocat contra se Angelos in iudicio, qui habuerunt gaudium de conuersione peccatoris, & maius expectant de glorificatione. Et ideo multum poterunt indignari contra eos, qui fraudant eos tali gaudio. Ber. Tu qui ad vomitum redire deliberas, putas ne placatos habebis in iudicio, quos tanto priuare vis gaudio? Item Deum grauius offendit propter gratiam factam in præcedenti remissione. Mat. 18. de seruo nequàm. Vnde Dominus Ioh. 8. dicit mulieri. Vade, & iam amplius noli peccare. ¶ Porro ad cauendum recidiuationem multum valet conceptio firmi propositi de cauendo; sicut enim citius frangitur ab inimico ostium vacillans, quàm firmum: sic animus sine firmitate propositi citius vincitur a dyabolo. Item valet ad hoc timor proprii casus: qui enim timet multum cadere, melius cauet sibi, & ita non facile cadit. Apostolus 1. Corinth. 10. Qui se existimat stare, videat, ne cadat. Item confidentia in Domino; qui enim de se præsumit, stat super sedem superbiæ, vbi ceciderunt, qui operantur iniquitatem; & ideo de facili cadunt propter huiusmodi sedis fragilitatem; Qui vero de se diffidentes spem ponunt in Domino, eius adiutorio stant, & incedunt firmi. Psal. Qui confidunt in Domino sicut mons Sion, non commouebitur in æternum. Item sollicitudo circa sui custodiam; non enim ita cito capitur castrum custoditum sollicitè, sicut custoditum negligenter. Et ideo dicitur Deut. 4. Custodite

temetip-

temetipsum, & animam tuam sollicitè. Sicut enim vir prudens infirmitatem incurrens, considerat causam infirmitatis, si fuerit frigus, vel calor, vel huiusmodi, causa inuentâ apponit remedium, & cautelam in antea; ita viri penitentis est considerare, quæ fuerunt occasiones peccati sui, & cum remedio de præterito cautelam apponere in futurum. August. Satisfacere est causas peccatorum excidere, & eorum suggestionibus aditum non indulgere. Item abscondio est a periculis; sicut enim in locis guerrarum, qui se exponunt, citius læduntur, quàm qui se abscondunt; ita multum valet contra sagittas inimici abscondi. Prouerb. 22. Callidus videt malum, & abscondit se. Innocens scilicet simplex transijt, & afflicus est damno. Item fuga occasio- num. Eccles. 21. Quasi a facie colubri fuge peccatū. Item occupatio sancta. Hierony. Semper aliquid boni operis facito, vt te dyabolus inueniat occupatū.

¶ *DE HIS, QUAE VALENT AD remissionem habendam. Cap. CXCIII.*

CIrca tertium cum dicit (orans vt sibi debitum dimittatur.) notandum, quòd quantumcunquè aliquis doleat de commissis, nunquàm est certus de remissione. Ionæ. 2. Quis scit, si conuertatur, & ignoscat Deus? Et prudentis est semper timere de huiusmodi remissione. Eccles. 5. De propitiatu peccatorum noli esse sine metu, propter istum timorem, etiam sancti orant pro peccatis dimittendis. Psal. Pro hac scilicet remissione, orabit ad te omnis sanctus in tempore oportuno. Nota autem, quòd multa sunt, quæ faciunt ad remissionem peccati. Vnū est peccati cognitio. Psal. A peccato meo munda

da me, quoniam iniquitatem meam ego cognosco. Ipso enim dicente, Peccaui Domine, Nathan Propheta statim respondit, Et Dominius transtulit peccatum tuum a te 2. Reg. 11. Aliud est suipsius apud Deum accusatio. Psal. Dixi confitebor aduersum me iniustitiam meam, & tu remisisti impietatem peccati mei. Aliud est contritio de peccato, sicut apparet in Petro, cui propter fletum amarum remissum est peccatum. Aliud est confessio oris. Psal. Facta est iudæa sanctificatio eius. Iudæa confessio interpretatur. Aliud est peccati desertio. Prouer. 28. Qui confessus fuerit scelera sua, & reliquerit ea, misericordiam consequetur. Aliud est satisfactio implentio. Apostolus Exhibete membra vestra seruire iustitiæ &c. Aliud est opus misericordiæ. Mat. 5. Beati misericordes, quoniam ipsi misericordiam consequentur. Aliud est remissio ecclesiastica. Io. 20. Quorum remisistis peccata, remittuntur eis. Aliud remissio iniuriæ. Eccles. 28. Relinque proximo tuo nocentem te, & tunc deprecanti tibi peccata soluantur. Aliud est, flagellum Domini piè susceptum. Tobia. 3. Cum iratus fueris, misericordiam facis, & in tēpore tribulationis dimittis his, qui inuocant te. Aliud est intercessio sancta. Iob. ult. Iob. seruus meus orabit pro vobis, vt non imputetur vobis stultitia. Aliud est meritū alienum. Lu. 5. Quorum vt vidit fidem, ait paralytico, Homo remittuntur tibi peccata tua. Aliud est immensitas dilectionis. Luc. 7. Remittuntur ei peccata multa, quoniam dilexit multum. Oranti ergo pro peccatis laborandum est circa ista, vt leuatis manibus operum cum voce oratio eius citius exaudiat.

DE TENTATIONIBVS.


Cap. CXCIV.

Circā quartum, quod dicit (in tentationem non inducatur) notandum, quòd sunt quidam, quos dyabolus rarò, vel numquàm tentat, qui scilicet sibi gratis seruiunt Gre. Illos pulsare negligit, quos iure quieto possidere se sentit. Alios vero, qui Christo seruiunt, magis tentationibus vexat, sicut Pharaò filios Israel; & ideo dicitur Eccles. 2. Fili accedens ad seruitutem Dei, præpara animam tuam ad tentationem; sunt autem multæ causæ, quare dyabolus impugnat seruos Dei. Vna est superbia: Superbus enim est dyabolus, & ideo quando aliquem contra se cognoscit præeminentem, indignatus insurgit contra eum, sicut tyrannus. Gregorius. Antiquus hostis tanto grauius contra hostes fræuit, quanto eleuari eos conspicit. Alia est inuidia? Inuidia enim, quam habuit ab initio erga hominem, ne ascenderet in cælum, non cessat; & ideo quando videt illuc bonos tendere, nititur eos impedire. Gregorius. Illos antiquus hostis rapere nititur, quos, despectis terrenis studijs, iungi cœlestibus contemplatur. Alia est vindicta: Est enim malitiosus, & ideo quando aliquis facit vituperium repellendo eum a se, sicut boni, se vindicare nititur. Gregorius. Tanto dyabolus in hominis fræctione duriores se exhibet, quanto ab eo q̄ projectus fuerit, dolet. Alia est causa inimicitiae antiquæ inter hominem, & dyabolum, in quibus boni magis rebellant; & ideo ipse eos impugnat. Gregorius. Hostis noster adhuc in hac vita nos positos quanto magis sibi rebellare conspicit, tanto
acrius

acrius nos impugnare contendit. ¶ Sciendum autem, quòd dominus huiusmodi tentationes nō permitteret euenire electis suis, quibus omnia coöperantur in bonum, nisi cederent ad vtilitatem eorū. Apostolus 1. Cor. 10. Faciet cum tentatione prouentum. Et hoc ad multa. Primo ad inquirendam scientiam pugnandi, sicut torneamentū militi: Eccles. 34. *Qui non est tentatus, qualia scit, scilicet de bello spirituali, ad quod summè valet experientia?* Secundo ad expellendam negligentiam; qui enim non sentiunt se hostes habere, frequentet pigrescūt. Glo. super illo verbo. Proba me Domine, & tenta me. Nisi tentaret, essemus negligentes. Tertio ad proficiendum in virtutibus: Vnde fratri dicenti, quod non haberet tentationes, dixit senex. Vade, & roga Deum contra te moueri bellum, quoniam pugnando proficit anima, sicut dicitur in viti spatrum. Multum addicit sibi virtus laceffita, sicut canis prouocatus fit bellicosior. Quarto ad expellendam elationem. Apostolus 2. Cor. 12. Ne magnitudo reuelationum extollat me, datus est mihi Angelus Sathanæ, qui me colaphizet. Quinto ad alios instruendum: Viri enim perfecti, qui transeunt per multas tribulationes, & tentationes, melius sciunt alios instruere: Apostolus 2. Cor. 1. Si tribulamur pro vestra exhortatione, idest vt sciamus vos exhortari. He. 2. In eo in quo tentatus est, potens est auxiliari & alios. Sexto ad coronam consequendam. Iacob. 1. Beatus qui suffert tentationem, quoniam cum probatus fuerit, accipiet coronam vitæ. ¶ Sunt autem multa, quæ valent ad vincendum tentationes. Primū est assidua belli memoratio, *Qui enim cogitat assiduè hostes habere, melius etiam cauet;* Et ideo dicitur Iob. 40. Memento belli. Secundum

est vigilantia; sicut fit in castris tempore hostili, in quibus vigilatur etiam de nocte propter hostium periculum. Et ideo dicitur 2. Pet. 5. Vigilate, quia aduersarius vester dyabolus, tanquam leo rugiens, circuit, quærens quem deuoret. Tertium est confortatio cordis; multi enim ex defectu cordis solent in pugna succumbere; & ideo dicitur Iosua. 1. Confortare, & esto robustus, noli metuere, & noli timere. Quartum est conatus in pugnando. Iaco. 4. Resistite dyabolo, & fugiet a vobis. Quintum est adiutorium bonorum. Eccles. 4. Et si quispiam præualuerit contra vnum, duo resistent ei. Sextum est virtus fidei: Heb. 11. Sancti per fidem vicerunt regna. Et hæc est victoria, quæ vincit mundum, fides vestra: Et ideo dicit Petrus, Cui resistite fortes in fide. Septimum est fidelis reuelatio tentationum in confessione viris bonis. Vnde in vitis patrū. Nichil ita confundit, & allidit virtutem dæmonū, quam si quis secreta cogitationum reuelauerit sanctissimis patribus; Latronum enim est fugere, vbi perpenduntur. Octauum est meditatio sacræ scripturæ; cor enim est sicut molendinum, quod semper molit, & ideo, quando reuoluit in se sacram scripturam, non recipit illud, quod dyabolus affert ad molendinum per cogitationes. Nonum est crucis memoria; hoc est enim vexillum regale, quod erectum terret; & fugat dæmonum agmina. Chrysostomus. Tanta est virtus sedulæ meditationis crucis Christi, quod si fideliter in corde teneatur, statim ad eius memoriam dyaboli fugatur exercitus. Decimum est scientia diuina, quæ instruit in multis circa illud bellum; in bello enim plus valere solet sapientia, quam vires, vel arma bellica. Esa. 11. Non nocebunt, nequē occident in vniuerso monte

meo scilicet hostes infernales, quia repleta est terra scientia Domini. Vndecimum est contritio capitis tentationum scilicet cogitationum primarū: Hiero. Lubricus est coluber tortuosus, & nisi capite teneatur, totus illabitur. Duodecimum est diuinum auxilium; Ipse enim Deus est, qui conseruat in tentatione, Eccles. 33. In tentatione conseruat illū scilicet Deus timentem se. Item non permittit tentationem inualescere; & ideo quasi ad summum remedium docens confugere dicit Aug. (orans ut in tentationem a Domino scilicet permissiue non inducatur) Beati uiri illi, qui prædictis videntes remedijs, uiriliter resistunt tentationibus; Nam dicit Bern. Quotiens tentationibus resistimus, demones superamus, Angelos letificamus, Deum honoramus. Ipse nos hortatur, ut pugnemus: adiuuat, ut uincamus, certantes spectat, deficientes subleuat, uincentes coronat. Amen.



FINIT EXPOSITIO M. VMBERTI
*Generalis Quinti Ordinis Prædicatorum
 super Regula Beati Augustini.*



T A B V L A R E R V M N O T A B I L I V M I N H O C L I B R O C O N T E N T A R V M.

*Cuius primus Numerus Paginam,
Secundus Capitulum indicat.*



A

Aberantes qui sint
à recto religio-
nis tramite. 39. 27.
Abstinencia caro domanda.
79. 49.
Abstinencia non seruata in
quosdā inuectiua. 81. 50.
Abstinencia fracta Proto pa-
rentes grauem subiere pe-
nam. 84. 51.
Abstinencia quantis ab hosti-
bus impugnetur. 84. 51.
Abstinencia indiscreta. aut
nimis austerā vitanda.
85. 52.
Abstinenciam non ita ener-
uata natura quin seruare
queat. 90. 55.
Abhominabile quomodo
committatur. 190. 87.

Abusiones duæ emanant ab
illis; quibus nimia recrea-
tiones relaxantur. 109. 66
Abundantiam non querant
in Monasterio. 35. 24
Accipiens aliquid religiosus
de cōmunibus bonis pro-
pria auctoritate an peccet
25. 19.
Accipere non licet res pro-
pria auctoritate, sed per
distributionem. 25. 18.
Accusare sine teste an liceat,
& an sufficiat vnus testis.
216. 94.
Actiones corporales hic enu-
merata non sunt subterfu-
giendæ causa orationis ex-
traordinariæ. 72. 44.
Actus diuersi in homine ad
se, ad Deum, & proximū
directi. 155. 76.

Dd

Actio

T A B V L A

Actio duplex . 55. 35.
Admonitiones faciendæ se-
 cretæ . 202. 90
Adversitates multos erudi-
 unt . 41. 27.
Aegrotis cura exhibenda spe-
 cialis . 299. 126.
Arguere est donum spiritus
 sancti . 197. 89
Amicitia sæcularis , & falsa,
 quæ sit . 17. 12.
Arma & religionis, & Prædi-
 catoris, quæ sint . 305. 129.
Aspectus mulierum cuique
 semper fuit grati pernicio-
 sum . 166. 79.
Aspectu quomodo dicatur
 appeti . cum appetere sit
 in affectu , non in aspe-
 ctu . 179. 82.
Aspectus fœminæ viſæ inter-
 dum est medium appeti-
 tus . 179. 82.
Aspectus diuinus non est vt
 humanus, omnia obscura
 videns . 187. 87.
Austeritas in infirmos habi-
 ta multū dedecet . 94. 58.
Austeritas vitæ cum non vi-
 get in religiosis, maximè
 in Prælatiſ . multum de-
 decet . 383. 177.
Auctoritas Rectorum demi-
 tur, aut debilitatur causis
 extrinsecis , & intrinse-
 cis . 344. 154.

B

Balnearis religiosi non re-
 ctes pro quacunq; ne-
 cessitate . 292. 122.
Bona quædam communia
 distribuenda, quædam nō .
 26. 19
Bona temporalia erogantes
 non zelo charitatis . 51. 43
Bona tēporalia si desint pro-
 pter Deum , nihil deest
 ibidem .
Bona communia magis, quā
 singularia à Fratribus pro-
 curanda . 284. 117.
Bona temporalia sint com-
 munita fraternitati spiri-
 tuali . 186. 118.
Bona communia dispensan-
 tes non personas, sed per-
 sonatum indigentiam at-
 tendere debent . 187. 119.
Boni ad inuicem bene se ha-
 beat . 334. 148.

C

Cadens subleuatur si so-
 cios sanctæ vitæ viros
 habeat . 18. 13.
Cantus in Ecclesiā varios p-
 ducit effectus . 77. 47.
Charitas præcipue spectat ad
 Prædicatorem . 9. 8.

Circon-

T A B V L A

Circonstantias graues tres
habet cupiditas proprie-
tatis. 22. 17.

Cœnobitarum vita excellen-
tior illa Anachoritarum.
14. 11.

Codices certa hora singulis
diebus petendi. 5. 4.

Cogitationes varix emer-
gentes inter orādū 75. 46.

Cognitio certa quomodo ha-
beri possit circa regulā, &
quando intendat astringe-
re sub præcepto, quando
non. 13. 10.

Comedere, vel iacere an li-
ceat in Oratorio. 68. 40.

Comedentes extra horā præ-
dij, quā in maximè errent.
92. 57.

Comedendum comedenti-
bus alijs rationabilib⁹ de
causis. ibidem.

Communitati quinque ascri-
buntur. 18. 13.

Cōmunitas Ecclesiæ an fue-
rit ex voto. 30. 21.

Communitas an fuerit apud
fideles in Ecclesia primi-
tiua. 31. 21.

Communicare quis nolens
res suas an peccet. 32. 23.

Completorium omittendū
non est multis de causis.
64. 38.

Complacencia habita de pec-

cato via ad recidiuādū,
quæ recidiuatio aufert fru-
ctum totius purgationis
præteritæ & multa alia
mala gignit, quæ hic enar-
rantur cum remedijs adhi-
bitis de non recidiuando.
409. 192.

Concordiam sex conturbare
solent. 55. 35.

Concordiæ fructus triplex.
ibidem.

Conuentum monaci subter-
fugientes, quot mala in-
currunt. 111. 66.

Concupiscentia multa mala
parit. 183. 85.

Considerāti se qualis sit, duo
occurrunt. 406. 190.

Conuitium quomodo suma-
tur. 331. 146.

Conuentus magnæ sunt spi-
rituales prærogatiue, dam-
na etiam maxima emer-
gunt fugientibus, aut de-
prauata in illum volunta-
te ingrediētib⁹. 114. 66.

Conuersatio muliebris, &
aliorum quorundam, fu-
gienda. 144. 74.

Conuersatio exterior sit mo-
ribus correctā. 158. 77.

Cor debemus habere ad Cœ-
lum eleuatum. 43. 28.

Correctionis ostensio facta
Prælato triplicem habet
Dd 2 annexam

- annexam utilitatem, & illi facienda ante testium productionem, cautequē procedendum ne infamia testij incuratur, quod magnum facinus. 230 97.
- Correctio quando non fiat a Prælato, quibus assimilatur, & errantiū culpæ euri in ipsum retorqueantur. 371. 171.
- Correctio fratetna an faciendade venialibus. 194 89.
- Correctio quomodo habenda in delinquirente 191 88.
- Correctioni tenetur frater, cum magna inter illos vigeat fraternitas. 196 89.
- Correctionis faciendę modus. 198. 89.
- Correctione desperata proclamati an liceat procedere ad correctionem per testes. 237. 98.
- Culpas committentes, & poenitentiam renuentes habentur incorrigibiles. 240 99.
- Culpa si erit manifesta, aut occulta, quomodo procedendum in correctione. 203. 90.
- Criminosi an proclamari possint sine testibus 234. 98.
- Crimen quod probare possit credit proclamans, an deficiens in probatione sit puniendus. 235 98.
- Crimine denunciato a proclamante probare parato, an possit iudex inquirere reum ante testium productionem, quodd respõdeat. 235 98.
- Criminis patrati subditus accusatus an teneatur coram Prælato dicere veritatem. 237. 98.
- Crimen cur quattuor modis accipitur, & quate criminolum dicitur velle appeti, & appeteremulieres. 171 81.
- Culpa fratris nõ indicanda, nisi ad hoc ut sanetur. 214 91.
- Culpam fratris an liceat proclamare coram Prælato, vel Cap. vel alibi. 201. 90.
- Culpæ subditorum transeunt in Prælatum correctioni indulgentem. 358. 164.
- Culpa non modica munus accipere. 256. 103.
- Culpa quomodo convincenda. 216 93.
- Curam debent habere Monasterii Præpositi, ut fratrum necessitati provideant. 37. 25.
- Cura debita in religione servanda, cui assignatur, ut multa

T A B V L A

multę euitentur transgres-
siones. 358. 164.
Curie delicie obnubilant
veritatem. 117. 66.
Custodia cuius rei habenda,
vt Deo placeamus, 374. 172.
Custodes destinata a Deo,
ne ruat. 192. 88.

D

Dare secundum indigen-
tiam laudabilius est.
27. 19.
Debiles mitius tractandi.
107. 85.
Diabolo arguta sententia da-
tur a B. Martino. 47. 30.
Dilectio inter fratres mutua
spiritualis sit, non carna-
lis. 347. 157 & 158.
Dilectiones in proximum
sunt variae, & ad varium
finem tendunt, quarum
vna pessima, & sex utilita-
tes dilectionis. 349. 159.
Delicta non iterata, non ta-
men correcta quomodo
emendanda, & cum nō ad
sint exploratores, vel ne
queant, quomodo proce-
dendū in accusatione, qui
busue in casibus non tene-
antur, & quādo testes pro-
curandi. 216. 94.

Delictum magis in maiori-
bus corrigendum, qui sunt
minorum exemplar. 259. 105.
Discordia irreuerentiae est
origo. 57. 36.
Disciplina tripliciter acci-
pitur. 383. 171.
Discordes ad remittendam
iniuriam quā mali sint.
333. 147.
Disciplina seruanda in in-
cessu, statu, & habitu.
139. 73.
Disciplina morum in actio-
nib⁹ extrinsecis maxime
requirenda in homine re-
ligioso. 158. 77.
Delinquens post admonitio-
nē quomodo iudicandus.
204. 90.
Dispensatio an fieri possit a
praelato cum subdito de
proprio retinendo, an pos-
sit etiam circa vsum rei.
23. 18.
Dispensatio cum cautione,
& maturitate facienda. 23. 18.
Dispensatione facta alicui
circa vsum rei sine causa
animum habēti incertum
resignandi, quotiescunq;
fuerit requisitus, nunquid
talī a vitio proprietatis
excusetur. 27. 19.

Dispu-

T A B V L A

Disputatio triplex 321. 139.
 Disputationi scholasticæ quæ
 nam incurrant reprehensibilia. 322. 139.
 Distributio intelligitur de
 victu & vestitu, alijsque
 necessarijs. 27. 19
 Distributio pecuniæ facta,
 ut sibi provideant, repro-
 batur. 27. 19
 Diuites superbiendi animum
 habent. 45. 29.
 Diuitiæ spirituales, & cor-
 porales, ut differant.
 118. 67.
 Dolor est habendus de regu-
 læ transgressione. 408. 191.
 Doctores sunt reprehensibi-
 les circa multa. 320. 138.
 Durities verborum, operum,
 & cordis duplex, una in
 Deum, altera in proximum.
 339. 151.
 Dubitatio magna oritur in
 peccatis fratrum conuin-
 cendis, quod rationibus
 probatur. 233. 98.

E

Ecclésiæ status quare in-
 uentus est. 30. 21.
 Elationi rerum domesticarum
 opposita remedia 54. 34.
 Eleemosynæ sunt de alieno,
 ideo pensandum est, quo-

modo consumantur. 29. 19
 Excommunicato an possit fieri
 distributio. 26. 17.
 Egens minus, & minus ha-
 bens melioris est condi-
 tionis. 122. 68.
 Exemplum de proprietario
 tumulato in sterquilinio.
 22. 17.
 Exemplum de non dissiden-
 te in senectute gratia Dei.
 32. 22.
 Exemplum de ingredientibus
 religionem, nec omni-
 nino abrenuntiantibus se-
 culo, sed quid proprii re-
 tinentibus. 25. 19.
 Exempla bona danda à reli-
 giosis viris, sed super om-
 nes à prælato, qui regere
 velit rationabilibus de
 causis. 368. 170.
 Excusant tria a peccato, quæ
 tamen non valent religio-
 sis. 252. 101.
 Exteriora quidam tantum-
 modo curant, & anima-
 rum defectum cernere non
 satagunt. 278. 115.

F

Facultates dispergentes,
 & illarum dispersione glo-
 riantes octo bona spiritua-
 lia amittunt. 52. 33.

Fama

T A B V L A

Fama bona quare dicatur odor. 398. 185.

Famam multi negligunt, & multi errant circa eam. 399. 186.

Fama bona multis de causis a viris appetenda. 400. 186.

Fama restitui non potest cū ablata, ideo graviter peccant infamiae nota quempiam inurentes. 230. 97.

Fiducia de egestate non sustinenda tribus fulcitur. 29. 10.

Fœminas quidam quòd alloquantur, excusationem fulciunt tribus rationibus, cōtra quos obijcitur quatuor modis. 207. 91.

Fortis fit frater cū fratribus in vita religiosa 15. 11.

Fratribus nimis ieiunantibus, recreationes fugientibus, siue medicinas non est acquiescendum. 294. 123.

Fratres quidam religionem ingredientes adhuc amant saeculares parentes, & illis acquisita dirigunt 31. 22.

Fratres partem, vel totum retinentes senectutis, vel infirmitatis causa. ibidem.

Fraternitas spiritualis requirit, ut res sint communes iure, natura, & utilitate 286. 118.

Fratres quidam communiant magis necessitate compulsi, quàm voluntate distante. 32. 22.

Fratri nomen quot modis intelligatur. 47. 30.

Fratres laici non debent vacare ab actionibus, quas conficere tenentur, extraordinarię orationis causa. 73. 45.

Fratres appetere non debent illud plus, quod quibusdam ægris, aut delicatis conceditur. 103. 63.

Fructus prædicationis consistit in confessionibus, & animarum consilijs. 6. 5.

Fructus emanans a vita communis verè magnus. 19. 15.

Fructus triplex a concordia emanans. 56. 35.

Fructus multus sequitur correctionem debite peractā 199. 89.

Fur dicitur ille, qui rem sibi collatam non propalat. 289. 120.

G

Gestus corporis, & cundo, & operando, & stādo quomodo corrigendi, ne reprehensibiles fiant. 148. 76.

Gloria-

Gloriabundi sunt quidam in religione, quòd sciant se nobiles. 48. 30.

Gratiæ quæ vertuntur in dissolutionem. 102. 62.

Gratiarum actiones Deo reddendæ de bonis operibus, nec faciendum est, vt quidam faciunt sibi arrogantes opera. 406. 190

Gratiæ spirituales sunt interior in anima habitus. 279. 115.

H

H Abitus in religioso notabilis est propter septem causas. 124. 69.

Habitus vt sit in corrigibilis, qui, & qualis erit. 147. 75.

Hæremita, Deo sibi reuelante horam mortis, accessit ad Cœnobium, vt securius e vita migraret. 14. 11.

Honestatis habitui duo traduntur mandata. 124. 69.

Honestas seruanda in ambulando, & bini incedere tenemur superiorum exemplo. 134. 72.

Honestas in re intrinseca, & rationi annexa appetenda. 139. 73.

Honores, abundantia, delicta, otium & similia ra-

dicatus tollenda. 35. 24.
Honor mutuus exhibendus in religione. 57. 36.

Honore sunt Prælati prosequendi, nam tria mala oriuntur ex irreuerentia erga Prælatum. 364. 167.

Horæ magis opportuna ad orandum, quæ sint 62. 37.

Hostis facilius impugnatur in societate. 57. 36.

Humilitas nō omnis est virtus. 343. 153.

Humilitas conducit cuiquē sed magis prædicatoribus. 55. 34.

I

I Acantia ne surrepat in corda fratrum, quòd sæcularia cōtempserint. 49. 31.

Iactura grauis ambitiosè dispersgentibus imminet. 54. 33.

In crepationes sanctorū contra Concubinos. 22. 17.

Ieiunium quomodo, & à quibus seruandum. 90. 56.

Indignatur Deus contra fratres in monasterio aliquid proprii retinentes. 32. 22.

Indignatur Deus contra Monachos a religione deuitantes. 111. 66.

Incorrigibilitas vitium est contra.

T A B V L A

contagiosum. 241. 99.
 Impudicitia magis viget in visu, quàm in alijs sensibus. 163. 78.
 Immunditia nulla maior impudicitia. 165. 78.
 Impatentia in prælato quæta pariat mala. 381. 176.
 Inflatio à D. Aug. quod significatum habeat. 46. 29.
 Infamia dupliciter infligitur, & quomodo procedendum in correctione. 234. 98.
 Infirmis pietate ministrandum. 94. 58.
 Infirmis si aliquid super addatur de victu, non ægre ferant fortiores, qui vero intelligantur infirmi ex pristina valetudine. 98. 60.
 Infirmi licet plus sumant non tamen feliciores putandi. 100. 61.
 Infirmi quattuor indigēt interdum. 292. 122.
 Infirmitas est occasio facillime murmurandi. 293. 123.
 Infirmis cura specialis exhibenda. 299. 126.
 Infirmitates multiplices malæ enumerantur, & quomodo se geret Prælatus ad illas sustinendas. 379. 175.
 Ingluies in quibusdā multorum damnorum parens. 52. 50.

Ingratitudo non referendi Deo quicquid boni habemus, & operamur tria mala parit. 406. 190.
 Inquieti qui sint, & quibus assimilentur, & causæ inquietudinis unde dimanent. 374. 172.
 Iniuria remittenda. 333. 147.
 Ira in odium conuersa duo mala parit. 329. 145.
 Irascentium quorundam natura ad ignoscendum diuersa. 1337. 150.
 Itinerantes non sua, sed Prælati electione socium habeant. 296. 124.
 Inuestiua contra secordes, & ignauos ad orationes. 63. 37.

L

L Abores a fratribus sunt resumendi, cum vires pristinas reparauerint. 110. 66.
 Laus vitæ communis. 18. 14.
 Læctionum audiendarum fratres quidā tepidi. 318. 137.
 Legis plenitudo est in dilectione Dei, & proximi. 9. 8.
 Libri Ecclesiastici debent esse legibiles, & correcti. 78. 48.

E c Libri

T A B V L A

Libri stata hora sunt distri-
buenti, 304. 128.
Librorum custodia diligens
habenda, ne consumentur. 307. 13.
Libri religiosorum non pretiosi, sed emendati, non multi sint, non nimia in illis habeatur cōfidentia. 317. 136.
Licentia eundi solitarie an haberi possit, 296 124.
Lingua bona, & mala parit. 340. 151.
Lingua quando tacens, & quando loquens peccat, quibusue oblit, 222. 95.
Lites cauendæ propter multa inconuenientia, quæ oriri possunt. 328. 144.
Lis orta, nec cito extincta, ut ignis augetur. 329. 145
Lingua grauitèr fauciat, 331. 146.
Loca quæcunq; lustranda à Prædicatore, tam diuitū, quam pauperum. 6. 5.
Loca quædam sunt laudabilia, quædam reprehensibilia illic uiris religiosi commorantibus. 145. 74.
Ludus Bonatèl qui. 182. 84.

M

Mala tria emanant ab irreuerentia in Præla-

tum, 365, 167.
Mala tria redundant in delinquentium perniciem, quæ mala alia tria pariunt in detrimentum vniuersitatis. 372. 171.
Mala multa accidunt subditis, cum Prælati non vtuntur verbis consolatorijs. 375. 173.
Malum non patratum propter tria retrahentia. 232. 98.
Mala tria insequuntur, cum quis mala intentione accusatur a fratribus 213. 92.
Male dictum quid. 331. 146.
Mandata nō imponenda circa illa, quæ commodè seruari nō possunt. 272. 112.
Mandata Dei semper memorie repetenda, ut mala vitentur. 403, 188.
Mandata duo de dilectione cur non imposita mulieribus, 10. 9.
Mandatum de cordis unitate quomodo seruandum. 18. 12.
Mandatum de cordis attentione in hymnis an obliget, 74. 46.
Medicinalia fratribus danda propter tria. 293. 123.
Medicinalia religiosi quidā sanctitatis seruire spernentes,

T A B V L A

nentes. ibidem.
Medicinalia qui spernant,
 qui appetant, qui cogantur
 accipere. 294. 123.
Memoria mandatorum le-
 ctione renouata valet ad
 obseruantia. 402. 187.
Mensa condienda est cibus
 animæ, & corporis, idest
 ferculis, & lectione, plu-
 ribus adductis rationi-
 bus. 96. 59.
Misericordia habenda de il-
 lis, qui in sæculo splen-
 didè epulantes fuerunt de-
 licati, nec debent cæteri
 ægrè ferre. 101. 62.
Misericordia circa tria fieri
 solet. ibidem.
Monachus a Conuentu sepa-
 ratus, vt carbo extinctus,
 & multa mala incurrit il-
 lū subterfugiens. 110. 66.
Monachus quomodo se ge-
 rere debeat omni tempo-
 re, loco, & statu in actioni-
 bus, & conuersando.
 150. 76.
Monasterij communia dili-
 gēter custodiēda. 262. 108
Monasteria non ingredien-
 da, vt quærantur necessa-
 ria. 36. 24.
Monasteria quibusdam non
 sunt ad salutem. 39. 27.
Monasteria tribus de causis

non conferunt ad salutem
 44. 29.
Mores circa exteriora maxi-
 mè decent virum religio-
 sum. 157. 77.
Moribus placeat Deo Mona-
 chus non habitu. 131. 71.
Mulierum conuersatio fugi-
 enda. 144. 74.
Mulieres quædam bonos vi-
 ros appetentes, magis quā
 alix. 178. 81.
Mulierum familiaritas vitā
 da, quia multi naufragan-
 tur. 204. 91.
Mulierum familiaritatē quæ-
 rentes, quibus comparen-
 tur. 210. 91.
Munditia spiritualis Deo
 placet, æquè & carnalis.
 290. 111.
Manuscula vitanda, quia ma-
 la pariunt in anima.
 258. 103.
Murmurare haud decet, si de-
 terius vno tempore quis
 accipiat, quā alio.
 277. 114.
Murmur quā magnū ma-
 lum sit. 276. 114.
Murmur, & contentiones in
 quo differant. 275. 114.
Mutuandi libri, mala cauē-
 da, & bona insectanda.
 34. 23.

N

Natura non est adeo enervata, quin abstinere queat. 90 55.

Necessaria ad salutem debet callere prædicator 9 8.

Necessaria an querere possit Frater in Monasterio, qui fuit pauper in sæculo.

34. 24

Necessaria ministranda sine mora. 325. 141.

Necessitati fratrum paterna charitate succurrendum. 37. 25.

Necessitati fratrum sine personarum acceptione subveniendum. 287. 119

Negligentia cauenda circa regulæ obseruandæ mandata, cuius negligentia tria sunt occasio efficax. 402. 187.

Negligentiam in prouidentis vestibis religiosi multa mala insequuntur.

265. 109.

Nunciij impudicitia animi oculi sunt. 282. 84.

O

Obedientia exhibenda est in religione quibusdā

prælati maior, quibusdā minor. 352. 160.

Obedientia multiplex.

354 161.

Obedientia quibus in casibus præstari non debeat.

354 162.

Obedientia inter omnes virtutes religioni necessarias præcipua est. 355 163.

Obiectio criminis quomodo sumatur. 331. 146.

Obseruantia regulæ quomodo interpretanda, nam multi multa sentiunt. 11. 10.

Obseruantia regulares quasi sepes, ideo magnum facinus patiant religiosi illas transilientes. 394. 182.

Obseruanda an sint hæc præcepta extra Monasterium, cum dicat, (obseruetis in Monasterio constituti.) 15. 19.

Occupationes ordinariæ religionis non dimittendæ orationis causa. 71. 43.

Oculus impudicus qui dicatur. 181. 84.

Oculos quis figit in aliam tripliciter. 167. 79.

Oculorum iclus quomodo regendi; ne impudicitia labe inficiamur; nam illorum visu cupiditas iustam naturam ad mala, & multa generant.

T A B V L A

- generantur in animo, quæ Deū offendunt, ideo corrigendi, cum etiā sint velociores cæteris sensibus non habentibus obiecta ita prompta. 161. 78.
- Offendens an statim teneatur reconciliari, antequā ad offerendum accedat ali quid Domino in altari. 332. 146.
- Offensor anteneatur mentiri de dicto satisfactionis gratia. ibidem.
- Offensæ remittendæ mora nulla difficultate produci debet. 333. 147.
- Officiales constituendi circa seruitium fraternarum necessitatum. 301. 127.
- Opera pœnitentiæ ad tria re ducuntur. 60. 37.
- Opera bona non requirunt magnā scientiā. 316. 135.
- Opus hoc cur regula inseri batur. 7. 7.
- Oratio à tribus impeditur. 335. 148.
- Orantes quæ seruare tenean tur. 335. 149.
- Oratio in rebus subeundis semper est præmittenda. 392. 182.
- Orationi tria competunt, vt sit perfecta. 60. 37.
- Orationes assiduæ, & secretæ multū laudabiles. 69. 41.
- Orationes publicæ, & priuætē in quo differant, & men tales quā Deo acceptæ sint. 69. 41.
- Orationes sunt exercitia spi ritualia erigentiā animū in Deum. 68. 40.
- Orationes magis conueniūt in loco sacro. 71. 42.
- Oratio extraordinaria facilius fermentatur. 71. 43.
- Oratio requirit cordis atten tionem. 76. 45.
- Orationi conuenit locus de putatus. 67. 39.
- Oratorij significatio. 67. 39.
- Ordo vt a religiosis obseruetur, ad hoc multa valent. 393. 182.
- Ordinem adamussim nō obseruantes quibus assimilentur, & quā multa hinc mala oriantur. 395. 183.
- Ordo prædicatorum debet vigilantius in litterarum studio operam nauare. 309. 132.
- Otium, nimiam curam de medicinalibus, desiderium famæ appetere non conuenit. 35. 24.

P

Parcitas reddit hominem
famosum, 28. 19.

Patientia tribus de causis a-
mittitur, quæ si in præla-
to emergant, maximum
incurrit periculum in re-
gendo, 369. 176.

Pauperibus detestabilior de-
bet esse superbia, 45. 29.

Paupertas magis competit
prædicatoribus, 5. 5.

Peccant fratres diuersimodè
scripta non mutuantes.
33. 23.

Peccatorum tria sunt genera
de medio tollenda, 21. 17.

Peccatorum remissio vt obti-
neatur, multa valent.
411. 193.

Peccatores quidā persequun-
tur fingentes persequi pec-
cata, 254. 102.

Peccata fratrum diligenter
indaganda, & corrigenda,
qui cū rebus pretiosis cō-
parentur, debent esse mun-
di, 250. 101.

Peccatores differt Deus pu-
nire multis de causis.
188. 87.

Peccatum est tanquam vul-
nus quandoq; putrescens.
226. 96.

Peccatum fratris redundat
in damnum commune.
197. 89.

Pœnitentiæ opera ad tria re-
ducuntur, 60. 37.

Pœnitentia agenda de non
obseruatis in regula.
408. 191.

Prædicatio magis competit
religioso multis rationi-
bus, 3. 3.

Præcepto an alligentur om-
nia contenta in regula.
10. 10.

Præcipio quare verbum po-
suit, si præcipere non in-
tendebat? 12. 10.

Prædicator debet abstinentiā
seruare, 80. 49.

Prædicatorum interest in cō-
uiujs illis, vbi lectio desi-
deratur, aliqua dicere æ-
dificatoria in fine exēplo
Christi, & aliorū, 97. 59.

Parcitatem sectantes ditio-
res sunt, 118. 67.

Parcitate quæ merita acqui-
rantur, 121. 67.

Peccata odio habēda, vt res
nocuiua, & malus nuntius.
254. 102.

Pœna triplici puniendus est
fur, 289. 120.

Placendi voluntas homini-
bus quomodo sit bona, &
mala, 131. 71.

Philo-

T A B V L A

Philosophiæ studium quib⁹
concedendum. & quā ma
gnē sit vtilitatis 311. 133.
Peruersitates tres maximē de
restatat Deus. 104. 63.
Presbyter, & Præpositus quo
modo intelligatur. 239. 99
Prælati matres vocantur, vt
mites sint. 106. 65.
Prædicator studere debet, vt
placeat. 132. 71.
Prædicatores decet habitus
vilis. 126. 70.
Prædicatoris insignia, vt do
ceat verbis, & factis.
129. 70.
Prædicatorum Ordini perso
næ minus sufficientes non
ascribendæ, hoc vero ob
seruandū plus, & minus,
loco, & tempore 323. 140
Prælati quomodo se gerat
circa subditorum repre
hensionem. 359. 164.
Prælati cur interdum immi
tes circa recreationes.
106. 65.
Prælati fugiēda partialitas
in recreatione danda.
108. 65.
Prælati honorandi tanquā
Patres. 18. 36.
Prælati verba duriora inter
dum habeant in reprehen
dendo. 342. 152.
Prælati tamen excedente

netur se humiliare; sed
benè perpendat quibus,
ne pei⁹ cōtingat. 344. 153
Prælati pondus examinan
dum est quā graue, &
cauēdum, ne aliqua ambi
tionis nota suscipiatur.
361. 165.
Prælati appetitur propter
tria. 362. 165.
Prælati solum in maiores in
uehētes quibus assimilen
tur. 258. 104.
Prælati debet se vocare ser
uorum seruum. 362. 166.
Prælati honorandus, alio
quin tria oriuntur mala.
364. 167.
Prælati quinque obseruare
tenetur. 367. 169.
Prælati tenetur esse exem
plaris ad bonum super om
nes. 368. 170.
Prælati non corrigentes qui
bus assimilentur, & quæ
mala correctionis negli
gentia sequatur. 371. 171.
Prælati debent erga subditos
vti verbis consolatorijs.
375. 173.
Prælati quomodo se geret
ad sustinendas varias sub
ditorum infirmitates, quæ
hic annotantur. 379. 175.
Prælati molles qui, & quibus
assimilentur. 386. 178.
Prælati

Prælati debet amari, & timeri, sed melius quod timeatur. 388. 179.

Prælati debet magis efficere, ut ametur. 389. 180.

Prælati memorie teneat, quod de subditis redditurus est Deo rationem. 391. 181.

Præpositi nomen quomodo interpretandum, 27. 19.

Proprietatis obtinendæ cupiditas inimicum parit amicum, & alia mala efficit. 19. 15.

Proprietatis occasionem tria præbent. 20. 16.

Prospera timent sancti magis, quam aduersa. 40. 27.

Provisio sit communis multis de causis. 37. 25.

Pulchritudo spiritualis reddit hominem similem Deo, ideo animus ad illam est intendendus. 397. 184.

Puillanimitas quæ sit, & quæ mala in cordibus pariat, 377. 174.

R

Recidivatem qui noscat, & qui non noscat. quomodo se gerent. 215. 92.

Recreatio concedenda cõualescentibus. 104. 64.

Recidivatio quanta pariat mala, & quæ valeant ad illam præcauendam. 409. 192.

Regimini sit annexa auctoritas, quæ multis de causis debilitatur. 344. 154.

Regulæ religiosè viuendi varietas a varijs tradita. 2. 2.

Regula D. Augustini magis cõperit prædicatoribus. 54.

Regula D. Aug. nõ est liber inscriptus speculum. 76.

Regulæ Etimologia. 77.

Regula non habet præceptum quoties verbum illud precipimus non inferat veritatem præcepti, sed solum voluntatis intentionem. 13. 10.

Regula frequenter est a viro religioso legenda. 404. 189.

Religiones cum oriri cœperunt, religiosorum duo genera fuerunt. 2. 2.

Religionis ingressus ab aliquibus sit tribus de causis. 44. 29.

Religio tribus vocatur nominibus à D. Aug. ad cõnuenda religionis vota. 49. 31.

Religiosi impotentes, & pigri ad communia, fortes ad propria multum distat à religione. 283. 117.

Religiosis magis competunt orationes. 60. 37.

Religiosi

T A B V L A

Religiosi viri sunt templum Dei, & vasa templi, ideo debent esse moribus bene disciplinati, & exteriori habitu nitidi. 158. 77.

Religionem quidam negligunt propter inordinatū amorē ad studiū. 113. 134.

Religiosi Ordinem non seruantes quibus assimilentur. 393. 182.

Religio est via ad Paradisū, vnde, illam transgredientes sunt causa, quod ceteri non proficiunt. 395. 182.

Religiosi non sint quæruosi in Monasterio. 36. 24.

Religio quibus comparetur 248. 100.

Remedium contra tria mala patientia in cordibus nostris proprietatis appetitum. 10. 16.

Remedia contra elationem a rerum domesticarum erogatione obortam. 54. 34.

Remittere debemus proximo. 333. 147.

Res collata cœlatur tribus modis. 288. 120.

S

Salutis remedia debet scire prædicator. 9. 8.

Sanctificatio acquiritur bo-

norum virorum societate 15. 11.

Sapientia rerum cœlestium comparatur fonti de cœlo tanquā per librorum canales venienti. 305. 129.

Satisfactio curandum malum in proximum patratum. 331. 146.

Satisfactio de offensa triplex esse potest. 331. 146.

Scandala caueāt inferre maiores. 206. 91.

Scientia quæ mala pariat. 314. 134.

Scriptura sacra a religiosis sectanda, vt in illa se potissimum aspiciant, tanquā in speculo, quæ valet ad multa bona acquirenda, 308. 131.

Sententia a viro prolata, quæ sit maioris auctoritatis. 2. 2.

Sentētia illa regulæ quomodo intelligenda (ne fortē possit secretius correctus non innotescere &c.) nā videtur implicare contradictionem. 229. 97.

Sensus hominis quidam patientes ab obiecto velit, nolit, quidam vero non, & quæ membra repugnēt spiritui. 257. 103.

Seruitus mutua fit inter fratres

tres sine murmure.
302. 127.
Seruis Dei non deerunt in
futuro facultates, si legi-
timè ministrauerit. 29. 20
Signa seruorum Dei, quæ
sint. 295. 123.
Societas in religione quanta
bona conferat. 15. 11.
Societas diuitum, & magna-
torum a fratribus habeat-
ur non ad extollentiam,
sed ad bonum. 42. 28.
Societas Sæcta requirit, vt om-
nes tam nobiles, quàm
ignobiles sint vnū in Chri-
sto. 47. 30.
Speculum Augustini conti-
net mandata Dei, & spe-
ctat ad oēs, ideo errât, qui
regulâ opinantur esse. 7. 6
Status oppositus vagandi vo-
luntati, quando est otio-
sus, tunc reprehensibilis
est multis d. causis. 143 74
Status in religione diuersa
enumerat accidentia D.
Aug. in sua regula. 3. 2.
Studentium varij defectus.
318. 137.
Studendi auiditate quidam
adeo illecti, vt religionē
negligant. 313. 134.
Superbiam caueat Prælatus,
si vult amari a subditis.
390. 180.

Superbia omnino fugienda
a viro sancto. 113. 66.
Superbia abigenda a fratri-
bus de monasterio, vt ma-
lorū omniū radix. 36. 27.
Superbia quæ mala dima-
nent. 44. 29.
Superbia vtitur Dæmon, vt
spirituale destruat ædifi-
cium. 49. 31.
Superbia duplex. 49. 31.
Superbia etiam a bonis ope-
ribus oritur, vt illa demo-
liatur. 50 32.
Subditi in quibus non tene-
tur obedire Prælati.
354. 162.
Superfluitas viris religiosi
non licet. 326 142.

T

Tempora antelucana, &
vespertina orationi op-
portuna. 66. 38.
Temporalia bona spernenda
a Prædicatore. 65.
Tentationes a diabolo serui
Dei patiuntur. sed vt fa-
ciunt cum tentatione pro-
uentum. 413. 194.
Tentationes vt vincere va-
leas, vide remedia.
414. 194.
Terrena omnia vana sunt:
43. 28.

Timorem

T A B V L A

Timorem habeat Prælatus ,
dum regiminis tenet ha-
benas, ne cespitet, nam
Duce ruente, totus disper-
gitur exercitus. 366. 168.
Timeri debet Prælatus a sub-
ditis, & tria sunt, quæ va-
lent, ut timeatur. 388. 179
Timor retrahens a procla-
mationibus faciendis tri-
plex est, qui causatur etiã
interdum a Diaboli calli-
ditate, & simplicitate non
corrigentis. 222. 95.
Transgressiones cur quãdoq;
non corrigant Prælati.
359. 164.

V

Veniã petendã a domino
quinam sint casus.
346. 156.
Veniam petet Prælatus a Do-
minõ subditos plus iusto
corripuens. 345. 155.
Verba sunt diuina habentia
solum intentionẽ de præ-
cepto. 12. 10.
Vide ibidem quæ sint verba
hẽntia præceptum in in-
tentione, quæ modũ præ-
cepti, & nõ intentionem.
ibidem.
Veritas vt antidotum contra
virus. 312. 133.

Vestibus Deo placere nemo
potest. 131. 71.
Vestis religiosi quæ, & qua-
lis debet esse. 147. 75.
Vester recipientes debent re-
ponere in loco communi.
287. 118.
Vestes lauandæ à fratribus,
& hoc tribus de causis.
291. 121.
Vestium custodia habenda.
326. 143.
Vini nimius potus fugiẽdus
multis emergẽtibus dam-
nis. 87. 53.
Vinum sæuissime imperit de
corem hominis religiosi.
88. 54.
Virtutes Sathanæ tres.
404. 188.
Vindicta quandoq; largẽ, &
strictẽ sumpta. 239. 99.
Vestium custodes quando de
uiẽt in religione. 261. 107
Vestium prouisio diuersimo
dẽ facta a quibusdam reli-
gionibus, quæ tamen im-
probatur à nostro ordine.
267. 110.
Victus communitas magis
seruanda, quàm vestitus.
269. 111.
Venerex cogitationes tribus
prosteruntur. 172. 81.
Videntes alios, & ipsi à nemi-
ne videri opinantes. qui-
bus

T A B V L A

bus assimilentur. 185. 86.
 Videntis circumstantiæ quin
 quæ nos a malo retrahen-
 tes, quas omnes circum-
 stantias Deus habet nos
 ubique videns. 189. 87.
 Videri qui non putant in ma-
 lo, superna deprehendun-
 tur providentia aliorum ti-
 more, & bono communi.
 186. 86.
 Vitam excellentiorum Præ-
 dicatorum tenetur imita-
 ri Prædicatores, 6. 5.
 Vitam degunt distortam D.
 Aug. regulam spernentes.
 8. 7.
 Vita conuentualis sex habet
 prerogativas, 113. 66.

Vitium tribus de causis cor-
 rigendum. 374. 172.
 Vitia quæ dedecent potissi-
 mū famulū Dei. 115. 66.
 Vitiōrum septem capitaliū
 peculiare officium, vt de-
 struant homines religio-
 sos. 51. 32.
 Voluntas hominibus placen-
 di quomodo bona, & ma-
 la. 131. 71.
 Voluptas vbi cauenda, ne te-
 neat nos vegetatos ad ma-
 lum. 117. 66.
 Vnitatem inter fratres quæ
 conturbent. 15. 12.
 Vnitas mūdāna vnitatem in
 Deo habendam destruit
 corde, & opere. 17. 12.

LAVS DEO.

C O M I, Apud Hieronymum Frouam.

Superiorum Mandato. 1602.

EPISTOLA
B. HUMBERTI. V.
MAGISTRI ORDINIS
F. PRÆDICATORVM;

Quam scripsit de tribus votis substantialibus
Religionis, & quibusdam virtutibus,
& per totum ordinem ad prouin-
cias singulas eam misit.

EXORDIUM EPISTOLAE.
Cap. 1.

ILIIIS Gratia coheredibus gloriae Fra-
tribus carissimis, religiosis vniuersis vi-
tam Deo gratam, sibi fructuosam, angé-
lis iocundam, dæmonibus terribilem,
hominibus exemplarem ducentibus salus. Nulla
sunt omnino reputanda dilectissimi, quæ diuinæ
laudi non militant, & honori. Inde est, quod offi-
cij necessitate, ac fraterna charitate compellimur
vestris auribus nunc scribendo, nunc monendo sæ-
pius inculcare, quæ vos bona facere, & mala do-
ceant; declinare. Sed cum pateat, quod secundum affe-
ctiuam, & intellectiuam vires geminas, sit & ani-
mæ perfectio bipartita: virtus videlicet, & scientia;
debet his nimirum virum euangelicum adornari;
ut per primum in bonum, & per reliquum diriga-
tur in verum, per primum ardeat, per secundum la-

ceat, per primum potens sit in opere, per reliquum in sermone illius exemplo, qui capit facere, & docere. Deniq; præsentem epistolam dignum duximus charitati vestræ trāsmittere, quæ vos moueat, & doceat ad regularis obseruantiam disciplinæ. Igitur ab obedientia, quæ est vnum de substantiis libus religiosorum votis, nostrum principium inchoamus ad laudem, & gloriam illius, qui origo est omnium bonorum, atq; finis.

EXHORTATIO AD OBEDIENTIAM. Cap. 11.

Diligenti studio, fratres carissimi, satagamus virtutum officijs insistere, quibus Christo conformemur, & ad perfectionis semitam informemur, atq; per gloriam reformemur. Et quis ambigat obedientiam talem esse? Hanc etenim Saluator noster intantum amplectitur, quod vsq; ad mortem Patri obediens factus, crucis supplicio condemnatur. Per hanc multarum gentium pater Abraham terram, & cognationem suam egreditur, & vsq; ad immolationem filij, quem habuit carissimum, inclinatur. Per hanc Iosue terram promissionis inuasit, & hostes gladio strauit. Monemus igitur, & hortamur in domino, vt obedientiæ bonum eò seruemus sollicitius, quantò sine illo regularibus non est salus. Scientes certissimè, quod est accepta multum apud omnipotentem Deum obedientia, qua pro Christo nobilissimum, quod est in anima, captiuatur, libertas videlicet voluntatis. Quare dignum est, & iustum, vt quantò quis arctius per obedientiam nunc astringitur, tantò postmodum in cœlestibus glorio-
sius eleuetur. Hoc ipsum certè exemplum nobis in-
nuit,

nuit, vbi frater, cui quatuor ordines ostensi sunt, cum, qui seruauit obedientiam, summum vidit.

¶ DETESTATIO INOBEDIENTIÆ.

Cap. III.

Sed in contrarium valde detestabilis agnoscitur esse inobedientia. Nam idolatriæ sceleri comparatur, per hanc vel spirituale furtum committitur, vel rapina. Nam si occultè contrariamur obedientiæ, furtum est; si manifestè, rapina, quia in vtrâq; rem alienam inuito Domino contractamus. Voluntatem enim, quam pro Christo relinquimus, contra iustitiam vsurpamus. Non igitur immerito pater noster Adam immortalitate, & innocentia spoliatur propter inobedientiam; ac de Paradisi amenitate eiectus in vallem miseriæ relegatur, per quod criminis huius enormitas declaratur.

¶ DE HIS, QUI VITIANT OBE- dientiam. Cap. IIII.

Sicut sunt multa, quæ reddunt obedientiam commendabilem, sic sunt plurima, quæ ipsam faciunt vitiosam. Sunt enim nonnulli, qui vt citius ab soluantur, malè exequuntur iniuncta sibi officia. In alijs vero inuenitur extorta licentia. Alij licentiam accipere nō curant: Alij contra negatam licentiam, sibi id quod placet, facere non formidant. Alij iubenti prælato contradicunt, & tamen faciunt. Alij deuotam quidem obedientiam suscipiunt, sed executionem negligunt. Alij ne mandatum ad eos veniat, se abscondunt. Alij, quod peius est, tales se exhibent, vt prælatus nil eis audeat iniungere, aut

mandare. Alij dicunt se nescire, vel non posse, quòd mandatur, mendacium quodammodo coniungentes inobediētiæ, cum eos ignorantia, vel impotentia non impediat, sed voluntas. Quidam vero nolunt ea, quæ iniunguntur facere, timentes ne ab ipsis talia ex consuetudine requirantur. Alij perficiunt, sed cum murmure, vel non voluntariè, sed coactè. Alij perficiunt quidem obedientiam, sed tristè, vel etiam nimis tardè. Sunt & quidam, qui quod volunt, obtinent minis, vel precibus importunis. Et si quandoq; negatur eis licentia, domum commouent, & seipsos conturbant: hi omnes si benè aduerterent verè in suis conscientijs; de prædictis se grauiter accusarent. Sed heu sunt nonnulli, qui culicem colant, & camelum deglutiunt: quia statum hunc periculosum minimè recognoscunt. Tales si amatores puri cordis essent, non tam malum actum, quàm malū statū corrigere laborarent.

QUALIS DEBET ESSE OBEDIENTIA. Cap. V.

VT autem obedientia nostra omnipotenti Deo sit acceptabilis, studete habere promptam sine dilatione, deuotam sine dedignatione, voluntariā sine contradictione, simplicem sine discussione, ordinatam sine deuiatione, iocundam sine turbatione, strenuam sine pusillanimitate, vniuersalē sine exceptione, perseuerantem sine cessatione.

QUOD OBEDIENTIA DEBET esse prompta. Cap. VI.

Bonus itaq; frater adeo sit paratus, & non turbatus, vt inueniatur ad obedientiam semper prom-

promptus. Quapropter dilectissimi sitis sicut aurum ductile, & quasi virga flexibilis, quæ rectificatur ad libitum artificis, vel curuatur. Sitis, ut rotæ volubiles, quæ secundum impetum spiritus mouentur. Sitis, ut iumentum apud Deum, cuius dorso omnia indifferenter ponuntur. Certè sillaba in differens multum est grata versificatoribus: quia poni poterit in omni loco. Sic & promptus frater ad obedientiâ Deo gratus est, & hominibus: quia nihil respuit iniunctorum. Legistis charissimi, quia stellæ vocatæ dixerunt, adsumus. Per quod aperte datur intelligi, quàm coniuncta debeant esse vox iubentis, & operatio obsequentis. Talis ille bonus monachus extitit, qui vocatus, imperfecta littera dimissa, quam cœperat, statim venit. Sed quidam e contrario, velut quadrati lapides ad obedientiam vix mouentur, de quibus ait sapiens: Qui transfert lapides, affligetur in eis. Cum enim prælatus ponere quosdam ad obedientiæ bonum nititur: per contradictionem rebellium fatigatur. Ad obedientiæ autem promptitudinem animemini per exemplum. Nam cum imperamus manui, nulla dilatione differtur executio. Iniungitur nobis aliquid, & inobedientes erimus prælatis nostris? Pudor est, quòd interdum serui nostri conducti pro paruo pretio promptiores sunt ad peragendum grauiâ, quàm nos simus prælatis nostris pro gloria sempiterna.

QVOD OBEDIENTIA DEBEAT
esse deuota. Cap. VII.

SIt post hæc deuota obedientia nostra, fratres. Ea namq; deuotione suscipiendum est, quod iniungitur, ac si dominus præcepisset. Non enim ho-

mini, sed in homine Deo certissimè obedimus. Dubium namq; non est; quin Deo acceptum offeratis sacrificium: dum propter ipsum alienę vos subijcitis voluntati. Utinam fratres simus cum Christo per obedientiam crucifixi: ut sicut ille clavis membra habuit ligata: sic mandatis superiorum nostrorum membra nostra omnia sint captiuata, scientes certissimè quòd tãtò liberiores apud Deum erimus, quantò nunc pro illo deuotius nos arctamus. Deniquè virtus hæc non sine causa victimis antefertur; quia hic mactatur in holocaustum volũtas propria: sed ibi tantummodo caro aliena. In ieiunijs, & vigilijs, & orationibus possunt æquari nobis sæculares, quos in abdicatione proprię voluntatis, & obedientia præcedimus: eosdem iudicaturi cum Christo in extremo examine præcedemus. Vnde summopere cauendum est, ne in his duobus etiam in minimo claudicemus.

QVOD OBEDIENTIA DEBET
esse voluntaria. Cap. VIII.

Voluntaria quoq; sit obedientia, quæ non virga, vel calcari indigeat: sed moueatur sibilo dulciori. Multum est laudabilis obedientia, quæ præceptum seruat, laudabilior quæ consilijs, & admonitionibus obtemperat: sed omni laude dignissima, quæ præcipientis animo se conformat. Sed sunt nonnulli, qui potius a maioribus suis audire uolunt placita; quàm ut placeat facere audita, qui prælatum sibi, non se illi cupiunt obedire, uel audire. Isti non magistrum gentium dicentem: Domine quid me uis facere: sed cæcum, cui dixit Dominus, quid uis, ut faciam tibi, satagunt imitari. Pater
 ergo

ergo esse, fratres nostri, duplicem obedientiam: vnā quidem charitatis, & aliam necessitatis. Illa præceptum respicit, ista consilijs & admonitionibus acquiescit. Illa necessitate quadam arctatur, hæc charitatis amplitudine dilatur. Illa per coactionem est seruorum: hæc per libertatem spiritus est filiorum. Et istam utiquè tantò magis acceptam, quantò minus debitam esse constat.

¶ QVOD OBEDIENTIA DEBET
esse simplex. Cap. IX.

TAm simplex obedientia vestra sit fratres, vt iniuncta sine discussione facientes iudicetis de vestro, nec in minimo habere vos. Nam quisquis intentionem præcipientis iudicat, bellum intrinsecus sibi parat. Per hoc enim, quòd causas mandatorum, quas ignorat, discutit, in laberinthū erroneum se ponit. Certè per hoc obedientiæ bonū minus purum redditur: cum quis prælatum irrationabilia iubere præsumptionis oculo intuetur. Verumtamen & si prælatus interdum minus vtilia nostro iudicio videtur iubere: vos id ad inobedientiā non debet mouere. Nam & si ille errauerit in iubendo: nequaquam vos deuiabitis seniorum mandatum, nihil contra Deum, quid præcipiat, exequentes. Si enim ea, quæ per obedientiam facitis, non sunt interdum vtilia monasterijs: semper tamen vtilia erunt vobis. Quid enim profuit, quòd quidam patrum virgam aridam longo tempore iussus rigauit: nisi quòd in terra conualescens virtutem obedientiæ, & obedientis meritum demonstrauit. Obedientiæ fastigium in hoc est; vt quasi stultū se quis faciat in hoc mundo: nihil scilicet discernens, ni-

hil iudicans ex his, quæ fuerint imperata; sed omni simplicitate, & fide illud utile, illud sapiens esse iudicans, quod sibi lex Dei, vel examen superioris indixerit. Et verè si per hunc modum euacuati fuerimus spiritu proprio: replebimur non immeritò tunc diuino. Attendite, quòd in tantum omnis creatura suo obedit sine discussione creatori, vt illa faciat quicquid suæ placuerit maiestati. Per quod manifestè instruimur, vt simpliciter iussa facientes nequaquam superioribus nostris per inobedientiam reluctemur.

QVOD OBEDIENTIA DEBET
esse ordinata. Cap. X.

O Portet nihilominus obedientiam esse ordinatam, ne si ordo eius peruertitur, obedientiæ quoque opus per consequens deprauetur. Vnde considerandum est, quòd sicut ratio nostra debet esse subdita creatori: sic voluntas obediat rationi, atq; sensualitas voluntati. Nam quando recalcitrat voluntati sensualitas, vel rationi voluntas, vel creatori ratio, debitæ subiectionis in anima periit ordo. Et tunc Dei iudicio nobis ab inferiori nostro resistitur, cum a nobis nostris superioribus non paretur. Ordo quippe obedientiæ, considerata prælatorum differentia, tenendus est; vt maiores minoribus in huiusmodi præferamur; Duobus enim prælatis contraria præcipientibus, acquiescendum modis omnibus est maiori: Vnde cum Deus prælatis supremus sit; contemnenda sunt prorsus mandata hominum: quodcumquè præcipitur contra Deum. Oportet enim, ait Petrus, Deo magis, quàm hominibus obedire. Patet igitur, quòd nunquam
sunt

sunt mala propter obedientiam perpetranda: licet propter eandem interdum bona sint rationabiliter omittenda. Scimus etenim contemplatiuam vitam actiuam in multis præcellere. Et tamen cum ab illa subditus ad istam trahitur: quod propter mandatum negligit virtute obedientiæ, in meritorum cumulo compensatur.

QVOD OBEDIENTIA DEBET
esse iocunda. Cap. XI.

Post hæc sciendum est, quod nequaquam ex tristitia, aut necessitate fit, quod iniungitur faciendum. Iocunda etenim obedientia prælatum ipsum iubentem lætificat; obediētiæ onus alleuiat, securitatem quoq; conscientiæ præstat. Si quis autē mæstus obtemperat, cum Simone Cyrenæo in angaria crucem portat. Currus non vinctus sub onere murmurat. Et sic is, qui cum tristitia obedientiam exequitur, carere vñctione Spiritus sancti se declarat. At vero gaudens cum Andrea crucem suscipit, quisquis onus, quod imponitur, nec corde renuit, nec signo quolibet contradicit. Sunt autem quidā, qui ex desiderio faciunt etiam laboriosa, dummodo sint placita. Alij cū grauitate suscipiunt leuia: quia iussa. Istud fieri persuasionē diaboli certum est; vt hoc nobis graue faciat, in quo maius meritum esse constat; & aliud nobis offerre satagit gaudiosum, qđ saluti nostræ minus perspicit fructuosum.

QVOD OBEDIENTIA DEBET
esse strenua. Cap. XII.

Non tantum leuia, sed ardua propter obedientiam sunt agenda. Est enim obedientia pretiosa

tiosa, cum obtemperatur in placitis; non quia placita; sed quia iniuncta. Pretiosior vero super aurum, & topazion, cum obeditur in contrarijs, in quibus si sensualitas interdum remurmuret; erit tamen ratio semper prompta exemplo Christi, qui quamuis calicem passionis à se transferri peteret; voluntatem tamen suam patris subiecerat voluntati. In obedientia multum valet, fratres mei, ad merendi efficaciam difficultas operis cum promptitudine voluntatis. Quando per claustralem vitam religioni iungimur, mundo morimur, & actibus quodammodo sepelimur. Quare nostras per obedientiam voluntates continue mortificemus; ut illi, qui per obedientiam sanguinem suum fudit, semper viuere valeamus. Non igitur ad iussum senioris respondere præsumamus, non possumus, aut nescimus: cum patres nostros aggressos propter obedientiam bonum etiam importabilia secundum humanum iudicium cognoscamus. Vires enim Deus omnipotens administrabit corpori: ubi voluntas seruiens ad id, quod iniungitur, aderit menti. Vnde quidam sanctorum patrum mandato senioris obtemperans supra spem, virtute diuina non propria saxum mouit. Ex his colligere poteritis, quod obedientiam discretio est, ut sit aliququaliter indiscreta; ut ea pro bono quis aggrediatur obedientiam, quæ aliquando videntur secundum mundi sapientiam carere ratione. Hinc est, quod vir obediens loquetur victorias; quia voluntas, quæ se inclinat naturaliter ad prospera, per coactionem obedientiam, ut curuetur etiam in aduersis, necesse est.

QVOD OBEDIENTIA DEBET
esse vniuersalis. Cap. XIII.

NEC semel tantum debet quisquè, quòd iubetur, facere; sed semper in omnibus obedire. Sed dicunt in corde suo desides, & rebelles, videmus, quòd hi, qui ad obedientiam sunt difficiles, ab omnibus sunt liberi, & ab officijs sunt securi. Ipsis enim ubiq; defertur, & parcitur; cum alij, qui se ad omnia paratos exhibent, nunc officijs, nunc laboribus incessabiliter onerantur. Quis igitur posset, inquitunt, omnia, quæ iubentur custodire? Sanè si oculum cordis aperimus, apertè considerare possumus, quòd illis pro eo, quòd parcitur, condolendum est, & istis, quòd eis non parcitur, congaudendum est. Quod enim interdum parcitur rebellibus, suo vitio deputent, non virtuti. Fit namq; istud, ne peior scissura fiat; ne concutiatur calamus conquassatus. Sic Deus non præcipit dare libellum repudij; sed permisit. Exultent autem iusti, qui oneribus prægrauantur; quia dum multiplicantur super eos onera, multiplicatur & materia meritorum, & per consequens gaudium præmiorum. Otium insuper eis tollitur, peccatorum pœna minuitur, tentationis occasio remouetur. Sciendum autem, quòd licet omnes homines obedientia stringantur aliquali; hic tamen propter votum regulares sunt amplius obligati. Nam patri familias obediendum est in bonâ suæ domus ordinatione, regibus in Reipublicæ gubernatione, plebanis diuinorum præceptorum expositione, & sacramentorum administratione, prælatis ordinum in disciplinæ obseruatione, summo prælato Deo in declinatione vitiorum,

& custodia mandatorum. Vos igitur fratres ad obedientiam specialiter ligastis; nec quicquam excepistis. Exemplum psalmistæ sequimini dicentis: Ad omnia mandata tua dirigebar. A memoria quoq; vestra non decadat, quod qui in vno præcepto seniorum offendit, præcedentes obseruantias omnes perdit.

¶ *QVOD OBEDIENTIA DEBET
esse perseverans. Cap. XIV.*

Vestra deniq; obedientia sit perseverans. Cum enim professionem facitis, vsq; ad mortem vos obedituros in posterum obligatis. Quia igitur exitus, & non principium acta probat, felici iocunditate perpetuo coronandus vsq; in finem obedientiam non relinquens. Cui igitur placet, vt sibi veritas promissa soluat, ipse quoque, quod promissit, finaliter non omittat. Qui enim secundum Christi sententiam perseverauerit vsq; in finem, hic saluus erit certissimè.

¶ *DE ABDICATIONE PROPRIETATIS. Cap. XV.*

Ad aliam obseruationem regularem manum mittamus, vt qualiter sine proprio viuere debeamus, doceamur. Igitur ex primitiue Ecclesiæ perfectione discere poteritis: quod habere cuncta communia debeatis. Creaturæ id nobis indicant in communicando bonum, quod habent, & inuicem sese donant. Mutuo quoq; sibi seruiunt membra corporis, communitatem rerum indicantia per hoc nobis.

¶ *QVÆ*

¶ QVAEDAM MOVENTIA

*Ad abdicationem proprietatis.**Cap. XVI.*

Abdicationem rerum Christus nos de suo exemplo docuit. Beatus Dominicus nobis moriens hoc legauit. Scriptura quoq; sacra idem figuris multiplicibus demonstraui. Nam crucifigendus Christus vestibis suis spoliatur: per quod nobis, quàm nudos rerum omnium proprietate nos esse conueniat, declaratur. Ipse quoq; non habuit, sicut asserunt, vbi caput reclinaret. Sanctus etiam Dominicus legauit nobis migrans ad Deum humilitatem, charitatem, & voluntariam paupertatem. Idipsum exemplo suo tradidit idem pater, qui pauper erat pecunia, sed diues vita pura. Deniq; legitur, quòd mulieris amictæ Sole pedibus Luna supponitur, per quod esse calcanda nobis omnia mutabilia demonstratur.

¶ QVOD IPSA MVLTIPLICITER

vitiatur. Cap. XVII.

Sed heu sunt aliqua, quæ bonum paupertatis vitiant, nunc possidendi desiderijs, nunc verbis inordinatè prolatis, nunc etiam factis in virtutis huius præiudiciū demonstratis. Nonnulli sunt etiam, qui ad ea, quæ profitendo contempserant, appetitibus accensi anhelant, obliti quòd apud ponderatorem spirituum ipsa peruersa voluntas, priusquàm ad actum procedat, condemnetur. Econtra quidam patrum, quia rapere cucumerem concupiuit, in Sole acriter se affixit: vt vexatio talis intellectum

lectum sibi tribueret, ac si malum in se desiderium puniret. Hi vero, qui diuitias, quas foris habere non poterant, nunc affectant, si vero Christi discipuli essent, per angustam portam, quæ ducit ad vitam, exonerati ab omni impedimento intrare sollicitè laborarent. Inuenimus etiam interdum quosdam in quibusdam rebus adeo delectari, ut nec ad concedendum ea fratri petenti velint aliquatenus inclinari. Alij quaternos, vel res alias innituntur à fratrum conspectu abscondere, ne possint petentibus non negare, quibus contemnenda essent illa transitoria, & fraternæ charitati omnia postponenda. Pudet autem dicere, quòd non nunquam vilissimis rebus sic accenduntur: ut si quis vel digito ex his quicquam atrectare præsumpserit, tam indignatione cordis contra ipsum, quàm verborum insolentia moueantur. Inueniuntur & alij, qui sic dicunt: Nisi mihi detur hoc, vel illud habendi, vel recipiendi licentia, nequaquam domum de cætero in talibus promouebo. Sunt & alij, qui tales se exhibent, ut prælatus ex his, quæ habent, auferre non audeat, vel ut ad tempus concedant, iniungere non præsumat. Et si abstulerit quicquam taliū; turbationes in domo concitant, & tumultus. Sed quia per talem indignationem in prædictis rebus aliquale ius sibi vendicant, proprietarios quodammodo se demonstrant. Pro his nequaquam turbationem sibi assumerent; nisi res illas, pro quibus mouentur, ad se pertinere aliququaliter iudicarent. Sunt & nonnulli, qui denarios sine licentia nec accipiunt, nec expendunt; & tamen quia licentiam sibi denegari nulla ratione volunt, apud Deum excusabiles non existunt. Alij dum dare, vel accipere quoq; desiderant, insidiosè prælati sui absentiam;

expectant, vt a minore prælato licentiam obtinere valeant, quam negandam a maiore credunt probabiliter, aut formidant. Isti quidem apud homines forinsecus se excusare poterūt, sed apud Deum, cui omne cor patet, & omnis uoluntas loquitur, perfectionis semitam derelinquunt. Quidam etiam commestibilia, uel potabilia sibi missa, uel soli contentantur habere, uel illis, quibus placet, tantummodo distribuere, nec fratres alios secundum dispensationem eorum, quorum interest, participes uolunt esse. Sunt & alij, quibus auctoritas est tradita: qui monasterij res indignis conferunt, aut incautè perire sinunt, aut superfluè res expendunt, qui nonnunquam circa curam propriam reperiuntur satis prodigi; sed quo ad alios satis auari: hi si certè aduererent, quòd eleemosynæ sunt pauperū, quibus uiuunt, eas cum magna timoris reuerentia, & prouidentia æqualiter dispensarent.

¶ *QUALITER DEBENT ESSE
amatores paupertatis. Cap. XVIII.*

VEri autem amatores pauperiatis sine licentia nil accipiant, nec dent, vel habeant, neq; mutant, neq; furentur: Quamuis enim nobis necessaria habere liceat in cōi; nullus tamen quicquàm habeat in speciali. Ecce pater noster Augustinus tantæ paupertatis exitit, quòd testamentum nec moriens fecit ullum. Et sicut proprium non licet habere claustrali; sic & operari studeat in communi. Sciendum est autem, quòd religiosis postponenda sunt quædam actu pariter, & affectu, vt proprietates rerum, qua se priuauerunt; quædam affectu, sed non actu, vt interdum est per actiuam vitam dispensa-

spensatio temporalium: quædam actu, sed non affectu sicut pro bono obedientiæ quandoquæ intermittitur contemplatio superiorum; Sed heu videmus multos bonum proprietatis appetere; nolunt tamen ipsam cum defectu, seu penuria sustinere. Apud omnipotentem vero Deum tunc paupertas pretiosa redditur, cum eam voluntas deuota cum difficultatis molestia comitatur. Sanè ad retinendum nuditatis virtutem ita vosmetipsos ab omni proprietate reddatis extraneos, vt tanquam peregrinos, & nihil habentes pijs monasterij largitionibus vos noueritis vestiendos, deinceps & alendos. Ex præmissis igitur coligite, vt possidendorum in vita præsentis nec quicquam inordinatè concupiscatis, nec inhonestè acquiratis, nec sine licentia quicquam recipiatis, vel detis, nec præter voluntatem prælati aliquid teneatis, nec licentiam extorqueatis, nec contra fraternam charitatem quicquam teneatis, nec inutiliter expendatis.

§ DE MVLTIPlici NOCVMENTO
proprietatis. Cap. XIX.

O Stendunt proprietarij se vacuos Dei gratia esse, qui contra professionem suam possidere satagunt aliena. Mala est compensatio, quæ bursum dat, animam Deo priuat: quantum sibi religiosus archam onerat rerum proprietate, tantum sibi grauat conscientiam puritatis egestate. In dialogorum libro legimus, quendam religiosum paucos denarios abscondisse, cuius sepultura extra cimiterium quidem facta maledictionem pro benedictione meruit sic habere. Pecunia tua tecum sit in perditione positis denarijs apud ipsum. Tales si
 dece-

decedunt impœnitentes peiores sunt inferno : qui moriente Christo restituit aliena. Isti pro re transitoria pretiosum obligant, quia pro talibus animam suam damnant, & se gaudijs cœli priuant. Vnde frater, qui se, & sua Christum secuturus reliquit, de his se vitiosè postmodum intromittit. Iste talis insipientem se ostendit, qui molam asinariam de collo amotam resumit : & in spinas, quas euaserat, se ponit, ac luto, quo subtractus fuerat, se submergit. Iste velut canis ad vomitum reuertitur, & retro aspiciens mittendo manum ad aratrum perficit curuum saltum. Talis namq; si vxorem Loth in statuam salis conuersam attenderet, ad ea respicere, quæ reliquit, minimè festinaret. Minus est sapiens, qui diuitias asino congregat, sed de propria inopia nihil curat : Huic similis est, qui contra professionem suam res sibi colligit; sed per defectum spiritualium fame perijt. Per hoc quoq; quod sua pretiosiora seipso æstimat, gradum, & ordinem diligendorum aut negligit, aut ignorat. Cum iste sit mundo mortuus, fame mori formidat. Cum de compedibus sit solutus, iteratò se illaqueat. Cum sit in naui, aquam haurit, vt se mergat, cum sit in horto sal spargit, ne fructus sibi gratiæ crescat. Benè talis dici potest ydololatra, quia fiduciam habet in pecunia, quæ in illo solum, qui iuuare potest, est habenda. O quam iniuste res hic ponderat, qui postponere pro paucis denarijs Christum putat. Immo talis interdum flagitium Iudæ superat, quia his non nunquam vno solido se damnat. Ille autem venditurus Dominum triginta argenteos eum æstimabat. Naturæ hic ordinem peruertit, quia terram super omnia diligit, quam inter elementa rerum Creator infimam ordinauit. Tu itaq; frater si currere ad cœlum vis ex-

pedite, satage, vt nequaquam prementes sarcinas amplectaris.

DE UTILITATE PAUPERATIS.

Cap. XX.

Sufficiat autem vobis, fratres carissimi, paupertas, & abhominetur anima nostra transitorias substantias; quia Christo vobiscum manente diuites nimis eritis, nihil temporalium habentes. Et sine illo pauperes eritis, & egeni, cunctas etiam diuitias mundi obtinentes. Ille autem sit vester thesaurus, qui solus animæ desideria replere potest, & sine illo est omnis creatura vacua. Quare si propter pauperatē esuritis, & sititis, si nudi estis, si sustinetis incommoda; ille solus vobis sufficiat, qui dulcedinis, suæ magnificentia, omnia mundi commoda propter se dimissa incomparabiliter recompensat. Attendite fratres mei, quia sicut securum iter pauper transit per latrones; sic & monachus nihil habens cum decedit, diaboli securus transit laqueos, & euadit. Elementa leuia sursum vadunt, sic & fratres, qui se perfectè omnibus nudant, liberè cœlos petunt. Exemplū enim est horum pauper Lazarus, qui fuit tandem ab Angelo in sinu Abrahæ deportatus.

DE CASTITATE.

Cap. XXI.

Amplectenda est post hæc velut vnum bonum de religionis principalibus ipsa castitas, quæ diuinæ visioni nos aptat, quæ naturam superat, & angelicis spiritibus nos conformat. Hæc est enim inquam, quæ fidelem animam Christi sponsam efficit,

cit, quæ sequentes agnum canticum nouū instruit,
& Deo proximum esse facit. Talibus inhæreatis
nuptijs, vbi thalamus est cordis munditia. O quam
regales sunt illæ nuptiæ, vbi anima Christo per amo-
rem iungitur, capiti nostro corona ponitur, & dex-
tra illius nos in primo amplexatur.

¶ SIMILITVDINES QVÆDAM
de castitate. Cap. XXII.

Castitas vestimentum est nuptiale, quo decorabi-
mur discumbentes in conuiuio summi regis.
Hoc byssino vestimento qui caruerit, de nuptijs
æternis confusibiliter expelletur. videte, quomo-
do confusi sunt valde serui Dauid, quorum videli-
cet vestes vsq; ad nates tondebantur, quia confusi
nimis erunt apud altissimum, qui tegumento nobi-
lis continentia nunc spoliatur. Omni laude di-
gnum est in carne præter carnem viuere, & inter spi-
nas esse, sed spinarum aculeos non sentire. Sala-
mandræ tales sunt similes, quæ in igne non combu-
ritur, & pisces, qui circumdatus aqua non submergi-
tur; atq; grano, quod non inter zizania suffocatur.
Isti mira faciunt in hoc mundo; Maius enim mira-
culum est de carne propria fomitem extirpare libi-
dinis, quàm eiicere dæmonia; vel febres de corpo-
ribus alienis.

¶ DE TRIBUS MALIS
Incontinentia. Cap. XXIII.

Tribus modis incontinentes errant; dum vel
delectatione, vel cogitatione, vel consensu cir-
ca idem vitium elaborant; huius figuram nobis sa-

cra scriptura euidenter innuit: cum in primorum parentum peccatum serpentem, & mulierem, atq; virum litteraliter introducit. Sit itaq; cor vestrum per castimoniam thronus eburneus; sit lectus floridus; sit fons clarus; sit utiq; hortus conclusus, amena paradisus; sit archa extrinsecus, & intrinsecus deaurata; & virtutum delectabilis apotheca.

DE COGITATIONE MALA.

Cap.

XXIV.

PRimo ergo super corda vestra, fratres mei carissimi, Christum sicut signaculum ponere satagite; & ne vagentur ad inania prohibente. Cor etenim ceræ simile dicitur, quæ per impressionem sigillo quolibet figuratur. Quare pulchris imaginibus mentes vestras imprimate, ac sic eas in æterna gloria decorate. Studeamus etiam pigmenta bonarum cogitationum in ignem desideriorum mittere, quo valeamus summi amoris incenso in conspectu altissimi redolere. Desiderium enim nostrum ignis est, & secundum materiam, quam imponimus, vel factoris, vel boni odoris fragrantiam excitat. Cor quoq; nostrum molæ continuo currenti comparatur, quæ vel lolium, vel triticum comminuitur secundum arbitrium imponentis. Faciamus igitur; ut Salomon, qui auream urnam supra templum posuit ad innuendum, quod quisq; talis esse debet, qui ad resistendum volatilibus cogitationibus se præmunit. Sciat uestra fraternitas, quod cogitando quis peruersa, rapto rem in thesaurum suum intromittit, semen iactando diabolus emittit, sagittas diaboli absq; clypei oppositione recipit incuruando se Sathanæ, Christum de solio dei jcit: porcos in hortum suum deaustandnm

standum introducit: lutum in fontem conscientiae suae mittit: flores relinquens ad stercorea se cōuertit.

¶ DE DELECTATIONE.

Cap. XXV.

Q Vasi proles matrem, sic delectatio malum sequitur cogitatum. Quisquis ergo voluerit vitare consequens, malum præcaueat antecedens, sciens quodd, qui cogitationibus carnalibus mentem dederit, à supernis se consolationibus elongabit. Absit enim, ut diuina consolatio infundi debeat uasi inquinato. Nam cor immundum sedes est Sathanae, cui non decet Christum per gratiam confedere. O quàm indigna commutatio incommutabile bonum spernere, & rebus mutabilibus adhærere, fontem dulcedinis relinquere, & turbato riuulo se replere. Igitur si de peccatis interdum uos cogitare contingat; non hoc ex delectatione; sed amara compunctione fiat, sicut pater multarum gentium Abraham ciuitates à longe conspexit subuersas, & Hieremias ciuitatis suae incendium dolens planxit.

¶ DE CONSENSU.

Cap. XXVI.

CÆterum si contingat, ut illicita cogitatio uos interdum mordeat, summopere cauendum est, quodd usq; ad consensum delectatio non decurrat. Cum enim diabolus inclinare uos nititur ad peccatum, ad suum incuruari transitum uos hortatur. Sed mendax est, & pater mendacij. Ideo minimè peruersus transibit, quin potius, si in consensu uestro aduenerit, pedem figat. Considerandum ta-

men est duplicem esse consensum, qui nos maculat, dum uel malum facere decernimus, uel dum nos in opus per delectationem motuum consentimus. Quando enim delectatio cogitationis usq; ad uoluntatem delectandi protrahitur, tunc morosa, & rea criminis, etiam absq; perpetrato operis iudicatur. Et si taliter delectantes apud omnipotentem rei sunt, uideant, quo reatu constringentur, qui cogitationes praueniens ad illicita se compellunt.

QVALES DEBENT ESSE VERI
continentes. Cap. XXVII.

STudeamus igitur fratres corporis habere continentiam, atq; mentis, quæ nobis per cinctiōnem lumborum, atq; mamillarum cum zona aurea declaratur. Si uero tentatio carnis, uel dæmonis ad illicita uos incitat, mentem tamen stantem fortiter hæc non frangat. Sed multum interest habere uirtutes politicas, uel purgatorias, aut purgati animi, quia tantum sunt extremæ prioribus meliores, quanto iam post triumphum quietem sinceræ possident puritatis, Quamuis enim omni laude plenum sit carnalibus desiderijs resistere, multo tamen laudabilius est tentationum incitamenta non sentire. Nam dum obtinet in bellorum conflictibus quis triumphum, tamen uulnere interdum ictus recipit, ac plagarum. Motum etiam quem cum labore pugnae, quis interimit; quando se pacem habere sperauerit, tunc insurgit. Nequaquam enim ab hoste dimicans securus esse poterit, quamdiu contra eum dimicans uictus non fuerit. Securius David erat postquam à prælijs subiectis hostib⁹ quieuerat, quàm cum bellorum discriminibus subiacebat. Status ille

ille tranquillus in archa Noë designatur, in qua cuncta quietantur animalia, & pacantur. Ad pacem hanc laudabilem tunc uenimus, quando contra uitia insurgentia, non quasi ex necessitate pugnare compellimur, sed ea potius, cum se prius oculo rationis obtulerint, velut colubrum horrore nimio detestamur.

¶ DE CIRCVMSTANTIIS LUXVRIÆ.

Cap. XXVIII.

Non solum opus luxuriæ nepharium; sed ad illud incitantes circumstantiæ sunt vitandæ: quales sunt incautus visus; tactus; osculum, & amplexus, frequens eloquium, risus,

¶ DE VISV INCAVTO.

Cap. XXIX.

Etenim quia mors per fenestras ingreditur, necesse est, vt visus ipse cum magna diligentia obseruetur, ne dum aspectus incautè exteriora incli- nantes aspicimus, diuitias intrinsecas amittamus. Certè si Dauid visum ab incauto intuitu restrinxisset, in tantæ tentationis mala minimè incidisset. Pudicitiam quoq; Dina perdidit, quia ad videndum mulieres regionis occurrens visus in sui se custodiam non conclusit. Ad tegendum visum nostrum exemplum nobis Saluator tradidit, qui ne proprios velari in irrisione oculos recusauit. Quod idcirco scandalizantem oculum secundum Dei consilium eruamus, vt visum videlicet, ne vanitates hauriat, auertere studeamus.

DE TACTV INCAVTO.

Cap. XXX.

CAuendi sunt præterea contactus non solum lasciuiarum; sed bonarum etiam fœminarum, quamuis enim bona sit terra: bona quoq; sit pluuia: tamen ex earum commixtione lutum efficitur. Eodem modo licet bona sit manus viri, & bona manus fœminæ ex contactu tamen illarum nonnumquam lutosa cogitatio, vel affectio generatur. Si picem etenim quis tetigerit, manum utiq; sordidabit. Quis autem stultus credit se manum in ignem mittere, & incendium non sentire? Vnde quidam sanctus, quando per aquam matrem propriam transportauit, manum pallio, ne illam tangeret, inuoluebat.

DE AMPLEXIBVS,

& osculis. Cap. XXXI.

SI ergo secundum Apostoli dictum, bonum est mulierem non tangere, nequaquam illam expedit osculari. Concupiscentia enim quosdam tales sic falsè decipit, & excæcat, ut dicant talia licere, cum eundem Apostolum constet osculum mundus indulgisse. O quam miserabiliter periit iudicium rationis: cum affectus ad aliquod faciendum incipit dominari. Firmat enim sibi mens captiua conscientiam qualemcumq; dum tamen perficiat, quod affectat. Ipsa vero conscientia post facti perpetratiorem amaris stimulis mentem pungit, quæ ad malam partem deuians veritatis semitas derelinquit. Amplexus quoq; mortales non desidentant, qui ad æternas nuptias se parant. Ornatos namq; lampadibus

bus munditiæ, & oleo laticię decet esse, qui super-
ni sponsi amplexibus cupiunt interesse.

§ DE REMEDIIS LVXVRIÆ.

Cap. XXXII.

Remedia sanè luxuriæ sunt familiaritates sus-
pectas deuitare, sibi non nimis confidere, occa-
siones tentationum fugere, sensus exteriores clau-
dere, cogitationes malas restringere, carnem doma-
re, motibus insurgentibus resistere, bonis se semper
exercitijs occupare. Quem enim antiquus hostis
vacantem viderit, hunc suis negocijs occupabit.
Sciendum deniq; quòd est nobis contra alia vitia
pugnandum, sed incontinentiæ malum potissimè fu-
giendum. Quoniam sicut infirmus per potum fri-
gidæ aquæ ardorem febrium non minuit, sed accen-
dit, sic remedia concupiscentiæ quærens in his mise-
rijs, desiderium nec satiat, nec exinguit.

§ DE RESISTENTIBVS CONTRA luxuriam. Cap. XXXIII.

OMni custodia necessarium est cor custodiri:
quia constat illud multipliciter impugnari. In
resistendo quoque necesse nobis est, vt ibi simus in
nostra custodia cautiore: vbi pugnas experimur ho-
stium fortiores. Nam & diabolus ibi ponit frequen-
tius tentationum laqueos, vbi magis sentit nos in-
cautos. Et ibi studet fortius nos debellare, vbi no-
uit nos amplius ærotare. Pax, & concordia cun-
ctis est laudabilis, nisi contra vitia pugnatur: quod
optimè innuitur, vbi turris Dauid ædificata cum
propugnaculis decorata fuisse mille clipeis, omniq;
arma-

armatura fortium memoratur. Vnde & antiquo populo propter exercitium præliandi Iebuseus dimittitur, & Machabæis in sabbatho pugnandi licentia tribuitur: vt, quàm gratum Deo sit bellum contra vitia, declaretur. Fratrem illum diligenter recogitate, quem vidit senex coram se per diuersarum specierum formatas imagines impugnari, quas, quia per negligentiam non repulit, cordis sui pulchritudinem in conspectu Dei omnia cernentis maculauit. Sed econtrario benè sibi frater ille tentatus confuluit, qui vt magis obliuisceretur talium, mulierem sibi luteam figurauit. Ad innuendum custodiam cordis nostri Cherubin flammeo gladio ad viam ponitur Paradisi. Studeamus autem maximè caput serpentis conterre, hoc est tentationum principijs insistere; vt sic hostem, dum est debilis, opprimamus: vt nequitiam in semine destruamus, atq; ad petram, idest Christum nostros paruulos allidamus vt si aduersarius noster sepius tentationibus examinet, ipsa frequentia tædio non afficiat, ne simus sicut lapides, quos stillæ cadentes non violentia, sed frequentia tandem cauant. Liqueat hoc in patre quodam, qui annis viginti tentatus fortis athleta Christi perstitit; sed postmodum vnius noctis spatio victus cessit.

DE HUMILITATE.

Cap. XXXIV.

Matrem virtutum humilitatem fratres carissimi libenter amplectamur, quàm & Christus verbis docuit, & exemplo. Nihilominus demonstrauit, qui se mitem, & humilem corde dixit. Scitis de quodam apud antiquos patres recipiendo, ad of-
fa mor-

sa mortuorum missio, vt illis exhiberet ignominiam, & honorem; quatenus sicut hæc ad vtrumquè insensibilia cernerent; sic & ipse laudes, vel vituperia non curaret.

¶ DE HIS PER QVÆ HVMLITAS
habetur. Cap. XXXV.

AD perfectam humilitatem istis gradibus venietis; si videlicet defectus vestros cum dolore, ac emendationis proposito recolatis, si propriam excellentiam ex corde fugiatis: si contempti non contemnatis: si vos vere mortuos mundo aestimetis: si nulli, nisi soli Deo placere appetatis, nec vlli displicere, nisi soli Domino Deo timeatis: si humana vobis præsentia nihil adjiciat honestatis, aut minuât solitudo: si vos inutiles non superficie verborum pronuncietis; sed veraciter reputetis: si desideretis viles videri: si omne, quod est contra communem cursum ordinis, quod vos porest reddere notabiles, declinetis: si singularem sensum relinquatis: si vos ipsos in vestris conscientijs accusetis, & alios excusetis.

¶ DE SIGNIS HVMLITATIS.
Cap. XXXVI.

Signa sunt humilitatis gratiam hominum negligere, sententijs aliorum acquiescere, correctiones libenter audire, caput inclinare, vestes notabiles non ferre: tortuosum incessum vitare: maiorū præcepta sine discussione perficere: æqualibus ad obsequia paratum esse, minores non contemnere, simplici gradientes via nunquam duplicatum, aut fictionis

ctionis vestigium prætere, in litibus nolle victoriam obtinere.

¶ DE VTILITATE HUMILITATIS.

Cap. XXXVII.

VT humilitatis fructum noueritis, agnoscite, quia cinis est virtutum carbonem in feruore conseruans, fundamentum spirituale, ædificium ne cadat sustentans, & scala ad cœlestia nos subleuans. Ipsa enim humilitas virtutes ceteras conseruat: capiti nostro nos assimilat, actiones pulchritudine sua ornat. Hæc est, quæ Deo est amabilis, in seipsa laudabilis, proximis exemplaris. Humilitas certè est virtus, quæ obtinet absentia, stabilit præsentia, recuperat iam amissa.

¶ QVOMODO QVIS HUMILIS debet apparere. Cap. XXXVIII.

SI quis igitur humilis esse perfectè nititur, uelut surdum, mutum, cæcum, immo quasi stultum exhibere ex intimis sese conetur: ut uidelicet nihil audire, nihil loqui, uel uidere cupiat, quod ipsum à proposito suo protrahat, & à bono propter derisionem aliquatenus non recedat. Humilitatem quã perfectè quisq; teneat sine fictione, ut sicut uel illam exhibet forinsecus in opere, sic deferat eam in corde. Non igitur sitis sicut illi, qui humilitatem diligunt, sed contemni nolunt, quia tales, si humilitatem noscerent, nequaquã illam in contemptu propriæ excellentiæ consistere dubitarent. In uestimentis serueris tale medium, ut nec pretiositate sint notabilia, nec uilitate nimia deturpata. Superbia nonnumquã de suo interitu conualescit. Dum enim quis abijcere sese nititur, de hoc ipse multotiès in-

niter

niter gloriatur. Eodē modo cum pro Christo quis ieiunauerit, sæpē vanagloria per hoc surgit. Vnde cum quidam frater quæreretur, cur magis in congregatione, quàm in solitudine ieiunare posset, responsum est ei, quia digitus eum in monasterio pasceret, sed in solitudine nullus ieiunij testis esset.

§ DE NOCUMENTIS SUPERBIAE.

Cap. XXXIX.

NOcumentum superbiæ in hoc perpendatur, quod duo sunt in operibus bonis, gloria utiq; & utilitas, quorum primum sibi Deus seruauit, sed reliquum nobis dedit. Vnde si Dei partem nobis retinere contenderimus, absq; dubio partem aliam amitemus. Sicut enim ventus puluerem proijcit; sic uanitas uirtutes dissipat, & dispergit. Hoc enim certissimè sciendum est, quod nunquam obedientiæ bonum, nec patientiæ uirtus, nec perfectionis puritas obtinebitur, si humilitatis sinceritas amittatur.

§ DE CONSERVATIONE

humilitatis. Cap. XL.

SI igitur humilitatem diligitis, per hæc quæ conscripsimus, illam conseruetis, si uidelicet in uobis pensaueritis facilitatem cadendi, difficultatem resurgendi: si cognitionem habere studueritis propriæ fragilitatis, & considerationem fratris alterius melioris, si sæpē cogitaueritis mortem imminētē, si nihilominus Dñm, quæ agitis, attenditis intuentem. Si nihilominus ipsum Dñm usq; ad mortē turpissimam humiliatū pensaueritis, si gloriā, & honorem, qui sequuntur ignominiam, ponderaueritis.

§ DE

§ D E P A T I E N T I A .

Cap. XL I.

DEniq; fratres mei virtutum clypeum, patientiā apprehendite, quæ in sanctis Dei mirabilia operatur. Facit enim ipsa patientia vincere puel- lam fragilem totum mundum immo sine pugna vin- cit aduersarium, & amaritudinibus mundi pasci- tur, & contrarijs delectatur. Discipuli certè se di- gnos habitos iudicabant, quia pro Christi nomine contumelias sustinebant. Si benè consideramus, non sunt condignæ passiones huius temporis, quas sustinemus, ad magnitudinem Christi passionum, nostrorumq; delictorum, & infernalium tormento- rum, atq; cœlestium præmiorum. Proinde lætati sunt patres nostri pro diebus, quibus humiliavit eos Deus, & annis quibus viderunt mala: sicut aper- tē nobis pater noster Dominicus ostendit, qui loca insidiarum transiens incessit alacriter, & cantauit. Idem quoq; pater fuit Carcaffione libentius, quàm Tholosæ, quia capit ibi molestias, hic honores. Exemplum patientiæ nobis exhibuit, qui dicebat, nonne dissimulaui? nonne silui? nonne quieui? Dis- simulauit quidem foris per opera: ne impatientiæ signum ostenderet. Tacuit autem verbis inordina- tis, ne vel ore dura verba proferret. Quieuit in corde, vel ne seipsum intrinsecus turbaret.

§ D E V T I L I T A T E P A T I E N T I A E .

Cap. XL II.

Patientia est adamas, quo mens incommodis non frangitur: medicina, per quam ab omni læsio-
ne

ne curatur, & clypeus, quo, ne lædi valeat, communitur. Ab alio certè lædi non poterimus: nisi prius contra nosmetipsos intrinsecus dimicemus. Tribulationis fructum ille nouit, qui pretium iniuriantibus erogauit; hunc fructum sacra scriptura satis innuit: vbi tribus pueris ignis in nullo nocuit, sed vinculatos soluit. Idem ostendit artificium. Nam lapis ad hoc tunditur, aut sculpitur, vt in solemniori loco postmodum collocetur. Sic & nos in mundo premimur, vt in templo cœlestis patriæ, vbi nullus sonat malleus, collocemur. Nam gaudium tristitia præcedit, qua vel pro purgatione culpæ, vel perfectione gratiæ, vel augmento gloriæ nunc ferimur, ô labor, ô dolor, ô beatæ lachrymæ, quas ab afflictorum oculis manus omnipotentis absterget. Cœlorum regnum eorum dicitur, qui propter iustitiæ persecutionem patiuntur. Cum ergo in persecutione duo sint, culpa videlicet, & pœna, meliorem partem habet patiens, cum sit culpa lædenti, & tantummodo pœna sustinentis. Puritatem suæ dilectionis in nobis omnipotens Deus ex hoc probat, quod eos, quos amat, arguit, & castigat. Hinc est, quod in signum clementiæ ab Assuero rege contra Hester aurea virga extenditur, qua nos esse consolandos virga Dominicæ correctionis figuratur. Si suis dilectoribus temporaliter benefaceret, plures sibi non pro se, sed pro donis potius adhærerent. Fuerunt, qui dextera utebantur, similiter, & sinistra, quibus quid aliud dixerim, nisi quod sicut ad meritum vitæ conuertebantur per prospera, sic & per aduersa, immo vt verius talibus dicam, nihil aduersum esse poterit, pro quibus aduersitas ipsa militans semper cumulat meritum, & tandem ducit in gaudium. Patet ergo, quod homo patiens de felle fauum mellis elicit,

cit, malum in bonum conuertit, amarum quasi lac fugit, marorem in fœlicitatis æternæ gaudium mutat usq; ad tempus enim expectabit patiens, ut postea iocunditatis redditio subsequatur. Certè peccantes ad refrigerium uenire non poterimus, nisi hic per aquam tribulationis, uel tandem per ignem purgatorij transeamus. Facilior est autem aquæ transitus, quàm ignis. Si aduersitatum utilitatem sciremus considerare, uix in centum annis Domino possemus pro infirmitatis unius beneficio respondere. Vnde sapienter ille bonus frater doluit plorans, quòd eum Dominus quinto Anno per infirmitatis molestiam non uisitauit.

*QUALIS ESSE DEBET VERA
Patientia. Cap. XLIII.*

Velimus igitur bona agere, & mala pati, Et si cordis tranquillitatem cupimus habere, debemus, non quòd nobis fit, sed quòd alijs irrogamus, ponderare, ferre libentius iniurias, quàm inferre, flagella Dei sine murmuratione sustinere, ac iniurias proximi sine rancoris odio tolerare. Exemplum nobis sumimus à Dauid, qui quando cytharam tangendo tetigit, in Saule malum spiritum mitigauit. Si pœnam ex culpa meremur, doleamus. Si autem innocenter patimur, gaudeamus, quia iocundum est cum Christo sustinere molestias innocenter, quàm cum latrone pati iustè, multoq; maioris gloriæ pro laude diuina, quàm pro meritis mala ferre. Sunt igitur agenda gratiæ Deo pro prosperis, & pro aduersis, sicut non solum cantat diebus, sed & noctibus Philomena. Sine querela tam actiue, quàm passiuè vos seruetis fratres charissimi,

— vt nec

vt nec querelas moueatis de alijs, nec de uobis cuiquam tribuatis materiam querelandi. De nullo, nisi quod pro Christo militatis, gaudeatis, nec de aliquo doleatis, nisi quod à conditoris gratia elongatis. Nam impatientia contra peccatum tantummodo est indulta. Hæc enim dilectissimi thronus Christi, & victoria est, vt cedant lædenti, & indulgeant prosequenti. Sitis igitur fratres velut aromata, quæ trita magis fragrant: sicut aurum, quod fornax non consumit, sed examinat, sicut granum, quod à palea flagellum separat, sicut nauis, quam ventus non impedit, sed ad littus agit, sicut gemma, quam sculptura non destruit, sed decorat. Ad perfectam igitur patientiam venire cupientes his gradibus utamur, vt videlicet malum pro malo nunquam reddamus, bono non resistamus: mala toleremus, iniuriantem placemus, bonum pro malo rependamus. Gaudenter iniurias suscipiamus, ad plus sustinendum parati simus in tribulatione, Deo gratias referamus aduersitates pro Domino affectemus. Maxime vero valet ad sustinendum conuitia, si ad responsum talionis sitis non faciles, sed immobiles velut muti, & quasi qui hoc non audierint, vel aduerterint, sicut surdi.

DE MALIS IMPATIENTIÆ.
Cap. XLIV.

Mltra male impatientia operatur. Rationis etenim oculus cæcat, sancti Spiritus donum conturbat, ac pacis dulcedine mentem priuat. Hæc diabolo comparatur, quia sicut ille ignem vomit, sic importunus homo impatientiæ verba fundit. Ira enim febribus similis est, quia non solum ani-

mus, sed & corpus per eam inordinatis motibus commouetur. Immo dico iram febribus peiorem, quia cum per febres homo vexetur, semel vel bis per iram multotiens vno die agitur. Cum autem tribulatio sit quædam rasura, talis quisq; quando per hunc mundum raditur, quietus sedeat; ne si sub rasorio insolenter se moueat, peius malum per impatientiam incurrat. Cum detrahenti se quis vindicauerit, plus amittit, quia tribuit vestem innocentiae tollenti pallium bonæ famæ. Siquis igitur à Deo vindictam poscit, Christum Deum quodammodo ultorem, & iudicem sibi facit. Quid de ira dicam? Per iram cor accenditur, siue palpitat, os in clamorem format, sensus, quid loquatur, ignorat, cæcantur oculi, non cognoscuntur moti, facies ignescit, lingua impeditur, cor tremit.

Q U O D I N Q U I B V S D A M
patientia deformatur. Cap. XLV.

SVnt autem quidam, qui patientiam, non ex proprijs, sed ex virtutibus concipiunt alienis, qui volunt tunc solummodo esse patientes, cum non fuerint ab alijs irritati. Sunt & alij, qui foris iniurias dissimulant, qui rancorem interius tamen seruant. Horum patientia est sicut sotularis non vinctus, qui ab exteriori quidem læsione pedem defendit, sed intrinsecus pedem rumpit. Isti sunt lupis similes, qui plagas in pelle foris benè sustinent, & vulnera, sed corruptionis concipiunt faciliter in interiorib. detrimenta. Sunt item alij, qui proprias iniurias studiosè vindicant, sed iniurias Dei prosequi minus curant, non aduertentes aliam per zelum, aliam per vitium iram esse, prima contra iniuriam Dei; secunda

da contra iniuriam propriam commouetur. Et illa est gratiæ, ista culpe, illa præmium, ista importat pœnam. Sed cauendum est valde, ne tantum animus per iram turbetur, vt quod vitio furoris agitur, fieri per zelum rectitudinis æstimeretur. Interdum enim vitia virtutibus se palliant, & actus, qui possunt fieri meritoriè, reddunt noxios, ac deprauant. Sic nõnumquam in correptione fraterna, ira charitatem excæcat, cum potius è contrario charitas iram debeat excæcare. Sunt & alij, qui personis, & non vitijs irascuntur. Nos autem si charitatis ordinem inspicimus, hoc videmus, quòd est diligenda natura, quam Deus condidit, & detestanda sunt crimina, quæ quis ex instinctu proprio, vel certè diaboli perpetravit. Possumus interdum homini non ex rancore irasci, & pro bono suo corpore cupere malum pœnæ. Cum quis ex sanitate corporis, vel affluentia diuitiarum, vel alijs ex gratijs extollitur, aut peccatis alijs implicatur, vt sibi bona sub trahantur, huius benè possumus, & rônabiliter exoptare, vt deficiente causa deficiat & effectus, siue desinat.

QUALITER PATIENTIA
acquiratur. Cap. XLVI.

VT autem iocundius nobis aduersantia sustinere possimus, studeamus hoc sollicitè possidere, videlicet memoriam passionis Dominicæ, considerationem retributionis diuinæ, ac dulcedinem Dominicæ charitatis. Pensemus & nostra mala merita, deniq; beneficia, pœnam purgatorij, quæ nobis per tribulationem diminuitur, & peccatû, quod dimittitur, & gratiam, quæ perficitur, & Dei gloriam, ad quam ordinamur, præmium, quod auge-

tur, atq; cautelam, qua per hanc non modicum erudimur. Sed laborandum nobis est, ne per ipsam nobis contingat quandoq; poenam incurrere, unde possemus, & gloriam expectare. Videmus enim, quod per æqualem motum pigmentum videlicet fragrat, & lutum foetet, & quod in eodem igne aurum rutilat, & fenum fumat. Certè tribulatio calcar est ad boni operis feruorem, pigritiam vero excitans nostram, & ventus ad portum gloriæ nos impellens. Cæterum cum iniuriöse molestamur, citius in nobis rancorem extinguimus, si per dissimulationem primos motus reprimamus. Est enim iræ natura, quod signis exterioribus prolata crescit, sed occulta minuitur, & languescit.

¶ *DE ORDINATIONE HOMINIS,*
quo ad Deum. Cap. XLVII.

OMni visu vos exhibete laudabiles fratres mei, coram Deo sinceros mentis puritate, & coram hominibus præclaros decenti disciplina. Exhibete vos semper in tali seruitio timoratos, sollicitos, & deuotos. Sollicitè Deo placita inuestigate, & ardentè ea concupiscite, ac implete. In charitate, & ex charitate cuncta facere satagite, vt & Deo largiente habeatis charitatis habitum, & per vestrum studium eius motum. Si enim vnum istorum in vestris actionibus defuerit, nequaquam apud Deum meritorium opus erit. Id ergo quod in vsum venerit, deuotè ad Deum referte, & ei propter seipsum per amorem infatigabiliter inhærete. Via vobis sit ad Deum tam prospera, quàm aduersa, vt in successibus cum gratiarum actione sitis humiles, & in contrarijs patientes. De nullo gaudeatis, nisi q̃ Christo

ſto militetis, nec de aliquo doleatis, niſi quòd ab eius gratia vos elongetis. Soli Deo placere appetatis, ſibiſmet ſolummodo diſplicere timeatis. Sola vobis ea, quæ Deo iungunt, dulceſcant, ſola, quæ ſibi contraria, amareſcant. Totam vitam veſtram ad Dei gloriam ordinate: ſemper illi de beneficijs ſuis gratias agite, & quicquid ad laudem eius non pertinet, quaſi amiſſum penitus reputate: vileſcant vobis omnia præter Deum, nec quæratſis aliquid in tranſitorijs, quod eſt contra Deum. Affectetis omne triſtabile, quod ordinat vos ad Deum. Sit vobis Deus honor, & gaudium, in mærore ſolatium, & in tribulatione deſenſio: ſit vobis cibus in ieiunio, in paupertate abundantia, in infirmitate ſaluberrima medicina. Quapropter ſi eſuritſis, ille vobis ſit conuiuium, ſi ſititſis, ille vobis ſit vinum conditum, ſi nudi, ſit ipſe veſtitus: ſi infirmi, ſit ipſe medicus, ſi vigilatiſis, ſit ille lect⁹, ſi fatigati ex itinere, ſit quies, & vmbraculum vobis ipſe. Sit inquam Deus cordis veſtri ſpeculum, quo vos ornetſis, ſit fons, qui vos lauet, ſit panis, qui vos confortet, electuarium, quod vos ſanet, ſit clauis, quæ corda veſtra ſibi aperiat, mundo claudat. Et ſi vires corporis deſiciant, ſemper tamen in obſequio conditoris bonæ voluntatiſis deſideria inardeſcant. Diligite, quod diligit Deus, & odite tantummodo, quod odit. Quantum eſt in vobis, ſemper ſtudeatiſis habere intellectum Deum cognoſcentem, affectum Deum diligentem, diligentiam ipſum quærentem, ſapientiam ipſum inuenientem, conuerſationem ſibi placentem, perfeuerantiam ipſum fiducialiter expectantem. Quid plura fratres. Adoremus Dei potentiam, miremur ſapientiam; amemus clementiam, deſideremus pulchritudinem, alliciamur per dulcedinem, veneremur

mur æternitatem, imitemur humilitatem, magnitudinem inquiramus, perfectionem laudemus, misericordiam speremus, iustitiam eius timeamus.

DE ORDINATIONE HOMINIS
quoad seipsum. Cap. XLVIII.

CORPUS vobis solummodo sit in mundo, sed animus sit in cælo. Intantum mentes vestræ sint intentæ superius, vt præsentia velut transacta quodammodo reputeris. Mundus sit vobis exilium, & patria vestra cælum. Frequenter ad Deum cor dirigite propter familiaritatis eius amicitiam subintrandam, licet hoc ipsum fiat breuiter, & propter accidiam remouendam studijs spiritualibus vos paulatim assuefacite. Orationis vsum vobis facite, & imprimate; nec tamen tanquàm ex cõsuetudine, sed ex deuotionis dulcedine adimplete. Orationes furtiuas quærite. Illis quoq; orationibus libentius insistite, quæ affectum vestrum ad feruorem magis videantur excitare. Videte, nedum corpus sit in choro, animus sit in foro. Existentes in itinere, sic vos exhibeatis bono modo socijs affabiles, ne ipsa societas ab orationum consuetarum fructu faciat inanes. Quotidie mane surgentes, cuncta quæ facturi estis, Deo offeratis. Finito die de commissis illa die vobis ipsis capitulum teneatis, conuocatis cogitationibus, locutionibus, & operationibus. In lectione studeatis intellectu proficere, & affectu. Sic illa bona, quæ ex affectu quandoq; facienda concipitis, facite; ne propter illam bonum obedientiæ, vel id, ad quod tenemini, negligatis. Et breuiter, vt supremo bono coniungi valeatis, sitis ab omnium negotiorum sæcularium strepitu exuti, à vanitatib.

specu-

DE TRIBVS VOTIS.

ſpeculatorum præſentium auulſi, à cunctis infructuoſis cogitationibus extranei, & mundi blandimentis, ac illecebris crucifixi.

DE ORDINATIONE HOMINIS quo ad proximum. Cap. XLIX.

IN omni actu fratres cariffimi ſtudeſte vobis proficere ad meritum, & proximis ad exemplum. Circa ſeruitia fraterna ſitis iocundi, ſpontanei, & parati, nec vlli ſitis propter uſum proprij corporis oneroſi. Gratiã, quam accepiftis, alijs libenter impendatis. Id quod deeſt ab habentibus, humiliter requiratis. Delictum fraternum non indignatio, ſed compaſſio proſequatur. Accuſate proprios defectus, & ſupportate humiliter alienos, ſemper cogitantes vos perpetrare potuiſſe ſimilia, & maiora, niſi diuina vos miſericordia cuſtodieſſet. Et certe licet non aduertatis, ideo forſitan in maioribus defectibus laboratis, in quibus & vos indigetis ab alijs ſupportari. Habet enim fructus quilibet vermem ſuum. Monete delinquentes humiliter, & arguite patienter. Pacem cum omnibus, & bellum cum vitijs habete. In omni bono ſeruate concordiam, & non in malo. Fratris iracundiam ſine ratione etiam contra uos conceptam conſideretis cõpeſcere, ſicut veſtram. Quælibet tranſitoria fraternæ poſtponite charitati. Sic homines diligatis, ut eorum uitia non ametis. Et dilectio debetur hominibus ſecundum meritum, ſed veneratio ſecundum officium, & ætatem. Debetis igitur plus honorare ſuperiores, ſed plus diligere meliores, prælati obedientiam, æqualibus concordiam, melioribus beneficium exhibere. Contendite maioribus per rimo-

rem subijci, æqualibus per charitatem obsequi; sed per humilitatem minoribus coæquari. Sitis præcipientibus parati, obedientibus modesti, maledicentibus taciti, laudantibus uerecundi. Negligentes, & reprehensione dignos ita cautè declinate, ut ipsos præsumptuosè non iudicetis, & tamen ea, quæ faciunt, fugiatis. Quoscumq; feruentiores in bono cernitis, eorum familiaritatem auidius appetatis. Quamlibet uirtutem, uelut apes, semper à melioribus deflorate, nec quid minus quis habeat, sed qd uirtutis possideat, cogitate. Vniuersa uero, quæ uideritis minus ædificationis habentia uelut cæci, & qui penitus hæc non uiderint, transeatis. Nunquàm enim eorum, qui malè agunt, auctoritate, uel consuetudine animati, uel exemplo, id quod deterius est faciatis.

QVOD PRAELATI DEBENT
esse speculum subditorum. Cap. L.

AD uos autem spectat, ò praelati speculum subditorum esse, dominium non amare, nunquàm imperare, sine contumelia corrigere, sine superbia gubernare, sine crudelitate castigare, cum charitate fouere: Venerationem non exigere, æqualitatem seruare, culpas propter timorem, uel amorem non dissimulare, ex rancore, uel odio non punire, in pænis misericordiam cum iustitia temperare, communi aliorum uictu, & uestitu contentos esse. Ad bonum monere, nec moribus contradicere, uerbo, exemplo præesse pro diuersitate culparum, & personarum; nunc uinum, nunc oleum exhibere: sicut potestate, sic uirtute cæteros præcellere, non solum præesse, sed prodesse. Circa interiora, & exteriora
 soli-

solicitudinem habere, spiritualia, & temporalia pro inde dispensare. Quæ sunt contra ordinem non dispensare, rationabiles licentias non negare. Curis superfluis se subtrahere, sed necessarijs non deesse. Cum his, qui in lenitate ambulant, nolle misceri; maturitatem honestam apprehendere, prælaturam pro libertate, uel commodo non tenere, amare communia, superflua non appetere, contra honestatem non acquirere, de reddenda ratione continuè cogitare. Ad uos inquam spectat, ò prælati, esse in actione prouidos, in contemplatione suspensos, in conuersatione humiles, in dictis ueraces, in factis stabiles, in regimine fideles, uobis esse parcos, sed alijs liberales, in capitulo strenuos, extra pios, rebellibus esse patres, humilibus esse matres. Sic igitur uos habeatis ad subditos, ut parati sitis semper infirmis subuenire, sanos ad bonum stimulare, tentatos confortare peccantes corripere, deuotos diligere, pigros excitare, indiscretè feruentes retrahere, religiosos ad exteriora mittere, dissolutos in domo tenere, seniores in dubijs consulere, minores secundum regulam nutrire, simplices non contemnere, præsumptuosos inclinare, turbatos consolari, omnesq; uobis commisos Dño commendare.

§ DE DISPOSITIONE HOMINIS
in corde. Cap. LI.

VT perfectius possitis fratres charissimi finem attingere, quem intenditis, ad quid mundum relinquentes veneritis, cogitate sollicitè. Voluntates vestras frangite, & mundo vos mortuos aestimate. De cordibus vestris abijcite curiosas cogitationes, indignas affectiones, sinistras intentiones, violentas

lentas occupationes, tristitiam inutilem, priuatum amorem, & sensum vriq; singularem. Illud coram oculis Dei cogitare pertimescite, quod in præsentia hominum erubescitis operibus exercere. Conetur igitur quisq; cor habere, quod sit quasi hortus arboribus virtutum virēs, vt apotecha sanctarum affectionum aromatibus redolens, vt cœlum diuinarum illuminationum syderibus fulgens, vt flos supernum rorem suscipiens, vt archa thesaurum mirificum in se claudens, vt fons deuotionis riuulos semper inanans, vt speculum dominicam imaginem repræsens. O' beatum cor, quod exhibet se folium, in quo Deus sedeat, thalamum, in quo quiescat, sigillum, cui similitudinem suam imprimat; cellarium, quod vino suo impleat; librū, in quo memoriam suam scribat, aurum, quod pro beneplacito suo flectat. Conetur iterum atq; iterum quisq; cor habere Deo deuotum, cogitationibus discretū, in tentationibus cautum, à rancore extraneum, à iudicijs alienum, desiderio æternorum languidum, amore vulneratum, cogitatione fulgidum, in operibus timoratum, contemplatione eleuatum, in bono sollicitum, contritione scissum, munditia sanctum, timore custoditum, & gratia decoratum. Denique diligentissimè studeamus fratres, vt toto corde recedamus à peccato, detestando culpam, toto corde conuertamur ad Deum, agēdo penitentiam, & toto corde quæramus dominum, supplicando veniam, toto corde adhæreamus domino ipsum super omnia diligentes, toto corde seruiamus domino ipsum laudantes, toto corde sequamur ipsius semitas imitantes. Ista domino meritò debemus, qui beneficia præstat innumera cordi nostro. Ipse namque Deus corda nostra illustrat, sapientia gubernat, bonitate

nitate dicitur, dulcedine cibatur, pulchritudine immutatur, potentia iuuatur, & charitate vnitur, promissis allucit, flagellis etudit, comminatione concutit, ac beneficijs emollit. Ipse Deus dulcissimus corda nostra intuetur probando, alloquitur informando, tangit excitando, visitat consolando, viuificat iustificando, & aperit irradiando, de quibus omnibus gratiarum actiones nobis sibi referre conuenit indefessè.

¶ DE DISPOSITIONE HOMINIS
in ore. Cap. LII.

NVnquam superfleat loquenda, vel proferat tacenda. Quando vero loqui proponit quis, ipsa verba prius in animo temperet, quatenus modestè, veraciter, & dulciter quod voluerit, id proponat. Lingua enim mendax dupliciter elata, vel inflammata, Deo est, & hominibus odiosa. Diligenter igitur charissimi respicite, quid, vel quibus, quando, vel vbi, qualiter, vel quantum, vel certè qua de causa loquamini: ne sermonibus vestris, si debite circumstantiæ defuerint, generetur mala conscientia in cordibus proprijs, vel certè scandalum in animo auditorum. Hæc autem tria, videlicet gestum, vocem, significationem in vestris locutionibus attendatis, ita vt gestus sint disciplinati, vox lenis, significatio semper vera. Verbis nolite contendere, sed nec in litibus victoriam curetis obtinere. Vitanda sunt semper verba, quæ vel loquentibus, vel audientibus sunt nociua. Ab illis locutionibus est abstinendum, quæ vel illius, qui loquitur, vel eius, cui loquitur, vel illius, de quo loquitur, non conueniunt honestati. Tempus loquendi considerandum

randum est, quia quandoquē nihil, quandoquē aliquid dicendum est. Sed nullum tempus inuenitur, quando mala, vel etiam bona omnia sint proferenda. Aliquando enim tacere debemus, propterea quia alter loqui cœpit, ne sermonem eius interrumpere videamur. Aliquando tacendum est propter auditorum animos, quando ad id, quod dicere proponimus, aduertimus imperatos. Aliquando tacendum est propter multiloquium deuitandum, vel etiam propterea quia ipsi, qui sumus loquuturi nūdam formam congruam concepimus proponendi. Senes loquantur de discretione consulendi: Iuuenes de instantia operandi: sapientes de mysterio scripturarum: simplices de exemplis bonorum operū: hi, qui exteriora tractant, de sollicitudine vitæ actiue: Qui quietam vitam ducunt de dulcedine vitæ contemplatiue: prælati de dispensatione temporalium, & spiritualium: subditi de obedientia præceptorum. Cum igitur ad ædificationem nostram loqui volumus, ad hoc illos, quorum doctrina possumus ad virtutem prouehi, eligamus. Cum vero propter aliorum ædificationem loquimur, ad illos, quos speramus nostra exhortatione corrigi, cōuertamur. Ad hoc autem doctrina nostra intendat, vt hortemur ad constantiam timidos, ad timorem superbos, ad quietem importunos, ad feruorem tepidos, ad silentium verbosos, ad verbum exhortationis tacitos, ad mansuetudinem impatientes, ad vigilantiam negligentes, ad indulgentiam crudeles, ad verecundiam præcipientes, & procaces. Hoc est sollicitè considerandum, quod frater habeat conuersationem sibi placentem, perseverantiam ipsum fiducialiter expectantem. Quid plura fratres? Admiremur Dei potētiam, miremur pulchritudinem,
allicia-

alliciamur per dulcedinem, veneremur æternitatē. Cauendum est insuper ne frater in loquendo membra inordinatē moueat, neq; oculorum nutibus, nec vultus transformatione, vel transmutatione sermonis sui gratiam decolorer. Deuitetis itaq; verbum amarum, superbum, detractorium, adulatorium, iuratorium, superfluum, otiosum. Sicut autem absenti non debetis detrahete, sic nec præsentem aliquatenus deridere. Insipientibus non debetis illudere, nec sapientibus inuidere. Sicut muti in otiosis, sed loquaces infructuosis: in sermonibus vestris non cor in lingua, sed linguam in corde potius teneatis. Sanè cum ad loquendum veneritis, pauca verba rationabilia proferatis. Taciturnitatem amertis, & tumultum hominum fugiatis; per silentium namque conscientia seruetur, & mens per contemplationē expeditius eleuatur. Quantò enim plus à negotiorum strepitu vos subtrahitis, tantò Deus vicinior erit vobis.

§ DE EXERCITIO BONORVM operum. Cap. LII.

HIs virtutibus fratres charissimi pollere satagite, quæ specialiter pertinent ad regularis obseruantiam disciplinæ, quales sunt abdicatio proprietatis cum obedientiæ bono ad munditiam castitatis. Et quoniam per votum religionis ad magna vos ligastis, magna quoque in operibus demonstretis. Multo namquē melius est in minoribus promissionibus esse deuotum, quàm in maioribus negligentem. Vestrum ordinem seruetis opere, sed omnes alios charitate. Quotidie in aliquo virtutis exercitio proficite, & in bonum conemini sollicitè laborare.

borare. Nauis enim, quæ contra ictum fluuij ducitur, retrocedit, nisi sursum cum magno labore cõtinuò moueatur. Secundum statum in quo Deus vos posuit, meliora semper, quæ ad illum pertinent, adimplete. Habeatis in penitentia vitam, in desiderio vero mortem. Disciplinam extra seruate, conscientiam interius expurgate. Subtiliter inuestigate mala propria, & dignè corrigere indagare. Commune reprehensionem audientes non illam ad alios, sed ad vosipfos humiliter retorquete. Quia certi estis de perpetrata culpa, doleatis, sed quia incerti estis de venia, timeatis. In omnibus actionibus vestris extrema fugite, & semper in medio vos tenete. Vnde tali moderamine carnem stringite, quasi centum anni victuri, sed vitia sic fugite, quasi crastino morituri. Circa seruitia fraterna sitis prompti, nec ulli circa vsum proprij corporis onerosi. Estote fratres humiles sine fictione, maturi sine ponderositate, agiles sine leuitate, timentes sine desperatione, sperantes sine præsumptione, obediētes sine contradictione, hylares sine dissolutione, patientes sine murmure. Estote inquam compositi ad morum disciplinam, pij ad misericordiam, immobiles ad constantiam, in oratione deuoti, & in vestra custodia circumspecti. Curate mala præterita plangere, præsentia mala spernite, futura caute, in bono finaliter perdurate. Quamuis nihil honestatis humana præsentia vobis debeat adijcere, vel solitudo diminueret, tamen ibi magis seruate disciplinam, vbi vel pluribus generat scandalum neglecta, vel formam imitationis tribuit custodita. Noctem ordinetis silentio, & orationi, diem uero bonis exercitijs, & labori. Diem detis proximo: noctem Deo: laboris causam, non laborem in labore cogitate: In bonis fortes

fortes estote, sed in malis vos debiles exhibete. In agendis uero talem ordinationem, quo ad omnes, & singulos obseruetis, ut uidelicet sit in prelatis diligentia, in subditis obediētia, in omnibus sit in pax, & concordia, in choro deuotio, & disciplina, iuxta altare maturitas, & reuerentia. Deuoti sint senes: laboriosi sint iuuenes. Sit humilitas in habitu, paritas in uictu, sobrietas in potu. Sit in clauistro non rumor, sed lectio: in capitulo non lis, sed confessio. Et intentio fratrum non uersetur in causis, sed in psalmis. In conuentu quoque sint assidui, ad curias uero rari.

§ DE EXERCITIIS VIRTVTVM.

Cap. LIIII.

SIcut spectat ad iustitiam operatio boni, sic declinatio quoque mali. Quapropter laudabiliter uiuatis: nec tamen laudem hominum eppetatis. Nō gloriemini de multis diebus, quibus in religione diu uixistis, sed de paucis, quibus ordinem obseruastis: hypocrisim fugiatis, & in ueritate corā Deo ambuletis, sicut & in uestimentis ouium forinsecus apparetis. Nimis enim parum est in ingressu religionis tantum habitum mutare, sed mores, & uitam laudabile est. Igitur simplici gradientes uia nunquam duplicetis, aut fictionis uestigium prætentatis. Quicquid cōtra communem usum est, uel quod uos potest reddere notabiles, id fugite quasi pestem. Iustitiam nūquam deferatis propter uerecundiam, uel timorem. Dissolutiones non faciatis, nec uos cum eis, qui in leuitate ambulant, commisceatis. stude uisum à uanitate, aures à rumoribus, cor à malis cogitationibus clauderē: & linguam à sermonibus

būs otiosis, manus à contactibus impudicis, pedes ab euagationibus cohibere. Ab omni denique uos subtrahite, quod in conditoris posset uos obsequijs impedire. Otia declinetis: ne cellas inutiliter occupetis: crebra munuscula, frequentemque missionem cingulorum; & cultellorum, & huiusmodi deuiteris. Nolite non fienda sapienter appetere, aut facienda per accidiam fastidire. Diligentissimè caueatis, ne quando in labore minus patientes, uel inobedientia præceptorum minus alacres, uel in operibus charitatis inueniamini negligentes. In certo statu, & certa conscientia uos ponatis; nunquam etiam in illo statu uiuere præsumatis, in quo moriendo discedere non uelleris. Excessum in habitu caueatis: ne uestimenta uestra sint in genere pretiosa, uel in qualitate minus mollia, uel in colote splendētia, uel in formatione signū habentia uanitatis. Gestum quoq; corporis ubique cum distinctione disciplinæ exerceatis, sic ubique, ut singula mēbra suum teneant officium, nec usurpent in suis actibus alienum. Vnde nec loquatur manus, nec os audiat, nec oculus officium linguæ sibi sumat, sed unumquodq; membrum tam decenter opus suum impleat, quatenus aspectus intuentium non offendat. Facies humana, cum sit speculum disciplinæ, intantum maiori custodia est habenda, quanto minus potest abscondi, si quod peccatum in ea fuerit, uel cædari. Discursus inutiles semper caueatis diligenter. Nam sicut de inconstantia mentis nascitur inordinata motio corporis: sic e contrario mens paulatim requiem imponit, quando motus corporis inordinatè fluere non finitur: corpus non colatis, nec solatijs transitorijs hæreatis. Terrenę namque delectationes iocundant falsè, dum (sunt) & contristant ueraciter,

post-

postquam non sunt. Hoc quoque specialiter attendendum, q̄ sicut malum opus quandoque est laudabile, sic & bonum opus reprehenditur, quodammodo, si non sit tempore oportuno. Iustitia enim & ueritas nō semper deficiunt: quando tempus debitum in his expectatur. Fructus namque non prouenit, cum semen iacitur: sed tunc demum quando suo tempore seminatur.

¶ DE TEMPERANTIA SERVANDA
in cibo, & potu. Cap. LV.

COrpus ut seruiat, nutriatur, & ne lasciuia, ordinetur. Sic abstinentiam exerceatis, ne postea comedentes ipsum ieiuniū superfluitate nimia compensetis. Non sapor ciborum, sed fames comedēdi uobis excitet appetitum. In mensa studeatis necessitati prouidere, non appetitui. Caro etenim est pascenda, sed uitia extinguenda. Vnde corpori non sunt danda superflua, neque necessaria subtrahenda. Cum igitur sufficientem cibum sumpstis, si postmodum delicatiora, uel meliora superueniunt, non propter illa stomachum oneretis. Et quod de cibo diximus, de potu quoque, ac somno, & indumento, alijs quoque corporis necessarijs intelligatur: ut numquam in illis curetis uolupati satisfacere, sed necessitati naturæ. Illud etiam prætereundum non est, q̄ ante sumptum cibum magis hylares esse conuenit, ne uideamur propter abstinentiam turbati; postea uero tacitos, & modestos, ne putemur in crapula inflammati. Ante prandium tempus est doctrinæ, & orationis; postmodum autem operis, & laboris. Tunc enim exercendus est animus, quando ad studium spirituale leuis est. Et tūc
d repr

reprimenda est caro, quando calores incentiui per cibum solent amplius excitari.

¶ *DE VENIALIBVS VITANDIS.*
Cap. LV I.

Sicut libenter vitatis peccata graua, sic caue te fratres, ne multa vos molestant venialia, vel leuia. Sæpe etenim de peccatis minimis venit ad maiora; sicut ignis calidus nonnumquam surgit modica de scintilla. Vitanda sunt igitur peccata venialia; quia nos in malis assuescunt, & feruorem charitatis diminuunt, animam maculant, ad pœnam obligant, animæ potestatem in operibus suis lassant, & à gloria nos retardant. Numquam enim à quocumque facies Dei videbitur, donec per venialium pœnitentiam vltimus quadrans persoluatur. Hæc sunt quoque, quæ gaudium cœleste nobis indirectè minuunt, quia opera bona nostra, per quæ crescere nobis posset æternorum cumulus præmiorum, conuertere nos oportet ad solutionem huiusmodi debitorum. Curemus ergo per omnes declinationes esse potius innocentes, quàm committentes etiam culpas leuissimas esse pœnitentes.

¶ *EXHORTATIO BONA, ET FINIS*
Epistola. Cap. LV II.

Ecce fratres charissimi qualiter in multis vos instruxi, quia & ipse indigeo erudiri. In loco peregrinationis nostræ quandiu prauum est cor hominis proclium ad vitia, languidum ad virtutem, mutis exhortationibus indigemus. Hinc est, quod omni virtute vos precor contestans, ut per eum, qui suo reue-

reuerendo sanguine nos redemit, & ad vitam pi-
 morte reparauit, vestræ professionis, vestrique pro-
 positi non immemores, semitarum memineritis an-
 tiquarum, per quas antecessores nostri currere festi-
 narunt in spiritu vehementi, & iam regnant cum
 Christo perpetua requie cōsolandi, ad quam & nos
 cum diuina suffragante gratia peruenerimus, erit a-
 nimabus nostris cognitio puræ veritatis, dilectio
 summæ bonitatis, ac diuinæ fruitio maiestatis. Erit
 & corporibus nostris claritatis pulchritudo: agili-
 tatis promptitudo: subtilitatis aptitudo: & impas-
 sibilitatis inuictissima fortitudo. Ibi erit affluentia
 diuitiarum: influentia bonorum omnium, & hono-
 rum. Ibi gaudebimus super nos de diuina intuitio-
 ne: infra nos de loci amenitate: intra nos de corpo-
 ris, & animæ glorificatione, iuxta nos de societate
 angelorum, & hominum vnitatem. Quid plura? Ibi
 euasio periculorum: distinctio mansionum: con-
 cordia voluntatum. Ibi amenitas vernalis: candor
 lucis æstiuæ: & requies hyemalis. Ibi inquam
 vita sine morte: certum sine sorte: dies sine nocte:
 libertas sine timore: gaudium sine merore: requies
 sine labore: regalis dominatio sine fine. Hæc vobis
 præstare dignetur, qui est principium sine princi-
 pio, & finis omnium sine fine. Amen.

Appensus es (frater) in statera (regulæ tuæ) &
 inuentus es minus habens. *Daniel 6.*




INCIPIUNT PRAEDICTAE

Epistolae Capitula.

S <i>ALV S, & Exordium Epistola.</i>	Cap. 1.
<i>Exhortatio ad obedientiam seruandam.</i>	Cap. 2.
<i>Detestatio inobedientia.</i>	Cap. 3.
<i>De his, qui vitiant obedientiam.</i>	Cap. 4.
<i>Qualis debet esse obedientia.</i>	Cap. 5.
<i>Quod obedientia debet esse prompta.</i>	Cap. 6.
<i>Quod obedientia debet esse deuota.</i>	Cap. 7.
<i>Quod obedientia debet esse voluntaria.</i>	Cap. 8.
<i>Quod obedientia debet esse simplex.</i>	Cap. 9.
<i>Quod obedientia debet esse ordinata.</i>	Cap. 10.
<i>Quod obedientia debet esse iocunda.</i>	Cap. 11.
<i>Quod obedientia debet esse strenua.</i>	Cap. 12.
<i>Quod obedientia debet esse vniuersalis.</i>	Cap. 13.
<i>Quod obedientia debet esse perseuerans.</i>	Cap. 14.
<i>De abdicatione proprietatis.</i>	Cap. 15.
<i>Quaedam mouentia ad abdicationem proprietatis.</i>	Cap. 16.
<i>Quod ipsa multipliciter vitiatur.</i>	Cap. 17.
<i>Quales debent esse amatores paupertatis.</i>	Cap. 18.
<i>De multiplici nocumento proprietatis.</i>	Cap. 19.
<i>De utilitate paupertatis.</i>	Cap. 20.
<i>De Castitate.</i>	Cap. 21.
<i>Similitudines quaedam de castitate.</i>	Cap. 22.
<i>De tribus malis incontinentia.</i>	Cap. 23.
<i>De cogitatione mala.</i>	Cap. 24.
<i>De delectatione.</i>	Cap. 25.
<i>De consensu.</i>	Cap. 26.
<i>Quales debent esse viri continentes.</i>	Cap. 27.
<i>De circumstantiis luxuria.</i>	Cap. 28.
	De

<i>De visu incauto.</i>	Cap. 29.
<i>De contactu.</i>	Cap. 30.
<i>De amplexibus, & osculis.</i>	Cap. 31.
<i>De remedijs luxuria.</i>	Cap. 32.
<i>De resistentibus contra luxuriam.</i>	Cap. 33.
<i>De Humilitate.</i>	Cap. 34.
<i>De his per quæ humilitas habetur.</i>	Cap. 35.
<i>De signis humilitatis.</i>	Cap. 36.
<i>Quomodo quis humilis debet apparere.</i>	Cap. 37.
<i>De nocumentis Superbia.</i>	Cap. 38.
<i>De conuersatione humilitatis.</i>	Cap. 39.
<i>De Patientia.</i>	Cap. 40.
<i>De utilitate patientiæ.</i>	Cap. 41.
<i>Qualis debet esse vera patientia.</i>	Cap. 42.
<i>De malis impatientia.</i>	Cap. 43.
<i>Quod in quibusdam patientia deformatur.</i>	Cap. 44.
<i>Qualiter patientia acquiritur.</i>	Cap. 45.
<i>De ordinatione hominis quo ad Deum.</i>	Cap. 46.
<i>De ordinatione hominis quo ad seipsum.</i>	Cap. 47.
<i>De ordinatione hominis quo ad proximum.</i>	Cap. 48.
<i>Quod prælati debent esse speculum subditorum.</i>	Cap. 49.
<i>De ordinatione hominis in se quo ad dispositionem cordis.</i>	Cap. 50.
<i>De ordinatione hominis in se quo ad dispositionem oris.</i>	Cap. 51.
<i>De exercitio bonorum operum.</i>	Cap. 52.
<i>De exercitijs virtutum.</i>	Cap. 53.
<i>De temperantia seruanda in cibo, & potu.</i>	Cap. 54.
<i>De venialibus vitandis.</i>	Cap. 55.
<i>Exhortatio bona, & finis epistola Amen.</i>	Cap. 56.



REGVLAE QVAEDAM BREVISSIMÆ,
ac valdè vtilēs Reu. P. F. Hieronymi
Sauonarolæ Ferrariensis Ordinis
Prædicatorum, quę ad omnes
religiosos pertinent.



PRINCIPALE studium re-
ligiosi est conari die, noctu-
quē, vt anima sua Domino
Deo cōiuncta per orationem,
& contemplationem, conti-
numque amorem actualem.
Quod quidem nequaquam fa-
cere poterit, nisi pacem men-
tis possideat, quam possidere

non poterit, nisi se amore omnium creaturarum, ac
sui ipsius penitus spoliauerit, veneritque vsquē ad
contemptum, & odium vitæ suæ. Quæ omnia si
voluerit obtinere, necesse est, cum omni sollicitudi-
ne prius has, quas subscribemus, regulas obseruare.

¶ Primò ita debet paupertatem diligere in parti-
culari, & in communi, vt statuat firmiter in corde
suo, nullo modo se velle aliquid possidere, nec ali-
quid ad vsum habere: nisi quod ei summopere ne-
cessarium fuerit, intantum vt odio habeat omnes di-
uitias magnas, & paruas, etiam ipsa vestimenta, si-
ne quibus honestè viuere non potest: gaudeat quē
de monasterij paupertate, & doleat de eius abundā-
tia, cum desiderio vt pauperrimè viuat vsq; ad ex-
tremam necessitatem: quia verè pauper in pauper-
tate gaudet.

¶ Secundò quantum ad votum castitatis ita debet
fugere

fugere omnes carnis illecebras , vt non modo ab illicitis , sed etiam à licitis recreationibus abſtineat : ita vt numquam ex toto relaxet præconceptum rigorem , sed ſemper ſibi iratus caſtiger rationabili obſequio corpus proprium , omneſque ſenſus à delectatione cohibeat , nec ſatiſfaciat deſiderijs ſuis , ſed ſemper gaudeat flere , & lamentari , & domino decantare verſiculum illud . Reogitabo tibi omnes annos meos in amaritudine animæ meæ.

¶ Tertiò ſemper in mente habens Domini noſtri Ieſu Chriſti ſubiectionem ad matrem ſuam , & putatium patrem ſuum Ioseph , & obedientiam vſq; ad mortem , mortem autem crucis , ſtudeat cum omni conatu , & viribus ſuis ſeipſum non ſolum maioribus , ſed etiam æqualibus , minoribus , & omnibus etiam viliffimis ſeruire , & eis , vt decet ſtatum ſuū , humiliter obedire , & cum Apoſtolo dicere : cum liber eſſem , ex omnibus , omnium me ſeruum feci &c.

¶ Quartò ſtudeat ita gubernare linguam ſuam , vt non ſolum illicita non loquatur , non ſolum non otioſa uerba , aut riſum mouentia dicat , ſed etiam neceſſaria in longum non protrahat , loquaturque ſemper de omnibus cum timore , & potius deſideret audire , & doceri , quàm loqui , & alios docere : quia in multis offendimus omnes , & qui in verbo nō offendit , hic perfectus eſt vir , & diabolus in nullo ſubtilius decipit religioſum , quàm per loquacitatem , per quam ſubtrahit eum ab oratione , & contemplatione , à quibus cum fuerit ſubtractus perdit omne robur mentis ſuæ , & ita inimicus præualet faciliter contra eum , ſicut uult , & ut libet.

¶ Quintò caueat diſtractionibus , ſeu ab his , quæ ſolent animum in partes diuidere , ut ſunt curioſitates ſenſuum , & intellectus . Qui enim uolunt mul-

ta, & inutilia uidere, & audire, seu intelligere, diuidunt cor suum ad multa, & ita remanent dissipati, nec compuncti. Negotia ergo proximorum, & facta aliena adeo relinquenda sunt, ut nec uelimus minimam eorum partem intelligere. Negotia quoque conuentus officialibus ipsius penitus relinquatur. Quidam zelo quodam indiscreto, qui non est secundum conscientiam, uolunt omnia intelligere, & inquietant seipsos, impleturque mens eorum phantasij, indignationibus, murmurationibus, & nonnunquam inuidia, & ambitione, ac detractioe contra prælatum, & alios confratres suos. Si nullum habes officium in conuentu, gaude, quia pacem magis acquires. Si habes, humiliter ea, quæ ad ipsum pertinent, & sine querela exequaris. Ne desideres habere aliquod officium, sed sta in pace, & libentius suscipe officia uilia, quàm honorifica. Et breuiter ab omnibus, quæ te ab intentione contemplationis diuinæ, & pacis, quantum possibile tibi est, salua obedientia, & charitate, cauere debes cum omni sollicitudine, aliter pacem non inuenies.

¶ Sextò debet fugere hominum conuersationem, præsertim sæcularium, & dissolutorum fratrum, porrius autem mulierum, & consanguineorum, & solitudinem amare, nec unquam in publicum apparere, nisi pro necessaria, honesta, uel utili causa, & semper breuiter se expedire. Neminem tamen propter hoc religiosus iudicet, aut contemnat, sed seipsum semper despiciens tanquam uilem in oculis proprijs indignum arbitretur habitu religionis, & aliorum fratrum conuersatione.

¶ Septimò cum omni, & summa diligentia, & sollicitudine uacare debet orationi, & contemplationi: ita ut sapientissimè eleuet mentem suam ad Deum, & oret

& oret cum breuitate tam in Ecclesia, quàm in mē-
sa, tam in domo, quàm in theatro, tam sedendo, q̄
ambulando, & frequentissimè dicat uersiculum il-
lud: Deus in adiutorium meum intende: Domine
ad adiuuandum me festina. Item dicat, Misericor-
dia tua Domine subsequetur me: ut inhabitem in
domo Domini omnibus diebus uitæ meæ. Sic enim
faciens obtinebit mentis quietem, & adeo coniun-
getur Deo, q̄ nihil aliud poterit cogitare, nec dili-
gere, & erit quodammodo in hac uita beatus.

¶ Qui ergo seruauerit istas septem regulas, reple-
bitur septem donis Spiritus sancti: à quo Spiritu
sancto anima eius acta gustabit ea, quæ nec oculus
uidit, nec auris audiuit, nec in cor hominis ascen-
dit, quæ præparauit Deus diligentibus se, & labores
religionis pro nihilo reputabit, & uidebuntur dies
pauci præ amoris magnitudine.

¶ Religiosi autem, qui ista non considerant, sed
ambulant sine consideratione finis proprii efficiun-
tur tepidi, inquieti, murmuratores, ambitiosi, ira-
cundi, auari, loquaces, sensuales, hystriones, & du-
riores, quàm sæculares ad penitentiam; & nisi Deus
per suam misericordiam eos reuocet, aut conseruet,
in alia labuntur præcipitia, à quibus nunquam po-
stea liberantur: quia ut dicit sanctus Thomas diui-
nus doctor in secunda secundæ: Religiosi ex mali-
tia peccantes efficiuntur pessimi, & incorrigibiles,
& sanctus Aug. dicit, q̄ sicut nunquam expertus est
meliores, quàm illos, qui in monasterio profecerunt:
ita nec deteriores, q̄ qui in monasterio defecerunt.

Conemur igitur nos fratres talem bonitatē in mo-
nasterio accipere, ut simus meliores homines mūdi,
& magnam coronam acquiramus in cœlis, ubi re-
gnat benedictus Deus in sæcula sæculorum. Amen.

RELIGIONES

VIVENTES SVB REGVLA

S. P. AVGVSTINI,

*Ab Ecclesia approbatæ, & confirmatæ, plusquàm
viginouem reperiuntur; vt meritò ma-
gnus Pater ab omnibus appelletur.*

- 1 **R**IMA, & præcipua fuit religio, sed congregatio clericorū in ciuitate Hipponensi ab ipso S. Augustino instituta, & ordinata, teste D. Possidio in vita B. Augustini cap. 5. & 25. circa Annos Dñi 394. Qui quidem clerici postea canonici vocati fuerunt: Post illos clericos, seu canonicos à B. Augustino institutos fuerunt & aliæ congregationes canonicorum ab alijs viris institutæ, & ordinatæ sub Regula S. August.
- 2 Quarū prima fuit ordinata in Gallia in ciuitate Bellouacensi à S. Iuone, Anno Domini 1080.
- 3 Secunda fuit in Gallia, Germania, & in Italia à S. Rafo sub Regula S. Augustini, vt testatur D. Abbas Ioachinus super Apocalip. Anno Domini 1100.
- 4 Tertia fuit congregatio Canonicorum præmonstratensium, in Gallia, Germania, & Hispania, ordinata à S. Nothberto sub Regula S. Augustini circa Annos Domini 1120.
- 5 Quarta congregatio Canonicorum S. Saluatoris in Italia propè Senas institutionem, ac ordinationem habens in loco, qui dicitur Scopeto; à quibz us-

quibusdam Patribus Heremitarum Ordinis S. Augustini circa Annos Domini 1876. sub regula almi Patris S. Augustini.

- 6 Ultima, & nouissima in Italia est congregatio Canonicorum Regularium, propè Lucam ciuitatem in Ecclesia S. Mariæ de frisonaria institutionem, ac ordinationem, nec non reformationem habens à quodam Venerabili Patre S. Dominici, F. Iacobo Bergomensi sub Regula S. Augustini circa Annos Domini 1407. prout legitur in eius Cronicis libr.3.
- 7 Reperitur etiam in Italia & alia parua congregatio Canonicorum Regularium, quæ dicitur Sancti Spiritus propè Venetias institutionem, ac ordinationum habens ab eccelenti Doctore Fr. Gabriele Spoletano Ordinis Heremitarum S. Augustini circa Annos Domini 1415. sub Regula S. Augustini.
- 8 Est & congregatio Clericorum Regularium, seu Canonicorum Sancti Georgij in Alga, propè Venetias institutionem habens à B. Laurentio Iustiniano Veneto Patriarcha primo Venetorū circa annos Domini 1408. sub Regula Sancti Augustini.
- 9 Congregatio Sanctæ Trinitatis, suæ de Redemptione in Hispania ordinata à quodam venerabili Patre Fratre Iohanne circa Annos Dñi 1197. sub Regula Sancti Augustini.
- 10 Congregatio S. Ambrosij ab ipso in ciuitate Mediolanensi instituta Anno Dñi 385. de qua B. Augustinus 8. lib. Confessionum cap. 6. loquitur, Nouissimè verò ab Eugenio Quarto Summo Pontifice approbata, & confirmata fuit sub Regula S. Augustini Anno Dñi 1431.

- 11 Ordo, vel Religio Fratrum Prædicatorum à B. Dominico instituta, & ab Honorio Tertio approbata, & confirmata sub Regula S. August. Anno Domini 1216.
- 12 Ordo Heremitarum multis Heremitarum Congregationibus adiunctis amplificatur, & confirmatur ab Innocentio Quarto, sub Regula Sancti Augustini, & inter mendicantes connumeratur, circa Annum Dñi 1240. vt scribit D. Antoninus 2. part. Hist. tit. vlt. cap. vlt. §. 3. & Onophrius Panuinius in suis Cronicis, licet ordo Heremitarum S. August. multo ante Prædicatores institutus sit, vt apparet in cap. Religionum, de Religione Dom. lib. 6.
- 13 Ordo Fratrum Cruciferorum à S. Ciriaco ordinatus, Anno Dñi 364. postea sub Innocentio Tertio fuit approbatus, & confirmatus sub Regula Sancti Augustini Anno Dñi 1215. & ab Innocentio Quarto, & Pio Secundo reformatus Anno Domini 1458.
- 14 Ordo Sanctæ Mariæ Seruorum à B. Philippo Florentino institutus, circa Annos Domini 1285. sub regula sancti Augustini à Benedicto Nono Summo Pontifice approbatus fuit.
- 15 Ordo Sanctæ Brigidæ ab ipsa institutus, & ordinatus Anno Domini 1367. sub Regula Sancti Augustini, & à Gregorio Nono fuit approbatus, & confirmatus Anno Domini 1376.
- 16 Ordo, seu Congregatio Sancti Pauli primi Heremitarum ortum habuit in Germania à B. Eusebio Anno Dñi 1215. & à Iohanne XXII. fuit approbatus sub Regula Sancti Augustini circa Annos Domini 1817.
- 17 Ordo S. Antonij Ordinatus, & approbatus An-

no Domini 1200. sub Regula Sancti Augusti
ab Honorio Tertio.

- 18 Ordo Iesuatorum, à B. Iohanne Columbino Sen-
nensi institutus, & approbatus ab Urbano V.
anno Domini 1376. sub regula S. Augustini.
- 19 Ordo vitæ communis à B. Gherardo Theutoni-
co institutus, & à Gregorio XI. approbatus
anno Domini 1376. sub Regula S. Augustini.
- 20 Ordo S. Hieronymi apud Fesulas à B. Carolo
Florëtino initium habuit anno Domini 1406.
& à Gregorio Duodecimo approbatus sub Re-
gula S. Augustini.
- 21 Ordo Heremitarum S. Hieronymi à B. Petro Pi-
sano institutus anno Domini 1380. Nouissimè
verò reformatus à Pio Quinto sub Regula san-
cti Augustini.
- 22 Ordo Apostolorum à B. Barnaba in Oriente or-
dinatus; postea in diuersas orbis partes diuisus
nouissimè ab Innocentio Octauo vnitus, &
approbatus sub Regula S. Augustini anno Do-
mini 1484.
- 23 Cōgregatio Clericorum Regularium Somaschæ
tituli sancti Maioli Papiæ, cuius Institutor fuit
D. Hieronymus Emilianus Nob. Patricius Ve-
netus anno 1528. quæ postea in Religiones
alias connumerata à SS. D. Pio Quinto Ordini
Prædicatorum, & ab alijs summis Pontifi-
cibus confirmata fuit.
- 24 Ordo militum S. Iohannis, seu equitum Hiero-
solymitanorum, seu Rhodiorum, seu Meliten-
sium Hierosolyminis initium habuit à B. Ghe-
rardo anno Domini 1080. approbatus, & con-
firmatus à multis summis Pontificibus Roma-
nis sub Regula S. Augustini.

- 25 Ordo militum, seu equitum S. Lazari Hierosolymis primus omnium ordinatus, & institutus circa annos Domini 360. postea à sancta sede Apostolica sub Regula sancti Augustini fuit approbatus, & confirmatus, & ab Alexandro Septimo multis privilegijs, & honoribus decoratus, atq; à Pio Quarto amplificatus.
- 26 Ordo equitum sancti Iacobi in Hispania institutus, & ordinatus à D. Petro Bernardino circa annos Domini 1170. ab Alexandro Tertio approbatus, & confirmatus sub Regula S. August.
- 27 Ordo equitum sanctæ Mariæ in Hispania ordinatus anno Domini 1212. & à Gregorio Nono approbatus, & confirmatus fuit anno Domini 1230. sub Regula S. Augustini.
- 28 Ordo equitum Theutonicorum in Germania, ordinatus circa annos Domini 1220. & approbatus sub Regula S. Augustini.
- 29 Ordo militum, seu equitum Iesu Christi, in Lusitania (sic vocatus) initium, institutionem, & approbationem habuit à D. Iohanne XXII. Pontifice maximo sub Regula S. Augustini anno Domini 1320.
- Sunt & alij complures ordines, vel congregationes Religiosorum, in Italia, Germania, Gallia, & Hispania, tam Canonicorum quàm Militum, seu Equitum viuentes sub Regula S. Patris Augustini.

L A V S D E O.

C O M I, Apud Hieronymum Froviam.

Superiorum Mandato. M. D C I I.





I. L.
I N C I P I T
E X P O S I T I O
H V G O N I S
D E S. V I C T O R E

CANONICI REGVLARIS.
S V P E R R E G V L A M
Beati Augustini Episcopi.



¶ D E C H A R I T A T E D E I,
& proximi, de unitate cordium, & com-
munitate rerum. Cap. 1.



ÆC præcepta, quæ subscri-
pta sunt, ideo Regula appel-
lantur; quia videlicet in eis
nobis rectè viuendi norma
exprimitur; Regula autem
dicitur, eo quòd rectè regat,
vel quòd rectè doceat. Et
quod nos dicimus regula,
Græci Canon appellant. Vn-
de etiam græco nomine Canonici, idest Regulares
appellati sunt hi, que in monasterijs constituti iux-
ta regularia præcepta sanctorum patrum canonicè,
atq; Apostolicè viuunt, quibus dicitur.

A

¶ Hæc

¶ *Hæc sunt, quæ, ut obseruetis, præcipimas, in monasterio constituti.*

¶ Ad hæc vobis diuina præcepta leguntur, quatenus lecta intelligantur, & impleantur. Metuenda illa sententia, qua dicitur. Seruus, qui scit voluntatem Domini sui, & non facit, plagis vapulabit multis. Hinc Paulus ait, Non enim auditores legis, sed factores iustificabuntur. Audiamus ergo sacra præcepta pij Domini, & memores simus mandatorum ipsius ad faciendum ea. Quia sicut dicit beatus Iacobus. Si quis in lege perfectè perspexerit libertatis, & permanserit in ea, non auditor obliuiosus factus; sed factor operis, hic beatus in facto suo erit. Et Dominus in Euangelio. Beati qui audiunt verbum Dei, & custodiunt illud. Igitur quæ præcipiuntur nobis in monasterio constitutis, humiliter attendamus.

¶ *Primum inquit, propter quod in vnum estis congregati, ut vnanimes habitetis in domo, & sit vobis anima vna, & cor vnum in Deo.*

¶ Primo nobis admonitis fit de vnitæte, & concordia, & tali concordia, quæ in Deo sit. Nam concordia ad faciendum peccatum mala est. Concordia vero ad faciendum bonum, & sectandam iusticiam, & seruiendum Deo bona est. Hoc est (propter quod in vnum sumus congregati) scilicet, ut in seruitio diuino vnum spiritum, & vnū animum omnes habeamus; & ideo præcipitur, ut vnanimes habitemus in domo, & sit nobis anima vna, & cor vnum in Deo. Oportet enim, si in vnum congregati sumus corporaliter, ut similiter habitemus, & spiritualiter. Non enim prodest, si nos continet vna domus, & separat diuersa voluntas; plus enim attendit Deus vnitatem animi, quam loci. Ecce in

una domo sumus plures homines, diuersi mores, diuersa corda, diuersæ animæ. Hæc omnia debet coniungere in unum una intentio, & unus amor in Deum. Debemus ergo in hoc esse unius animi, & unius uoluntatis, ut seruiamus Deo, & diligamus Deum ex toto corde. Qui sic haberi potest, si frater conueniens ad monasterium incipit se spoliare propria uoluntate, atq; illum imitari, qui ait. Non ueni facere uoluntatem meam. Et iterum. Pater non sicut ego uolo, sed sicut tu. Hoc est enim, quod maximè adducit concordiam, si quisq; non suam, sed alterius uoluntatem facere studeat in bono. Et hoc est magnæ humilitatis indicium, inde generatur obedientia, crescit charitas, & pax, atq; iustitia, & Ecclesiæ uirtutes, quòd si uolo facere uoluntatem meam; & iste suam; & ille suam, fiunt diuisiones, oriuntur lites, iræ quoq; & rixæ, quæ sunt opera carnis. Et sicut ait Apostolus, qui talia agunt, regnum Dei non consequentur. Sunt quidam in congregatione obstinati in suo sensu, sapientes in oculis suis, non quòd in animo conceperint hoc, quod quasi ex ratione defendunt, nec se alijs, sed alios sibi applicari contendunt, & si uiderint sibi nõ obtemperari, statim cõmouentur, & perturbantur. Tales solent esse rebelles mandatis seniorum, plurimumq; in eis regnat passio inobedientiæ, & impatientiæ; isti non sunt idonei ad concordiam. Nam iuxta Apostoli vocẽ euauerunt in cogitationibus suis: & obscuratum est insipiens cor eorum; dicentes enim se esse sapientes, stulti facti sunt; Magna quippè obscuritas cordis est superbia, & valde stulta sapientia est alijs se uelle præferre; contra quos idem Apostolus ait. Si quis uidetur inter uos sapiens esse, stultus fiat, ne sit sapiens. Stultus enim

sapiens est; & secundum Deum magna sapientia est omnibus se iudicare inferiorem. Inde scriptum est. Quanto maior es, tãto te humilia in omnibus. Hinc Dominus discipulos suos, inter quos contentio erat, quis eorum videretur esse maior, statim ad humilitatis concordiam reuocat dicens. Qui maior est vestrum, erit ipse vester seruus; Et ipse filius hominis non venit ministrari, sed ministrare, & animã suam dare redemptionem pro multis. Ergo vnanimis habitemus in domo. Bonum est enim, & iocundum Deo habitare fratres in vnum. Nec tam placent ei nostra ieiunia, nostræ orationes, quàm concordia. Ideo dicit in Euangelio. Vade prius reconciliari fratri tuo, & tunc veniens offeres munus tuum. Ex quibus verbis patet; quia qui concordiam non habet, omnipotenti Deo sacrificium offerre non valet. Pénfere ergo debemus quanta sit apud Deum concordie virtus, sine qua non placerent ipsa sacrificia, quibus delentur peccata; & sciendum est, quia cum ad conuersionem venimus, contra diabolum certamen assumimus. Nihil est autem, quod ipse tantum timeat, quantum charitatis vnitatem. Nam si distribuimus totum, quod habemus propter Deũ, hoc diabolus non timet, quia ipse nihil possidet, si ieiunamus, hoc ipse non metuit, quia eibum non sumit, si vigilamus, inde non terretur, quia ipse somno non vitur; sed si charitate coniungimur, inde vehementer expauescit, quia hoc tenemus in terra, quod ipse in cœlo contempsit seruare. Hinc est, q̃ sancta Ecclesia terribilis esse, vt castrorum acies ordinata, describitur; quia sicut hostes timent, quando aciem castrorum bene ordinatam, & coniunctam ad bellum vident, ita nimirum diabolus expauescit, quando spirituales viros virtutum armis accinctos

In vnitate concordiae viuere conspicit, victusq; vehementer dolet, cum eos per discordiam diuidere, & penetrare non valet. Hinc de Domino scriptum est. Factus est in pace locus eius. Ibi confregit potentias, arcum, scutum, gladiū, & bellum. Ex quibus verbis patet, quia omnia diabolica arma frangit concordia.

¶ Quod sit nobis anima vna, & cor vñ in Domino.

¶ Hæc sunt primitiæ Spiritus, quas ex primordio nostræ conuersionis offerre omnipotenti Deo debemus, sicut ipsa sapientia præcepit dicens. Fili da mihi cor tuum; primus enim corde, & voluntate trahimur ad Deum, ergo si corpore separamur à sæculo, corde, & anima iungamur Deo, vt possimus veraciter dicere. Mihi autem adhærere Deo bonum est. Nam qui adhæret Deo, vnus spiritus est. Adhæreamus ergo ei, vt simus fortes per ipsum, vt simus vnum in ipso, & beati dicamur cum ipso. Adhæsit anima mea post te. Charitas separat nos à mundo, & ipsa nos coniungit Deo. Sic erit nobis anima vna, & vnum cor in Deo, si ex toto corde, & ex tota anima diligamus Deum. Deus enim charitas est, & qui manet in charitate, in Deo manet, & Deus in eo; Et quia charitas non quærit, quæ suæ sunt, rectè subiungit.

¶ Et non dicatis aliquid proprium; sed sint vobis omnia communia.

¶ Non enim debemus aliquid habere proprium, aut quicquàm dicere meum, sed nostrum, vt dicatur nostra cappa, nostra tunica, nostra domus, & in cæteris similiter. Omnia enim in communi debemus habere, & omnia communi nomine appellare.

¶ Sed in hoc pensandum est, quanta differentia sit inter carnales fratres, & spirituales. Nā illi quod

commune est eis, diuidunt, isti, quodd diuifum erat, in communi ponunt. Ibi quisq;, quod suum est, quærit. Isti non, quæ sua sunt, quærunt, sed quæ Iesu Christi. Plus ergo valet ista propinquitas, quâ illa, quia illa deficit, ista crescit, illa habet diuifionem, ista unitatem, illa transit cum sæculo; ista permanet, cum futuro. Ad hoc enim simul modo in ista domo viuimus, vt postmodum in cœlesti regno maneamus. Filij Dei sumus ait Apostolus, sed nondum apparuit, quid erimus. Scimus autem, cum apparuerit, similes ei erimus, quoniam videbimus eum, sicuti est. Et iterum. Non habemus hic manentem ciuitatem, sed futuram inquirimus, ergo non debemus habere propria, licet sint nobis omnia communia. Partes sibi faciunt homines in hoc sæculo, alius argentum, & aurum; alij domos, & familias; alius nomen grande, potentiam & gloriâ; iste hoc; alius aliud; diuersi diuerso modo; pars vero piorum est ipse Deus, & nos si volumus habere talem potestatem, talem hæreditatem, vt est Dominus, tales nos oportet exhibere, vt digni simus eum possidere, & possideri ab ipso. Ergo si volumus in hæreditatem possidere Deum, nihil debemus habere extra Deum. Nam nimis est auarus, cui non sufficit Deus, quod si quippiam aliquid quærimus, verbi gratia aurum, argentum, possessiones, cū istis partibus pars fieri Dominus dedignatur. Verba sunt beati Hierony. Ego inquit non accipio hæreditatem inter cæteras tribus, sed quasi sacerdos, & leuita viuo decimis, & altari seruiens altaris oblatione sustentor, habens victum, & vestitū his contentus ero. Beati enim pauperes spiritu, qm̃ ipsorū est regnū cœlorum. Et quia quamdiu hic viuimus, corporali necessitate indigemus, rectè subiungitur.

¶ *Et distribuatur unicuique vestrum a prapósito vestro victus, & vestimentum.*

¶ Sic enim Dominus voluit ordinari ecclesias suas, vt alij vacarent spiritualibus, alij eis temporalia ministrarent, & ideo alios voluit esse prapósitos, alios subditos. Prapósitorum officium est subditis corporalia ministrare: Subditorum ministerium est spiritualibus studijs insistere, lectioni, orationi; contemplationi vacare in psalmis, hymnis, & canticis spiritualibus cœlesti Domino de seruire. Tantò ergo opus est, vt circa se sollicitius viuant, quantò eos aliena cura non implicat. Constitutum est a Domino, vt qui altari seruiunt, de altari viuant; dignus est operarius, sicut ipse ait, mercede sua. Et ideo si viuimus de annona Christi, & iustum est, ut laboremus in seruitio Christi, & tunc dignè mercedem accipimus, si prius boni operarij fuerimus. Dicit enim Apostolus Paulus. Qui non vult operari, non manducet; quòd si non laboramus, & manducamus, tanto maioris criminis efficiamur rei, quanto Dei beneficia suscipimus indigni. Oportet ergo, ut seruiamus ei, a quo pascimur, si sine periculo animæ uolumus sumere hoc, quod distribuitur, & tanto plus debemus in eis esse solliciti, quanto ea percipimus sine magno labore. Nam quid mirum, si hi, qui temporalibus occupantur, minus studiose, & religiose uiuunt, si frequenter in cogitationibus, & sermonibus, atquè actionibus suis offendunt, usus enim sæculi hominem ad peccatum etiam quandoquè inuitum trahit. Hi uero, quibus & cura mundi, & occasio peccandi deest, quanto minus religiose uiuunt; tanto supernū iudicem offendunt, nec sine graui periculo animæ, & in minimis negligentijs offendunt. Pensemus

ergo, ad quid nobis uictus, & tegumentum tribuitur, ut sit totum desiderium nostrum primum quæ-
rere regnum Dei, & iustitiam eius, propter quod
hæc omnia adiunguntur nobis. Qualiter autem di-
stribuendum sit, ostenditur, cum subinfertur.

¶ *Non aequaliter omnibus distribuatur, quia non
aqualiter valetis omnes; sed potius unicuiquè, prout
cuiquè opus fuerit.*

Et hoc auctoritate Apostolica roborat dicens.

¶ *Sic enim legitis in actibus Apostolorum, quia
erant illis omnia communia, & distribuebatur uni-
cuiquè, sicut unicuiquè opus erat.*

¶ Hoc non est ita intelligendum, ut unicuiquè
quod opus erat, sic abundanter distribueretur, q̃
non haberent indigentiam. Cum enim scriptum
sit, quòd inter eos nullus egens erat. Scriptum etiã
legimus esse de ipsis Apostolis, quòd seruiebant
Deo in fame, & siti, in frigore, & nuditate, ex qui-
bus uerbis colligendum est, quòd multi corpore
indigent, non animo. Sed qui semetipsos abnegat
propter Christum, animi uirtute ipsam superant
naturam. Dei namquè dilectio, quæ fortis est, ut
mors, non solum illicita desideria, uerum etiam ip-
sos corporales, & naturales extinguit affectus. In
primitiua quippe ecclesia tanta erat gratiæ spiritua-
lis abundantia, ut non solum modico contenti es-
sent, sed hoc ipsum, quod nihil habebant, pro sum-
mis delicijs reputarent. Vnde Apostolus ait. Ni-
hil habentes, & omnia possidentes. Hinc etiam
quidam uir sanctus ait. Sufficiebat nobis pauper-
tas nostra, ut diuitiæ computarent. Item ait Apo-
stolus. Magnus inquit quæstus est pietas cum suffi-
cientia, habentes, inquit, uictum, & uestitum, his
contenti simus. In huiusmodi ergo non debemus

atten-

attendere uoluntatem carnis, sed ualitudinem naturæ. Plus enim appetit carnalis uoluntas, quam necessitas. Quamobrem in eo, quod dicitur, (¶ unicuiquè, quod opus est, tribuatur.) Iste modus seruandus est, quatenus sic nutriatur caro, ut feruiat. Et iterum sic reprimatur, ut non superbiat. Sic seruetur necessitas naturæ, ut abscindatur superfluitas concupiscentiæ.

¶ *Qui autem aliquid habebant in saculo, quando ingressi fuerint monasterium, libenter uelint illud esse commune.*

¶ Hoc fecerunt primitiuæ ecclesiæ fratres; dignum enim eis uidebatur, ut qui communem habebant gratiam, communem haberent & substantiam, & quibus vnus erat spiritus, vnus esset & sumptus. Bene autem additum est hoc uerbum libenter, quia hilarem datorem diligit Deus. Libenter debemus terrena dare, ut possimus cœlestia comparare. Regnum enim cœlorum tantum ualeat, quantum habes. Nihil uilius, cum emitur, nihil charius, cum possidetur. Duo sunt quæ relinqui oportet propter Deum, facultatem, scilicet possidendi, & uoluntatem habendi. Hinc est, quod dominus ait in Euangelio. Qui non renunciat omnibus, quæ possidet, non potest meus esse discipulus. Et iterum. Qui uult uenire post me, abneget semet ipsum. Illud pertinet ad substantiam: hoc ad uoluntatem; non enim sufficit exteriorem relinquere substantiam, nisi interiorem abscindamus concupiscentiam. Vnde & subditur.

¶ *Qui autem non habebant, non ea quarant in monasterio, quæ nec foris habere potuerunt.*

¶ Etiam illi, qui nichil habebant foris, habent intus, quod relinquere possunt propter Deum scilicet

cer voluntatem habendi. Vnde scriptum est. Non concupisces. Plus enim attendit affectum Deus; quàm sensum. Hinc per sapientem dicitur. Fili da mihi cor tuum. Quod fieri non potest, nisi prius carnalis appetitus refecetur. ¶ Primum ergo iubemur habita deferere, deinde terrena non querere, vt postea liberius ad cœlestia possimus anhelare. Et ne videretur pauperibus sæculi, qui conuertuntur, necessaria non debere ministrari: quia nichil in monasterio querere præcipiuntur, subiunctum est.

¶ *Sed tamen eorum infirmitati, quod opus est, tribuatur: etiam si paupertas eorum, quando foris erant nec ipsa necessaria poterant inuenire.*

¶ Siue enim diuites sint, siue pauperes, siue nobiles, siue ignobiles quicumquẽ accedunt ad seruitium Christi, iustum est, vt viuant de annona Christi. Dignus est enim operarius mercede sua.

¶ *Tamen non ideo putent se esse fœlices; quia inueniunt victum, & tegumentum, quale foris inuenire non potuerunt.*

¶ Multi enim ad conuersionem veniunt non tam propter animæ salutem, quàm propter corporis necessitatem, qui non Deum colunt, sed ventrem suũ, de quibus ait Apostolus. Quorum Deus venter est. Talibus Dominus dicit in Euangelio. Amen dico vobis; quæritis me, non quia vidistis signa; sed quia manducaastis ex panibus meis. Horum talium tota est intentio, atquẽ fœlicitas, vt bene pascantur, bene vestiantur, & bene sit eis temporaliter. Et quia terrena appetunt, cœlestibus priuantur. Receperunt enim (sicut Dominus ait) mercedem suã. Vnde summopere cauendum est, ne temporalibus adhæreamus bonis. Ideo Psal. nos admonet dicẽs. Diuitiæ si affluant, nolite cor apponere. Terrena quidem

quidem nobis in usu esse debent, cœlestia autem in desiderio. Est enim quædam admirabilis, & magna multitudo dulcedinis Dei, quam habet in se, de qua dictum est. Quia oculus non vidit, nec auris audiuit, nec in cor hominis ascendit, quæ præparauit Deus diligentibus se. Vnde scriptum est. Satiabor, cum apparuerit gloria tua: Illa ergo facies debet esse nostra fœlicitas.

DE HUMILITATE.

Cap. 11.

Nec erigant cervicem, quia sociantur eis, ad quos foris accedere non audebant; sed sursum cor habeant, & terrena vana non querant; ne incipiant monasteria diuitibus esse vtilia, non pauperibus, si diuites illic humiliantur, & pauperes instantur.

¶ Cervicem erigere signum superbiæ est. Si superbis angelis non fuit vtile cœlum, constat quia superbis hominibus non erit vtile monasterium. Et si sanctus sit locus, si sanctus sit habitus, si sancta opera videantur, totum ex vitio superbiæ inutile habebitur. Superbia enim casum habet. Ideo sanctus David orat ad Dominum, vt non veniat ei pes superbiæ; quia ibi ceciderunt, qui operantur iniquitatem, expulsi sunt; nec potuerunt stare, contra quod vtilia sunt humilibus monasteria. Ipsi enim sunt docibiles Dei, sicut scriptum est. Docebit mites vias suas. Item quæ qui emittit fontes in conuallibus, id est gratiam suam præstat humilibus. Ipsi quidem bona, quæ faciunt, non amittunt; quia custodem virtutum humilitatē non deserunt, & quia iuxta euangelicum præceptum recumbunt in nouissimo loco, & secundum Prophetam eligunt abiecti
esse

esse in Domo Domini. Ideo ab ipso merentur exaudiri, sicut scriptum est. Omnis, qui se exaltat, humiliabitur, & qui se humiliat, exaltabitur. Et iterum. Superbis Deus resistit, humilibus autem dat gratiam.

¶ *Rursus etiam illi, qui aliquid videbantur esse in saculo, non habeant fastidio fratres suos, qui ad illam sanctam societatem ex paupertate venerunt. Magis autem studeant non de parentum diuitum dignitate, sed de pauperum fratrum societate gloriari.*

¶ Summopere cauere debent fratres, qui ad sanctam societatem, & communem vitam venerunt, ut non habeant alter alterum fastidio, quamuis eoditior sit, siue nobilior, siue sapientior; quoniam sicut dicit Apostolus, infirma mundi elegit Deus, & ignobilia, & contemptibilia, ut non gloriatur omnis caro in conspectu eius, scilicet neque potens in potentia sua, neque sapiens in sapientia sua, neque diues indiuitijs suis. Non enim est personarum acceptio apud Deum. Nam idem Dominus diues in omnes, qui inuocant eum. Bene autem non de dignitate diuitum parentum, sed de societate pauperum fratrum precipimur gloriari, quoniam ipse, qui diues est in gloria sua, pauper factus est pro nobis. Non diuitibus, sed pauperibus dignatus est sociari; ut & nos pauperes simus propter ipsum, quoniam pauperibus promissum est regnum celorum. Gloriari quidem de diuitijs pertinet ad vanitatem mundi, de paupertate vero gloriari pertinet ad beatitudinem.

¶ *Nec extollantur, si communi vita aliquid de suis facultatibus contulerint, nec de suis diuitijs magis superbiant; quia eas monasterio partiuntur, quam si eis in saculo fruerentur.*

¶ Ex præcedenti sententia, & ea, quæ sequitur, nobis duo genera superbiæ designantur. Vnum carnale, aliud spirituale. Nam pauperes fastidire, & de nobilitate gloriari ad superbiam pertinet, quæ inter homines sæculares frequenter solet euenire. De operibus misericordiæ se extollere superbia spiritualis, quæ solet etiam spirituales corrumpere. Magis autem timenda est superbia spiritualis, quàm carnalis; quia se extollere de bono opere, ut de virtute ab alto cadere est; & quanto altior est ascensus, tanto periculosior est casus. Dominus dicit in Euangelio. Cum facis eleemosynam nesciat sinistra tua, quid faciat dextera tua; vt sit eleemosyna in abscondito, & ille qui videt in abscondito, reddet tibi. Per dexteram recta operatio, per sinistram fauor mundi, atquè elatio designatur, ex his verbis admonemur, vt recta, quæ agimus, abscondere ab elatione studeamus, alioquin mercedem non habebimus apud patrem nostrum: Deinde ostendit quantum sit vitium superbiæ, cum subiungit.

¶ *Alia quippe quacunque iniquitas in malis operibus exercetur, vt fiant: superbia vero, etiam bonis operibus insidiatur, vt pereant.*

¶ Ex hoc apparet, quia cæteris vitijs maior est superbia; vitia enim, & virtutes exterminant humanam mentem. Superbia Deo, & hominibus odibilis est, de qua scriptum est. Initium omnis peccati superbia. Prima est in peccando, vltima remanet in conflictu. Nam cum seruus Dei cætera vitia superauit, & iam ad virtutum alta conscenderit, adhuc habet pugnam contra superbiam, quàm nisi expugnauerit, in cæteris frustra laborauit. Vnde dicitur. Cum poteris subijci, non debes dice-

re.vici. Nam quis uincatur, vel vincat, sine probatur. Præmia victorum pendent in fine laborum. Vt scriptura sonat, finis, non pugna coronat. Tunc bene pugnabis, cum cuncta subacta putabis. Quæ magis infestat, vincenda superbia restat. Quæ nisi vincatur, promissa corona negatur: Prohdolor, his telis superatur sæpe fidelis. Cum ergo foris bona agimus, intus cor ab elatione custodiamus, quia nulla Deo placet cum superbia operatio, vnde scriptura nos admonet dicens. Omni custodia custodi cor tuum; quia mora, & vita ab ipso procedit.

¶ *Et quid prodest dispergendo dare pauperibus, & pauperem fieri: cum anima misera efficitur superbior diuitias contemnendo, quàm fuerat possidendo.*

¶ Non prodest nobis nostra relinquere; nisi relinquamus & nos. Non enim dicit Dominus. Beati pauperes rebus, sed beati pauperes spiritu: quoniã ipsorum est regnum cælorum. De contemptu rerum quisquæ debet esse humilior, non superbior, & melius esset, vt eas in sæculo retineret, quàm sic relinqueret, vt inde in monasterio superbi- ret. Sicut ergo illa anima est beata, quæ sua propter dominum diuidit, vt humilietur, ita est illa misera, quæ inde extellitur. Infelix perfectio est, qui per iter virtutum tendit ad vitia; & vnde præmium habere debuit, inde tormentum incurrit. Omnis quippe superbus tanto in imo est, quanto in altum se erigit, tantoquæ profundius labitur, quanto excelsius eleuatur. Resecatis quibusdam vitijs ad vnanimitatem redit, quam primo commendauit dicens.

¶ *Omnes ergo vnanimiter, & concorditer viuite, & honorate in vobis Deum inuicem, cuius templi facti estis.*

¶ Vnanimiter uiuimus, si unum in Deo animum habea-

habeamus, quemadmodum primitiua ecclesia, cui cor erat unum, & anima una. Quod ait (unanimitè) pertinet ad uoluntatem. Quod uero subdit (concorditer) pertinet ad bonos mores. Hic est rectus ordo viuendi, primum ut sit uoluntas una; deinde concors & uita. Frater qui uult concorditer uiuere, prius debet prauos mores deponere, ne sit peruersus; inordinatus, indisciplinatus, ne anxietate sua cæteros premat, deinde ita debet librare actus suos, & totam vitam suam, ut concordare possit secundum Deum, cum quibus uiuit. Sunt ergo nonnulli, qui postquam sæculum relinquunt, proprias uoluntates sequi uolunt. Et rursus sunt plerique, qui in suis actibus appetunt secularibus apparere. Ideo dictum est (Omnes ergo unanimiter, & concorditer uiuite) Deinde autem in nobis Deum inuicem honoramus, si nos inuicem propter ipsum diligamus, si præcepta eius sollicitè custodimus, & efficimur sanctum templum eius per in habitationem spiritus eius in nobis. Nostrum est Deum honorare, Dei est nos in habitare, & illustrare per gratiam.

¶ *Nec extollantur si communi uita aliquid de suis facultatibus contulerint &c. usque fruerentur.*

¶ Melius est res suas in sæculo tenere, quam eas ita in monasterio distribuere, ut uelint se inde extollere. Nam si extolluntur, deiiciuntur. Quisquis enim in eo, quod bene agit, inrumescit, eo ipso tramite; quo proficit, cadit; bona quippè actio cum elatione non eleuat, sed grauat. Benedicta est ergo illa anima, quæ potest dicere cum propheta. Domine non est exaltatum cor meum, neque elati sunt oculi mei, neque ambulauit in magnis, neque in mirabilibus super me. Fœlix planè est, qui non habet occultam superbiam in corde, nec apertam corpo-

re, nec in vultu, nec in habitu, neq; in sermone, ne q; in opere, neq; in cæteris motibus suis. Et si non ambulat in magnis, idest si se non reputat inter magnos, quod nobilis fuerit, aut potens, aut quod diuitias suas communi uitæ contulerit, aut quod in aliquo officio sit utilis; & si non ambulat in mirabilibus super se, ut de religione, & sanctitate desuper a Deo sibi collata nō uelit apparere tanquā admirabilis, atq; laudabilis: raro tamen inuenitur aliquis, qui ex his aliquam commotionem non habeat. Ut autem ista omnia superbix genera possit seruus Dei superare, semper de se debet humiliter sentire, & non exaltare animam suam: sed in humilitate reprimere, iuxta quod scriptum est. Quanto maior es, tanto magis humilia te in omnibus. Valde enim timenda sunt uerba, quæ sequuntur. (Alia enim quæcunque iniquitas &c.) Auaritia enim non exercetur, nisi in malis operibus. Luxuria non exercetur nisi in malis operibus: similiter, & cætera uitia; sola superbia etiam bonis operibus insidiatur, ut pereant. Ideo pharisæus perdidit bona sua: quæ se egisse iactanter protulit. Aug. Sunt quidam, qui de contemptu uanæ gloriæ uanius gloriantur; similiter sunt plerique, qui de contemptu diuitiarum uanius extolluntur, de quibus subiungitur.

¶ *Et quid prodest dispergendo dare pauperibus, & pauperem fieri, cum anima misera superbior efficitur diuitias contemnendo, quā fuerat possidendo.*

¶ Ac si aperte diceret. Quid prodest paupertas cum superbia? Melior est diues humilis, quā superbus pauper. Melior est peccator humilis, quā iustus elatus. Debet ergo in omnibus esse seruus Dei prouidus, & circumspectus; primum ne mala
 agat,

agat, deinde ne bona negligat, postmodum ne in bonis, quæ facit, intumescat; quia tunc sunt veraciter bona, quæ agimus, si ea semper in humilitate custodimus, & tunc veraciter sumus pauperes Christi. Et beati pauperes spiritu, quoniam ipsorum est regnum cælorum. Vnde apertè subiungitur.

¶ *Omnes ergo vnanimiter viuite, & honorate in vobis Deum inuicem, cuius templa facti estis.*

¶ Paupertas quippe, & humilitas generant charitatem. Charitas vero vnitatem nutrit, vnitas verò, & concordia efficiunt nos templum Dei. Et tunc veraciter Deum honoramus, quando vnanimiter, & concorditer viuimus. Tunc enim ostendimus, quia sumus discipuli Christi, si renemus vnitatem charitatis Christi. Hinc est, quod Dominus ait. In hoc cognoscent omnes, quia mei estis discipuli, si dilectionem habueritis ad inuicem.

¶ DE ORATIONE, ET IEIUNIO. Cap. III.

O *Rationibus instare horis, & temporibus constitutis.*

¶ Ante tempus orare est prouidentia. In tempore constituto orare est obedientia. Tempus orandi præterire est negligentia. Tanto crebrior debet esse oratio, quanto vtilior, Instanter, & ardentè orare debemus. Magna enim sunt bona, quæ promittit nobis Deus. Nam oculus non vidit, nec auris audiuit, nec in cor hominis ascendit, quæ præparauit Deus diligentibus se. Non vult bona sua quærendi, & inueniendi facilitate vilescere, preciosa, & desiderabilis merces auidum negociatorem requirit. Ideo nos Dominus hortatur in Euangelio

dicens. Petite, & dabitur vobis: quærite, & inuenietis, pulsate, & aperietur vobis. Non enim otiosis, tepidis; & negligentibus promittitur regnum Dei; sed sicut dicit scriptura. Regnum cœlorum vim patitur, & violenti rapiunt illud. Amat Deus instantiam, & importunitatem in prece. Si magna sunt bona, non debent esse desideria parua. Cum magnitudine præmiorum concordare debet magnitudo desideriorum, quòd si ad primas lachrymas non exaudit Dominus, nec sic quidem acquirendo, & pulsando desistendum est. Sed tanta potius perseverādum instantia, tantoq; obstinato clamore frequentandus est Saluator: donec impleat orantis desiderium, quòd si quisq; nostrum conscientiam suam, vel cogitatione sua, aut actione vitiorum sordē sentit inquinatam; misericordiam redemptoris continuis debet flagitare lamentis, sanctorumq; intercessionibus, & auxilia postulare, quòd si ad exemplum Cananæ mulieris in orando persistamus, fixi maneamus, aderit gratia redemptoris nostri, quæ cuncta in nobis errata corrigat, immunda sanctificet, turbulenta serenet. Fidelis enim, & iustus est, ut remittat nobis peccata nostra, ut emundet nos ab omni iniquitate; si ad illum sedula mente voce clamemus. Et ut secreta, & quiete possint orare fratres; ideo subiungitur.

¶ *In Oratorio nemo aliquid agat, nisi ad quod factum est, unde & nomen accepit, ut si etiam forte aliqui præter horas constitutas, & si eis vacat, orare voluerint, non eis sint impedimento, qui ibi aliquid agendum putauerint.*

¶ Ideo Dominus noster vendentes, & ementes eiecit de templo dicens. Domus mea domus orationis vocabitur, ut doceat in Dominica domo ni-

hil aliud esse agendum, quàm orandum. Ad hoc enim omnis ecclesia constituitur, vt in ea oretur. Ipsa enim est domus Dei, & porta cœli. Ibi peccatores reconciliantur, & iusti sanctificantur. Ibi explentur diuina mysteria, & tractantur cœlestia sacramenta. Vnde Salomon ait. Domine si conuersus fuerit populus tuus, & orauerit ad sanctuarium tuum, tu exaudies eos, & dimittes peccata eorum. Et ideo summopere cauendum est, ne aliquid in sanctuario fiat, quod aut oculos diuinæ maiestatis offendat, aut ibi orare volentes impediat. Qualiter autem orare debemus, ostenditur, cum subinfertur.

¶ *Psalms, & hymnis cum oratis Deum, hoc versetur in corde, quod profertur in voce.*

¶ Psallentium in ecclesia mens concordare debet cum voce, vt impleatur illud Apostoli. Psallam spiritu, psallam & mente. Orandi perseuerantia ita solum meretur esse fructifera, si quod ore precamur, hoc mente meditemur. Sæpe namq; oramus, & alibi mente intendimus; nec ipsum, quod dicimus, recolimus, sed illam Deus non exaudit orationem, quam ipse, qui orat, non intendit, quod instinctu diaboli sæpe fieri solet, sciens etenim utilitatem orandi, & nobis inuidens gratiam impetrandi immittit orantibus cogitationum tumultus, vt mentem ab oratione diuidat, & fructus orationis tollatur, contra cuius malitiã debemus habere mentis constantiã, vt quanto plus cogitationum turbamur impugnati simus, tãto robustius mens nostra in sui status rectitudine fixa permanear. Multũ enim iuuat ad orationis puritatem, si in omni loco, & tempore nos ab actibus illicitis temperemus; si semper ab otiosis sermonibus auditũ pariter temperemus, & linguam, sed in lege Dei ambulare, & testimo-

nia eius afuescamus toto corde scrutari. Quæcunq; sæpius agere, loqui, audire solemus, eadem necesse est, ad animum quasi solitam, propriamq; recurrant sedem.

¶ *Et nolite cantare, nisi quod legitis esse cantandum; Quod autem ita scriptum est, ut non cantetur, non cantetur.*

¶ Non enim decet, ut cantus ecclesiasticus fieri debeat secundum arbitrium diuersorum, sed firmiter seruandum est secundum scripta, & instituta maiorum. Similiter cæteræ consuetudines monasterij cum auctoritate, & discretione ordinandæ sunt; si quid autem mutari oportet, aut constitui, non debet hoc cito fieri, aut leuiter, nec arbitrio tantum duorum, vel trium, sed conuocatis fratribus, sicut sanior pars canonicæ congregationis decreuerit, ordinandum est. Et sciendum; quia auctoritas ecclesiastica in omnibus magis imitanda est, quam ratio, quoniam auctoritas semper obedientiæ, & humilitatis est, ratio vero nonnunquam præsumptionis. Hoc autem seruandum est in ordine, ut semper maturitas, ac grauitas teneatur. Nunquid leuitate usus sum (ait Apostolus) ut apud me sit est, & nō. Honestum quippe est, & religiosum non facile quicquam, aut leuiter variare.

¶ *Carnem vestram domate ieiunijs, & abstinentia esca, & potus, quantum valetudo permittit.*

¶ Caro quidem concupiscit aduersus spiritum, & spiritus aduersus carnem, sed ne caro possit præuallere, spirituales viri per virtutem spiritus eandem concupiscentiam debent reprimere, quia quando caro domatur, spiritus roboratur. Sed cum adiungitur, quantum valetudo permittit, virtus discretionis commendatur. Pereunt enim ipsa bona, nisi

cum

cum discretione fiant. Tantum ergo debet quisq; carnem suam domare per abstinenciam, quantum valetudo permittit naturæ. Qui carnem suam supra modum affligit, ciuem suum occidit; si plus, quàm oportet, alimentis reficit, hostem nutrit, sic ergo nutrienda est, vt seruiat; sic domanda, vt non superbiat. In omni abstinencia hoc semper attendendum est, ut uitia extinguantur, non caro.

¶ *Quando autem aliquis non potest ieiunare, non tamen extra horam prandij aliquid alimentorum sumat, nisi cum agrotat.*

¶ Primum vitium ex septem principalibus vitijs est gula. Tentatio huius vitij aliquando fit de paruis rebus, & uilibus. Nam primus homo tentatus est non de porco, sed de pomo. Esau non de gallina, sed de lenticula. Saluator noster non de carne, sed de pane. Sunt autem huius uitij tria genera. Vnum genus est, quando cibo, uel potu quis immoderatè utitur. Alterum genus est, quando nimis delicatum cibum, uel potum quis desiderat. Tertium genus, quando extra horam cibum, uel potum uult quis sumere, extra horam credimus esse usq; ad tertiam; nam usq; ad istam horam non decet fratrem comedere, aut bibere, nisi ægrotet, & egrotanti omni hora licet, infirmis enim non est lex posita. Non ieiunantibus, nec tamen infirmantibus, rectam horâ reficiendi intelligimus ab hora tertia usq; ad sextâ; ieiunantibus uero ab hora nona usq; ad uesperâ. Cum Apostolus præcipiat, ut omnia honestè, & secundû ordinem fiant, nec tm cibo, & potu tēperate uti oportet; sed et horas constitutas obseruare; ne cui de uita nostra præbeamus offendiculû. Valde enim indecens est, si nos reprehensibiliter uiuimus, qui formam rectè uiuendi alijs demonstrare debemus.

DE REFECTIONE VTRIVSQ;
hominis. Cap. IV.

Cum acceditis ad mensam, donec inde surgatis, quod vobis secundum consuetudinem legitur, si-
ne tumultu, & contentionibus audite, ne sola vobis
fauces sumant cibum, sed & aures esuriant Dei verbū.

¶ Illi esuriunt Dei verbum, qui desiderant audi-
re, multi sacram lectionem audiunt, qui tamen ab
ipsa lectione uacui recedunt; nullum ibi affectum
habent; nullum saporem sentiunt; quicquid au-
diunt, facile amittūt, iudicium est illis audire, quod
audiunt, contra quos scriptum est. Beati qui esu-
riunt; & sitiunt iustitiam; quoniam ipsi saturabun-
tur, ideo saturabuntur, quia prius esurierunt, esu-
riendo enim homo efficitur, ut post modum satietur.
Primum ergo præparare debemus cor nostrum
ad esuriendum, & desiderandum verbum Dei; ade-
rit diuina gratia, quæ nos intus perfundat, & dul-
cedine, atq; sapore spirituali reficiat, & delectat nos
cantare, quàm dulcia faucibus meis eloquia tua Do-
mine super mel ori meo. Et bonum mihi lex oris
tui super millia auri, & argenti. Non solum debe-
mus esse participes mensæ corporalis, sed spiritua-
lis; nec tantum sumere cibum corporalis, sed animæ,
& quanto melior est anima, quàm corpus, tanto an-
pius nos delectare debent alimenta animæ, quàm
corporis. Quotiens nobis diuina scriptura legitur,
aut exponitur, cogitare debemus, quia esca spiritua-
lis est, quæ à Deo nobis mittitur ad reficienda cor-
da nostra, ne deficiamus in uia, & ad robotandos
nos contra tentationes diaboli, & pericula huius sæ-
culi. Talem cibum nos oportet incessanter esurire,
atq;

atq; in mente iugiter retinere, ut possimus dicere cum propheta. In corde meo abscondi eloquia tua, ut non peccem tibi. Qui in corde suo sacrum eloquium abscondit, uitalis, & cibꝰ animæ est, qui à morte, idest à peccato animæ defendit, & insuper ad uitam æternam perducit. ¶ Iam quid de infirmis subiungat, audiamus.

¶ *Qui infirmi sunt ex pristina consuetudine, si aliter tractantur in victu, nob debet alijs molestum esse, nec iniustum videri eis, quos aliqua consuetudo fecit esse fortiores.*

¶ Ac si apertè dicat: fortiores non debent contristari, si infirmos vident misericordius tractari; immo quia fortiores sunt in se, debent abstinentiæ seruare rigorem, & aliorum imbecilitatem equanimiter portare per compassionem.

¶ *Nec illos ditiores putent; quia sumunt, quod non sumunt ipsi; sed sibi potius gratulentur, quia valent, quod non valent illi.*

¶ Melius est enim abstinere, quàm plus sumere; nam illud est virtutis, hoc infirmitatis. Gratulari quisquè sibi debet, qui dono gratiæ diuinæ tam sanus est, & validus, ut possit sibi sufficere communis aliorum cibus, & potus, qui nihil delicatum quærit, nihil superfluum, quanto enim quisquè minus appetit, quanto arctius viuit, tanto beatior existit. Arcta enim, & angusta est via, quæ ducit ad vitam. Gaudeat igitur, qui potest parcè viuere propter Christum: parca enim vita occidit vitia, libidinem extinguit, virtutes nutrit: animum roborat, mentem ad cœlestia subleuat.

¶ *Et si eis, qui venerunt ex moribus delicatioribus ad monasterium, aliquid alimentorum, vestimentorum, operimentorum ve datur, quod alijs fortioribus,*

Et ideo falicioribus non datur &c. (vsque) non potuerunt.

¶ Quare hic debent cogitare scilicet, vt ex ratione cognoscant; quia iustum est, vt hi, qui plus descendunt, plus accipiant: Et cum hoc iustum esse cognouerint, non velint omnes accipere, quod paucos viderint accipere, tolerandi enim sunt, qui minus possunt; Et hoc est, quod subiungit.

¶ *Nec debent omnes velle, quod paucos viderint amplius accipere (non quia honorantur, sed quia tolerantur) ne contingat detestanda peruersitas, vt in monasterio, vbi quantum possunt, sunt diuites laboriosi; fiant pauperes delicati.*

¶ Valde quippe detestabile est, vt ibi fiat pauper delicatus, vbi fieri appetit diues laboriosus idest abstinens. Quod tamen sæpè videmus fieri in pluribus, vel contingere. Multi enim quanto nobiliores, & delicatiores fuerunt in sæculo, tanto postmodum abiectius, & districtius viuunt in monasterio; & pleriquè quanto abiectiores, & pauperiores fuerunt, tanto plus deinde in monasterio extollentiam, & delicationes quærunt. Sed sicut diximus valde detestabile, & peruersum est, ibi pauperem delicias quærere, vbi diues pro amore Dei abstinendo nititur laborare. Ille seruit ventri, iste spiritui: ille per latam, & spaciosam viam tendit ad pœnam, iste per arctam, & angustam viam tendit ad gloriã.

¶ DE INFIRMIS PROCURANDIS.

Cap. V.

Sane quemadmodum agrotantes necesse habent minus accipere, ne grauentur: ita & post ægritudinem sic tractandi sunt, vt citius recreentur, etiam se
de

de humillima sæculi paupertate venerint, tanquàm hoc illis cōtulerit recentior aegritudo, quod diuitibus anterior consuetudo.

¶ Sed quædam aegritudines sunt, in quibus si ci-
bus sumitur, non iuuat, sed grauat, & tunc necessè
habent ægotantes minus accipere, ne grauentur.
Exposita autem ægitudine, sic tractandi sunt, vt
citius recreentur; & in hac recreatione fratrum nō
debet esse acceptio personarum, non debet contem-
ni humillima paupertas in his, quæ postulat huma-
na necessitas; cum hoc eis tribuat recens aegritudo,
quod diuitibus anterior consuetudo; qui enim mi-
sericors est in alium, Deus misericors est in illum.
Vnde ipse ait. Beati misericordes: quoniam ipsi
misericordiam consequentur. Beatus quoquē Io-
hannes dicit. Qui viderit fratrem suum necessita-
tem habere, & clausèrit ab eo viscera sua, quomo-
do charitas Dei manet in eo. Si ergo charitatem
Dei volumus habere, debemus in fratribus nostris
misericordiæ opera exercere, quod cum agimus,
proculdubio ei seruimus, qui electis suis dicturus
est in iudicio, infirmus fui, & visitastis me; esuri-
ui, & dedistis mihi manducare &c. his similia; qui-
bus merces inde impenditur, cum dicitur. Perci-
pite regnum, quod vobis paratum est ab origine
mundi: Cum ergo fratribus nostris propter Deum
seruimus, ipsum regnum cœlorum requirimus, &
si opera sunt trāsitoria, merces tamen manet æterna.

¶ *Sed cum vires pristinas reparauerint, redeant ad
fæliciores consuetudinem suam.*

¶ Felix consuetudo est carnalia desideria, quæ
militant aduersus animam, abscindere; felix con-
suetudo est abstinere; felix consuetudo corpus suū
castigare, & in seruitutem redigere.

¶ *Quæ famulos Dei tanto amplius decet; quanto minus indigent, nec cibi eos teneat voluptas iam vegetatos, quos necessitas leuaret infirmos.*

¶ Ad leuandam infirmitatem necessarium est carnis curam agere, quæ uidelicet caro postquam vegetata fuerit, oportet eandem curam carnis refecare, ne famulos Dei teneat cibi voluptas, nec seruiant gulæ, qui debent animæ deseruire. Quanto minus indigent, tanto amplius decet, ne cibi eos voluptas teneat, ne gulæ initium animæ virtutes tollat. Nullus palmam spiritualis certaminis apprehendit, qui non in semetipso prius per afflictam uentris concupiscentiam carnis incentiua deuicerit; nequē per conflictum spiritualis certaminis asurgitur, si non prius intra nosmetipsos hostis positus, gulæ uidelicet appetitus edomatur, quia si non prius ea, quæ nobis uiciniora sunt, prosternimus, inaniter ad ea, quæ sunt impugnanda, transimus. Multi ordinem certaminis ignorantes edomare gulam negligunt, & ad spiritualia bella consurgunt, qui etiam aliquando multa, quæ magnæ fortitudinis sunt, faciunt; sed dominante gulæ uicio per carnis illecebram omnia, quæ fortiter egerunt, perdunt; & dum uenter non restringitur, per carnis concupiscentiā simul uitæ uirtutes obruntur. Hoc signat, quod muros Hierusalem princeps eorum destruxit; quia uirtutes animæ, dum non restringitur uenter, pereunt. Ex Aegypto populus adductus in heremo occubuit; quia despecto manna cibos carnum petijt. Primogenitorum gloriam Esau amisit, quia magno estu desiderij uilem cibū idest lenticulam concupijt; nequē enim cibus, sed appetitus in uicio est: Vnde & lautiores cibos plerumquē sine culpa sumimus, & abiectiores non si-

ne reatu conscientiae degustamus. Ea itaque; sumenda sunt, quae naturae necessitas quaerit, & non ea, quae edendi libido suggerit.

¶ *Illos aestiment ditiores, qui in sustinenda parcitate fuerint fortiores.*

¶ Ex fortitudine parcitatis deprimuntur uicia carnis, ex mortificatione uitiorum procedit pullulatio uirtutum. Ipsae sunt uerae diuitiae, quibus distantur animae continentium. Vnde & subditur.

¶ *Melius est minus egere, quam plus habere.*

¶ Melius est aliquid egestatis propter Dominum sustinere, quam super abundanter. Nam egestas, quae propter Dominum est, generat humilitatem, quae est initium omnium bonorum. Abundantia uero parit superbiam, quae est initium omnium malorum. Seruus ergo Dei, ut uoluntatem, atque appetitum carnis possit reprimere, semper debet ad minus tendere, ut ipsorum alimentorum, & uestimentorum minus uelit habere, etiam quam necesse sit. Adiutorem quippe habemus internae intentionis hunc hominem, quem exterius gestamus, & si ipsi insunt lasciuiae, ipsi tamen affectus supererunt operationi bonae. Vnde necesse est, ut interior homo noster aequus quidem arbiter praesideat inter se, & eum, quem exterius gestauit, quatenus ei homo suus exterior, & semper debitum ministerium seruire sufficiat, & nunquam superbe libera ceruice contradicat.

¶ *DE HABITU EXTERIORI, ET
interiori. Cap. VI.*

Non sit notabilis habitus uester, nec affectetis uestibus placere, sed moribus.

¶ Fecit

¶ Fecit iste uir sanctus, quod docuit, scriptum est enim, quia uestimenta eius, & calceamenta nec nitida nimium, nec abiecta plurimum, sed ex moderato, & competenti habitu erant; ipse quoque de se legitur dixisse. Fateor, quia de preciosa ueste erubesco, Non decet hanc professionem, nec decet hanc admonitionem, non decet hæc membra, non decet hos canos. Hinc dominus in euangelio. Ecce qui mollibus uestiuntur in domibus regum sunt. Mollia dicuntur uestimenta, eo quod mollem efficiunt animum: Mollibus uestimentis Regia delectatur domus; Asperis, & humilibus Christi delectatur ecclesia. Talia debent esse uestimenta clericorum, in quibus nihil notari possit nouitatis, nihil quod pertineat ad superbiam, & inanem gloriam. Non tenera uestis sacerdotem, sed munditia mentis ornat clericum. Ornemus ergo nos spiritualibus ornamentis, scilicet castitate; humilitate, mansuetudine, obedientia, patientia, charitate. Hæc sunt indumenta, quibus anima potest ecclesiæ Imperatori placere, non enim exteriorem, sed interiorem pulchritudinem requirit inuisibilis sponsus. Sicut scriptum est. Omnis gloria eius filiæ regis abintus; Nostræ ergo diuitiæ, nostra pulchritudo, boni mores, & beata illa anima, cui dicitur in Cantico Canticorum. Quam pulchra es amica mea, & macula non est in te. Studeamus ergo inuisibili Domiuo placere non uestibus, sed moribus, ut impleatur in nobis, quod per Apostolum præcipitur. Nolite conformari huic sæculo; sed reformamini in nouitate sensus vestri; etsi enim exterior uoster homo corrumpitur, interior tamen renouatur de die in diem. Deinde subiungit, de incessu, statu, & cæteris motibus, dicens.

¶ Quando

¶ *Quando proceditis, simul ambulate, cum veneritis, quò itis, simul state. In incessu, statu, & in omnibus motibus vestris nihil fiat, quod cuiusquàm offendant aspectum; Sed quod vestram deceat sanctitatem.*

Sancta ergo perfectorum ecclesia non solum floret honore religionis, sed etiam honestatis decore pollet, sicut scriptum est. Flores mei fructus honoris, & honestatis. Religiosum quippe, & honestum est, ut sicut simul habitant fratres; ita quoque simul ambulent, & simul stent. Et Apostolus præcepit, ut omnia honestè, & secundum ordinem fiant. Potest quoque in hac corporalij coniunctione aliquid spirituale intelligi. Sanctorum quoque societas terribilis, ut castrorum acies ordinata, describitur. Castrorum namque acies, cum ad bellum se præparat, prius se coniungere, atque ordinare festinat, ne ab hostibus interrumpi, aut penetrari valeat. Sic nimirum nostra spiritualis acies, quæ bene coniuncta, & ordinatè simul stare præcipitur, contra dyabolum quotidie munitur ad bellum, ut videlicet ex sua coniunctione terreat antiquum hostem, qui in servis Dei nihil tam timeret, quàm concordie unitatem. Sed valde notandum est, quod dicitur.

¶ *In omnibus motibus vestris nichil fiat, quod cuiusquàm offendant aspectum sed quod vestram deceat sanctitatem.*

¶ Sic vivere debent canonici, ut a nemine iuste valeant reprehendi; valde enim incongruum est, ut ipsi reprehensibiliter viuant, quorum ordo exigit, ut cæteris formam sanctitatis ostendant. Nam ad eos hæc sententia pertinet: quia dicitur. Estote sancti, sicut & ego sanctus sum, dicit Dominus, vere sancti esse debemus, quinomen, & habitum
religio,

religionis, & sanctitatis suscepimus, qui diuino cultui sumus mancipati, sacrisq; altaribus Christi cōsecrati, & diuinis mysterijs ordinati. Ergo sic nos existimet homo, vt ministros Christi, & dispensatores misteriorum Dei. Non præcipit Apostolus tantum, vt ita simus; sed sic nos existimet, inquit homo. Non enim sufficit nobis vita sancta, nisi sit & fama bona. Nam vita bona nobis necessaria propter nos, fama vero bona propter alios. Vnde rursus ait Apostolus. Oportet nos ab his, quæ fors sunt, habere bonum testimonium. Sic ergo debemus viuere, vt vita concordet cum nomine, & professio teneatur in opere, vt si sanctus est ordo, sancta sit conuersatio, & sicut bene de nobis dicitur, testimonio bonæ actionis comprobetur; Tunc enim religiose viuimus, si illicitos motus sub disciplina coercemus, si membra, & sensus nostros studeamus restringere, vt non possint lasciuiæ, & leuitati deferuire, vt aspectus noster sit simplex, & humilis, ne fixè aspiciat oculus, quod illicitè cōcupiscat animus, vt noster auditus sit purus, & discretus, ea quæ superflua sunt, & vana, respuens, ea quæ Dei sunt gratanter suscipiens, vt sermo noster sit sale conditus otiosa & nocua detestans, bona & vtilia commendans; vt sit in corde munditia; in uultu pudicitia, in incessu grauitas, status cum reuerentia, motus cum maturitate, habitus cum religione; quatenus ubiquè resplendeat sanctitas, superemineat honestas, seruetur humilitas.

In omnibus motibus vestris nichil fiat, quod cuiusquam offendant aspectum, sed quod vestram deceat sanctitatem. Oculi vestri & si iaciantur, in aliquam sceminarum, in nulla figantur; nequè enim quando proceditis, sceminas videre prohibemini, sed appetere,

sere, vel ab ipsis appeti velle criminofum est.

¶ Vnde dominus in euangelio. Qui uiderit mulierem ad concupiscendum eam, iam mæchatus est in corde suo. Et quia per illicitum uisum concupiscentia oritur, per quam integritas mentis uiolatur, necesse est, ut semper seruus Dei uisum suum reprimat, ne per concupiscentiam, & per immundiciam cordis Deum offendat. Sanctus Dauid, quia oculos in fœminam iecit, & fixit, illicito appetitu deuictus adulterium perpetravit. Si ergo tantus uir per incuriam oculorum cecidit, nos qui longe ab eius sanctitate distamus, tam mortale præcipitium summopere timere debemus. Teneamus ergo sententiam Beati Iob, qua dicitur. Pepigi fœdus cum oculis meis, ut non cogitarem de uirgine. Quia enim sensit sanctus uir, quod per exteriorem uisum interior animus corrumpitur, fecit pactum cum oculis suis, ne incaute aspicerent, quod illicite cõcupiscerent. Non enim profecto uirtutum uincitur nisi sollicitè causa, & opportunitas uitij caueatur. Hinc est, quod Loth à Sodomis fugienti præcipitur, ut non retrospiciat, neq; remaneat iq̃ omni circa regionem, sed in monte saluum se faciat; quis enim perfectè appetit incentiua uitiorum fugere, ab aspectu, & uicinitate ipsorum se alienum facere, atq; ad alta uirtutum conscendere; tanto à uitijs remaneat extraneus, quanto ab eis uirtute, & corpore elongatur. Et quod uisus sit causa concupiscentiæ ostenditur, cum subditur.

¶ *Non solum tacito affectu, sed affectu, atque aspectu appetitur, & appetit concupiscentia fœminarum.*

¶ Ac si apertè dicat: Non solum tacita uoluntate inatus concupiscentia oritur, sed etiam per exteriorem aspectum generatur; nisi enim sanctus Dauid
fœmi-

fœminam fixè inspexisset in tantam carnis tentationem minimè incidisset. Hinc per prophetam dicitur. Ascendit mors per fenestras nostras. Mors animæ est concupiscentia, domus interior mens nostra est. Fenestræ huius domus sunt quinque corporis sensus; Mors ergo per fenestram ascendit, atque domos ingreditur, quando concupiscentiæ uitium per sensus prorumpit ad interiora mentis. Qua propter ne uitalis sensus per exteriorem appetitum intus intro eat, opus est, ut fenestras domus nostræ tanta diligentia custodiamus, ut ipsum appetitum tanto facilius possimus compescere, quanto nullum uitij permittimus ingressum patere. Valde enim timenda est sententia, quæ subditur.

¶ *Nec dicatis vos habere animos pudicos, si habeatis oculos impudicos, quia impudicus oculus impudici cordis est nuncius.*

¶ Sæpe enim, quæ intus lateant, exteriora membra denunciant, & frequenter per habitum corporis cognoscitur habitus mentis. Minor est autem culpa, dum iacet in occulto, sed iam maior efficitur, dum incipit apparere in publico. ¶ Et sciendum, quia impudicitia alia est carnalis, alia spiritualis. Spiritualis est, quæ per delectationem cogitationum intus tantum agitur. Carnalis vero est, quæ corporaliter completur. Fit autem multis modis. Nam modo per visum, modo per auditum, modo per tactum, modo per cogitationem, modo per locutionem, modo per operationem, talibus fomentis nutritur, & exercetur libido, & separatur anima à Deo, fugitque castitas de moribus, exercetur in mentibus luxuria; Vnde & subditur.

¶ *Et cum se inuicem sibimet, etiam tacente lingua, conspectu mutuo corda nunciant impudica, & secundum*

dum concupiscentiam carnis alterutro delectantur ardore: etiam intactis ab immunda violatione corporibus fugit ipsa castitas de moribus.

¶ Castitas quippe de moribus fugit; dum libidinosa uoluptas conspectibus mutuis magis magisque inardescit: Et si corpus ab immunda uiolatione non tangitur; ipsa tamen immunda uiolatio, uisu, affectu, cogitatione, delectatione perpetratur, ipsisque fomentum, quasi quibusdam gradibus crescit peccatum. Cogitatio praua delectationem parit, delectatio consensum, consensus operationem, operatio consuetudinem, consuetudo quasi necessitatem. Apostolus enim legem peccati dicit esse in membris, quæ lex consuetudo est, quam peccando concipimus, & ab ea cum volumus, non discedimus; quia necessitatis vinculo per consuetudinem retinemur. Bonum est ergo culpam corrigere, cum incipit apparere, quia si morari cæperit, immanitatem sceleris facit, & quod dicit Psalmus de huiusmodi Prolongauerunt iniquitatem suam; Dominus iustus concidet ceruices peccatorum.

¶ *Nec putare debet, qui in feminam figit oculum; & illius in seipsum diligit fixum, ab alijs se non videri, cum hoc facit; videtur omnino, & à quibus se videri non arbitratur.*

¶ Hoc videmus frequenter de his, qui culpas suas nolunt abscondere, quod dum vitia quasi cautè, & latenter agere æstimant, ipsi seipsum, dum nesciunt, demonstrant, & culpa, quæ occulta esse creditur, ab alijs manifestè cognoscitur.

¶ *Sed & si lateat, & à nemine hominum videatur, quid faciet de illo desuper inspectore &c. (vsq;) sapientius.*

¶ In cunctis ergo quæ, vel agendo, vel loquendo;

do, vel cogitando delinquimus, aspectum superni Iudicis vehementer formidare debemus, quia si aliquando non apparent hominibus vitia nostra, illius tamen oculis nuda sunt omnia, & aperta; & hoc nos à culpa reprimere debet, quia in eius iudicio nihil multum poterit remanere. Vnde dicitur. Ante Dei vultum remanebit nihil inultum. Contra vitiorum incentiua debemus opponere inferni tormenta, & contra transitoriam delectationem perpetui ignis dolorem. Valde stultus est, qui pro eo, quod paruo tempore luxuriæ deseruit, suumque miserum desiderium prauis delectationibus pascit, & cœlestem perdit amenitatem, & incurrit æternam damnationem.

¶ Illi ergo vir sanctus timeat displicere, ne velis mala fœmina placere (vsq;) desigens oculum.

¶ Ex quibus verbis, patet, quia si oculum in fœminam figimus, Deo nostro, cui placere debuimus, abhominabiles sumus, & à quo debuimus recipere gloriam, recipiemus pœnam. Quapropter necesse est, ut si à nostris vitijs diuinus non separat amor, vel reprimat timor, & si nos non delectant superna gaudia, vel terreant æterna supplicia. Sic homo recedere à peccato incipit, si timeat displicere auctori suo.

¶ Si dicit aliquis. Quomodo timebo Deum? Si vis Deum timere, illum cogita omnia videre. Titil lat te mala conscientia, cogita, quia Deus videt te. Quicquid in te malum fuerit, pensa, quia Deus totum conspicit. Quicquid egerimus, aut dixerimus, aut mente tractauerimus, semper attendamus supernos oculos Dei, semper timeamus displicere illi. Hæc est via iustitiæ, hæc sunt primordia sapientiæ, sicut scriptum est. Initium sapientiæ timor Domini. Sequitur.

¶ Quan-

¶ *Quando ergo simul estis in Ecclesia, vel ubique, fœmina sunt inuicem; pudicitiam vestram custodite.*

¶ Magna est pudicitia virtus, & multum commendata in scripturis diuinis, hæc virtus cœlestis, & spiritualis est: Nam hominem à terra subleuat, angelis sociat, Deo coniungit, de terrene cœlestem, de carnali spiritualem facit, hæc virtus etiam humanam naturam transcendit. Nam, quod homo pudicus est, quod castus, non tam virtus humana facit, quam diuina; Per hanc nos amat inuisibilis sp̄s, non enim placet Deo anima, si non est casta; si non est pudica. Nam si immunditiæ, & luxuriæ deseruit, abhominabilis est ei, & reprobata. Pudicitia virtus acceptabilis est Deo, & hominibus, hanc nobis inuidet, hanc impugnare non cessat antiquus humani generis hostis. Ipse enim est persuasor immunditiæ, & luxuriæ, plures decipit, plures corrumpit; Non parcat clericis, non indulget monachis, & quod magis gemendum est, ipsos etiam religiosos prostermit. ¶ Necesse est ergo summa vigilantia inuicem nostram pudicitiam custodire, nam si eam perdimus, totum perdimus, etiam nosmetipsos. Qui perdit pudicitiam, perdit animam suam, perdit Deum, perdit & semetipsum. Sed ad hoc in vnum habitamus, vt nos inuicem custodiamus, inuicem corrigamus, inuicem erudiamus, vt quod quisq; non potest per seipsum, possit per alium. Et quia nostra custodia non à nobis est, sed à Deo, bene subditur.

¶ *Deus enim, qui habitat in vobis, etiam isto modo custodiet vos ex vobis.*

¶ Non enim sufficiens est nobis custodia nostra, nisi etiam adsit diuina. Vnde scriptum est. Nisi do

minus custodierit ciuitatem, frustra vigilat, qui custodit eam. Nemo est, qui pudicitiam possit custodire, aut in seipso, aut in alio, nisi per Deum. Sed si ipse habitauerit in nobis, poterimus per ipsum, qui uiuit, & regnat Deus per omnia sæcula sæculorum. Amen.

¶ DE CORRECTIONE FRATERNA.
Cap. VII.

ET si hanc, de qua loquor oculi petulantiam (vsq³)
competenti seueritate coerceri.

¶ Hæc sententia verbis Apostolicis concordat, & Euangelicis. Ait enim Beatus Paulus. Si fuerit homo præoccupatus in aliquo delicto, vos qui spirituales estis, instruere huiusmodi in spiritu lenitatis. Et Dominus in Euangelio. Si peccauerit in te frater tuus, corripe eum inter te, & ipsum solum, si te audierit, lucratus es fratrem tuum. Si te non audierit, adhibe tibi duos, vel tres, ut in ore duorum, vel trium stet omne verbum. Summa quidem diligentia inuestiganda, & corrigenda est culpa. Nam si eam non emendamus in hoc sæculo, damnabimur in futuro. Vnde Apostolus ait. Horrendum est incidere in manus Dei uiuentis. Melius est ergo hic emendare vitam, quam tunc perire. Qui amat corripi, sapiens est. Vnde scriptum est. Corripe sapientem, & amabit te. Stultus autem si corripitur, irascitur. Sed quid dicit Apostolus ad discipulum. Insta inquit, oportunè, importunè. Oportunè dicebat propter eos, qui libenter audiebant verbū prædicationis. Importunè propter eos, qui inuiti audiebant. Similiter eos, qui culpas redarguunt, quandoq; oportet esse importunos, sed ista importunitas non

non est ex ira, sed ex charitate, & sape is, qui conturbatur, quia corripitur, cum cogitare ceperit, quanto eum amore frater suus reprehenderit, gaudet de reprehensione, & quod deliquit, studet emendare.

¶ *Nec vos indicetis esse maleuolos, quando hoc indicatis (usq;) ne deterius putrescat in corde.*

¶ Si crudelis est, qui peccati vulnus in corpore fratris cœlat, multo magis crudelis est, qui peccati vulnus in anima fratris non indicat. Et reus mortis illius existit, quem tacendo perire permittit. Sicut enim ille ex opere, ita iste damnatur ex taciturnitate, quod si is crudelis est, qui culpam non detegit, econtra ille misericors est, qui eam non abscondit. Nec maiorem potest erga miserum misericordiam agere, quàm pereunti vitam præstare. Magna quoque illi merces debetur ab omnipotente, a quo dictum est. Beati misericordes, quoniam ipsi misericordiam consequentur. Et Iacobus ait. Qui conuerti fecerit peccatorem ab errore uic sue, saluabit animam eius a morte; & operiet multitudinem peccatorum. Quo autem ordine culpa debeat demonstrari, ostendit, cum subiungit.

¶ *Sed antequàm alijs demonstretur (usque) non innotescere ceteris.*

¶ Culpa cum occulte committitur, ab alijs fratribus, qui eius culpæ conscij sunt, hic qui deliquit frater, secrete debet corrigi, quos si neglexerit audire, Patri monasterij debet indicari, ut & ipse fratrem secrete corrigat, quatenus culpa, quæ adhuc latens est, si forte secretius corrigi potuerit, non omnibus innotescat; si autem negauerit, tunc testes adhibeantur, ut conuictus districtius iudicetur. Et hoc est, quod subditur.

¶ *Si autem negauerit (vsquè) debebit emendatorem subire vindictam.*

¶ Qui blandè castigatus non corrigitur, necesse est, vt acius corrigitur. Cum dolore enim abscindenda sunt, quæ leniter sanari non possunt. Qui autem admonitus secreto de peccato corrigi negligit, publicè arguendus est, vt vulnus, quod occultè sanari nescit, manifestè valeat emendari. Manifesta autem peccata non sunt occulta ratione purganda; palam enim arguendi sunt, qui palam peccant, vt aperta obiurgatione hi, qui eos imitando deliquerunt, corriganur: hic ergo, qui secreto corrigi noluit, publicè conuictus debet mendatorem subire vindictam.

¶ *Quam si ferre recusauerit (vsq₃) plurimos perdat.*

¶ Melius est enim pro multorum saluatione condemnetur vnus, quàm per vnus exemplum plurimi periclitentur. Hinc dominus ait in in Euangelio. Si oculus tuus scandalizauerit te, erue eum, & projice abs te; expedit enim tibi, vt vnum membrorum tuorum pereat, quàm totum corpus tuum mittatur in gehenam. Et si dextra manus tua scandalizauerit te, abscinde eam, & projice abs te; per dexteram manum possumus intelligere aliquem nostrum necessarium amicum, qui prouidet in causis, oculus noster est, Qui ministrat in necessarijs, manus nostra est. Qui si etiam prouidet in spiritualibus noster dexter oculus, aut dextra manus. Talis & tam necessarius si ceteros in Dei seruitio scandalizauerit, de corpore idest de societate est abscindendus. Melius est enim vnus solatium perdere, quàm per vnum totum corpus perire.

¶ *Et hoc quod dixi de oculo non figendo (vsquè) & odio vitiorum.*

¶ Hinc

¶ Hinc idem beatus doctor alibi dicit. Sic diligendi sunt homines, vt non diligantur eorum errores; aliud est enim amasse, quod facti sunt, aliud vero odisse, quod faciunt. Sunt nonnulli, qui aliorum redarguunt culpas non tam ex charitate, quàm ex odij amaritudine, non tam vt eos corrigi velint, quàm vt odium, quod in corde gestant, exercere valeant; & hoc non est secundum Deum. Magis autem ad vindictam pertinet, quàm ad disciplinā. Caueant ergo, vt neminem cum ira, & indignatione, sed potius cum dulcedine, & charitate redarguant; & si aliquando culpa exigente sonat in voce asperitas; semper tamen maneat in mente lenitas. Iuxta quod Apostolus præcipit dicens. Vos qui spirituales estis, instruite huiusmodi in spiritu lenitatis; Benè autem subiungit. Considerans temetipsum, ne & tu tenteris. Attende enim teipsum, qui alium reprehendis, quia peccator existis, & fragilis, ne grauitè tenteris, si quem reprehendero conaris, indignando potius, quàm compatiendo. Fiat ergo cum dilectione hominum, & odio vitiorum, ita vt amor seruetur in corde erga hominem, & odium aduersus vitium; quia districtio debetur vitijs, compassio vero naturæ. Sequitur.

¶ *Quicunque autem in tantum progressus fuerit malum. (vsquè) & oretur pro eo.*

¶ Ideo progressum esse in malum magnum dicit fratrem, qui occultè aliquid recipit; quia aliquid occultare est ordinem infringere. Magnum malū incurrit, qui ordinis sui præuaricator existit. Nisi propheta sanctus magnum malum esse sciret, quòd Giezi discipulus suus a Naamā Syro munus occultū accepisset, nequaquàm eum tam terribiliter passionē lepræ percuteret; Exemplo itaque suo nos do-

cuit graui correctione dignum esse, qui committeret simile peccatum. Tamen si hoc vltro confiteatur, parcendum est ei, & orandum pro eo; nam culpa leuior efficitur, quæ confessione voluntaria humiliter aperitur. Vnde Dauid dicit. Dixi, confitebor; & tu remisisti iniquitatem peccati mei.

¶ *Si autem deprehenditur, grauius emendetur.*

¶ Quia si grauior est culpa, grauior competit disciplina. Grauius quippe, & mortaliter offendit, qui malum, quod agit, etiam abscondit. De occultis litteris, & munusculis Beatus Hiero. ita scribit. Occultas inquit litteras, & sudariola, & crebra munuscula sanctus amor non habet. Quisquís talibus delectatur, magna vanitate seducitur; & quo plus delectatur infimis, eo amplius eiicitur a supernis, ex huiusmodi autem mala grauius solent generari: sed qui perfectè vitia cauere desiderat, non solum studet, vt ea quæ per se sunt, caueat, sed etiã illa refugit, vnde tantum etiam, vel praua actio, vel mala opinio procedere possit. Nos vero, quos oportet bene viuere, & bonum exemplum alijs demonstrare, non conuenit talia agere, vnde quis possit, vel malam suspicionem habere.

¶ DE CUSTODIA RERVM COMMUNIVM. Cap. VIII.

V Estes vestras in vnum habeatis (vsquè) ne à tineis ledantur.

¶ Quod vestes præcipit reponi sub vno custode, vel pluribus, duæ videntur causæ. Prima videlicet, ne per incuriam neglectæ à tineis corrumpantur. Secunda ne frater hanc ipsam vestem, quam habet, in propriam se habere crederet, si in proprio loco

loco sibi reponere liceret. Huic autem sententiæ videntur verba concordare, quæ sequuntur; ait enim.

¶ *Et si fieri potest, ad vos non pertineat (vsquè) prout cuiquè opus est, non negetur.*

¶ Ideo ait, si fieri potest, ut si cui videatur difficile, liceat ipsum quod deposuerat vestimentum suscipere. Ad maiorem enim perfectionem pertineret, si ad tantum contemptum sui quis peruenisset, ut eo solummodo, quod opus est corpori, contentus esset, iuxta quod ait Apostolus. Habentes uictum, & uestitum his contenti esse debemus. Non determinat quantum, vel quale; sed tantum ea notat, quæ sufficiant naturæ, nam in imperfectis plus semper uoluptas appetit, quam necessitas. Sicut autem ait Beatus August. Humana natura modico contenta est, sed consuetudo multa addidit, uoluntas, atquè uoluptas plura copulauit. Si quis Deum perfecte diligeret, si carnalibus desiderijs omnino renunciaret, multa refecaret superflua, quæ modo tenet quasi necessaria. Discamus ergo Deum toto corde diligere, quatenus per ipsius amorein studeamus, & contenti esse necessarijs, & superflua refecare, ut dum, quod opus est unicuiquè, non negatur, ultra quod opus est, a nemine requiratur. Charitas non quarit, quæ sua sunt, charitas communia anteponit. Charitas facit esse abiectum in domo Dei, Hanc si quisquàm perfecte possederit, etiam ex eo, quod opus erit sibi metipsi, refecabit.

¶ *Si autem hinc inter vos contentiones oriuntur (vsquè) qui pro habitu corporis litigatis.*

¶ Habitus cordis uestri sanctificatur per gratiam Dei, per inhabitationem spiritus sancti, quando inest pax, charitas, bonitas, humilitas, patientia,
concor-

concordia, mansuetudo, & alia huiusmodi. Hæc sunt nostræ interiores diuitiæ scilicet boni mores, & uirtutes. Sed si incipimus inter nos contendere, murmurare, & litigare, statim ab his spiritualibus bonis uacui remanemus; uirtutes enim cum uitijis remanere non possunt; Nam fermentum modicum totam massam corrumpit. Hinc se debet quisque probare, & sollicitè pensare, quantum illi intus de sit, & quàm magnum damnum incurrit, qui pro rebus transeuntibus hoc, unde debet esse beatus, perdit. Valde ergo nobis cauendæ sunt lites, & contentiones, quia hæc sunt opera carnis. Ec sicut ait Apostolus. Qui talia agunt regnum Dei non cōsequuntur; ideo nos admonet in alio dicens. Nihil per contentiones, aut inanem gloriam, superiores sibi inuicem arbitrantes; non ea, quæ sua sunt, singuli cogitantes, sed ea quæ sunt alterius. Plurimum enim ualent hæc duo ad remouendas lites, & generandam concordiam, cum quis se inferiore omnibus iudicat, & ea quæ sunt alterius, magis quàm sua propria pensat. In his enim duobus, humilitas, & charitas commendatur, quæ non solum non discordare solent, sed etiam discordantes ad concordiam reducere. Et quia hæc, quæ dicta sunt, ad perfectiores pertinent, propter minus perfectos temperat sententiam, cum subiungit.

¶ *Tamen si uestra toleratur infirmitas (usquè) habete, quod ponitis.*

¶ Vt uidelicet dum in communi loco reponitur, hoc ipsum, quod in proprium usum suscipitur, non proprium esse, sed commune credamus. (Ita sanè ut nullus sibi aliquid operetur) usquè (quàm si uobis singulis faceretis propria.) Et inde Apostolicam sententiam apponit, & exponit dicens.

¶ *Chari-*

¶ *Charitas enim, de qua scriptum est, non propria communibus ante ponit.*

¶ Hæc est causa, quare nullus sibi operetur; sed in communi fiant maiori studio, & frequentiori alacritate, quàm si essent propria. Hæc causa inquã, quia charitas non quærit, quæ sua sunt, sed communia proprijs anteposit. Si charitas Christi non quærit, quæ sua sunt, nullus nostrum debet operari sibi. Et si Christi charitas communia proprijs anteposit, ergo maiori studio, & frequentiori alacritate debemus agere cõmunia, quàm si essent propria. Maior est enim fructus charitatis, quã proprietatis. Nam quod oculus non vidit, ne auris audiuit, hoc præparavit Deus diligentibus se.

¶ *Et ideo quanto amplius rem communem curaveris, superemineat, atque permaneat charitas.*

¶ Transitura quippe necessitas utitur temporalibus rebus, temporalibus studijs, in quibus debet semper charitas eminere, quia nullus potest placere Deo sine charitate. In cunctis ergo, quæ agimus, necesse est, ut semper emineat charitas, quia ipsa est mater virtutum, ipsa est radix omnium bonorum; hæc est via sublimior, qua tenditur ad cœlum, de qua Paulus Apostolus ait. Adhuc excellentiorem vobis viam demonstro. Multum proficit in hac charitate, qui pro amore Dei cuncta, quæ huius mundi sunt, despicit, nihil sibi retinere appetit, quicquid habet in commune diuidit. Verè per excelsam viam graditur, qui calcatis terrenis mente, & desiderio ad cœlestia subleuatur, Charitas in amore Dei constat, & proximi. Amor autem Dei tribus modis exprimitur, ut nihil remaneat in homine, quod non diuinæ dilectioni subdatur. Nam Deum præcipimur diligere ex toto cor
de,

de, videlicet, vt omnes cogitationes nostras referamus ad Deum. Ex tota mente, vt omnem rationem, qua intelligimus, & discernimus, habeamus in ipsum. Ex tota anima, vt omnes affectiones animæ dirigamus ad Deum. In dilectione proximi duo seruanda sunt. Vt quod tibi non vis fieri, alijs ne feceris. Et quæ vultis, vt faciant vobis homines, & vos facite illis. Ex hac gemina virtute dilectionis in proximum omnes virtutes oriuntur, quibus aut vtiliter, quæ sunt appetenda, cupimus, & quæ vitanda sunt, vitamus. Ex his duobus articulis congruè diligitur proximus, dum & beneficijs fouetur, & nulla malitia læditur.

¶ *In omnibus ergo, quibus utitur transitoria necessitas, debet semper eminere charitas.*

¶ Quia quicquid agimus, aut loquimur, ad Dei charitatem debet respicere, aut proximi, vt in omni nostra conuersatione nostræ intentionis summa versetur semper in charite. In his autem duobus præceptis tota lex pendet, & prophetæ.

¶ *Consequens ergo est &c. (vsquè) cui necesse fuerit præbeatur.*

¶ In omni enim vita nihil licet occultè recipere, vel recipi, nihil proprium retineri, sed si quid alicui datur, reddendum est præposito, vt cui necesse fuerit præbeatur de proprijs. Sic extinguitur auaritia, si superfluitas refecatur. Sic nutritur charitas, & paupertas sancta custoditur; quia dum non licet terrena retinere, cogitur animus cœlestia cogitare. Sed sunt quidam, qui grauiter conturbantur, cum ea, quæ ab alijs suscipiunt, eis non permittuntur retineri. Amant munuscula, delectantur in proprijs; & sæpe ex paruis, & vilibus rebus tanto inardescunt desiderio, vt earum occasionibus concordiam

cordiam fratrum soleant conturbare, quod persuasione dyabolica fieri dubium nō est, callidus enim hostis omnium mores nouit, & qualitates, atque eorum affectus discernit, & in eo vnumquemque tentat, in quo se magis præualere cognoscit, nec curat vtrum ex magno, vel ex paruo decipiat, tantum vt charitatem fratris corrumpere valeat. Debemus contra hostem callidum cauti, & vigilantes esse, atque eius laqueos in omni rerum materia præcauere, & omnia terrena, quibus decipere potest, animi virtute calcare, vt possimus cantare cum propheta. Laqueus contritus est, & nos liberati sumus; sed quia quidam in hoc capiuntur; ideo subiunctum est.

¶ *Quod si aliquis rem sibi collatam cœlauerit &c. (vtque) furti iudicio condemnatur.*

¶ Apostolus dicit. Fures, & latrones regnum Dei non possidebunt. Furtum enim criminale peccatum est, sicut scriptum est. Non adulterabis, nō furtum facies, non falsum testimonium dices &c. Quia ergo inter criminalia mala deputatur iuxta canonum sententiam; sic iudicare debet quisque de furto, quomodo de adulterio, quomodo de homicidio, quomodo de falso testimonio. Frater qui rem sibi collatam cœlauerit, Iudæ traditoris locum tenet in ecclesia sancta, qui fur erat, & latro, & oculos habens, & ea quæ mittebantur Domino, asportabat, & abscondebatur. Qui tanto cupiditatis, & auaritiæ vitio exarsit, vt Dominum suum, sicut dyabolus in cor miserat, venderet, & traderet; Sed appetendo lucrum inuenit mortem, sicut scriptum est, Dum sitit lucrum, peruenit ad laqueum. Tales sunt fructus auaritiæ. Caueant ergo fratres, ne lucra appetant, ne quamlibet rem abscondant, ne dū, suadente

suadente dyabolo, tam detestabilem perpetrant culpam, iusto omnipotentis Dei iudicio mortis, & damnationis perpetuæ incurrant pœnam.

¶ *DE MUNDITIA VESTIVM,*
& corporum. Cap. IX.

I*ndumenta vestra secundum arbitrium præpositi lauentur &c. (vsquè) nimius appetitus.*

¶ Quare vestimenta lauari secundum arbitrium præpositi iusserit, ipse idem causam exponit; ne videlicet fratres sordes in animo contrahat, si ultra mundum vestes mundas habere concupiscit; tanto enim quisquè polluitur intus, quanto ad inanem gloriam foris mundatur. Curare ergo debent prælati, ne per nitorem vestium delinquant subiecti. Non enim nitor uestitum, sed morum honestas ornat clericum. Vnde Apostolus nos admonet dicens, Nolite conformari huic sæculo; sed reformamini in nouitate sensus vestri; nam qui formam huius sæculi appetunt; formam interioris hominis non requirunt. Et quanto exterior pulchritudo diligitur, tanto interior minus curatur. Hæc est autem uera, & spiritualis munditia, quam requirit in nobis Deus dicens. Lauamini, mundi estote; Auferte malam cogitationum uestrarum ab oculis meis. Non enim ait. Beati mundo corpore, sed beati mundo corde, quoniam ipsi Deum uidebunt, & ne quis putaret curam carnis similiter esse resecandam, adiungit.

¶ *Lauacrum etiam corporis, cum infirmitatis necessitas cogit, minimè denegetur &c. (vsq;) sua cupiditati non obediatur.*

¶ Hæc sententia uerbis Apostolicis uidetur con-

cor-

cordare, quæ carnis curam fieri prohibet in desiderijs non in necessitate. Multum enim interest inter necessitatem, & cupiditatem, nam quod ex necessitate est, utile est, quod autem ex cupiditate vitium est. Sunt autem quidam, qui dicunt religioni non competere corporalem medicinam. Sed si diligenter attenderent, quia hoc, quod manducamus, & bibimus, quod uestibus operimur, & terrenis rebus ad necessitatem utimur, corporis medicina est.

¶ Fiat ergo de consilio medici sine murmure.

¶ Et bene ait; nolens in necessitate cogatur; uolens ex cupiditate reprimatur, quia necessitati, non cupiditati obediendum est, nam aliquando etiã si noceat, prodesse creditur, quod delectat. Ecce quare homo suæ cupiditati obedire non debet, quia sæpe sic ipse sua cupiditate decipitur, ut credat id sibi prodesse, quod nocet. Sic fallit homines mala cupiditas; sic simulat bonum esse, quod malum est, & perniciosum est. Ecce quare adeo damnant cupiditatem sacra scripturæ; & carnalem delectationem, quia ad mortem trahunt homines, dum ipsi nesciunt. Aliquando etiam si noceat, prodesse creditur, quod delectat, sic iuxta Apostoli vocem oportet nos abstinere à carnalibus desiderijs, quæ militant aduersus animam, quia caro quidem concupiscit aduersus spiritum. Sed per disciplinam spiritus reprimenda est concupiscentia carnis. Sed sunt quidam qui rigorem spiritus, alij qui mollitiem carnis supra modum sectantur, illi dum spiritualiter vivere appetunt, aliquando cum vitijs, & carnem extinguunt; sed sciendum est, quia virtus si modum non habeat, in vitium vertitur. Illi vero, qui carnaliter volunt vivere, cum cura carnis student & propria deside-

ria nutrire, ponendus est vtriusque; modus, & cogendi sunt illi facere, quod faciendum est pro salute. Hi vero reprimendi sunt, ne faciant, quod carnaliter concupiscunt. Salus quidem corporis ad seruendum Deo seruanda est, cupiditas vero carnis extinguenda est. Et quia de manifesta infirmitate locutus est, de latenti dolore subiungit dicens.

¶ *Denique, si latens est dolor (vsq^{ue}) sine dubitatione credatur.*

¶ Iure enim credendus est, quem boni mores, & conuersatio sancta famulum Dei esse commendant, non enim ex ore loquentium cognoscitur veritas, aut falsitas, sed à fructibus eorum cognoscetis eos; dicit Dominus, non sunt fallaces, non sunt duplices, non sunt ex illis, qui in corde, & ore locuti sunt falsa; Famuli Dei, quales sunt in corde, tales sunt in ore. Bona vita fidem dat verbis. Mala vita etià ipsam veritatem facit esse ambiguam, sine dubitatione ergo credantur, qui sine dubitatione sunt boni. ¶ Alio modo.

¶ *Si latens est dolor sine dubitatione credatur.*

¶ Famulus enim Dei timet Deum offendere non solum in opere, sed etiam in sermone. Tales nos exhibere debemus, ut quicquid dixerimus, sine dubitatione credatur. Vita debet commendare sermonem, & opera bona testimonium perhibere veritati, sicut Saluator noster de se dicit. Si mihi non creditis, uel operibus credite. Opera, inquit, quæ facio, ipsa testimonium perhibent de me. Multi enim sunt, quibus non creditur, etiam si uerum dicant, quia enim mali sunt, aut in suspitione habentur, ne mali sint, si uita sine suspitione cæperit esse bonis, mox uerba nostra sine dubitatione credentur esse uera, quanto quisque minus bonus est, tanta

minus

minus ei creditur, quanto cæperit esse religiosior, tanto uerbis eius maior fides præstatur. (Sed quia infirmitas necessitatis) necessitas aliquando appetit ea, quæ sibi ipsi sunt contraria, ideo adiungit.

¶ *Sed tamen utrum sanando illi dolori, quod deletat, expediat, si non est certum, medicus consulatur.*

¶ Credendum est eorum verbis, nec tamen statim acquiescendum est eorum desiderijs; nam & famulos Dei illicita tentant desideria: ergo (si non est certum, medicus consulatur.) Quærat ille, qui de incerto faciat certum. Nec mirum si medicorum consilia quærimus, cum Apostolum Paulum consilio medicinæ usum fuisse legamus: nam per Epistolam suam discipulo suo Timotheo præcepit dicens. Modico vino utere propter stomachum, & frequenter tuas infirmitates. A rigore ergo abstinentiæ discretus magister discipulū temperat, ne scilicet frequentibus passionibus fractus a bono prædicationis elanguescat. Bonum quippe erat, ut discipulus ex infirmitate patientiæ fructum redderet. Sed utilius esse prouidebat Apostolus, si usu medicinæ aliquantulum conualescens animas Deo lucrificaret; Ex diuersis autem bonis utiliora eligenda sunt: Hac autem auctoritate fulcti ad hæc medicinam corporalem querere debemus, ut inde maiorem fructum domino referamus.

¶ *Nec eant ad balnea (usquè) ire debet.*

¶ Prouideamus bona, ait Apostolus, Non tantū coram Deo, sed etiam coram omnibus hominibus; propter nos conscientia bona sufficit nobis, propter alios fama nostra non pollui, sed pollere debet in nobis. Qui fidens conscientiæ suæ negligit famam suam, crudelis est, maximè in hoc loco positus, de quo dicit Apostolus scribens ad discipulum suū.

Circa omnes teipsum bonorum operum præbe exemplum. Rursus alibi dicit. Speculum facti sumus mundo, & angelis, & hominibus. Qui nos amant, quærent, quid in nobis laudent. Qui vero nos odiunt, detrahunt nobis. Nos autem in vtro quæ medio constituti, adiuuante Domino nostro Iesu Christo, & vitam, & famam nostram sic custodire debemus, vt non erubescamus a detractoribus laudari. Simul ergo ire debent duo, vel tres, & propter solatium, & propter bonæ famæ testimonium. Vnde Salomon ait. Veh soli, si ceciderit, non habet subleuantem, Si fuerint duo, fouebuntur mutuo. Bene autem ait, (cum quibus præpositus iusserit ire debet) scilicet vt a prælato prouideatur securitas personæ, & a subdito seruetur virtus obedientiæ.

¶ Egrotantium cura siue post agritudinem reficiendorum, siue aliqua imbecillitate, siue etiam febribus laborantium alicui debet iniungi, vt ipse de cellario petat, quod cuiquàm opus esse prospexerit.

¶ Eligendus est frater timens Deum, qui circa infirmos curam maximam gerat, & quod opus eis fuerit, ministrare eis studeat; & eo studio, & effectu eis deseruiat, ac si ipsi Domino Iesu Christo deferuiret. Ipse enim dicturus est in iudicio. Infirmus fui, & visitastis me. Et iterum. Quod vni ex minimis meis fecistis, mihi fecistis. debent ergo fortiores imbecillitatem portare infirmorum. Sic enim diuina charitas adimpletur teste Apostolo, qui ait. Alter alterius onera portate, & sic adimplebitis legem Christi, Lex Christi est dilectio. Dilectionis officium est inuicem onera nostra portare. Diuersa vero tempora, & diuersæ infirmitates faciunt, vt onera nostra portemus inuicem. Nihil autem sic

sic probat amicum, quàm oneris amici portatio. Sed & ipse infirmus, cui pro Dei amore seruitur, debet pensare, & summopere cauere, ne superfluitate sua, aut impatientia sibi seruientem contristet. Studeat autem Deo gratias agere, ne infirmitas, quæ data est ei ad purgationem animæ, vertatur ad augmentum culpæ.

¶ *Sive autem, qui vestibus, sive qui codicibus præponuntur, sine murmure seruiant fratribus suis.*

¶ Tales se exhibeant, ea charitate fratribus suis deseruiant; ne ipsi de ministerio sibi commissio peccent in murmure, nec alios per suam negligentiam faciant murmurare. Graue peccatum est murmuratio, testante Greg. qui ait. Regnum cælorum nullus, qui murmurat, accipit, nullus, qui accipit, murmurare poterit. Et Salomon. Præcordia fatui, sicut rota carri fœnum portat, & murmurat. Tales ergo sunt in congregatione, qui carne subditi, non cessant a murmuratione. Apostolus. Nequè murmuraueritis, sicut quidam eorum murmurauerunt, & a serpentibus perierunt. Quare a serpentibus? nisi quia serpens venenosus est, & omnis, qui murmurat, venenum dyaboli habet in lingua. Iaco. Lingua inquietum malum plenum veneno mortifero. Cauendum est ergo nobis a murmure, ne mortifero, & dyabolico pereamus veneno.

¶ *Codices certa hora petantur, extra horam qui petierit, non accipiat.*

¶ Superius præcepit instare orationibus temporibus constitutis. Tempora ergo sunt distinguenda, quibus debemus orare, & quibus debemus legere. De opere quoquè alibi admonet, vt nullus sibi aliquid operetur, sed oïa opera vestra in vnum fiant. Hæc tria commendat nobis regula, quæ ani-

mæ nostrę valde sunt necessaria scilicet orationem, lectionem, operationem. Nam oratione mundamur, lectione instruimur, operatione beatificamur: sicut spiritus sanctus dicit in Psal. Labores manuum tuarum; quia manducabis, beatus es, & benetibierit; quodd autem dicit, vt (Codices singulis diebus petantur) frequentia legendi commendatur. Frequenter debet legere seruus Dei. Valde enim est vtilis diuina lectio; nam per lectionem discimus, quid cauere, quid agere, quo tendere debeamus. Hinc Psal. ait. Lucerna pedibus meis verbum tuum. Per lectionem sensus, & intellectus augentur. Lectio, oratio, & operatio ad contemplatiuam vitam instruunt nos, & actiuam. Ideo in Psal. Beatus vir, scribitur, qui in lege Domini meditatur die, ac nocte. Hęc sunt arma, videlicet, oratio, lectio, & operatio, quibus dyabolus expugnatur; hęc sunt instrumenta, quibus æterna beatitudo acquiritur; his armis vitia exprimuntur, his alimentis virtutes nutriuntur. Sed etsi a lectione cessatur, debet manuum operatio subsequi, quia otiositas inimica est animæ, & antiquus hostis, quę a lectione, siue ab oratione vacantem inuenerit, facile ad vitia rapit. Per vsum namquę lectionis discetis, qualiter & vos viuatis, & alios doceatis; per manuum operationem, & corporis macerationem, & virijs alimenta negabitis, & vestris necessitatibus subuenietis, & habebitis, vnde necessitatem patientibus aliquid porrigatis.

¶ *Vestimenta vero, & calceamenta, quando fuerint indigentibus necessaria, dare non differant, sub quorum custodia sunt, quę poscuntur.*

¶ Hoc est, quod superius dictum est, vt sine murmure seruiant fratribus suis; ne quando differunt
necessaria

necessaria dare; faciant fratres murmurare, & fiant occasio peccati. Studeat ergo seruire fratribus suis propter Deum, necessaria congruis temporibus ministrare; & hoc faciant sine murmure, sine tristitia, sine dilatione, cum gaudio, & hilaritate; quia hilarem datorem diligit Deus, ut omne quod opus est eis, secundum modum congregationis, & possibilitatem loci habeant, & eis, qui seruiunt, sit maior exinde merces a Domino. In indumentis vero, & calceamentis clericorum congruus seruandus est modus, ne preciosa, vel nitida sint supra modum, aut nimis abiecta, & vilia, nec habentia compositionem plusquam decet, nec incompositionem ultra quam oportet. Talia ergo sint, ut religionem simul cominentent, & honestatem. Caueat ergo fratres, quibus necessaria ministrantur, ne quid expetant importune, aut quod non deceat eorum religionem: nam quicquid superfluum habent mortiferum est illis. Perpendant ergo; quoniam ea, quae expendunt mortifera, oblationes sunt fidelium pro redemptione peccatorum. Et ideo non gloriantur talibus uti, sed magis timeant, quod in ueteri testamento de sacerdotibus dictum est, iniquitatem populi eos debere portare. Et ideo cum magno timore solliciti sint super eos, quorum donis participant, quia magnum est periculum. Salubrius est autem pauperes Christi sicut iam praedictum est, semper minus egere, quam plus habere: Nam unde pauperes erimus, nisi penuriam propter Deum æquanimiter portemus? Quantum ergo me minimus nos illicita commisisse, tantum oportet a licitis abstinere. Per angustam enim portam intrare debemus, ut ad latitudinem cœlestium gaudiorum pertingere ualeamus; Nam quanto arctiorem

uitam hic agimus, tanto maiorem gloriam possidebimus in cœlo.

¶ *Lites autem nullas habeatis, aut quàm celerrimè finiatis, ne ira crescat in odium &c. (usquè) qui odit fratrem suum, homicida est.*

¶ Sic paulatim saepe crescunt uitia, cum ab otioso uerbo linguam restringere nolumus, ad noxia dilabimur; inde aliquando ad murmura, & detractiones decidimus, plerumquè etiam usquè ad lites, & contentiones, inde ad iram, & odium, & iuxta Salomonis uocem: dum negligimus corrigere minima, prolabimur ad maiora. Dum ergo uitium ex uitio oritur, iniquitas prolongatur. Hinc Propheta ait. Veh qui trahitis iniquitatem in funiculis uanitatis. Et Psal. Prolongauerunt iniquitatem suam, Dominus iustus concidet ceruices peccatorum. Primum est ergo omnino cauèdum peccatū; Melius est enim præcauere, quàm emendare, quòd si per fragilitatem peccare contigerit, facile culpa corrigitur, quæ cito cognoscitur. Hinc est, quod Dominus de muliere ad serpentem dicit. Ipsa conteret caput tuum. Caput serpentis conteritur, quando peccatum ibi corrigitur, ubi nascitur. Debet ergo quisq; esse sollicitus, ut mox ibi se studeat emendare, ubi se nouerit deliquisse. Quantum interest inter festucam, & trabem, tantum interest inter irā, & odium; odium enim est inueterata ira, quæ quasi ex uetustate tantum accepit, ut merito uetus appellaretur, fieri enim potest, ut si irasceris homini, uelis etiam corrigi, si autem oderis, non potes eum uelle corrigere, per iram mentis oculus turbatur, per odium etiam extinguitur. Vnde Apostolus. Qui odit fratrem suum, in tenebris est. Nulli irascenti uidetur ira sua iniusta; unde de omni indignatione
cito

cito redeundum est ad mansuetudinis lenitatem ;
nam pertinax motus facile in eius odium transit,
cui non celeriter ignoscitur. Vnde subditur.

¶ DE VENIA POSTVLANDA,
& offensa remittenda. Gap. X.

Quicumq; conuitio, vel maledictio, vel etiam cri-
minis obiectu aliquem laeserit, meminerit satis-
factione quam citius curare, quod fecit, & ille, qui
laesus est sine disceptatione dimittere.

¶ Grauitur offendit, qui conuitio, vel maledictio
aliquem laedit. Apostolus ait. Maledici regnum
Dei non possidebunt, & Dominus in Euangelio.
Qui dixerit fratri suo fatue, reus erit gehēnæ ignis.
Debet ergo sicut grauitur deliquit, grauitur pœni-
tere, atq; ab eo, quem læsit, toto corde, tota humi-
litate veniam postulare; & ille, qui laesus est sine di-
sceptatione dimittere. Isidorus. Qui fratrem suū
tardius reconciliat, Deum sibi tardius placat. Fru-
stra enim sibi Deum reconciliari, atq; propitiari
quærit, qui cito placare in proximum negligit. Sed
sunt quidam, qui de suis meritis confidentes pigre
in se delinquentibus veniam præstant, sed nihil pro-
ficit esse illæsum, qui non est paratus ad veniā: dum
potius hæc magna sit culpa, quando tardius laxan-
tur fraterna delicta. Veritate testante didicimus,
quia seruus, qui decem millia talenta debebat, cum
pœnitentiam ageret, absolutionem debiti à Domi-
no accepit. Sed quia conseruo suo centum dena-
rios sibi debenti debitum non dimisit, & hinc est
missus exigi, quod ei fuerat iam dimissum, ex qui-
bus verbis constat, quia si hoc quod in nobis delin-
quitur, ex corde non dimittimus, & illud rursum

exigitur, quod nobis iam per pœnitentiam dimissum fuisse gaudebamus.

¶ *Si autem inuicem se laſerint, inuicem sibi debita relaxare debebunt, &c. (uſq;,) tanto ſanctiores habere debetis.*

¶ Quotidie dicimus Deo: dimitte nobis debita noſtra, ſicut, & nos dimittimus debitoribus noſtris, quod ſi debitoribus noſtris, id eſt eis, qui in nos peccant, non dimittimus, cum dicimus Deo, dimitte nobis debita noſtra, ſicut & nos dimittimus, ipſi inducimus maledictionem potius, quàm benedictionem. Sicq; fit, vt oratio, quæ debebat nobis eſſe ſalubris, fit noxia, & peccata noſtra, quæ debuiſmus minuere, orando augeamus. De quotidianis autem leuibus, breuibuſq; peccatis, ſine quibus hæc vita non ducitur, quotidiana oratio fidelium ſatisfaciet, eorum eſt enim dicere. Pater noſter, qui eſ in cœlis, qui iam tali patri regenerati ſunt ex aqua, & ſpiritu ſancto, debet omnino hæc oratio minima, quotidiana quæ peccata delet & illa, quibus & vita fidelium etiam ſcelerata geſta, ſed pœnitendo in melius mutata diſcedunt. Sed quemadmodum veraciter dicitur, dimitte nobis debita noſtra; quoniam non deſunt, quæ dimittantur, ita veraciter dicatur, ſicut & nos dimittimus debitoribus noſtris. Item fiat, quod dicitur, quia & ipſa eleemoſyna eſt veniam petenti homini ignoſcere. Multa quidem genera ſunt eleemoſynarum, quæ cum facimus, adiuuamur, vt dimittantur nobis peccata noſtra. Sed ea nihil eſt maius, quæ ex corde dimittimus, quod in nos quiſq; peccauit. Minus magnū eſt erga eum beneuolum eſſe, ſiue etiam beneficium, qui tibi nihil mali fecerit, illud multo grandius, & magnificentiffimæ bonitatis eſt, vt tuum quoq; inimicum

micum diligas, & ei qui tibi malum vult, semper bonum uelis, facias quoq; , quòd possis audire dicentem Iesum. Diligite inimicos uestros, benefacite his, qui oderunt vos, & orate pro eis, qui vos persequuntur. Sed quorum perfectorum sunt ista? filiorum Dei, qui se debet omnis fidelis extendere, & humanum animum ad hunc effectũ orando Deum, & secum agendo, lucrandoq; perducere. Tamen quia hoc magnum tantæ multitudinis non est, quanta nos credimus exaudiri, cum in oratione dicitur, dimitte nobis debita nostra, sicut & nos dimittimus debitoribus nostris, proculdubio sponsonis huius verba implentur, si homo, qui nondum ita proficit, vt etiam diligat inimicum, tamen quando rogatur ab homine, qui peccauit in eum, vt ei dimittat, dimittit ex corde, quia etiam si roganti dimittat, utiq; vult dimitti, cum orat, & dicit, dimitte nobis, sicut & nos dimittimus debitoribus nr̃is, idest sic dimitte nobis rogantibus; Iam qui eum, in quẽ peccauit, hominem rogat, si peccato suo mouetur, vt roget, si est à Deo deputandus inimicus, vt eum sic diligere sit difficile, vt difficile erat, cum inimicitias exercebat. Quisquis autem roganti, & peccata sua pœnitenti ex corde non dimittit, nullo modo existimet à Domino peccata sua dimitti; quoniã mentiri veritas non potest, quæ ait. Si dimiseritis hominibus peccata eorum, dimittet vobis & pater vester cœlestis delicta vestra.

¶ *Melior est autem, qui quamuis ira saepe tentetur, tamen impetrare festinat, vt sibi dimittat, cui se fecisse agnoscit iniuriam &c. (vsq;) tardius inclinatur.*

¶ Nonnullos ira citius accendit, & facilius deserit, nonnullos vero tarde commouet, sed durius tenet. Alius autem (quod nequius est) & citius iracundiæ

cundiæ flammæ accipit, & tardius deponit. Nonnulli uero has, & tardius suscipiunt, & citius amittunt, in quibus nimirum liquido lector agnoscit, quia ad tranquillitatis bonum ultimus plus, quàm primus accedit, & in malo secundū tertius superat. Quanta sit ergo iracundiæ culpa pensemus, per quā dū mansuetudo amittitur, similitudo supernæ imaginis uitatur. Per iram iustitia relinquatur, sicut scriptum est. Ira uiri iustitiam non operatur. Per iram gratia uitæ socialis amittitur, sicut scriptū est, Noli esse assiduus cum homine iracundo, ne fortè discas semitas eius, & sumas scādalum animæ, nam qui se humana ratione non temperat, necesse est, ut bestialiter solus uiuat. Aliquando autem ira manus non exerit, sed in maledictionis iacula linguam uertit. Nonnunquā uero dum accensus animus à consueta locutione restringitur, per accessum temporis à proximi dilectione separatur, & acriores stimuli ad mentem ueniunt, causæq; quæ grauius exasperent, oriuntur, atq; in irati oculo festuca in trabem uertitur, ira dum in odium permutatur. Veremur à proximis despici, dedignamur iniurias tibi tolerare, si contingat iurgium fortasse cum proximo, erubescimus priores satisfacere. Cor quidem carnale, dum huius uitæ gloriam quærit, humilitatem respuit, & plerumq; ipse homo, qui irascitur discordanti sibi reconciliari appetit, sed ire ad satisfaciendum priori erubescit. Pensemus ergo facta capitis nostri, ut uideamus, quo iaceant nostræ prauitatis errores. Ecce inter nos, & Deum peccando discordiam fecimus, & tamen ad nos Deus suos legatos prior misit, ut nos ipsi, qui peccauimus, ad pacem Dei reuocemur. Erubescat ergo humana superbia, & confundatur quisq; si non

satisfa-

satisfaciat proximo, quoniā post culpam nostram, ut ei reconciliari debeamus, & ipse, qui offensus est, legatis interuenientibus obsecrat Deus.

¶ Qui autem non vult petere veniam, aut non ex animo petit; sine causa est in monasterio; etiam si inde non proijciatur.

¶ Cum Dominus tantum curæ reconciliationis nostræ habeat, ut patiatur munera sua derelinqui ante altare, & imperfecta manere, atq; interrumpi ministeria sua, donec eas, & resolvas iracundiam; & disiungas inimicitias cum fratre tuo, nec nos ipsum erubescimus, sed dies multos patimur manere inimicitias, & trahimus sicut funem longam discordiam. Non iracundos tantum, & malitiæ memores punit Deus, sed & eos, qui irascentes aut offendunt patres, negligunt, atq; contemnunt, quoniam quod hi, qui passi sunt, & uidentur pati iniurias, necessario dolent, & irascuntur; qui uero fecerunt, nec doloris aliquid, nec iracundiæ gerunt, ob hoc ergo hunc, qui ab iracundia liber est, adducit ad illum, qui in dolore est, & liber non est, ostendens, quia criminis huius noxa penes hunc magis est, quoniam causam peccati dedit, sed nec sic quidem emendatur. Persistimus enim pro rebus nullis contristare fratres nostros, & quasi nil mali fecerimus, de satisfactione negligimus, & obliuioni tradimus culpam, atq; in longum tempus protrahi patimur ignorantes, quod tanto largior nobis erit poena, quāto largior discordia, ubi enim amicitia permanet, nihil facile recipitur, nihil facile creditur, quod dissidium possit operari. Si uero semel inimiciæ occupauerint omnia, quæ fiunt, quæ dicuntur, quæ audiuntur; ita accipiuntur, ita negliguntur, ut ad maiores, & longiores proficiant inimicitias,

Si quid autem mali, hoc solum creditur, & confirmatur. Iubet ergo Dominus relinqui donum ante altare, & prius reconciliari fratri, ut ex hoc discamus, quia si nec illo in tempore, quo ad ministerium Dei iubemur accedere, reconciliationem diffimulari, ac differri patitur Deus, quanto magis curari hæc in alijs temporibus. Si fortè accidat irasci, mandatur, ut sub die aut iracundiam nostram, uel inimicitias nostras finiamus. In hoc constringimur præcepto, quo ait. Sol non ocidat super iracundiam uestram. Nos e contra, nec hoc contenti sumus, ut iracundiam ultra solis terminum producamus; sed & insidias inuicem instruimus, siue rebus, siue uerbis supplantare cupientes proximos, mordentes inuicem, & comedentes, quod utiq; aperta insania est. Quid enim aliud faciunt insani, & dæmone repleti, nisi membra sua moribus dilaniant. Frustra est ergo in monasterio, qui discordat cum fratre suo; quia nec Deum placat sacrificijs, nec proficere ualet operibus bonis.

¶ *Proinde uobis à verbis durioribus parcite.*

¶ Salomon. Responsio mollis frangit iram, sermo durus excitat furorem. Itemq; Dulce uerbum inimicos mitigat, & amicos multiplicat. Et Paulus. Vos, qui spirituales estis, instruite huiusmodi in spiritu lenitatis. Caueant ergo viri sancti à verbis duris.

¶ *Quasi emissæ fuerint ex ore uestro (usq; 3) facta sint vulnera.*

¶ Primum quidem summopere caueamus, ne duris uerbis aliquem conturbemus, quòd si aliquando peccamus ex fragilitate, oportet continuò ad satisfactionem venire, & contra sermonem durum proferre dulcem, atq; placabilem, ut vulnus commotio-

motionis sanat medicina humilis confessionis. Sed sicut prædiximus, melius est ante cauere vitium, quàm postea emendare commissum. Ideo seruus Dei debet semper ponere custodiam ori suo, vt non delinquat in lingua sua, & tunc maxime quâdo aduersus eum consistit peccator, videlicet aliquis calumniosus, ac iniuriosus; sicut scriptum est. Sunt multi superbi, & inuidi, qui non cessant irritare famulos Dei. Ergo si est tibi intellectus, responde proximo tuo; Sin aut sit manus tua super os tuum, ne capiaris verbo indisziplinato, & confundaris.

¶ Quando autem necessitas disciplina cogit vos in moribus coercendis, dicere vos dura verba compellit. &c. (vsquè) regendi frangatur auctoritas.

¶ Plerumquè hoc magnis doctoribus contingit, vt dum coacta correctione feruent, modum correctionis exaggerent, & lingua aliquid, quod non debet, dicat: quia mentem dilectio, quantum debet, non inflamat. Vnde bene per Moysen dominus præcepit dicens. Si quis abierit cum amico suo simpliciter in siluam ad cædenda ligna. Et in succisione lignorum securis fugerit manum, ferruq; lapsum de manubrio amicum eius percusserit, & occiderit, hic ad vnâ supradictarum vrbium fugiet, & viuet; ne forte proximus eius, cuius est effusus sanguis, doloris stimulo persequatur, & apprehendat eum, & percutiat animam eius. Ad siluam quippè cum amico imus; quotiens cum quolibet proximo ad intuenda delicta nostra conuertimur, & simpliciter; cum delinquentium vitia pia intentione refecamus, sed securis manum fugit, cū sese increpatio, plusquàm necesse est, in asperitatem protrahit, ferrumquè de manubrio profilit, cum de correctione sermo durior excedit, & ami-

cum

cum percutiens occidit; quia auditorem suum prolata contumelia a spiritu dilectionis interficit. Cor recti nanquē mens ad odium proruit, si hunc immoderata increpatio plusquā debuit, addicit. Si is, qui incautē lignum percutit, & proximum extinguit, ad tres necesse est vrbes fugiat, ut in vna earum defensus uiuat. Quia si ad pœnitentiæ lamenta conuersus in unitate sacramenti sub spe, fide, & charitate absconditur, reus perpetrati homicidij non tenetur, eumquē extincti proximus, cum inuenerit, non occidit; quia & cum iustus iudex, qui sese pro nobis per naturæ suæ consortium coniunxit; ab eo proculdubio uindictam de culpæ reatu non expetit, quem sub eius uenia, fides, spes, & charitas abscondit. Ideo subiungitur.

¶ *Sed tamē petenda est uenia ab omniū domino, qui nouit eos, quos plus iusto fortē corripitis, quanta beneuolentia diligatis.*

¶ Aliquando exceditur modus zelo malitiæ, aliquando zelo iustitiæ, plerumquē ex studio perdelibetatam locutionem, plerumquē per excessum locutionis: Dominus uero non tam attendit sermonem, quā intentionem. Citius uero culpa dimittitur, quā nequaquā malitiæ studio perpetratur.

¶ *Non autem carnalis, sed spiritualis inter vos debet esse dilectio.*

¶ Sunt nonnulli, qui diligunt proximos, sed per affectum cognationis, & carnis, quibus tamen in hac dilectione sacra eloquia non contradicunt; Sed aliud est, quod sponte impenditur naturæ, aliud, quod ex præceptis dominicis ex charitate debetur obedientiæ. Hi nimirum & proximum diligunt, & tamen illa sublimia dilectionis præmia non assequuntur; quia amorem suum non spiritualiter, sed carnali-

carnaliter impendunt. Omnipotentis Dei esse discipulos sola custodia charitatis probat. Vnde ipse ait In hoc cognoscent omnes quia mei estis discipuli, si dilectionem habueritis ad inuicem Quæ dilectio, si cor nostrum ueraciter replet, duobus modis ostendi solet; si amicos in Deo, & inimicos diligimus propter Deum. Sæpe in dilectionis imagine erga inimicum animus fallitur, sequè illum diligere falso arbitratur, Sed tunc inimici dilectio ueraciter custoditur, cum nec de profectu addicimur, nec de ruina lætamur. A duobus quidem præceptis incipit charitas, sed sese ad innumera extendit; huius namquè initium dilectio est Dei, & proximi; sed Dei dilectio per tria distinguitur, quia ex toto corde, & ex tota anima, & ex tota fortitudine conditor diligere iubetur. ¶ Quia in re notandum est, quòd diuinus sermo, cum Deum diligere præcipit, non solum narrat, sed etiam informat ex quanto, cum subiungit. Ex tota fortitudine, ut uidelicet qui perfectè Deo placere desiderat, sibi de se nihil relinquat. Proximi autem dilectio a duobus præceptis deriuatur. Vnde dicitur. Quod tibi non uis fieri, uide, ne tu alteri facias; & per semetipsam ueritas dicit. Quæ vultis, ut faciant vobis homines, & uos facite illis. Quibus duobus, scilicet utriusquè testamenti mandatis, per unum malitia compescitur, per aliud benignitas prærogatur, ut quod non uult malum pati quisquè, non faciens cesset a nocendi opere, & rursus bonum, quod sibi appetit, impendens ad utilitatem proximi exerceat ex benignitate. Sed hæc nimirum duo dum sollicita intentione cogitantur, cor ad innumera uirtutum ministeria tenditur, ne uel inferenda, quæ nõ debet in desiderijs inquieta mens ferueat, uel erga
exigenda,

exigenda, quæ non debet, otio resoluta torpescat : Nam cum cauet alteri facere, quod nequaquã uult ab altero tollere, solita se intentione circumspicit, ne superbia usquẽ ad despectũ proximi animũ deiiciens exaltet, ne ambito cogitationum laniet, cumq; hanc ad appetẽda aliena dilatat, angustet, ne luxuria polluat, & subiectum desiderijs per illicita corrumpat, ne ira exasperet, & vsque ad proferendam contumeliam inflammet, ne inuidia mordeat, & alienis fœlicitatibus emula sua se face consumat, ne immoderatẽ linguam loquacitatis protrahat, eamq; ad lasciuiam obtreccionis extendat; ne odium malitia excitet, & os vsq; ad iaculum maledictionis irriter. Rursumq; cum cogitat, ut ea alteri faciat, quæ sibi ab altero fieri expectat, nimirum ut malis bona, ut bonis meliora respondeat, ut erga procaces mansuetudinem longanimitatis exhibeat, ut malitiæ peste languentibus gratiam benignitatis impendat, ut discordes pace muniat, ut concordēs ad concupiscentiam ueræ pacis accendat, ut indigentibus necessaria tribuat, ut errantibus uiam rectitudinis ostendat, ut afflictos uerbo, & compassione mulceat, ut accensos in huiusmodi desiderijs increpatione restringat, ut minas potentium ratiocinatione mitiget, ut oppressorum angustias, quanta præualet ope, leuet, & foris obsistentibus opponat patientiam, ut intus superbientibus exhibeat cum patientia disciplinam, ut erga subditos sic mansuetudo zelum temperet, quatenus à iustitiæ studio non declinet, sed ad ultionem zelus ferueat, ne tamen pietas limitem feruendo transcendat, ut ingratos quosq; ministerijs in amorem seruet, ut proximorum mala, cum corrigere non ualeat, taceat, ut quæcunq; corrigi possunt, consensum esse,

esse, silentio pertimescat, ut sic ea, quæ tacet, tolleretur, nec tamen in animo virus doloris occulter, ut sic maleuolis munus benignitatis exhibeat, nec tamen per gratiam a iure rectitudinis excedat, ut contra proximos, quæ præualet, impendat, sed impendendo non timeat, ut sic in bonis, quæ exhibet, timoris præcipitium caueat, nec tamen & boni exercitio torpescat, ut sic quæ possidet, tribuat, ut quanta sit largitas remunerantis attendat, ne cum terrena largitur suam, plus quam necesse est, inopiam cogitet, & in oblatione muneris claritatis lumen tristitia obscuret. Bene ergo lex Dei multiplex dicitur, quia nimirum una eademque charitas, si mentem plene cœperit, ad innumera opera multiformiter accendit. Multiplex ergo ista lex est Dei, quæ singulis hic rerum articulis non permixta congruit, & causis se variantibus non variata coniungit, cuius nimirum legis multipliciter bene Paulus ostendit dicens; Charitas patiens est, benigna est &c.

DE OBEDIENTIA.

Cap. XI.

P Reposito tanquam patri obediatur, multo magis presbytero, qui vestrum omnium curam gerit.

Obedientia sola virtus est, quæ ceteras virtutes inserit menti, insertasque custodit. Samûel. Melior est obedientia, quam victima; quia per victimas aliena caro, per obedientiam vero voluntas propria religatur. Salomon. Vir obediens loquitur victorias, quia dum voci alienæ humiliter subdimur, nos in corde superamus. Nobis quippe obedientia usque ad mortem seruanda præcipitur: per obedi-

E tiam

tiam malum numquam fieri, aliquando autem etiā debet per obedientiam bonum, quod agitur, intermitteri. Sed quia nonnunquā nec iubentur aduersa, sciendum summopere est, quōd obedientia aliquando si de suo habeat aliquid, nulla est, aliquando autem si de suo non habeat aliquid, minima est. Nam cum huius mundi successus præcipitur, cum locus superior imperatur: is, qui ad percipienda hæc ex proprio desiderio anhelat, obedientiæ sibi virtutem euacuat. Rursum cum mundi despectus præcipitur, cum probra, & contumeliæ adipisci iubentur, nisi hæc ex semetipso animus appetat, obedientiæ sibi meritum minuit; quia ad ea, quæ in hac vita despecta sunt, inuitus, nolensq; descendit. Debet ergo & obedientia in aduersis aliquid ex suo habere, & rursum in prosperis ex suo aliquid omnino non habere, quatenus & in aduersis tanto sit gloriosior, quanto diuino ordini etiam ex aduerso iunguntur, & in prosperis tanto sit vilior, quanto a præsentī ipsa, quam diuinitus percipit, gloria funditus ex mente separatur. In nocuis autem meritis ornamentum semper obedientiæ iungitur, Domino attestante, qui ait. Oves meæ vocem meā audiunt, & ego agnosco eas, & sequuntur me. Profecto redemptori obedit, qui innocens est, & innocens esse non potest, qui obedire contemnit.

¶ *Vt ergo cuncta ista seruentur, præcipimus (vsque) quod modum, vel vires eius excedit.*

¶ Ad hoc quidem data sunt ista regularia præcepta, vt cuncta seruentur. Et si quid minus seruatum fuerit, oportet vt cito emendetur, non enim possumus aliquid præterire negligenter sine periculo animæ nostræ; Etenim vouimus specialiter tenere, & secundum ea viuere iurauimus. vt Psalm. ait.

Tu

Tu mandasti, mandata tua custodiri nimis. Et Apostolus. Si quis autem totam legem seruauerit, offendat autem in vno, factus est omnium reus. Pertinebit ergo ad præpositum, & ad eum, qui custos est ordinis, vt ad presbyterum, cui maior est auctoritas, id est ad abbatem referat, quicquid per se secundum canonicam regulam non potest diffinire, quòd si in congregatione, vbi est ordo canonicus, non est abbas, sed Episcopus, ipse Episcopus presbyteri nomine designatur. Ad hoc enim prælati constituti sunt in ecclesia, vt bene ordinata custodiant, errata corrigant, vitam, & mores subditorum verbo, & exemplo custodiant, Apostoli formam sectantes, qui ait. Argue, obsecra, increpa. Immiscentes temporibus tempora, terroribus blandimenta, indisciplinatos, & inquietos debent durius arguere, obedientes mites, & patientes, vt in melius proficiant, obsecrare; negligentes, contemnentes, & superbos aut increpent, aut puniant. Nequè dissimulent peccata delinquentiũ, sed mox, vt cœperint oriri, radicitus, vt præualent, amputent, memores periculi Heli sacerdotis de filiis suis. Honestiores, atquè intelligibiliiores prima, & secunda admonitione corripiant: improbos, & dueros corde, superbos, & inobedientes verberare, & castigatione coerceant, reducentes illud in memoriam. Stultus verbo non corrigitur, percutite filiũ tuum virga, & liberabis animam eius a morte.

¶ Ipse vero, qui vobis præest, non se existimet potestate dominante, sed charitate seruiente fœlicem.

¶ Nam qui ita præsumunt, vt gaudeant de potestate Domini, non sunt veri pastores, sed mercenarii. Hi magis præesse appetunt, quàm prodesse, non querunt animarum fructum, sed temporale lu-

crum, non cœlestem gloriam, sed terrenum honorem, de talibus ait Dominus in Euangelio. Amen dico vobis, receperunt mercedem suam. Qui vero ita præsunt, vt gaudeant de seruitute charitatis, ipsi tenent exemplum veri pastoris, qui non venit ministrari, sed ministrare, & animam suam dare redemptionem pro multis. Illi vere prælati sunt, & secundum Deum curam regiminis agunt, qui ad hoc tantum laborant, vt plures ad Deum secum trahant, quos delectat onus, non honor, charitas, nō potestas, seruitus impensa alijs, nō suscepta ab alijs. Iuxta quod Apostolus ait. Cum essem liber in omnibus omnium me seruum feci, vt omnes lucrificerem: Qui tamen propter auctoritatem regiminis honorandus est a subditis. Vnde & subditur.

¶ *Honore coram vobis prælatus sit vobis.*

¶ Ideo scilicet honorari debet, quia christi vicē in monasterio tenet. Vnde & ipse Dominus pastoribus ait. Qui vos audit, me audit, & qui vos spernit, me spernit. Debent ergo serui Dei suum honorare magistrum, cuius pro amore Dei supra se susceperunt magisterium; qui tamen quanto plus honoratur exterius, tanto oportet, vt amplius timeat, atque semetipsum despiciens eos, a quibus honor impenditur, sibi in cogitatione præponat. Vnde subiunctum est.

¶ *Timore coram Deo sit substratus pedibus vestris.*

¶ Hinc scriptum est. Quanto maior es humiliare in omnibus, Et iterum. Fili te ducem constituerunt, noli extolli, sed esto in eis, quasi vnus ex illis. Et Dominus in Euangelio. Omnis, qui se exaltat, humiliabitur, & qui se humiliat, exaltabitur. Tanto quippe est maior quisquē apud Deum, quanto humilior fuerit apud semetipsum. Sed qualis debeat

beat esse in moribus, audiamus.

¶ *Circa omnes seipsum bonorum operum prabeat exemplum.*

¶ Sicut enim præcellit honore, & dignitate, & ordine; ita eos præcedere debet sanctitate, ut eius exemplo discant subditi, qualiter vivere debeant.

¶ *Corripiat inquietos, consoletur pusillanimes, suscipiat infirmos, patiens sit ad omnes.*

¶ Qui locum tenet regiminis, mala inferre non debet, sed tolerare, ut ex sua mansuetudine iracundos valeat mitigare. Quia medicus animarum contra passiones vitiorum debet opponere medicamenta virtutum; ita scilicet ut prius mores omnium diligenter inquirat, ut quid cuique inferre debeat, non ignoret.

¶ *Disciplinam libens habeat, metuendus imponat, & quamvis utrumque sit necessarium; tamen plus a vobis amari appetat, quam timeri, semper cogitans Deo pro vobis redditurum esse rationem.*

¶ Oportet, ut doctor ecclesiasticus sapiens sit, & disciplinatus; quia tunc alijs recte disciplinam imponit, cum ipse disciplinate viuit, cum ex seipso trahit magisterium, quod exercet in alio. Verba sunt Apostoli dicentis ad Hebræos. In disciplina perseverate, tanquam filijs offert se nobis Deus. Et quis filius; quem non corripit pater &c. ? Sunt autem hic duo necessaria, ut rector suis exhibeat subditis timorem scilicet & amorem. Timorem his, qui superbi, ac rebelles, & duræ mentis sunt. Amorem vero eis, qui libenter humiliter, & deuotè seruiunt Domino Deo.

¶ *Et quamvis utrumque sit necessarium, tamen plus a vobis amari appetat, quam timeri.*

¶ Quia prælatus quanto plus diligitur, tanto
E 3 plus

plus auditur. Et magis placet Deo illa seruitus, quæ ex voluntate, & amore fit, quàm illa, quæ fit ex timore. Propterea dulcis magister discipulis suis ait. Iam non dicam vos seruos, sed amicos. Non enim vult Dominus, vt eum tanquàm dominum timeamus, sed vult, vt eum diligamus, tanquàm patrem filij, & vt præcepta eius faciamus, non timore pœnæ, sed amore iustitiæ. Hoc semper autem cogitare debet, qui iudex est animarum, quia super se iudicem habet Deum, vt regiminis curam tanto sollicitius agat, quanto se redditurum rationem pro sibi commissis apud districtum iudicem pensat. Valde enim sollicitus debet esse quisquæ in bono opere, vt in cunctis, quæ agit, semper cogitet de extremo fine. Vnde scriptum est. In omnibus operibus tuis memorare nouissima tua, & in æternum non peccabis.

¶ *Vnde vos magis obediendo non solum vestri, sed etiam ipsius miseremini, qui inter vos quanto in loco superiori, tanto in maiori periculo versatur.*

¶ In periculo magno versatur, quisquis in regiminis loco sublimatur; nam quanto superior gradus, tanto periculosior casus, & cui plus donatur, plus exigitur. Grande periculum est sibi, & alijs viuere, temporalia simul, & spiritualia prouidere. Sic debet sui curam agere, vt alios non negligat, sic de alijs cogitare, vt semetipsum obliuiscendo non delinquat; sic temporalia procurare, vt non refrigescat a spiritualibus, sic inardescere ad spiritualia, vt sit sollicitus de temporalibus. Inde ergo magis subditi prælato obedire debent, vnde magis eum pro ipsis vident laborare, quod cū faciunt non sui, sed etiam ipsius magis obediendo miserruntur; sui videlicet, quia animas suas saluant. Scriptum

ptum est enim. Miserere animæ tuæ placens Deo, ipsius quoquē, qui præest, misferentur; quia onus eius alleviant obediendo. Cum enim scriptum sit. Filius sapiens lætificat patrem, tanto plus gaudent, & liberior laborant patres spirituales pro filiis, quanto eos vident spiritualibus obtemperare disciplinis.

¶ *Donet Dominus, vt obseruetis hac omnia (vsq̃) sicut liberi sub gratia constituti.*

¶ Aptè subditur post lectionem orare. Sic enim legere, & prædicare, quomodo agrum seminare. Sic orare, quomodo semen operire: Sicut qui seminant in agro, si hoc operire dissimulauerint; veniunt volucres, & totum, quod seminatum esse videbatur, diripiunt; ita quidem isti, qui agro sui cordis scientia verbi Dei psallendo, legendo, prædicando asperferint, nisi postea orando in corde recluserint, & quodammodo sepelierint, veniunt volucres idest cogitationes huius sæculi volatiles, inanes, & vacuæ, & rapiunt, quod in corde fuerit seminatum. Ideo post lectionem, & prædicationem semper orandum est, vt virtus verbi Dei maneat in corde, & fructus spiritualis crescat in operatione. Bene autem ait.

¶ *Tanquam spiritualis pulchritudinis amatores.*

¶ Non enim possunt implere hæc omnia regularia præcepta nisi per amorem iustitiæ, quæ est spiritualis pulchritudo animæ. August. Non enim bene agit quisque in vitijs, etiam si bonum est, quod agit. Quod vero subdit.

¶ *Et bono christi odore de bona conuersatione fragantes.*

¶ Pertinet ad bonam vitam, & bonam famam. Vnde Apostolus: Christi bonus odor sumus Deo in

omni loco. Serui sunt sub lege, qui ex timore Domini seruiunt, liberi sub gratia, qui ex amore implent diuina mandata. Gratia Dei diffusa est in cordibus nostris per spiritum sanctum, qui datus est nobis, implet legem. Iusto non est lex posita, ubi enim spiritus Domini, ibi libertas. Sic autem viam mandatorum Dei curremus libere, si dilatatum cor nostrum in charitate Dei habeamus.

DE VI GI MEDITATIONE

regula. Cap. XII.

VT autem vos in hoc libello tanquam in speculo possitis inspicere: ne per obliuionem aliquid negligatis, semel in septimana vobis legatur.

Ideo legi precipitur, quatenus memoriter lectum teneatur. Beatus enim Iacobus dixit. Qui perspexerit in lege perfecte libertatis, & manserit in ea, non auditor obliuiosus factus, sed factor operis, hic beatus in facto suo erit. Et bene hunc libellum dicit speculum, quia in eo tanquam in speculo inspicere possumus, quales sumus, siue pulchri, siue foedi, siue iusti, siue iniusti; utrum quisque nostrum regulariter uiuat, utrum proficiat, an deficiat, utrum Deo placeat, an displiceat. Scriptura quippe nobis sacra nostram interiorem repræsentat imaginem, ostendit quid formosum, quid deforme sit in anima, & qualiter pulchritudo iustitiæ debeat obseruari, qualiter debeat uirtutum decor componi. Quomodo uitiorum macula debeat abstergi. Prauorum usus est mala semper tegere, & quæ egerint, nunquam retractare, quicquid faciunt, cæca mente pertranseunt. At contra sancti uiri in scripturis sacris quotidie non cessant inspicere uitam suam, moresque suos uigilanter pensare,

re, & si quid deforme, uel in compositum, aut inuenerint, mox quod secundum scriptum uident, reformare, & componere se student; quatenus sancti, & immaculati coram Deo tam in corpore inueniantur quàm in anima. Ideo Psal. ait. Tunc non confundar, cum perspexero in omnibus mandatis tuis. Et Apostolus admonet dicens. Renouamini spiritu mentis uestre. Et iterum. Noster homo interior renouatur de die in diem. Vnde aperte subiungitur.

¶ *Et ubi vos inueneritis ea, quæ scripta sunt, facientes, agite gratias Deo bonorum omnium largitori.*

¶ Gratiarum actiones patri luminum semper a nobis debentur, a quo omne datum optimum, & omne donum perfectum, scriptura teste, descendit. Nemo est enim donis Dei beatus, qui donanti existit ingratus, & Apostolus. Quid habes, quod non accepisti; Merito ergo Domino Deo nostro gratias agere admonemur, ut agnoscat homo, si quis benè uiuit, gratia Dei se habere, & ut proficiatur in dilectione iustitiæ non aliunde consecuturum, quàm pium, quem cogitatio pium facit. Ipsa est enim sapientia, quæ pietas uocatur, quæ colitur, pater luminum colitur autem sacrificio laudis, gratiarum actionibus; ut cultor eius non in seipso, sed in domino gloriatur.

¶ *Vbi autem sibi quicumque uestrum uidet aliquid deesse: doleat de præterito, caveat de futuro, orans ut ei debitum dimittatur, & in temptatione non inducatur.*

Finit Expositio Hugonis de S. Victore super Regula beati Augustini, Vna cum Expositione Magistri Humberti Generalis diui ordinis prædicatorum, diligenter emendata.



NOTABILIA IN HVGONIS EXPOSITIONE

Capitulis, & singulis regulæ sententijs inter
expositionem passim annotatis
hac tabulâ indicantur.

A.



*Abstinentia semper laudabilis, &
gaudeat, qui parce viuere po-
test.*

Cap. 4. Nec illos.

B.

*Bona temporalia, quæ habebant in sæcu-
lo, communi sunt exponenda utili-
tati.*

Cap. 1. Qui autē.

*Balnea petentes, siue alio exeuntes negotio,
nec inuito Prapósito, nec soli, sed sociari
exire debent, ne conscientia bona à nobis,
& à cæteris fama polluatur.*

Cap. 9. Nec eant.

C.

Canonici quare ita dicti.
*Cantus seruandus est in Ecclesia secun-
dum*

Cap. 1.

T A B V L A

dum scripta, & instituta maiorū.	<u>Cap. 3.</u>	<u>Et nolite.</u>
Caro domanda ieiunij, & abstinentia esca,		
& potus.	<u>Cap. 3.</u>	{ Carnē & vram.
Castitas libidinosa voluptate mutui conspe-		
ctus enascente fugit è moribus.	<u>Cap. 6.</u>	{ Et cū se & inuicē.
Charitas, & humilitas sectanda, & tunc		
nulla erunt inter nos contentiones, sed om-		
nia erunt communia.	<u>Cap. 8.</u>	{ Caritas & ideo & in oīb ⁹ .
Communia sint omnia, nil proprij quera-		
mus, sed solum Deum proprium habere		
satagamus.	<u>Cap. 1.</u>	{ Et non & dicatis.
Commune sit, quicquid in saculo hebant,		
cum ingrediantur.	<u>Cap. 1.</u>	{ Qui autē & aliqd.
Concordiam sectari debemus, & unitatem		
non loci, sed animi.	<u>Cap. 1.</u>	{ Primū & inquit.
Consuetudo foelix qua sit.	<u>Cap. 5.</u>	<u>Sām vires</u>
Contentiones per habitum oborta refecanda		
sunt; nam contentionibus multis bonis		
spiritualibus inanes, & vacui remane-		
mus.	<u>Cap. 8.</u>	{ Si autē & inter tñ & lacrum.
Cor nostrum Deo per charitatem prafere		
debemus.	<u>Cap. 1.</u>	<u>Quid sit.</u>
Correctio fraterna per necessaria est.	<u>Cap. 7.</u>	<u>Et si hanc.</u>
Crudelis ille non habendus, qui corrigit		
fratrem.	<u>Cap. 7.</u>	<u>Nec vos.</u>
Culpa occultè commissa, occultè corrigen-		
da, si negant, testes adhibendi, ut publi-		
cè arguantur.	<u>Cap. 7.</u>	{ Sed an- & tequam & si autē.
Custodes vestium, calceamentorum, seu li-		
brorum seruiant, & petentibus prabeant,		
non queruli, non murmurantes, sed <u>hila-</u>		
res, & lati.	<u>Cap. 9.</u>	{ Sin autē & vstimen & ta veto.

Dlabolus timet charitatis unitatē. Ca. 1. } Primū
 Dilectio in fratres ea erit, ut dili- } inquit.
 gantur, sed odio illorum vitia habeantur. }
 Cap. 7. } Et hoc
 quod.

Dilectio sit inter vos non carnalis, sed spir-
 ritualis, quæ à duobus ramis emanat,
 Dei, & proximi, illa Dei tribus roboratur,
 corde, anima, & fortitudine; illa
 proximi ad duo reducitur præcepta, e
 quibus duobus bona, & mala eliciuntur
 erga proximum. Cap. 10. } Nō autē
 } carnales

Diuitias distribuere nihil prodest, cum glo-
 riatur anima diuitiarum contemptu, quæ
 misera efficitur. Cap. 2. } Et quid
 } qđ est.

Dolor ex infirmitate quamuis latens, tamē
 credendus, sed magis veris Christi ser-
 uis, qui ab operibus non fallaces: sed ve-
 ri dignoscuntur. Cap. 9. } Deniq;
 } si latens
 } si latens
 } ē dolor.

Egestas laudabilis apud viros religiosos. Cap. 5. } Meli⁹ est.

F.

Fœminas, quando incedimus, videre non
 prohibemur, sed appetere, & ab illis
 appeti velle criminofum est. Cap. 6. } In om-
 } nibus.

Fœminarum concupiscentia non cogitatio-
 ne solum, sed etiam aspectu debaccha-
 tur. Cap. 6. } Non so-
 } lum.

Fœminam aspicere non potest, quod non vi-
 deatur, & si à nemine, à Deo saltem re-
 rum omnium inspectore. Cap. 6. } Nec pu-
 } tare sed
 } & si la-
 } teat.

Fortiores non debent contristari videntes
 infirmos mitius tractari. Cap. 4. } qui infirmi

Fratres

T A B V L A

*Fratres ad inuicem se ament in religione ,
nec dedignentur , quod fuerit unus in
saeculo nobilis, & diues, alter pauper , &
ignobilis.*

Cap. 2.

{ Rursus
etiam.

*Frater qui ferre recusauerit poenam infli-
ctam culpa patrata expellendus.*

Cap. 7.

{ Quæ si
ferre.

*Fratres in moribus educati delicatioribus
mitius tractandi, nec fortiores agre fer-
re debent.*

Cop. 3.

Et si eis .

*Fratres cundo stando, & redeundo sint so-
ciati.*

Cap. 6.

{ Qñ pro
ceditis.

*Forti iudicio ille reus habetur , qui rem sibi
collatam cœlaucrit .*

Cap. 8.

Quia si .

G.

*G*ratiam Dei, caueat , ne amittat , sœ-
minis dum placere cupit .

Cap. 6.

Illi ergo.

Gula magnum est vitium.

Cap. 3.

Qñ autem

Gula ciborū abstinentia edomanda.

Cap. 5.

{ Quæ fa-
mulus.

H.

*H*umilitas commendatur .

Cap. 1.

{ Primū
inquit.

*Habitus noster non notabilis , non
delicatus sit .*

Cap. 6.

Non sit.

*Honor debet exhiberi Pralato , ut vicem
Christi gerenti .*

Cap. 11.

Honore.

I.

*I*nfirmi non sint impatientes, ne ministran-
tem verborum leuitate ad exandescen-
tiam pronosent .

Cap. 9.

{ Egrotā
ciū aut,

Inimi-

T A B V L A

- Inimicitia multa mala pariunt, & multū appetit Deus, ut remittantur. Cap. 10.* } Qui aut non.
- Iniurias ad inuicem illatas, ad inuicem relaxemus; nam, nisi dimittamus, Deum facillimum erit ad iram prouocare: at si dimittamus magnam facimus Eleemosynam, & Christi mandatum obseruamus. Cap. 10.* } Si autem.
- Iracundia multorum parens malorum; & nos improbi erimus ignoscere recusantes. Cap. 10.* } Melior autem.
- Iustitia amor per necessarius ad regulam præcepta obseruanda. Cap. 11.* } Tāquā spūalis.

L.

- L** *Auacrum corporis urgente necessitate, non denegatur, habito prius medici consilio, multis de causis. Cap. 9.* } Lauacrum fiat ergo.
- Lectiōes, quæ leguntur in mensa diligenter audienda, quia cibus sunt anima. Cap. 4.* } Cum acceditis.
- Lectio, Oratio, & operatio tria sunt, quæ maxime uiris religiosis conducunt. Cap. 9.* } Codices.
- Liber iste dicitur speculum, quia in illo sapissime inspicere debemus, ut si quæ macula in anima facie videantur, facillime tergantur. Cap. 12.* } Vt autem.
- Lites, si quæ oborta inter vos, quam celerime terminetis, ut mala peiora videntur. Cap. 9.* } Lites.

M.

- M** *Alum magnum committit ille in religionē, qui occulto aliquid recipit,*
 &

T A B V L A

Et cœlat. Cap. 7. { Quicū-
Motus, & actiones a corpore prodeuntes { que aut
debent corrigi, ne ceterorum aspectum of- { In oib.
fendant. Cap. 6. { motit.
Munus nullum occulto recipiendum, ut mul- { Confe-
ta vitentur mala. Cap. 8. { quēs er
Murmurationes, litesq; de medio tollende, { go.
quia nobis bona auferut spiritualia. Cap. 8. { Si autē
{ inter.

N.

N *Ecessarijs contenti esse debemus super-*
fluarefecantes. Cap. 8. Et si fieri,

O.

O *Bedientia magna uirtus, & quàm mul-*
tis modis intelligatur. Cap. 2. Præposito
Obstinati in sensu, & voluntate inepti ad { Priinū
concordiam. Cap. 1. { inquit.
Odor Christi bonus sunt bona vita, & bona { Et bono.
fama omnium nostrum. Cap. 11. { Psal. &
Oratio non ab ore tantum, sed à corde etiā { Hymn.
procedere debet. Cap. 3. { Donet
Oratio debet succedere lectioni. Cap. 11. { Dñs.
Orationibus inuigilandum est, cum magna { Ofonibus
promittat Deus. Cap. 3. {
Oratorium sit liberum ab omni impedimen-
to, nec ibi aliud exerceatur, quàm sola
oratio. Cap. 3. { In Ora-
{ torio.

P.

P *Super in religione delicias quarens de-* { Nec de
testabilis Deo. Cap. 4. { bent.
Pana

T A B V L A

Pœna mulctandus est frater, qui deprehensus est aliquod clam acceptum occultasse. Cap. 7. Si autem.

Præcepta non audienda tantum, sed etiam obseruanda. Cap. 1. Hæc sunt.

Præcepta in regula sunt ad amissim obseruanda, quia si vnum contennatur, omnium rei facti sumus; hinc Præpositorum inter est sectari, quomodo seruentur, arguendo, obsecrando, & increpando iuxta naturam errantium. Cap. 11. § Vt ergo cuncta.

Pralatum non delectet dignitas, sed onus, charitas, non potestas, nam qui præsumt, & gaudent domini potestate, non pastores, sed Mercenarii habentur. Cap. 1. Ipse vero.

Pralatus magnum sustinet pondus, cum debeat temporalia prouidere, & spiritualibus uno eodemque tempore, ne refrigescant, insistere; ideo magno in discrimine regiminis dignitas est locata. Cap. 11. Vnde vos.

Pralatus sit humilis, & bonorum operum exemplar. Cap. 11. Timo-

Pralatus sit sapiens, & disciplinatus, duo subditis exhibeat timorem, & amorem; sed tamen plus amari, quam timeri appetat. } re circa corripit.

sed tamen plus amari, quam timeri appetat timens, & cogitans iudicem habere supremum. Cap. 11. } Disciplinam,

Pudicitia est magna virtus; ideo seruanda ubique, sed inuocandum diuinum auxilium, vt nos custodiat. } & quã vos.

vt nos custodiat. Cap. 6. } Deus. n. qñ ergo

R.

R *Regula quid significat.* Cap. 1.
Regulam qui se obseruasse conspexerit, gratias

A T I A V B V A L T A

gratias agat Deo bonorum omnium largitori.

Cap. 12. **Erybi** vos

Religiosi omnes, siue diuites, siue pauperes in hoc saculo fuerint, in monasterio digni sunt mercede sua.

Cap. 1. **Sed** tamē.

Religionem quidam ingrediuntur non anima salute, sed ventris ingluuie, quare valde canendum est.

Cap. 1.

§ Tamen
§ nō idēo

S.

SAnitas doloris interni rebus licet infirmo delectabilibus, non tentanda, nisi prius medicus consulatur.

Cap. 9. **Si tñ** utrū.

Superbia in Monasterio non viuat, quia casum habet, sed humilitas.

Cap. 2.

§ Nec eri
§ gare.

Superbia tam carnalis, quā spiritualis ne surrepat in corda nostra.

Cap. 2.

§ Nō ex-

Superbia insidiatur bonis operibus, ut pereant.

Cap. 2.

§ tollanr.

Superfluum quid non petant Fratres, quia mortiferum est illis.

Cap. 2. **Alia** q̄ppe

Cap. 9.

§ vestimē
§ ra vero.

V.

Veniam petat ladens, & laesus sine disceptatione dimittat.

Cap. 10. **Quicunq;**

Veniam qui petere recusat, in monasterio nullus est.

Cap. ibid.

Vestibus non notabilibus, non delicatis, sed virtutum ornamentis induti esse debemus.

Cap. 6.

Non sit

Vestes in unum habenda sub vno custode, vel pluribus.

Cap. 8. **Vestes.**


Vestes


T A B V L A

- Vestes lauanda iuxta Prapostiti arbitrium
ne nimia vestium munditia in hominum
corda vanitatis virus serpat. Cap. 9. Indumēta*
- Victus, & vestitus ad hoc nobis ministran-
tur, ut Deo seruiamus. Cap. 1. { Et dīstri-
buatur.*
- Victus, & vestitus sufficiant nobis ad valetu-
dinem natura carnis voluntatem cohi-
bentibus. Cap. 1. { Sic. n. le-
gitis.*
- Verba duriora non sunt proferenda, quibus
tamen prolatis danda est satisfactio, sed
melius cauere conuitium, quam emenda-
re commissum dignis de causis. Cap. 10. { Proin-
de quæ
si omnis
sa.*
- Verba contumeliosa in coercendis depraua-
tis moribus, si dixerit aliquis, a summo
omnium domino veniam petat, exemplo
illius, qui cum amicis ad excidenda li-
gna in siluam pergit, & securi de manu
lapsa percutit, & occidit. Cap. 10. { Qñ aut
& sed tñ.*
- Vnitas, & honor sit inter vos. Cap. 2. Oēs ergo.*
- Voluntate propria deposita in religione mul-
ta bona oriuntur. Cap. 1. { Primū
& inquit.*
- Voluntas cohibenda, nec appetenda ter-
rena. Cap. 1. { Qui aut
& non.*
- Voluntatem unam, & cor vnum habere de-
bemus, & inuicem honorari. Cap. 2. Oēs ergo.*

LAVS DEO.

C O M I, Apud Hieronymum Frouam.
Superiorum Mandato. 1602.









6339

